

ЕРЕМИЁ ПАЙҒАМБАРНИНГ КИТОБИ

Кириш

Еремиё пайғамбар нотинч даврда яшаган эди. Вужудга келган янги кучли шоҳликлар атрофидаги давлатларни забт этарди. Кичкинагина Яхудо шоҳлиги жанг қилаётган иккита кучли шоҳлик — Бобил ва Миср орасида қолиб кетган эди. Орадан кўп вақт ўтмай, Бобил шоҳлиги Яхудони забт этди. Яхудо халқи озодликни қўлдан бой берип, Бобил шоҳлигининг мустамлакасига айланди. Еремиё пайғамбар бу воқеаларнинг гувоҳи эди. Зафаниё, Хабаққуқ, Дониёр ва Ҳизқиёл пайғамбарлар Еремиёнинг замондошлари эди.

Еремиё йигирма ёшга тўлар-тўлмас, Яхудо халқига Худонинг сўзини етказа бошлади. Унинг фаолияти милоддан олдинги 586 йилгача, яъни Бобил Яхудо юртини забт этгунга қадар давом этди. Сўнг эса Мисрга қочиб кетаётган одамлар Еремиёни мажбуран ўзлари билан олиб кетишиди. Еремиё Мисрда ҳам ўз халқига Худонинг сўзини етказишида давом этди.

Еремиёнинг кўп башоратларида, уларнинг ёзилган санаси кўрсатилган. Аммо бу башоратлар хронологик тарзда эмас, мавзулар бўйича жойлаштирилган.

Кўпинча Еремиё Худонинг сўзини одамларга аниқ ва тўғри етказиб бериш учун ўз башоратларини нафақат оғзаки, балки ҳаракатлар орқали ҳам тасвирлаб беради.

Еремиё пайғамбар ўжар ва гуноҳга ботган Яхудо халқини доимий тарзда огоҳлантириб туради, Худо уларни жазоламоқчи эканини айтади. Пайғамбар халқни Бобилликларга таслим бўлишга чақиради. Шу сабабдан Еремиёнинг душманлари уни хоинга чиқаради. Улар Еремиёни зинданга ташлашади, ҳатто унинг жонига сунқасд уюштироқчи бўлишади. Шунда Еремиё пайғамбар Худога ёлвориб, ичидаги ҳамма дардини тўкиб солади. Китобнинг бу парчалари одамлар орасида “Муножот” деб ном олган. Еремиё ўз халқига ачиниб, кўп қуйинади. Халқнинг итоатсизлиги ва аянчли қисматидан у кўп қайғуради. Шу сабабдан уни “йиғлаётган пайғамбар” деб ҳам аташади.

Еремиё пайғамбар Яхудо халқига: “Сизлар Эгамиз билан тузилган аҳдни буздингиз, ёлғиз Унга хизмат қилмай, бутпарастликка берилиб кетдингиз”, деб уларга кўп танбеҳ беради. Шу қилмишлари учун Яхудо халқи Худонинг қаҳрига учраб, Бобилликларга таслим бўлишини, сўнг эса Бобилга сургун қилинишини башорат қиласди. Аммо бир кунмас-бир кун Худо сийлаган халқини ўз юртига қайтариб олиб келишини ва улар билан янги аҳд тузишини айтади (31:31-34, 32:36-40 га қаранг).

1-БОБ

¹ Ушбу китобда Хилқиё ўғли Еремиёнинг сўzlари баён этилган. Еремиё Бенямин ҳудудидаги Онотўт шаҳрида^{*} яшаган руҳонийлардан бири эди. ² Омон ўғли Йўшиё Яхудода^{*} ҳукмронлик қилган даврнинг ўн учинчи йилида^{*}, Эгамизнинг сўзи илк бор Еремиёга аён бўлган эди. ³ Шундан сўнг Яхудо шоҳи Йўшиё ўғли Ёҳайиқим давридан^{*} тортиб, то Яхудо шоҳи Йўшиё ўғли Зидқиё ҳукмронлигининг ўн биринчи йилигача^{*}, Эгамиз Еремиёга Ўз сўзини бир неча

марта аён қилган эди. Зидқиё хукмронлигининг ўн биринчи йили бешинчи ойида* Қуддус аҳолиси Бобилга сургун қилинди.

Эгамиз Еремиёни танлайди

⁴ Эгамиз менга Ўз сўзини аён қилди:

⁵ “Онанг қорнида сенга шакл бермасимдан олдин сени билган эдим,
Туғилмасингдан олдин сени Ўзим учун ажратиб олган эдим.
Халқларга сени пайғамбар этиб тайинлаган эдим.”

⁶ Мен Унга шундай жавоб қайтардим:

— Ё Эгам Раббий! Мен тузукроқ ҳам гапира олмайман. Ҳали жуда ёшман.

⁷ Эгамиз эса менга шундай деди:

— Ўзингни, ёшман, деб айтма! Мен сени кимнинг олдига юборсам,
ўшаларнинг олдига борасан. Сенга амр қилган ҳамма гапларимни уларга айтасан.

⁸ Сен улардан қўрқма. Мен сен билан бирга бўламан, сени халос қиласман. Буни
Мен, Эганг, айтдим.

⁹ Сўнг Эгамиз қўлини узатиб, лабимга теккизди-ю, деди:

— Мана, сўзларимни оғзингга солиб қўйдим. ¹⁰ Бугундан бошлаб халқлар ва
шоҳликларни қўпориб, йўқ қилишинг учун, вайрон қилиб, ағдаришинг учун,
бунёд этиб, мустаҳкамлашинг учун сенга изн бердим.

Иккита ваҳий

¹¹ Эгамиз менга Ўз сўзини аён қилиб, шундай деди:

— Эй Еремиё, нимани кўряпсан?

— Бодом шохини, — деб жавоб бердим мен.

¹² — Тўғри кўрдинг, — деди Эгамиз. — Бодом шохи Менинг ҳушёр туришимни
билдиради*. Айтган сўзларимни* Мен тез орада бажо келтираман.

¹³ Эгамиз менга Ўз сўзини яна аён қилиб деди:

— Нимани кўряпсан?

— Шимол томонда қайнаб турган бир қозонни. Қозон биз томонга
ағдарилай-ағдарилай деб турибди, — дедим.

¹⁴ Эгамиз менга шундай деди:

— Бу юртнинг бутун аҳолиси устига шимол томондан фалокат ёғилади.

¹⁵ Эгамиз шундай демоқда: “Мен шимолдаги шоҳликларнинг барча
халқларини* чақириб оляпман. Уларнинг шоҳлари келиб, ўз таҳтларини Қуддус
дарвозаларининг ёнига ўрнатадилар. Қуддус деворларини қуршаб оладилар,
Яхудо шаҳарларининг ҳаммасига ҳужум қиладилар. ¹⁶ Шу йўсин Мен халқимга
қарши хукмимни эълон қиласман, чунки Ўз халқим Мени тарқ этиб, қабиҳлик
қилди. Улар бегона худоларга қурбонликлар келтириб, ўз қўлларининг ижодига
сажда қилдилар. ¹⁷ Сен энди бўла қол, белингни боғла. Буюрганларимнинг
ҳаммасини уларга бориб айт. Улардан қўрқма. Акс ҳолда, уларнинг олдида сени
ваҳимага соламан. ¹⁸ Бугун Мен сени бир қалъадай, темир устундай ва бронза
девордай мустаҳкам қилдим. Сен бутун юртга — Яхудо шоҳларига,
шаҳзодаларига, руҳонийларига, юрт аҳолисига қарши чиқасан. ¹⁹ Улар сенга
ҳужум қилишади, лекин сени енга олишмайди. Мен сен билан бирга бўламан,
сени халос қиласман.” Эгамизнинг каломи шудир.

2-БОБ

Худо Истроил халқыга ғамхүрлик қиласы

¹ Эгамиз менга Ыз сўзини аён қилди: ² “Куддусга бориб, жар сол: «Эгамиз шундай деб айтмоқда:

Ёшлигингдаги вафодорлигинг ёдимда,
Келинчаклигингдаги севгинг эсимда.
Сен сахрова Менга эргашган эдинг,
Экин экилмаган ерда орқамдан юрар эдинг.
³ Эй Истроил, сен Менга бағишиланган эдинг,
Үримимнинг илк ҳосилига ўхшаган эдинг.
Ўша ҳосилни еган ҳар ким айбдор ҳисобланарди,
Бундайларнинг бошига кулфат келар эди,
— деб айтмоқда Эгамиз.»”

Истроил аждодларининг гуноҳи

⁴ Эй Ёкуб насли, жамики Истроил* уруғлари, Эгамизнинг сўзларини эшитинглар. ⁵ Эгамиз шундай демоқда:

“Ота–боболарингиз Мендан нима айб топдилар?
Нима учун Мендан узоқлашдилар?
Улар бетайин бутларга сифиндилар,
Ўзлари ҳам бетайин бўлиб қолдилар.
⁶ Улар Менга интилмайдилар.
Мен эса уларни Мисрдан олиб чиқсан эдим,
Чўлдан, чуқурликларга тўла саҳродан олиб ўтгандим,
Зулмат қамраган қақроқ ерда олиб юрган эдим.
Одам яшамаган, оёқ етмаган жойдан олиб ўтган эдим.
⁷ Мен сизларни ҳосилдор юртга олиб келгандим,
Меваларидан, мўл ҳосилидан енглар, деган эдим.
Аммо сизлар келиб, юртимни ҳаром қилдингизлар,
Мулким бўлган еримни жирканч бир жойга айлантиридингизлар.
⁸ Руҳонийлар Менга интилмайдилар,
Қонун ҳимоячилари Мени билмадилар,
Хукмдорлар Менга қарши бош кўтардилар,
Пайғамбарлар Баал* номидан башорат қилдилар,
Ҳеч нарсага ярамайдиган бутларга кўнгил боғладилар.”

Эгамиз Ўз халқини айблайди

⁹ Эгамиз шундай демоқда:

“Мен сизларни яна бир бор айблайман,
Набираларингизни ҳам айблайман.

¹⁰ Гарбдаги Кипр* қирғоқларига бориб кўринглар,
Шарқдаги Кедарга* одам жўнатиб, билиб келинглар.
Бундай воқеа ҳеч юз берганмикан?!

¹¹ Бирон халқ ўз худоларидан воз кечганмикан?!

Худолари ҳақиқий бўлмаса-да, улардан юз ўғирганмикан?!

Менинг халқим эса ўз улуғвор Худосидан воз кечди,
Қадрсиз бутларга Мени алмаштириди.

¹² Эй осмон, бундан ҳайратлангин,

Вахима ичра титрагин,
— деб айтмоқда Эгамиз. —
¹³ Менинг халқым икки гуноҳ қилди:
Улар Мени — ҳаётбахш сув булоғини тарк этдилар.
Үzlари учун сардобалар қазидилар,
Сувни ушлаб туролмайдиган ёриқ сардобалар қурдилар.

Хиёнатнинг оқибати

¹⁴ Истроил қулмиди?! Ёки қулликда туғилғанмиди?!
Нечун унда у ғанимларига ўлжа бўлди?
¹⁵ Ғанимлари унга шердай ўкирди,
Овози борича унга бўкирди.
Ўшалар дастидан Истроил юрти хароб бўлди,
Шаҳарлари вайрон бўлиб, ҳувиллаб қолди.
¹⁶ Эй Истроил, Нуф ва Тахпанхасдаги* халқлар
Сочингни қириб ташладилар*.
¹⁷ Сенга йўл кўрсатган Эганг Худони тарк этдинг,
Шу қилмишинг билан ўз бошингни ўзинг единг.
¹⁸ Энди нега Мисрга борасан?
Нил* сувидан ичиш учунми?!
Нечун Оссурияга* йўл оласан?
Фурот сувидан ичиш учунми?!*
¹⁹ Қабиҳлигинг ўзингнинг бошингга етади,
Хиёнатнинг сени маҳкум қилади.
Эганг Худони тарк этганинг
Нақадар ёмон ва аламли эканини
Кўриб, билиб қўйгин.
Сен Мендан қўрқмас экансан”, демоқда
Сарвари Олам — Раббий.

Истроил халқи Худога сажда қилишдан бош тортади

²⁰ Эгамиз шундай демоқда:
“Эй Истроил, сен анча олдин
Бўйинтуруғингни синдирган эдинг,
Кўп вақт олдин кишанларингни узган эдинг.
«Сенга хизмат қилмайман!» деб айтган эдинг.
Ҳар бир баланд тепалиқда бутларга сажда қилдинг,
Ҳар бир яшил дараҳт остида фоҳишадай ётдинг*.
²¹ Мен сени аъло тоқдай эккан эдим,
Сен энг сара уруғдан пайдо бўлган эдинг.
Нечун энди айниб қолдинг?
Нега ёввойи токка айланиб қолдинг?
²² Сен ўзингни ишқор билан ишқаласанг ҳам,
Кўп совун ишлатиб, ўзингни ювсанг ҳам,
Айборлик доғларинг кетмайди,
Булар доим кўз ўнгимда туради,
— деб айтмоқда Эгамиз Раббий. —
²³ Шундай экан, қандай қилиб:
«Булғанмадим», деб айтасан?!

Нега «Баалга сиғинмадим», дейсан?!

Водийда қилган ишларингга* қара,
 Қилган қилмишларинг ҳақида ўйлаб кўр,
 Сен ҳирси қўзиган урғочи туяга ўхшайсан,
 Ўзингни у ёқдан-бу ёққа урасан.

²⁴ Саҳрода улғайган бир қулонга ўхшайсан,
 Шаҳватинг қўзигандада, ҳавони исказайсан.
 Сенинг ҳирсингни ким қондира олади?!
 Ҳеч бир эркак сенга эришиш учун ўзини уринтириши шарт эмас,
 Жуфтлашиш даврида сени осонликча топиб олишади.

²⁵ Эй Истроил, бошқа худоларнинг кетидан югуравермагин,
 Чориғинг йиртилгунча, томоғинг қуригунча
 Улар кетидан юравермагин.
 Лекин сен шундай дединг:
 «Гапирганинг бефойда,
 Ахир, мен ўша худоларни севиб қолдим,
 Уларнинг кетидан бормасам бўлмайди.»

Истроил халқи жазоланади

²⁶ Қўлга тушган ўғри шарманда бўлгандай,
 Истроил халқи ҳам шарманда бўлади.
 Уларнинг ўзлари, шоҳлари, аъёнлари уятга қолади,
 Рұҳонийлару пайғамбарлари шарманда бўлади.

²⁷ Улар ёғочга: «Менинг отам сенсан» дейишади,
 Тошга*: «Туққан онам сенсан», деб айтишади.
 Аммо Менга юз бурмай, орқа ўгиришади,
 Бошларига кулфат келганда эса,
 «Бизга нажот бер!» дея Менга ёлворишади.

²⁸ Хўш, ўзларингиз учун ясаган худоларингиз қани?
 Кулфат чоғида сизларни кутқара олса, келсин.
 Шаҳарларингиз қанча кўп бўлса,
 Худоларингиз ҳам шунчадир, эй Яхудо халқи.

²⁹ Нечун Мен билан даъволашасиз?!

Ҳаммангиз Менга қарши бош кўтардингиз!
 — деб айтмоқда Эгамиз. —

³⁰ Эй халқим, сени жазолаганим зое кетиби.
 Сен барибир гапимга кирмадинг.
 Сенинг қиличинг йиртқич арслондай
 Пайғамбарларингни қириб ташлади.

³¹ Эй бу насл, Менинг гапларимга қулоқ сол!
 Наҳотки Мен Истроил учун саҳродаи бўлган бўлсам?!

Наҳотки зулмат қоплаган қоронғи ердай бўлган бўлсам?!

Нечун халқим: «Энди озодмиз, олдингга қайтиб бормаймиз», деб айтади?

³² Қиз бола тақинчоқларини унутадими?!

Келинчак ўз либосини эсдан чиқарадими?!

Йўқ! Аммо халқим Мени унутди,
 Орадан сон-саноқсиз кунлар ўтиб кетди.

³³ Ошиқларни топишга нақадар устасан!
 Энг бузуқ аёл ҳам сендан ўрганса бўлади.

³⁴ Сен кийимларингни доғ қилдинг,
Айбиз қашшоқларнинг қонига уларни беладинг,
Улар уйингга ўғри бўлиб тушмаган эди.

Шунга қарамай сен:

³⁵ «Айбизманс», деб айтасан.

«Эгамиз ғазабидан тушгани аниқ», дейсан.

«Гуноҳ қилмадим» деганинг учун
Мен сени жазолайман.

³⁶ Нега сен енгилтаклик қиласан?

Нега иттифоқчиларингни ўзгартирасан?

Сен Оссуриядан ёрдам олмаганингдай,
Мисрдан ҳам ҳеч қандай ёрдам олмайсан.

³⁷ Сен Мисрдан чиқиб келасан,

Уялганингдан юзингни қўлинг билан тўсасан.

Зоро, сен умид боғлаган халқни Эганг рад этди.

Сен улардан ҳеч қандай наф кўрмайсан.”

3-БОБ

Бевафо Истроил

¹ Эгамиз шундай демоқда: “Бир одам хотини билан ажрашди, дейлик. Агар хотини бориб, бошқасига турмушга чиқса, олдинги эри уни қайта никоҳига олиши мумкинми?! Бундай бемаънигарчилик юртни ҳаром қилиб юбормайдими?!* Эй Истроил, сен кўп ўйнашлар орттириб фоҳишалик қилдинг. Энди қайси юз билан олдимга қайтиб келмоқчисан?!”

² Атрофингдаги яланг қирларга назар солиб, қара!

Сен фоҳишалик қилмаган бирор жой қолдими?!*

Сен йўл бўйларида ўтириб, ўйнашларингни кутдинг.

Чўлда босқинчилик қилишга шай турган қароқчидай бўлдинг.

Менга қилган бевафолигинг ва фосиқлигинг билан,

Бутун юртни ҳаром қилдинг.

³ Шу сабабдан ёмғир ёғмади,

Баҳорда ёғингарчилик бўлмади.

Сен фоҳишадай безбетсан,

Уят деган нарсани билмайсан.

⁴ Энди эса Менга: «Отажонимсан», деяпсан,

«Ёшлигимдан буён дўстимсан», деб айтапсан!

⁵ «Ҳадеб мендан жаҳлинг чиқаверадими?» дейсан,

«Бир умр менга ғазабингни сочасанми?» деб айтасан,

Ўзинг эса имконинг борича ёвузлик қиласерасан.”

Истроил ва Яҳудо халқлари тавбага чақирилади

⁶ Шоҳ Йўшиё даврида* Эгамиз менга шундай деди: “Бевафо Истроилнинг* қилмишларини кўрдингми? Ҳар бир баланд тепаликда ва ҳар бир яшил дарахт остида у фоҳишалик қилди*. ⁷⁻⁸ Барча қилмишларидан кейин ҳам, олдимга қайтиб келади, деб ўйлаган эдим. Лекин у қайтиб келмади. Шунинг учун Мен садоқатсиз Истроилга талоқ хатини бериб, жўнатиб юбордим*. Унинг синглиси Яҳудо эса буни кўрган эди. Шунга қарамай бу мунофиқ заррача ҳам кўрқмади, у Менга вафо қилмай, фаҳшга берилди. ⁹ Истроил тош ва ёғочдан ясалган худоларга сифиниб,

зино қилган эди. Енгилтаклик билан фоҳишалик қилиб, юртни ҳаром этган эди.

¹⁰ Буларга қарамай, унинг мунофиқ синглиси Яхудо Менга соф кўнгил билан қайтмади. У қўзбўямачилик қилди”, — деб айтмоқда Эгамиз.

¹¹ Кейин Эгамиз менга шундай деди: “Бевафо Истроил, мунофиқ Яхудога қараганда, ўзини солиҳ қилиб кўрсатди. ¹² Қани, шимолга бор, у ерда ушбу сўзларни жар солиб айт: «Эгамиз шундай демоқда: эй бевафо Истроил, Менга юз бур! Энди Мен сенга ғазабимни сочмайман, Мен раҳмдилман, — деб айтмоқда Эгамиз. — Сендан то абад ғазабланмайман. ¹³ Фақатгина гуноҳингни тан олгин: сен Эганг Худога қарши бош кўтардинг, ҳар бир яшил дараҳт остида бегона худоларга сажда этиб, зино қилдинг, Менинг гапимга кирмадинг, — деб айтмоқда Эгамиз.”

¹⁴ Эгамиз шундай демоқда: “Эй садоқатсиз фарзандлар, олдимга қайтинглар! Зеро, Мен хўжайнингизман. Ҳар бир шаҳардан биттангизни, ҳар бир хонадондан иккитангизни олиб, Қуддусга* олиб келаман. ¹⁵ Мен сизларга кўнглимдаги чўпонларни бераман. Улар сизларни донолик ва билим билан бошқаришади. ¹⁶ Сизлар юртда кўпайиб, ували-жували бўласизлар. Шунда халқ Менинг Аҳд сандигим* ҳақида гапирмайдиган бўлади. Улар Сандиқ ҳақида ўйлашмайди, уни эсга ҳам олишмайди, зарурати бўлмагани учун янгисини ясашмайди*. ¹⁷ Зеро, ўша вақтда Қуддус «Эгамизнинг Тахти» деб аталади. Ҳамма халқлар Менга сажда қилиш учун Қуддусда, Менинг хузуримда тўпланадилар. Шундан кейин улар ҳеч қачон ёвуз юракларининг ўжарликларига итоат қилмайдилар. ¹⁸ Ўша кунларда Яхудо ва Истроил халқлари бирлашади. Улар шимолдаги юртдан Мен ота-боболарингизга мулк қилиб берган юртга бирга қайтиб келишади.

¹⁹ Мен, Эгангиз, ичимда шундай деган эдим:

«Сени жон-жон дея Ўзимга фарзанд қилиб олган бўлар эдим,
Сенга ажойиб юртни совға қилган бўлар эдим,
Халқларнинг энг гўзал мулкини сенга берган бўлар эдим.»
Мени «Отажоним дейсан», дея ният қилган эдим,
Мендан ҳеч қачон юз ўғирмайсан, деб ўйлаган эдим.

²⁰ Аммо, эй Истроил, Менга бевафолик қилдинг!
Сен эрига хиёнат қилган аёлдай бўлдинг,
— деб айтмоқда Эгамиз. —

²¹ Яп-яланг қирлар узра фифон эшитилмоқда,
Истроил халқи доду фарёд солмоқда.
Зотан, улар ҳақ йўлдан озган эдилар,
Ўзларининг Эгаси Худони унутиб юборган эдилар.

²² Эй садоқатсиз фарзандларим, орқага қайтинглар!
Бевафо қалбингизга Мен шифо бераман.

Сизлар Менга шундай дейсизлар:

«Мана, олдингга қайтяпмиз,
Ахир, Эгамиз Худо Сенсан.

²³ Биз қирларда бутларга сажда қилар эдик,
Қаттиқ шовқин-сурон кўтарар эдик.
Аммо ҳаммаси беҳуда экан.

Ягона нажоткоримиз Сенсан, эй Эгамиз Худо.

²⁴ Бу ярамас бутлар болалигимиздан буён,
Оталаримизнинг меҳнатини йўққа чиқарди,

Уларни мол-қўйларидан айирди,
Ўғил-қизларидан жудо қилди.
²⁵ Келинг, шармандаликни ўзимизга тўшак қилайлик,
Уятни ёпинчиқ қилиб, устимизга ёпайлик!
Ахир, ота-боболаримиз билан биз
Эгамиз Худога қарши гуноҳ қилдик.
Ёшлигимиздан то бугунгача
Эгамиз Худонинг гапига кирмадик.»”

4-БОБ

Тавбага даъват

¹ Эгамиз шундай демоқда:

“Эй Истроил, қани энди қайтсанг,
Қани энди, Менга қайтиб келсанг!
Хузуримдан жирканч бутларингни улоқтириб ташласанг,
Қани энди, Менинг йўлимдан озмай юрсанг.
² Қани энди, ҳақиқат, адолат ва тўғрилик ила
«Эгамиз шоҳид!» дея қасам ичсанг.
Шунда халқлар Мен орқали барака топади,
Улар Мен билан фахрланади.”

³ Эгамиз Яхудо халқига ва Қуддус аҳолисига шундай деб айтмоқда:

“Ерингизни шудгор қилинг,
Тиканлар орасига уруғ сепманг.
⁴ Эй Яхудо халқи ва Қуддус аҳолиси,
Ўзингизни Мен, Эгангизга бағишиланг,
Юрагингизни суннат қилинг*.
Акс ҳолда, ёвуз қилмишингиз учун
Алангали ғазабимни устингизга ёғдираман.
Бу ғазабимни ҳеч ким сўндира олмайди.

Яхудо халқи бошига келадиган фалокатлар

⁵ Яхудода эълон қилинг, Қуддусда жар солинг:
«Бутун юрт бўйлаб бурғу чалинсин.»
Баланд овозда ҳайқиринг: «Қани, тўпланинглар!
Мустаҳкам шаҳарларга қочиб борайлик!»
⁶ Қуддусга* қочиб бориш учун ишора беринг,
Имилламай, тезроқ қочинг!
Мен шимолдан* кулфат келтирмоқдаман,
Даҳшатли ҳалокат олиб келмоқдаман.
⁷ Ана, халқларни ҳалок этувчи йўлга тушди,
У шер каби чакалакзордан чиқди.
Юрtingизни хароб қилгани уясини ташлаб келди.
Эвоҳ, энди шаҳарларингиз вайрон бўлади,
Ҳаммаси хувиллаб қолади.
⁸ Марсия айтиб, фарёд қилинглар,
Қанорга ўраниб олинглар*.

Ахир, Эгангизнинг алангали ғазаби
Сизни четлаб ўтмади.”

⁹ Эгамиз шундай демоқда: “Ўша куни шоҳ билан аъёнларнинг юраги орқага тортиб кетади. Руҳонийлар билан пайғамбарлар даҳшатга тушади.” ¹⁰ Шунда мен дедим: “Ё Эгам Раббий, Сен Қуддус аҳолисини ёмон лақиллатдинг! Қилич уларнинг бўғзида турган бир пайтда, Сен уларга тинчлик ваъда қилдинг.”

¹¹ Ўша пайт келганда Эгамиз Қуддус аҳолисига шундай деб айтади: “Сахродаги яланг қирлардан чиққан гармсел* халқим томон эсмоқда. У донни хашакдан тозалайдиган майин шабада эмас, ¹² балки Мен юборган кучли бир гармсeldир. Мен сизларга қарши йўз ҳукмимни эълон қилмоқдаман.”

Яҳудо душманлар қуршовида

¹³ Каранг! Душман булутдай кўтарилимоқда.

Уларнинг жанг аравалари қуюн кабидир,
Отлари бургутдан ҳам чаққондир.

Эвоҳ, шўримиз қурсин! Хонавайрон бўлдик!

¹⁴ Эй Қуддус, нажот топишинг учун юрагингни покла.

Қачонгача юрагингда ёвуз ният сақлайсан?!

¹⁵ Ана, Дан шаҳридан хабарчининг овози эшитилмоқда,
Эфрайим қирларидан* бир шум хабар келмоқда.

¹⁶ Эгамиз шундай дейди:

“Халқларга буни айтинглар,
Қуддусда шундай эълон қилинглар:
«Олис юртдан босқинчилар келмоқда,
Улар Яҳудо шаҳарларига қарши ҳайқирмоқда.

¹⁷ Босқинчилар дала қўриқчиларига ўхшаб,
Куддусни қуршаб олишади.»

Зотан, Қуддус аҳли Менга қарши бош кўтарди,
— деб айтмоқда Эгамиз. —

¹⁸ Тутган йўлингиз, қилган қилмишингиз дастидан
Бу кулфат бошингизга келди-ку!

Жазоингиз шудир.

Ох, нақадар аччиқ бўлмаса бу кулфат!
Нақадар юракни эзади-я!”

Еремиё ўз халқи учун қайғуради

¹⁹ Вой жоним, адойи тамом бўлдим!

Вой юрагим! Қинидан чиққудай бўляпти!
Суқут сақлаб тура олмайман,
Эшиятпман бурғу садоларини,
Эшиятпман урушга даъватларни.

²⁰ Кулфат кетидан кулфат келди,
Бутун юрт хонавайрон бўлди.
Бир зумда чодирларим бузилиб кетди,
Масканим пардалари йўқ бўлди.

²¹ Қачонгача ёв байроғи қўзим олдида ҳилпираб тураверади?!

Қачонгача бурғу овози қулоғимга чалинаверади?!

²² Эгамиз шундай жавоб берди:

“Ахир, Менинг халқим бефаросат,

Улар Мени танишмайды.
 Улар нодон, ақлсиз фарзандлардир.
 Ёмонлик қилишга уста,
 Яхшилик қилиш эса қўлларидан келмайди.”

Келаётган кулфат ҳақидаги ваҳий

²³ Мен ерга қарадим, ер айқаш–уйқаш эди,
 Кўзимни осмонга тикдим, осмонда нур кўринмасди.
²⁴ Тоғларга қарадим, тоғлар силкинаётган эди,
 Ҳамма қирлар ларзага келган эди.
²⁵ Қарадим, аммо инсон зоти кўринмади,
 Ҳатто кўқдаги қушлар ҳам учиб кетган эди.
²⁶ Қарадим, ҳосилдор ерлар чўлга айланган эди,
 Ҳамма шаҳарлар вайрон бўлган эди.
 Бунга сабаб Эгамизнинг қаттиқ қаҳри эди.

²⁷ Зеро, Эгамиз шундай деган эди:

“Бутун юрт вайрон бўлади,
 Лекин юртни бутунлай йўқ қилиб юбормайман.
²⁸ Бутун дунё аза тутади,
 Осмон ҳам қоп–қора бўлиб кетади.
 Буни Мен айтдим, шахтимдан қайтмайман.
 Қарор қилдим, қароримни ўзгартирмайман.”

²⁹ Отлик ва камонкашлар ҳайқириғидан
 Ҳар бир шаҳар аҳолиси қочиб қолади.
 Улар чакалакзорлар оралаб югуришади,
 Қояларга чиқиб, ораларига яшириниб олишади.
 Ҳамма шаҳарлар ҳувиллаб қолади,
 У ерларда яшайдиган одам бўлмайди.
³⁰ Сен эса, эй харобазорга айланган шаҳар,
 Нега устингга қирмизи либос кийиб олдинг,
 Олтин тақинчоқлар билан безандинг?
 Нега қўзларингни бўяб олдинг?
 Бекорга безаниб олибсан!
 Ўйнашларинг* сендан нафратланади,
 Жонингга қасд қилмоқчи улар.

³¹ Ана, кимдир тўлғоқ тутган аёлдай бақирмоқда,
 Кимдир илк бор туғаётган аёлдай инграмоқда.
 Қиз* Куддус энтикиб қичқирмоқда,
 Қўлларини чўзиб шундай демоқда:
 “Шўрим қурсин! Қотилларим олдида мадорим қолмади.”

5-БОБ

Қуддус аҳолисининг гуноҳлари

¹ Эгамиз шундай дейди:
 “Қуддуснинг ҳар бир кўчасига кириб чиқинглар,
 Атрофингизга қараб, билиб олинглар,

Шаҳар майдонларида қидириб кўринглар,
Бирон адолатли, ростгўй одам бормикан.
Агар шундай одамни топиб келсангиз,
Мен Қуддус аҳолисининг гуноҳидан ўтаман.
² Улар «Эгамиз шоҳид!» дея қасам ичадилар,
Аммо ичган қасамлари ёлғон.”
³ Эй Эгам, Сен ҳақиқатни излайсан.
Сен бу халқни урган эдинг,
Аммо улар оғриқ сезмадилар.
Уларни деярли йўқ қилиб юборганингда ҳам,
Гапингга кирмадилар.
Бетларини тошдан ҳам қаттиқ қилдилар,
Тавба қилишни хоҳламадилар.

⁴ Шунда мен ичимда дедим:
“Эҳа, булар камбағал-ку!
Шунинг учун уларнинг фаросати йўқ,
Улар Эгамизнинг йўлини билмайди,
Худосининг қонунини танимайди.
⁵ Қани, бойларнинг* олдига борай-чи,
Улар билан гаплашиб кўрай-чи,
Эгамизнинг йўлини улар албатта билади,
Улар Худосининг қонунини танишади.”
Аммо уларнинг ҳаммаси бўйинтуруғини синдирган экан,
Эгамизга итоат этишдан бош тортган экан.

⁶ Шунинг учун ўрмондан чиққан шер уларни ўлдиради,
Чўлдан келган бўри уларни ғажиб ташлайди.
Қоплон уларнинг шаҳарлари олдида писиб туради,
Шаҳардан чиққан ҳар бир одамни тилка-пора қиласди.
Ахир, улар кўп гуноҳ қилдилар,
Худога кўп хиёнат этдилар.

⁷ Эгамиз шундай дейди:
“Эй Қуддус, Сени қандай қилиб кечираман?!
Фарзандларинг Мени тарк этдилар-ку!
Улар Худо бўлмаган бутларнинг номини ўртага қўйиб онт ичдилар.
Мен уларнинг эҳтиёжларини қондирар эдим,
Улар эса зино қиласверар эдилар,
Фоҳишаларнинг уйига тўдалашиб борар эдилар.
⁸ Улар ҳирси қўзғаган айғир отлар каби эдилар,
Ҳар бири қўшнисининг хотинига кишинар эди.
⁹ Мен уларни бунинг учун жазоламайми?!
Шундай бир халқдан ўч олмайми?!
— деб айтмоқда Эгамиз. —

¹⁰ Қани, уларнинг узумзорлариға кириналар,
Токларини кесиб ташланглар.
Аммо бутунлай йўқ қилманглар.
Новдаларини синдириналар,

Энди улар Меники эмас.

¹¹ Ахир, Истроил ва Яхудо халқлари
Менга бутунлай хиёнат қилишди.”
Эгамизнинг каломи шудир.

Эгамиз Истроилни тарқ этади

¹² Истроил халқи Эгамиз ҳақида ёлғон гапирди, улар шундай деди:

“Эгамиз барибир ҳеч нарса қилмайди.
Ҳеч қандай күргилик бошимизга тушмайди!
Қаҳатчилик, уруш бўлмайди!
¹³ Пайғамбарларининг бемаъни сўзлари шамолга ўхшайди,
Худонинг сўзи уларга аён бўлмаган.
Бу кулфатлар ўзларининг бошига тушсин!”

¹⁴ Шунинг учун Парвардигори Олам — Эгамиз шундай демоқда:

“Эй Еремиё, халқим айтган бу гаплари учун
Мен Ўз сўзларимни сенинг оғзингда оловдай қиласман.
Бу халқ эса ўтин каби бўлади,
Олов уларни ёндириб ташлайди.”

¹⁵ Эгамиз шундай демоқда:
“Эй Истроил халқи,
Мен олисдаги бир халқни қўзғатаман.
Уларни сизга қарши юбораман.
Улар кучли, қадимги бир халқдир.
Бу халқнинг тилини сизлар билмайсизлар,
Уларнинг гапларини тушунмайсизлар.
¹⁶ Уларнинг ҳаммаси моҳир жангчилардир,
Ўқлари ўлим элчилариdir.
¹⁷ Улар ҳосилингизни, нонингизни еб битиришади,
Ўғил-қизларингизни ўлдиришади.
Мол-қўйларингизни бўғизлашади,
Узумзору анжирзорларингизни йўқ қилишади.
Суянган мустаҳкам шаҳарларингизни
Лашкарлари вайрон қилишади.”

¹⁸ Эгамиз демоқда: “Шундай кунларда ҳам Men Ўз халқимни бутунлай қириб юбормайман. ¹⁹ Халқим сендан: «Нима учун Эгамиз Худо бундай ишларни қилди?» деб сўраганда, сен, эй Еремиё, уларга шундай жавоб бер: «Сизлар Худони тарқ этиб, юртимизда бегона худоларга хизмат қилдингизлар. Энди ўзга юртда бегона одамларга худди шундай хизмат қиласизлар.»

Худо халқни огоҳлантиради

²⁰ Бориб, Ёқуб наслига шундай деб айт, Яхудо халқига шундай деб эълон қил:

²¹ Сизларнинг кўзингиз бор, аммо кўрмайсизлар,
Қулоғингиз бор, аммо эшитмайсизлар.
Эй ақлсиз, бефаросат одамлар,
Гапларимни эшитинглар!

²² Наҳотки Мендан қўрқмасангизлар?!
Менинг олдимда титрамасангизлар?!

— деб айтмоқда Эгамиз. —

Ахир, Мен денгизга қумни чегара қилиб қўйдим,

Ўтиб бўлмайдиган абадий тўсиқ қилдим.

Тўлқинлар кўпириб, кўтарилса ҳам,

Тўсиқдан устун келолмайди.

Ҳайқириб ўкирса ҳам,

Ундан ошиб ўтолмайди.

²³ Аммо сизлар ўжар ва исёнкорсизлар,

Йўлдан озиб, Мени тарк этдингизлар,

²⁴ Сизлар ичингизда ҳеч айтмайсизлар:

«Эгамиз Худодан қўрқайлик,

У ўз вақтида ёмғир ёғдиради-ку!

Кузда ҳам, баҳорда ҳам еримизни суғоради-ку!

Йиғим-терим мавсумини ўз вақтида беради-ку!» деб.

²⁵ Гуноҳларингиз сизларни булардан маҳрум этди,

Айбларингиз сизларни баракадан жудо этди.

²⁶ Ҳа, халқим орасида ярамас одамлар бор.

Улар қуш овлаётгандай писиб ётишар,

Тузоқ қўйиб, одамларни ўз домига тортишар.

²⁷ Овчи қафасни қушларга тўлдиргандай,

Улар уйларини ҳийлага тўлдирдилар.

Шу туфайли кучайиб, давлат орттиридилар,

²⁸ Семириб, ялтираб кетдилар.

Қабиҳ ишларининг чек-чегараси йўқ.

Улар етимни оқлашга ҳаракат қилмайди,

Йўқсилнинг ҳақини ҳимоя этмайди.

²⁹ Мен уларни бу учун жазоламайми?!

Шундай бир халқдан ўч олмайми?!

— деб айтмоқда Эгамиз. —

³⁰ Қўрқинчли ва даҳшатли ишлар

Бу юртда содир бўлмоқда:

³¹ Пайғамбарлар ёлғондан башорат қилмоқда,

Рұҳонийлар ўзларича* ҳалқимни бошқармоқда,

Халқимга буларнинг ҳаммаси хуш келмоқда.

Аммо охирида улар нима қилар экан-а?”

6-БОБ

Қуддус душманлар қуршовида

¹ Эгамиз шундай дейди:

“Эй Бенямин насли,

Жонингизни қутқаринглар!

Қуддусдан қочиб чиқинглар!

Тахува шаҳрида бурғу чалинглар!

Байт-Ҳакерем шаҳрида* олов ёқиб, белги кўрсатинглар.

Ана, шимолдан бир фалокат келяпти,

Даҳшатли бир ҳалокат яқинлашяпти.

² Киз* Қуддус* гўзал ва латофатлидир,

Аммо Мен уни йўқ қилиб ташлайман.
³ Шаҳар атрофига жойлашиб олган чўпонлардай,
Душманлар Қуддусни қамал қиласди.
Ҳар бири ўз лашкари учун жой танлайди.
⁴ Улар шундай деб айтишади:
«Қуддусга қарши жангга тайёрланинглар!
Бўла қолинглар, кундуз куни уларга хужум қиласми!
Шўримиз қурсин! Кун ҳам ботяпти,
Оқшом соялари бўй чўзиб қолди.
⁵ Энди тунда хужум қиласми,
Шаҳардаги қалъаларни вайрон этамиш!»

⁶ Сарвари Олам душман лашкарига шундай демоқда:
“Дараҳтларини кесинглар*,
Қуддус деворига қиялатиб тупроқ уйинглар*.
Бу шаҳар жазоланиши керак,
Шаҳар зўравонликка тўлиб-тошган.
⁷ Булоқдан сув қайнаб чиққани сингари,
Қуддусдан қабиҳликлар қайнаб чиқяпти.
Зўравонлигу бузғунчилик садолари эшитиляпти.
У ерда кўрганим хасталигу яралар.
⁸ Эй Қуддус, эсингни йиғиб олгин,
Йўқса, Мен сендан юз ўгираман.
Сени ташландиқ бир жойга айлантираман,
Юртингни ҳувиллатиб қўяман.
⁹ Душманларингга айтаман,
Улар сени шип-шийдам қиласдилар,
Бир шингил узуми қолмаган токка ўхшатиб қўядилар.”
Сарвари Оламнинг каломи шудир.

Исёнкор Истроил

¹⁰ Эй Эгам! Кимга гапирай, кимни огоҳлантирай?!
Ким менинг гапларимга қулоқ солади?!
Қара, уларнинг қулоқлари ёпиқ*,
Улар ҳеч нарсани эшиитмайди.
Сенинг сўзингдан улар хафа бўлади,
Уни эшитишни хуш кўрмайди.
¹¹ Аммо ичим Сенинг ғазабингга тўлган эди,
Жаҳлимни тийишдан чарчадим.

Эгамиз менга шундай деди:
“Ғазабимни қўчадаги болаларга сочгин,
Тўдалашиб турган йигитларга сочгин.
Ғазабим эркагу аёлларга тушади,
Мункиллаган қариялар ҳам ундан қочиб қутулмайди.
¹² Уйлари, далалари ва хотинлари
Бошқа бирорларга берилади.
Мен бу юрт аҳолисига қарши қўл кўтараман,
— деб айтмоқда Эгамиз. —

¹³ Улар кичкинасидан тортиб, каттасигача,
Нафсини тиёлмай ҳаром йўл билан пул топишади.
Пайғамбардан тортиб, руҳонийгача —
Ҳаммаси товламачилик қилишади.

¹⁴ Халқимнинг яраларини юзаки даволашади.
Аҳвол оғир бир пайтда «ҳаммаси яхши», деб айтишади.
¹⁵ Жирканч ишлари учун уяладиларми?
Йўқ, уялмайдилар!
Қизариш деган нарсани билмайдилар,
Шунинг учун бошқалардай ҳалок бўладилар.
Ҳа, уларни жазолаб, хонавайрон қиласман.”
Эгамизнинг каломи шудир.

Исройл Худонинг йўлидан озади

¹⁶ Эгамиз Ўз халқига шундай деб айтмоқда:
“Чорраҳаларда туриб қаранг,
Қадимги йўллар ҳақида сўранг,
Яхши йўл қаерда эканлигини билиб олинг.
Ўша йўлдан юринг,
Шунда кўнглингиз таскин топади.
Аммо сизлар: «Йўқ, у йўлдан юрмаймиз», дедингизлар.
¹⁷ Мен сизларга қўриқчилар* қўйдим,
«Қўриқчилар бурғусининг жанговар садосига қулоқ солинглар»,
Деб сизларга тайинладим.
Сизлар эса: «Уларга қулоқ солмаймиз!» деб айтдингизлар.
¹⁸ Шунинг учун, эй халқлар, эшитинг!
Халқим не ҳолга тушишини билиб олинг.
¹⁹ Эй замин, қулоқ сол!
Мен бу халқнинг бошига кулфат келтираман,
Ёмон ниятларининг оқибати шудир.
Зотан, улар сўзларимга кирмадилар,
Қонунларимни рад этдилар.
²⁰ Шава юртидан* келтирилган зираворларни нима қиласман?!

Олис юртдан олиб келинган хушбўй қамишни нимага ишлатаман?!

Халқимнинг куйдириладиган назрларини Мен қабул қилмайман,
Курбонликларидан хушнуд бўлмайман.”

²¹ Шу сабабдан Эгамиз демоқда:
“Мен бу халқнинг оёғига тўғоноқ соламан,
Улар қоқилиб йиқиладилар.
Оталар фарзандлари билан бирга,
Қўшнилар ёр-биродарлари билан бирга ҳалок бўладилар.”

Шимолдан босқинчилар келади

²² Эгамиз шундай демоқда:
“Ана, шимолдаги юртдан* оломон келмоқда,
Дунёнинг четидан буюк бир халқ қўзғалмоқда.
²³ Камону найзалар билан қуроллангандир улар,
Шафқат қилмайдиган золимдир у одамлар.
Улар отларини елдиради,
Тўлқинланган денгиздай гувиллаб келади.

Эй қиз Куддус, улар қаршингда саф тортадилар,
Жанг қилишга шай бўлиб турадилар.”

²⁴ Одамлар шундай деди:
“Улар ҳақидаги бу хабарни эшидик,
Мадоримиз қолмади.
Дард тутган аёл каби,
Азобу изтироб чекдик.
²⁵ Далаларга борманглар,
Кўчаларда юрманглар!
Душман қиличини тутган.
Атрофни даҳшат қамраган.”

²⁶ Эй ҳалқим, қизалофим!
Қанорга ўраниб, кулга белангин*.
Ёлғиз фарзанд учун аза тутгандек,
Аччиқ–аччиқ йифлагин.
Ана, ҳалок этувчи келяпти,
У тўсатдан бизга ҳужум қиласди.

²⁷ Эгамиз шундай деди:
“Эй Еремиё, ҳалқимни текширгин,
Темирни синағандай уларни синағин,
Тутган йўлларини билиб олгин.
²⁸ Уларнинг ҳаммаси ўжар ва бебошдир,
Бирорларга туҳмат қилиб юрадилар.
Бағирлари мис ва темир каби қаттиқ,
Ҳаммаси бузғунчилик қиласдилар.
²⁹ Ана, босқонга тўхтовсиз дам берилмоқда,
Ўчоқдаги олов ловуллаб ёнмоқда.
Аммо бундай олов ҳам уларни тозалай олмади,
Улар фосиқлигича қолди.
³⁰ Уларни «сифатсиз кумуш» деб атайдилар,
Ахир, Мен уларни рад этдим.”

7-БОБ

Еремиё Маъбадда воизлик қиласди

¹ Еремиёга Эгамизнинг қўйидаги сўзи аён бўлди: ² “Уйимнинг дарвозаси олдига бор. Ўша ерда туриб, баланд овозда шундай деб айт: «Эй жамики Яхудо ҳалқи! Эй Эгамизга сажда қилиш учун мана бу дарвозадан кираётган ҳалойик! Эгамизнинг гапларини эшитинглар. ³ Истроил ҳалқининг Худоси — Сарвари Олам шундай демоқда: ёмон йўлингиздан қайтинглар. Турмуш тарзингизни ўзгартиинглар. Шундагина бу юртда яшашингизга ижозат бераман.

⁴ ‘Эгамизнинг Маъбади шу ерда! Мана, Эгамизнинг Маъбади, шунинг учун ҳеч қандай хавф–хатар йўқ!’ деган ёлғон сўзларга ишонманг.

⁵ Агар ҳақиқатан ёмон йўлингиздан қайтсангиз, турмуш тарзингизни ўзгартирангиз, бир–бирингизга нисбатанadolatli бўлсангиз, ⁶ мусофиirlарга, етим ва беваларга зулм қилассангиз, бу юртда айбисиз одамнинг қонини тўкмассангиз, бошингизга фалокат келтирадиган бошқа худоларга эргашмасангиз,

⁷ бу ерда қолишингизга ижозат бераман. Мен ота–боболарингизга абадий мулк қилиб берган бу юртда сизлар яшайверасизлар.

⁸ Аммо сизлар ёлғон сүзларга ишоняпсизлар. ⁹ Үғрилик қиляпсизлар, одам ўлдиряпсизлар, зино қиляпсизлар, ёлғондакам қасам ичяпсизлар, Баалга назрлар атаб, ўзингиз билмаган худоларга эргашяпсизлар. ¹⁰ Шундай экан, нима учун сизлар Менинг номим билан аталган уйимга* келиб, ‘Биз хавф–хатардан холимиз!’ деб айтапсизлар?! Бундай жирканч ишларни давом эттириш учунми?! ¹¹ Айтинглар–чи, Менинг номим билан аталган бу уй сизлар учун қароқчилар уяси бўлиб қолдими?! Қилган барча ишларингизни Мен Ўз кўзим билан кўриб турибман–ку! — деб айтмоқда Эгамиз. — ¹² Қани, Шилў шахрига* боринглар! Мен улуғланишим учун илк бор ўша жойни танлаган эдим. Аммо халқим Истроилнинг қабиҳликлари туфайли ўша жойни не ахволга согланимни кўриб қўйинглар. ¹³ Бундай ёвуз ишларни қилаётганингизда, Мен сизларга қайта–қайта гапирдим. Аммо сизлар гапларимга қулоқ солмадингиз. Сизларга хитоб қилдим, аммо жавоб бермадингиз, — деб айтмоқда Эгамиз. — ¹⁴ Шундай экан, Мен Шилўни не кўйга соглан бўлсам, Ўз номим билан аталган уйимни ҳам ўша ахволга соламан. Сизлар умид боғлаган бу уйимни ва ота–боболарингизга берган бу юртни Шилўнинг ахволига тушираман. ¹⁵ Кондошингиз Эфрайим* халқини улоқтирганимдай, сизларни ҳам Ўз хузуримдан улоқтириб ташлайман.»”

Халқнинг итоатсизлиги

¹⁶ Эгамиз шундай деди: “Эй Еремиё, сен бу халқ учун ибодат қилма! Улар учун фарёд қилиб, илтижо қилма! Уларни деб, Менга ёлворма! Мен сенга қулоқ солмайман. ¹⁷ Яхудо шаҳарларида, Куддус кўчаларида улар нималар қилаётганини кўрмаяпсанми?! ¹⁸ Болалар ўтин йиғишади, оталари олов ёқишиади, хотинлар эса хамир қориб, само қироличасига* атаб нонлар ёпишади. Ғазабимни қўзғатиши учун бегона худоларга шароб назрини келтиришади. ¹⁹ Бу қилмишлари билан улар Менга эмас, ўзларига зарар келтирмоқда–ку! — деб айтмоқда Эгамиз. — Ўзларини шарманда қилишмоқда–ку! ²⁰ Шу сабабдан, Мен, Эгангиз Раббий, айтаманки, Мен қаҳру ғазабимни бу заминга, инсонлару ҳайвонларга, даладаги дараҳтлару экинларга сочаман. Ғазабим сўнмас оловдай ёнади.”

²¹ Истроил халқининг Худоси — Сарвари Олам шундай демоқда: “Сизлар қурбонликларнинг гўштини ейсизлар, куйдириладиган қурбонликларингизнинг гўштини ҳам ўзларингиз еяверинглар*. ²² Мен ота–боболарингизни Мисрдан олиб чиққанимда уларга нафақат қурбонликлар ва куйдириладиган қурбонликларга оид амрлар берган эдим, ²³ балки уларга яна шундай амр берган эдим: «Менга итоат қилинг! Шунда Мен сизнинг Худойингиз, сизлар эса Менинг халқим бўласизлар. Фақат Мен кўрсатган йўлдан юринглар, шунда баҳтиёр бўласизлар.» ²⁴ Аммо улар итоат қилишни ҳам, қулоқ солишни ҳам хоҳламадилар. Ёвуз юракларининг ўжарликлариға итоат қилдилар. Олдинга юрмай, орқага кетдилар. ²⁵ Аждодларингиз Мисрдан чиққан кундан бошлаб шу кунга қадар, Мен пайғамбар қулларимни олдингизга кетма–кет жўнатдим. ²⁶ Аммо сизлар Менга қулоқ ҳам солмадингизлар, эътибор ҳам бермадингизлар. Ўжарлиқда ота–боболарингиздан ҳам ўтиб тушдингиз, қилган ишларингиз уларникидан ҳам ёвуздроқ.”

²⁷ Эгамиз шундай деди: “Эй Еремиё, сен бориб, айтганларимнинг ҳаммасини уларга етказасан, лекин улар сенга қулоқ солишмайди. Уларга хитоб қиласан, аммо улар сенга жавоб беришмайди. ²⁸ Шунинг учун сен уларга шундай деб айт: «Сизнинг халқнинг Эгаси Худога итоат қилмади, Унинг гапига кирмади. Ҳақиқат қолмабди, оғзингиздан ҳақ сўз чиқмайдиган бўлди. ²⁹ Эй Қуддус аҳолиси, аза

тутинг! Сочингизни қириб ташланг*. Марсиянгиз яланг қирлар узра нола қилсин. Зеро, Эгамизнинг тоқати тоқ бўлди, У бу наслни рад этиб, ташлаб кетди.”

Хиннум сойлигида қилинган гуноҳлар

³⁰ Эгамиз шундай демоқда: “Яхудо халқи ўзининг Эгаси олдида қабиҳликлар қилди. Улар Менинг номим билан аталган уйимга макруҳ бутларини ўрнатдилар. Уйимни ҳаром қилдилар. ³¹ Шуниси етмагандек, Хиннум сойлигидаги* Тофатда саждагоҳлар* қурдилар. У ерда ўз ўғилу қизларини оловда куйдирдилар. Аммо Мен уларга буни амр қилмаганман, бунақасини хаёлимга ҳам келтирмаганман. ³² Қараб тулинг! — деб айтмоқда Эгамиз. — Шундай кунлар келадики, одамлар бу жойни Тофат ёки Хиннум сойлиги деб атамайди. Бу жой «Қирғин водийси» деб ном олади. У ерда кўп мурдалар дағн қилинади, мурдалар кўплигидан қабрларга жой етмай қолади. ³³ Бу халқнинг жасадлари қушларга ва ёввойи ҳайвонларга ем бўлади, ҳеч ким уларни ҳайдамайди. ³⁴ Яхудо шаҳарларида ва Қуддус кўчаларида шоду хуррамлик садолари бўлмайди, келин-куёвнинг овози эшитилмайди. Бу юрт хувиллаб қолади.”

8-БОБ

¹ Эгамиз шундай демоқда: “Ўша вақтда Яхудо шоҳларининг сяклари, аъёнларнинг, руҳонийларнинг, пайғамбарларнинг ва Қуддус аҳолисининг сяклари қабрлардан олиб чиқилади. ² Уларнинг сяклари қуёш, ой ва юлдузлар остида сочиб ташланади. Зотан, бу одамлар осмон жисмларини севар эдилар, ўшаларга хизмат қиласар эдилар, уларга эргашиб, маслаҳат солар эдилар, ўшаларга сажда этар эдилар. Уларнинг сякларини ҳеч ким йиғиб қўммайди, гўнгдай ер устида ётаверади. ³ Бу ёвуз наслнинг омон қолганларини Мен турли жойларга сургун қиласман. Ўшанда улар яшашдан кўра, ўлимни афзал кўрадиган бўладилар.” Сарвари Оламнинг каломи шудир.

Гуноҳ ва жазо

⁴ Уларга бориб айт, Эгамиз шундай демоқда:

“Йиқилган одам турмайдими?!

Йўлдан адашган ортига қайтмайдими?!

⁵ Нима учун бу халқ Мен кўрсатган йўлдан озди?

Нима учун Қуддус аҳли тўғри йўлга қайтмаяпти?

Улар ёлғонга қаттиқ ёпишиб олдилар,

Ҳузуримга қайтишдан бош тортилар.

⁶ Мен уларнинг гапларига яхшилаб қулоқ солдим,

Биронтаси тўғри гап айтмайди.

Ҳеч бири қилмишидан пушаймон бўлмайди,

«Нималар қилиб қўйдим?» демайди.

Улар жангга чопган отга ўхрайдилар

Ўз йўлларидан қайтмайдилар.

⁷ Ҳаттоки осмондаги лайлаклар

Қайтиб келиш вақтини билади.

Каптар, қалдирғочу турналар*

Мавсумда қўчиш вақтига амал қиласди.

Менинг халқим эса ўз Эгасининг

Қонун-қоидаларини билмайди.

⁸ Сизлар: «Биз дономиз» деб айтасиз,
«Бизда Эгамизнинг қонунлари бор», деб мақтанасиз.
Аслида тафсирчилар қаллоблик қилиб,
Қонунимни ўзгартирдилар.

⁹ Бундай донолар шарманда бўлади,
Саросимага тушиб, тузоққа илинади.
Менинг сўзимни рад этганларни
Доно деб бўладими?!

¹⁰ Шунинг учун уларнинг хотинларини бошқаларга бераман,
Далаларини босқинчиларга топшираман.
Зотан, уларнинг кичигидан тортиб, каттасигача
Нафсини тиёлмай ҳаром йўл билан пул топишади.
Пайғамбаридан тортиб, руҳонийсигача —
Ҳаммаси товламачилик қилишади.

¹¹ Халқимнинг яраларини юзаки даволашади.
Ахвол оғир бир пайтда «ҳаммаси яхши», деб айтишади.

¹² Жирканч ишлари учун улар уяладиларми?
Йўқ, улар уялмайдилар!

Қизариш деган нарсани билмайдилар.
Шунинг учун бошқалардай ҳалок бўладилар,
Уларни жазолаб, хонавайрон қиласман,
— деб айтмоқда Эгамиз. —

¹³ Мен уларнинг ҳосилини тортиб оламан.
Токларида узум қолмайди,
Анжир даражатлари мева тугмайди,
Барглари тўкилиб хазон бўлади.
Уларга нима берган бўлсам,
Ҳаммасидан жудо бўлишади.”
Эгамизнинг каломи шудир.

¹⁴ Яхудо одамлари бир-бирига айтишади:
“Бу ерда нима қилиб ўтирибмиз, ахир?
Қани бўлинглар, йиғилишиб,
Мустаҳкам шаҳарларга қочиб борайлик,
Ўша ерда жон таслим қиласлик.
Эвоҳ, Эгамизга қарши гуноҳ қилдик!
Эгамиз Худо бизни ўлимга маҳкум этди,
Захарли сувдан бизга ичирди.

¹⁵ Биз тинчликни изладик,
Аммо яхшилик келмади.
Шифо топмоқчи эдик,
Аммо ваҳимага дучор бўлдик.

¹⁶ Ана, душман Дан шаҳрига этиб келди*,
У ердан отларининг пишқиргани эшитилмоқда.
Айғирларнинг кишнагани
Бутун юртни титратмоқда.
Душман юртимизни яксон қилмоқчи,
Шаҳарларни вайрон этиб, одамларни ўлдирмоқчи.”

¹⁷ Эгамиз шундай демоқда:

“Мен орангизга илонларни юборяпман,
Бу заҳарли илонлар* сизларни чақади,
Бу илонларни ўйнатиб бўлмайди.”

Еремиёнинг ўз халқи учун тортган жафоси

¹⁸ Қайғуларимга тасалли топа олмаяпман,
Юрак-бағрим эзилиб кетди.

¹⁹ Халқим фарёд этмоқда:
Юрт бўйлаб дод-войлари эшитилмоқда:
“Наҳотки Эгамиз Куддусни* тарқ этган бўлса?!
Наҳотки Шоҳимиз Сионда бўлмаса?!”

Эгамиз шундай жавоб берди:
“Улар бутлари билан қаҳримни келтирдилар-ку!
Яроқсиз бегона тасвирлари билан Мени ғазаблантирилар-ку!”

²⁰ Халқ эса шундай деб нолимоқда:
“Үрим вақти ўтди,
Ёз ҳам тугади,
Биз эса ҳануз қутқарилмадик!”

²¹ Халқим тортган азоблардан эзилиб кетдим,
Қайғуриб, ваҳимага тушдим.

²² Нима, Гиладда* малҳам йўқмиди?!
Табиб йўқмиди?!
Ундей бўлса, нега халқим шифо топмаяпти?

9-БОБ

¹ Кошкийди, бошим бир булоқ бўлса,
Кўзларим ёшлар чашмаси бўлса.
Халқим ҳалокатга учрагани учун,
Кечаю кундуз йиғлаган бўлар эдим!
² Қанийди, сахрода бир қўнолғам бўлса,
Мен халқимни тарқ этган бўлардим,
Уларнинг орасидан чиқиб кетардим!
Ахир, уларнинг ҳаммаси зинокор, хоинлар тўдасидир.

³ Эгамиз шундай демоқда:
“Халқим тилларини камон каби қайириб,
Ёлғон сўзларни ўқдек отишади.
Халқим ноҳақлик қилиб, юртда кучайиб бормоқда,
Ёмонлик кетидан ёмонлик қилмоқда,
Улар Мени тан олмайдилар.

⁴ Қўшнингиздан эҳтиёт бўлинг,
Қариндошингизга ишонманг.
Ҳамма қариндошингиз ёлғончи*,
Ҳамма қўшнингиз тухматчи.

⁵ Қўшни қўшнисини алдайди,
Биронтаси тўғри гап гапирмайди.

Тили ёлғон гапиришга ўрганиб қолган.

Холдан тойгунча гуноҳ қилишади.

⁶ Эй Еремиё, сен ёлғончилар орасида яшаяпсан,

Улар ёлғонлари дастидан

Мени тан олишни хоҳламаяптилар."

Эгамизнинг каломи шудир.

⁷ Шу сабабдан Сарвари Олам демоқда:

"Мен халқимни синовдан ўтказиб, поклайман.

Уларни бошқа нима ҳам қилар эдим?!

⁸ Уларнинг тили ҳалокат келтирадиган ўққа ўхшайди,

Оғзидан фақат ёлғон сўзлар чиқади.

Қўшниларига ширин гапиришади,

Ичларида эса уларни тузоққа туширмоқчи бўлишади.

⁹ Шундай экан, бу қилмишлари учун уларни жазоламайми?!

Шундай бир ҳалқдан ўч олмайми?"

Эгамизнинг каломи шудир.

¹⁰ Мен тоғлар учун фарёд қилиб, йиғлайман,

Даштдаги яйловлар учун марсия айтаман,

Чунки яйловларнинг ҳаммаси қуриб қолган.

У ердан ҳеч ким ўтмайди,

Сигирларнинг маъраши эшитилмайди.

Қушлару ҳайвонлар бу ерларни тарқ этган.

¹¹ Эгамиз шундай деди:

"Мен Қуддусни вайрон қиласман,

Бу ерни чиябўриларнинг маконига айлантираман.

Яхудо шаҳарлари ҳувиллаб қолади,

У ерда биронта ҳам одам қолмайди."

¹² Мен Эгамиздан сўрадим:

— Эй Эгам, нечун бу юрт шу қадар вайрон бўлиб кетди? Нечун саҳро каби ҳувиллаб қолди? У ерда биронта ҳам сайёҳ кўринмайди. Қайси фаросатли одамнинг бунга ақли етади?! Сен буларни ким орқали ҳалққа етказасан?

¹³ Эгамиз шундай жавоб берди:

— Мен халқимга қонунлар берган эдим, лекин улар рад этдилар, Менга итоат этмадилар, қонунларимга риоя қилмадилар. ¹⁴ Аксинча, юракларининг ўжарликларига итоат қилдилар, ота-боболари ўргатгандек Баалга сифиндилар.

¹⁵ Шунинг учун Мен бу ҳалққа аччиқ ўтдан едириб, заҳарли сувдан* ичирман, — деб айтмоқда Исройл ҳалқининг Худоси — Сарвари Олам. — ¹⁶ Ўзлари ва ота-боболари билмаган ҳалқлар орасига Мен уларни тарқатиб юбораман. Уларнинг кетидан қилич жўнатиб, қирдириб ташлайман.

Қуддус аҳолиси аза тутади

¹⁷ Сарвари Олам шундай демоқда:

"Энди қулоқ солинг!

Йиғичи аёлларни* чақириб келинг,

Уларнинг энг моҳирлари келсин."

¹⁸ Ҳалқ шундай деди:

“Уларга айтинг, тезроқ келсин.
 Биз учун марсия айтишсин,
 Кўзимиздан ёшлар оқсин,
 Киприкларимиздан сувлар тўкилсин.
¹⁹ Ана, Қуддусдан* фарёд эшитилмоқда:
 «Хонавайрон бўлдик!
 Қандай шарманда гарчилик!
 Юртимизни тарқ этишга мажбурмиз,
 Уйларимиз вайрон бўлди.»”

²⁰ Эй аёллар, Эгамизнинг сўзини эшиting,
 Унинг оғзидан чиқсан ҳар бир сўзига қулоқ солинг.
 Қизларингизга марсия айтишни ўргатинг,
 Бир-бирингизга йиғи қўшигини ёдлатинг.
²¹ Ана, деразалардан ўлим ўрмалади,
 Қалъаларимизга кириб олди.
 Кўчалардаги болаларни йўқ қилиб ташлади,
 Майдонлардаги ёшларни қириб юборди.
²² Эй аёллар, сизлар айтинг:
 “Эгамиз шундай демоқда:
 «Одамларнинг жасадлари ётади
 Даладаги гўнг каби
 Ўроқ солинган буғдой каби,
 Уларни ҳеч ким йиғиштириб олмайди.»”

²³ Эгамиз шундай деб айтмоқда: “Донолар донолиги билан мақтанмасин. Кучлилар кучи билан мақтанмасин. Бойлар бойлиги билан мақтанмасин. ²⁴ Ким мақтанмоқчи бўлса, Эгамизни биламан, деб мақтансин, Эгамизни тушунаман, деб мақтансин. Мен Эгангизман. Мен меҳр-шафқат кўрсатаман, ер юзида адолату ҳақиқат ила иш тутаман. Бундай қилишдан Мен завқланаман.” Эгамизнинг каломи шудир.

²⁵ Эгамиз демоқда: “Шундай кунлар келадики, бадани суннат қилинган, аммо юраги суннат қилинмаган одамларнинг* ҳаммасини Мен жазолайман. ²⁶ Ҳа, Мен Мисрликларни, Эдом наслини, Оммон халқини, Мўабликларни, сочини олдириб юрадиган* чўл қабилаларининг ҳаммасини* ва улар билан бирга йўз халқим Яхудони жазолайман. Аслида, бу халқларнинг ҳаммаси суннатсиз, уларнинг юраги суннат қилинмаган.”

10-БОБ

Бутлар ҳақида

¹ Эй Исроил халқи, Эгамиз сизларга айтаётган сўзларга қулоқ солинг. ² Эгамиз шундай демоқда:

“Бошқа халқларга тақлид қилманглар,
 Бошқа халқлар сингари,
 Осмондаги аломатлардан қўрқманглар.
³ Халқларнинг удумлари беҳуда!
 Улар ўрмондан дараҳт кесади,
 Ҳунарманд болтаси билан унга шакл бериб,

⁴ Кумушу олтин билан безатади.
 Йиқилиб кетмасин дея, мих билан маҳкамлайди,
⁵ Бутлари полиздаги қўриқчиларга ўхшайди.
 Улар гапира олмайди.
 Уларни кўтариб юриш керак бўлади,
 Ўзлари юра олмайди.
 Улардан қўрқманглар,
 Уларнинг қўлидан ҳеч қандай ёмонлик келмайди,
 Яхшилик ҳам қила олмайди.”

Еремиё Худонинг шаънига ҳамду санолар айтади

⁶ Эй Эгамиз, Сенга ўхشاши йўқ!
 Сен буюқдирсан,
 Сенинг номинг улуғ ва қудратлидир.
⁷ Эй элларнинг Шоҳи,
 Сендан қўрқмайдиган бирор зот борми?!
 Сен бунга лойиқдирсан.
 Халқларнинг донишмандлари орасида,
 Уларнинг шоҳлари орасида
 Сенга ўхшаши йўқ.
⁸ Донишмандларию шоҳлари* аҳмоқ ва бефаросат.
 Улар бетайин ёғоч бутларидан маслаҳат олишади.
⁹ Бутларини ясаш учун кумушни Таршишдан,
 Олтинни Уфаздан келтиришади.
 Бутларни хунарманду заргарлар ясаган.
 Кўк ва сафсар либослар билан безаган,
 Ҳаммаси — моҳир усталарнинг ишидир.
¹⁰ Аммо Эгамиз ҳақ Худодир.
 У барҳаёт Худо ва абадий Шоҳдир.
 Ғазабланганда ер силкинади,
 Унинг қаҳрига халқлар дош бера олмайди.

¹¹ Эгамиз шундай деди: “Бошқа халқларга айт: «Бу худолар еру осмонни яратмаган. Улар ер юзидан ва осмон остидан йўқ бўлиб кетади.»”*

¹² Эгамиз қудрати ила ерни яратди,
 Донолиги ила дунёни бунёд этди,
 Идроки ила осмон гумбазини ўрнатди.
¹³ Унинг овозидан осмондаги сувлар гулдурайди,
 У дунёнинг тўрт бурчидан булатларни олиб келади.
 Ёмғир ёғдирганда чақмоқ чақтиради,
 Омборларидаги шамоллардан эстиради.
¹⁴ Унинг олдида ҳамма одамлар аҳмоқ ва нодондир.
 Заргарлар ясаган бутлари туфайли шарманда бўлишади.
 Ясаган санамлари соҳтадир, уларнинг жони йўқ.
¹⁵ Бу бетайин бутлар алдамчиdir.
 Уларни жазолаганим заҳоти йўқ бўлишади.
¹⁶ Ёқубнинг Худоси эса ундей эмас.
 Бутун борлиқни У яратган,
 Исроил қабиласини Ўзига мулк қилган.

Унинг номи Сарвари Оламдир.

Сургун вақти яқинлашиб келмоқда

¹⁷ Эй қуршовда яшаётганлар!

Бор-будингизни йигиштириб олинг.

¹⁸ Зеро, Эгамиз шундай демоқда:

“Мен сизларни Исроил юртидан улоқтириб ташлайман,
Бошингизга кулфат ёғдиралан,
Токи сизлар буни сезинглар.”

¹⁹ Шўрим қурсин! Шунчалик азобларга қолдим!

Оғир яраланган эканман.

Аммо ўзимга ўзим: “Бошимда шу дард бор экан,
Унга чидашим керак”, дедим.

²⁰ Чодирим йиқитилган, иплари узиб ташланган.

Фарзандларим кетди, улар йўқ бўлди.

Энди чодиримни ким тикади?!

Чодиримнинг пардаларини ким осади?!

²¹ Ахир, чўпонлар аҳмок,

Улар Эгамиздан маслаҳат олмадилар.

Шунинг учун ҳам ишлари ўнгидан келмади,

Қўйлари ҳар ёқقا тарқалиб кетди.

²² Эшигинлар! Бир хабар келмоқда!

Ана, шимолдан* шовқин-сурон кўтарилимоқда!

Лашкарлар Яҳудо шаҳарларини хароб қиласи эмиш,

Чиябўрилар яшайдиган маконга айлантирас эмиш.

Еремиё ибодат қилади

²³ Эй Эгам, биламан,

Одам зоти ўз тақдирини ўзи белгилай олмайди,
Ўз қадами ўзининг ихтиёрида эмас.

²⁴ Эй Эгам, мени жаҳл устида жазоламагин.

Адолатинг илиа ҳақ йўлга солгин,

Акс ҳолда, мени йўқ қилиб юборасан.

²⁵ Сени тан олмайдиган халқлар устига қаҳрингни соч,

Сенга сажда қилмайдиган эллар устига соч,

Ахир, улар Ёқуб наслининг бошини едилар.

Ҳаммасини ҳалок этиб, йўқ қилдилар,

Юртини харобазорга айлантирилар.

11-БОБ

Еремиё ва аҳд

¹ Еремиёга Эгамизнинг қуийдаги сўзи аён бўлди: ² “Менинг Исроил халқи билан тузган аҳд шартларимга қулоқ сол. Буларни Яҳудо халқи ва Қуддус ахолисига етказ. ³ Уларга айт: «Исройл халқининг Худоси — Эгамиз шундай демоқда: ушбу аҳд шартларига риоя қилмаган ҳар бир одам лаънати бўлсин!

⁴ Мен ота-боболарингизни Мисрдан, ўша темир ўчоқ ичидан олиб чиқсан эдим. Уларга, гапларимга қулоқ солинглар, ҳамма амларимни бажаринглар, деб айтган

эдим. Агар шундай қилсангиз, сизлар Менинг халқим бўласиз, Мен эса сизнинг Худойингиз бўламан, деб айтдим. ⁵ Мен ота–боболарингизга берган қасамимни бажариш учун шу сўзларни айтган эдим. Мана, Мен уларга ваъда қилган, сут ва асал оқиб ётган юртда* сизлар яшаб юрибсизлар.»"

"Омин, эй Эгам, айтганинг келсин", дедим мен.

⁶ Эгамиз менга шундай деди: "Айтадиган гапларимнинг ҳаммасини Яхудо шаҳарларида ва Қуддус қўчаларида шундай деб эълон қилгин: ушбу аҳднинг шартларини эшитинглар, уларга риоя қилинглар. ⁷ Мен ота–боболарингизни Мисрдан олиб чиққанимдан бери уларни огоҳлантириб келдим. Уларга: «Менинг гапларимга қулоқ солинглар», деб қайта–қайта айтдим. ⁸ Аммо улар итоат қилмадилар, Менга қулоқ солмадилар. Аксини қилиб, ёвуз юракларининг ўжарликларига итоат этдилар. Шунинг учун аҳдда ёзилган ҳамма лаънатларни уларнинг бошига солдим. Мен уларга буюрган аҳдимнинг шартларини бажармаганлари учун шундай қилдим.»

⁹ Эгамиз менга деди: "Яхудо халқи ва Қуддус аҳолиси Менга қарши фитна уюштиришмоқда. ¹⁰ Улар ота–боболарининг эски гуноҳларига қайтиши. Ота–боболари сингари, гапларимга қулоқ солмай, бегона худоларга эргашиб, сажда қилиши. Яхудо халқи Исройл халқига* тақлид қилди, Мен ота–боболари билан тузган аҳдимни улар бузиши. ¹¹ Шунинг учун уларнинг бошларига шундай кулфат келтираманки, биронтаси ҳам қутулиб қололмайди, — деб айтмоқда Эгамиз. — Менга илтижо қилишса ҳам, уларнинг илтижоларига қулоқ солмайман. ¹² Ўшанда Яхудо халқи билан Қуддус аҳолиси ўз худоларига илтижо қилишади. Улар бу худоларига қурбонликлар келтиришар эди. Аммо кулфат куни ўша худолари уларни асло қутқаролмайди. ¹³ Эй Яхудо халқи, шаҳарларингиз сони қанча бўлса, худоларингиз ҳам шунчадир. Қуддусдаги қўчалар қанча қўп бўлса, қурбонгоҳларингиз ҳам шунчадир. Сизлар бу қурбонгоҳларни жирканч Баалга қурбонликлар келтириш учун қургандингизлар.

¹⁴ Эй Еремиё, сен бу халқ учун ибодат қилма. Улар учун илтижо қилиб ёлворма. Уларнинг бошларига кулфат тушиб, илтижо қилганларида, Мен уларга қулоқ солмайман. ¹⁵ Азиз халқим шунча жирканч ишлар қилди. Энди уйимга киришларига нима ҳақлари бор?! Ваъдалару қурбонликлар билан кулфатнинг олдини олиб бўлармиди?! Ахир, халқим қабиҳликлар қилаётганидан севинди–ку!"

¹⁶ Эгамиз Ўз халқини "Яхши мева берадиган, мафтункор ям–яшил зайдун дарахти" деб атаган эди. Аммо энди Эгамиз бўроннинг даҳшатли товуши остида дарахтга ўт қўяди, унинг шох–шаббалари ёниб кетади. ¹⁷ Бу дарахтни эккан Сарвари Оламнинг Ўзи уни йўқ қилишга амр берди. Зеро, Исройл ва Яхудо халқлари қабиҳликлар қилдилар. Баалга қурбонликлар келтириб, Худони ғазаблантирилар.

Еремиёнинг жонига қасд қилишади

¹⁸ Эгамиз менга душманларимнинг фитнасини аён қилди. Эгамиз уларнинг ёвуз қилмишларини қўрсатгани учун, мен бу ҳақда хабар топдим. ¹⁹ Мен бўғизланишга олиб кетилаётган ювош қўзидаи бўлган эканман. Душманларим менга қарши фитна уюштирганларини пайқамаган эканман. Улар шундай деб айтишган эди: "Дарахт ва унинг мевалари кесилгандай, келинглар, уни ҳам бу дунёдан даф қилайлик, унинг хотирасини ўчирайлик!"

²⁰ Эй Сарвари Олам,
Сен адолат билан ҳукм қиласан,
Инсоннинг юрагини, хаёлларини синайсан.

Душманларимдан ўч олганингни кўрай,
Даъвоимни Ўзинг ҳал қил!

²¹ Шунда Эгамиз менга деди: “Эй Еремиё, Онотўт* аҳолиси сенга: «Эгамизнинг номидан гапирма, бўлмаса ўласан», деб айтиб юришибди. ²² Аммо Мен, Сарвари Олам, айтаманки, уларни жазолайман! Йигитлари қиличдан ўлади. Ўғил-қизлари қаҳатчилиқдан нобуд бўлади. ²³ Уларнинг биронтаси омон қолмайди. Белгиланган вақтда Онотўт аҳолисининг бошига қулфат келтираман.”

12-БОБ

Еремиё Эгамизга саволлар беради

¹ Сен билан даъволашганимда, эй Эгам,
Сен ҳар доим ҳақ бўлиб чиқсан.
Шундай бўлса-да, Сен билан яна гаплашмоқчиман,
Адолат хусусида савол бермоқчиман.
Нечун фосиқларнинг иши юришади?
Нечун мунофиқлар роҳатда яшайди?
² Уларни Сен экиб ундиридинг,
Улар ўсиб ҳосилга кирдилар.
Номинг уларнинг оғзидан тушмайди,
Аммо диллари Сендан узоқдир.
³ Лекин Сен, эй Эгам, мени биласан.
Сен мени синагансан,
Дилим Сенга мойил эканини Ўзинг кўрдинг.
Энди ёвларимни бўғизланадиган қўйлардай судрагин!
Бўғизлашга тайёрлаш учун ажратиб қўйгин!

⁴ Эвоҳ, қачонгача ер қақраб ётади?
Қачонгача далалардаги ҳамма ўтлар қурийди?
Бу ерда яшайдиган фосиқларнинг дастидан,
Қушлару ҳайвонлар нобуд бўлди.
Бу одамлар: “Бизга нима бўлишини
Еремиё қаердан ҳам биларди?!”* деб айтишади.

⁵ Эгамиз менга деди: “Эй Еремиё,
Сен одамлар билан пойга қилиб ҳолдан тойган бўлсанг,
Қандай қилиб отлар билан пойга қила оласан?!
Фақат осойишта юртда ўзингни бехатар сезсанг,
Иордан бўйидаги чакалакзорда* нима қиласан?!”
⁶ Ҳатто қариндошларинг ҳам сендан юз ўтириди,
Ўз оиласан сенга хиёнат қилди.
Овози борича сенга дўқурди.
Улар сенга ширин гапиришса ҳам,
Уларнинг сўзларига ишонма.”

Эгамиз Ўз халқи учун қайғуради

⁷ Эгамиз шундай деб айтди:
“Мен хонадонимни тарқ этдим,
Мулк қилиб олган халқимни рад этдим.

Севган халқимни душманларининг қўлига бердим.
⁸ Ўз халқим Менга
 Ўрмондаги шердай бўлиб қолди.
 У Менга қараб бўкирди,
 Шунинг учун ундан нафратландим.
⁹ Ўз халқим Менга
 Олачипор калхатдай бўлиб қолди.
 Бошқа калхатлар халқимни ўраб олди!
 Боринг, барча ёввойи ҳайвонларни йифинг,
 Халқимни ғажиб ташлашсин.
¹⁰ Тўда-тўда чўпонлар узумзоримни хароб қилдилар,
 Даламни улар пайҳон қилдилар.
 Ҳа, гўзал даламни ташландиқ чўлга айлантирилар.
¹¹ Улар еримни хароб қилдилар,
 Ташландиқ ерим кўз олдимда қақраб ётиби.
 Бутун юртим вайрон бўлди,
 Аммо бу билан ҳеч кимнинг иши йўқ.
¹² Босқинчилар сахродаги
 Ҳамма яланг қирларни эгаллаб олдилар.
 Энди Менинг қиличим бутун юртни вайрон қиласди,
 У бошидан бу бошигача ҳаммани қириб ташлайди.
 Бехатар яшаётган биронта одам қолмайди.
¹³ Менинг халқим буғдой экди,
 Аммо тикан ўриб олди,
 Зўр бериб ишлади,
 Аммо ҳеч нарсага эришмади.
 Қаттиқ қахрим уларнинг ҳосилини нобуд қилди.
 Улар ҳосилсиз қолиб, шарманда бўлишди.”

Эгамиз қўшни халқларга ваъда беради

¹⁴ Эгамиз шундай демоқда: “Мен халқимга Истроил юртини мулк қилиб берган эдим, аммо унинг ёвуз қўшнилари халқимга ҳужум қилиб, юртимни талон-тарож қилдилар. Мен бу ёвуз халқларни ўз юртларидан суғуриб ташлайман. Яхудо халқини уларнинг исканжасидан суғуриб оламан. ¹⁵ Ўша ёвуз халқларни суғуриб ташлаганимдан кейин, уларга яна раҳм-шафқат қиласман. Ҳаммасини ўз юртларига, ўз мулкларига қайтариб олиб келаман. ¹⁶ Илгари бу халқлар Истроил халқига Баал номи билан қасам ичишни ўргатган эдилар. Агар энди улар халқим Истроилнинг йўлини астойдил ўргансалар, «Эгамиз шоҳид» дея Менинг номим билан қасам иссалар, халқим орасида ўрнашиб оладилар. ¹⁷ Борди-ю, биронта халқ Менга итоат этмаса, ўша халқни таг-томири билан қўпориб ташлайман.” Эгамизнинг каломи шудир.

13-БОБ

Зифир толасидан тўқилган қийиқча

¹ Эгамиз менга шундай деди: “Бор, ўзинг учун зифир қийиқча сотиб ол. Уни белингга боғла, аммо сувга теккизма.” ² Эгамизнинг амрига биноан, мен қийиқча сотиб олиб, белимга боғлаб олдим. ³ Кейин Эгамиз менга шу сўзини аён қилди:
⁴ “Сотиб олган белингдаги қийиқчани қўлингга олгин-у, Поро анҳорининг* бўйига туш. Қийиқчани қоянинг ёриқ жойига яшириб қўй.” ⁵ Мен Эгамиз

буюрганидек қилдим. Қийиқчани Поро анҳорининг бўйига яшириб қўйдим.

⁶ Орадан анча кун ўтгандан сўнг, Эгамиз менга шундай деди: “Қани, Поро анҳорининг бўйига бор, Менинг амримга биноан, у ерга яшириб қўйган қийиқчангни олиб кел.” ⁷ Шунда мен бориб, қийиқчани ўзим яшириб қўйган жойдан ковлаб олдим. Аммо қийиқча чириб кетган, ҳеч нарсага ярамайдиган бўлиб қолган эди.

⁸ Шунда Эгамиз менга Ўз сўзини аён қилди. ⁹ Эгамиз шундай демоқда: “Мен Яхудо халқининг мағрурлигини ва Қуддус аҳолисининг такаббурлигини қийиқча каби чиритаман. ¹⁰ Бу фосиқ халқ сўзларимни эшитишдан бош тортди, ёвуз юрагининг ўжарликларига итоат қилди. Бегона худоларга эргашди, уларга хизмат қилиб, сажда этди. Улар ўша чириб кетган қийиқча каби, ҳеч нарсага ярамайдиган бўлиб қоладилар. ¹¹ Қийиқча одамнинг белига ёпишиб тургани каби, Мен жамики Исройл ва Яхудо халқларини ўзимга яқин тутар эдим: улар Менинг халқим бўлишади, Менга шон-шуҳрат, олқишилар ва шараф келтиришади деб, шундай қилган эдим. Аммо улар Менга қулоқ солмадилар.” Эгамизнинг каломи шудир.

Шароб учун мешлар

¹² Исройл халқининг Худоси — Эгамиз менга шундай деди: “Эй Еремиё, халқقا айт: «Шароб мешлари шароб билан тўлдирилиши керак.» Борди-ю, улар сенга: «Шароб мешлари шароб билан тўлдирилиши кераклигини ўзимиз ҳам биламиз», деб айтишса, ¹³ сен уларга шундай деб жавоб бер: «Эгамиз демоқда: Мен бу юртдаги ҳамма одамларни маст* қиласман. Довуд тахтида ўтирган шоҳдан тортиб, руҳонийлар, пайғамбарлар ва Қуддуснинг бутун аҳолисигача — ҳаммасини маст қиласман. ¹⁴ Мен уларни бир-бирларига, ота-оналарни болаларига қарши қилиб қўяман, — деб айтмоқда Эгамиз. — Уларни аямай йўқ қилиб ташлайман, уларга ачинмайман, раҳм-шафқат қилмайман.»”

Еремиё такаббурлик оқибатлари ҳақида огоҳлантиради

¹⁵ Эшитинглар, қулоқ солинглар,

Катта кетманглар,

Зотан, Эгамиз гапирмоқда.

¹⁶ Худо устингизга зулмат юбормасдан олдин,

Қоронғи қирларда қоқилмасингиздан олдин,

Эгангиз Худони улуғланг.

Акс ҳолда, сиз кутаётган ёруғликни

У зулматга айлантиради,

Ўша ёруғликни тим қоронғи қиласди.

¹⁷ Агар сиз гапларимга қулоқ солмасангиз,

Мағрурлигингиз учун қалбим пинҳон йиғлади.

Мен аччиқ-аччиқ қўз ёш тўкаман,

Ахир, Эгамизнинг қўйлари

Асирикка олиб кетилади.

¹⁸ Эгамиз менга деди:

“Шоҳга ва она маликага* шундай дегин:

«Тахтдан тушинглар,

Ахир, чиройли тожингиз

Бошингиздан тушиб кетди.»

¹⁹ Нагав чўлидаги шаҳарлар беркитилган,

Дарвозаларни очадиган кимса йўқ.

Яхудо халқи асирикка олиб кетилди,
Ха, бутун халқ сургун қилинди.”

²⁰ Эй Куддус, шимолдан келаётгандарга бир қара!
Қани сенинг чиройли қўйларинг?

Қани сенга топширилган сурувинг?

²¹ Сен иттифоқдошларингга ўзинг устозлик қилган эдинг,
Эгамиз ўшаларни бошингга чиқаргандা, нима дер экансан?
Шунда сен тўлғоқ тутган аёлдай бўлиб қоласан-ку!

Дард азобида қолиб кетасан-ку!

²² “Нега булар бошимга тушди?” дерсан.

Сен кўп гуноҳ қилдинг,
Этагинг кўтарилиди, хўрландинг.

²³ Ҳабашистонлик* ўз терисининг рангини ўзгартира оладими?!
Қоплон ўз терисидаги холларини йўқота оладими?!
Шу сингари, сизлар ҳам яхшилик қила олмайсизлар,
Ёмонлик қилишга одатланиб қолгансизлар!

24-25 Эгамиз шундай деб айтмоқда:
“Гармсел* сомонни тўзғитгандай,
Мен сизларни сочиб ташлайман.
Бу сизларнинг қисматингиздир,
Мен бошингизга ёғдирадиган кулфат шудир.

Сизлар Мени унутдингизлар,
Сохта худоларга инондингизлар.

²⁶ Мен кўйлагингиз этагини баланд кўтараман,
Шармандангизни чиқараман.

²⁷ Далаларда, қирларда қилган
Жирканч ишларингизни Мен кўрдим,
Зино ва шахвоний қийқириқларингизни эшитдим.

Уятсизларча қилган фоҳишабозлигингизнинг гувоҳи бўлдим*.
Эй Куддус, ҳолингга вой!
Қачонгача булғаниб юрасан?!”

14-БОБ

Даҳшатли қурғоқчилик

¹ Еремиёга Эгамизнинг қурғоқчилик ҳақидаги сўзи аён бўлди:

² “Яхудо аза тутмоқда,
Шаҳарлари адойи тамом бўлди.
Одамлар қайғуга ботган,
Бағирларини ерга бериб ётибди,
Куддусдан фарёд кўтарилимоқда.

³ Асилзодалар хизматкорларини сувга юбордилар.
Хизматкорлар сардобаларга борган эдилар,
Аммо сув топа олмадилар.

Идишлари бўм-бўш қайтиб келдилар.
Улар тушкунликка тушдилар,
Шарманда бўлиб қолдилар,

Уятдан юзларини беркитиб олдилар.
⁴ Ёмғир ёғмагани учун ер ёрилиб кетди,
Деҳқонлар умидсизликка тушди,
Юзларини беркитиб олишди.
⁵ Ҳатто чўлдаги она оху ҳам,
Ўт-ўлан бўлмагани учун,
Янги туғилган охучаларини ташлаб кетмоқда.
⁶ Қулонлар яланг қирларда туриб,
Чиябўрилар каби ҳансираяпти,
Ўт йўқлигидан қулонларнинг қўзлари киртайиб қолган.”

⁷ Гуноҳларимиз бизга қарши гувоҳлик берса-да,
Ўз номинг ҳақи-ҳурмати бизга раҳм қил, эй Эгам.
Ахир, биз Сенга кўп хиёнат қилдик,
Сенга қарши гуноҳ ишлар қилдик.
⁸ Эй Истроилнинг ёлғиз умиди,
Кулфат вақтида Кутқарувчиси!
Нечун юртимизда мусоғирга ўхшайсан?
Бир кечагина тунайдиган сайёҳга ўхшайсан?
⁹ Нега саросимага тушган одамга ўхшайсан?
Нега ёрдам бера олмайдиган жангчига ўхшайсан?
Эй Эгам, Сен бизнинг орамиздасан-ку!
Биз Сеникимиз.
Бизни тарк этма!

¹⁰ Эгамиз бу халқ ҳақида шундай демоқда:
“Улар ўзларини сира тия олмайдилар,
Дайдиб юришни ҳақиқатан яхши кўрадилар.
Шунинг учун Мен улардан рози эмасман,
Энди қабиҳликларини ёдга оламан,
Гуноҳлари учун уларни жазолайман.”

¹¹ Сўнг Эгам менга тайинлаб деди:

— Бу халқ учун ибодат қилма. ¹² Улар рўза тутишса ҳам, Мен уларнинг илтижоларига қулоқ солмайман. Менга атаб қурбонликлар куйдиришса ҳам, дон назрларини олиб келишса ҳам қабул қилмайман. Аксинча, уларни қаҳатчилик, уруш ва ўлат орқали қириб ташлайман.

¹³ Мен эса шундай дедим:

— Ё Эгам Раббий, пайғамбарлар бу халқقا, уруш ва қаҳатчилик бўлмайди, сизлар бу юртда чинакамига осойишта ҳаёт кечирасизлар, деб айтишмоқда-ку.

¹⁴ Эгамиз менга шундай жавоб берди: “Пайғамбарлар Менинг номимдан ёлғон гапиришмоқда. Мен уларни юбормаганман, уларга гапиришни буюрганман. Улар сизларга уйдирмаларни ўзларича башорат қилишяпти, бехуда фол очиб, хаёлларига келган ёлғонларни гапиришяпти. ¹⁵ Ўша пайғамбарлар Менинг номимдан гапиришса ҳам, уларни Мен жўнатмаганман. Улар: «Юртда уруш ва қаҳатчилик бўлмайди», деб айтаетган эканлар, аммо Мен айтаманки, ўша пайғамбарлар уруш ва қаҳатчилиқдан нобуд бўлишади. ¹⁶ Уларнинг гапларини тинглаётган одамлар ҳам уруш ва қаҳатчилиқдан ўлади. Жасадлари Қуддус кўчаларида қолиб кетади. Уларнинг, хотинларининг, ўғил-қизларининг жасадларини кўмадиган одам бўлмайди. Қилган қабиҳликларини Мен

ўзларининг бошларига соламан.

¹⁷ Сен уларга шундай деб айт:

«Кечаю кундуз кўзларимдан ёш оқяпти,
Ўзимни тўхтата олмаяпман.
Зоро, бокира қизим — Менинг халқим,
Қаттиқ зарба еди, оғир яраланди.
¹⁸ Далага чиқаман,
Эвоҳ, ана, қиличдан ҳалок бўлганлар ётибди.
Шаҳарга кираман,
Ана, очарчиликдан ўлганлар ётибди.
Пайғамбару руҳонийлар эса пул дардида
Одамларга бемаъни маслаҳатлар бериб юрибдилар*.»”

Еремиё Худога илтижо қиласади

¹⁹ Эй Эгамиз, наҳотки Яҳудони бутунлай рад этган бўлсанг?!
Наҳотки Қуддусдан* ҳазар қилсанг?!
Нечун бизни оғир яраладинг?
Шифо топа олмаяпмиз-ку!
Биз тинчликни изладик, аммо яхшилик келмади,
Шифо топмоқчи эдик, аммо ваҳимага дучор бўлдик.
²⁰ Эй Эгамиз, Сенга қарши гуноҳ қилдик!
Қабиҳликларимизга иқрор бўлдик,
Ҳа, ота-боболаримизнинг айбларини тан оламиз.
²¹ Номинг ҳақи-хурмати бизни рад этма,
Улуғвор таҳтинг турган жойни хор қилма.
Биз билан тузган аҳдингни ёдингда тут,
Ўтинамиз, аҳдингни бузма.
²² Ҳалқларнинг бетайин бутлари ёмғир ёғдира олармиди?!
Ёғингарчилик осмоннинг хоҳиши билан бўлармиди?!
Буларни қилишга қодир Сен эмасми, эй Эгамиз Худо?!
Биз умидимизни Сенга боғлаганмиз,
Зотан, буларнинг ҳаммасини қила оладиган Сенсан.

15-БОБ

Яҳудо халқининг қисмати

¹ Эгамиз менга деди: “Ҳатто Мусо билан Шомуил ҳузуримда туриб, ёлворганда ҳам, Мен бу халққа ачинмаган бўлардим. Бу халқни ҳузуримдан ҳайдай! Йўқолишсин! ² Улар сендан «Қаерга борамиз?» деб сўрашса, уларга айт, Эгамиз шундай демоқда:

«Ҳамма пешанасида борини кўрсинг,
Баъзилар ўлатга йўлиқиб нобуд бўлсин,
Баъзилар қиличдан ўтказилсин,
Баъзилар очликдан қирилиб кетсин,
Баъзилар асирилкка тушиб, сургун қилинсин.»”

³ Эгамиз демоқда: “Уларнинг бошига тўрт хил балою офатни келтираман: улар қиличдан ҳалок бўлишади, жасадларини итлар судрайди, қушлар ва ёввойи

ҳайвонлар уларни ғажиб ташлайди.⁴ Ҳизқиё ўғли Манаше Яхудо шоҳлиги таҳтида ўтириб, Қуддусда кўп қабиҳликлар қилган эди*. Ўша қабиҳликлар туфайли дунёдаги барча шоҳликлар халқимдан ҳазар қиласидиган бўлади.”

⁵⁻⁶ Эгамиз шундай демоқда:
 “Эй Қуддус, ким сенга ачинар экан?!
 Ким сен учун мотам тутар экан?!
 Биронтаси сенга келиб,
 Ҳол-аҳвол сўрармикан?!
 Сен Мени рад этдинг,
 Менга орқа ўгирдинг.
 Сенга раҳм қиласидиган чарчадим.
 Энди сенга қарши қўл кўтараман,
 Сени йўқ қилиб юбораман.
⁷ Мен сени юртнинг ҳар бир шаҳрида
 Буғдойни совургандай совураман.
 Сени фарзандларингдан жудо қиласаман.
 Эй халқим, сени нобуд этаман,
 Ахир, сен ўз йўлингдан қайтмадинг.
⁸ Мен беваларингни денгиз қумидан ҳам кўп қиласаман,
 Йигитларингнинг оналарига қарши
 Куппа-кундуз қуни қирғин қилувчини жўнатаман.
 Тўсатдан бошларига даҳшат ва азоб-уқубат соламан.
⁹ Етти фарзанднинг онаси ҳолдан тойиб, жон беради.
 Унинг қуёши кундуз қуни ботади,
 У хўрланиб, шарманда бўлади.
 Омон қолганлари душман қиличидан ўлади.”
 Эгамизнинг каломи шудир.

Еремиё Эгамизга шикоят қиласиди

¹⁰ Шўрим курсин! Нега онам мени дунёга келтирган экан-а?! Мен бутун юрт билан тортишиб, жанжаллашяпман. Қарз олмаган, қарз бермаган бўлсам ҳам, ҳамма мени қарғамоқда.

¹¹ Эгамиз шундай деди: “Эй Қуддус аҳли, Мен айримларингизни омон қолдираман, ўшаларга яхшироқ тақдир ато қиласаман. Қолганларингизнинг устингизга эса душман тортиб келаман, бошингизга кулфату оғир қунлар соламан.¹² Эй Яхудо халқи, сиз бронза ва темирни синдира олмаганингиз каби, шимолдан* сизга хужум қиласидиган душманларни ҳам синдира олмайсизлар.

¹³ Сизлар юртингизнинг ҳамма жойида кўп гуноҳлар қиласидигизлар. Шунинг учун бойликларингиз ва хазиналарингиз душманларга текин ўлжа бўлади.¹⁴ Ўзингиз билмаган юртда душманларингизга хизмат қиласизлар. Менинг ғазабим сизларни оловдай ямламай ютади.”

¹⁵ Эй Эгам, Сен ҳаммасини биласан,
 Ёдга ол мени, ёрдам бергин,
 Мени қувғин қиласидиганлардан ўч олгин.
 Фанимларимга сабр-тоқат қилиб,
 Тағин мени ҳалок қилиб юборма.
 Сени деб хўрланганимни эсингдан чиқарма.
¹⁶ Айтган ҳар бир сўзингга ташна эдим.

Сўзларингдан шодланар эдим,
Сўзларинг дилимга қувонч бағишлар эди.
Зоро, мен Сенга тегишлиман,
Эй Парвардигори Олам — Эгамиз.
¹⁷ Мен хушчақчақ улфатлар даврасида ўтирмадим,
Уларнинг хурсандчилигига шерик бўлмадим.
Қўлинг остида ёлғиз ўзим ўтирап эдим,
Сен мени ғазабга тўлдирган эдинг.
¹⁸ Нега менинг дардим зўрайяпти?
Нега оғир ярам тузалмаяпти?
Наҳотки ёзда қуриган булоқ каби,
Умидларимни барбод қилсанг?!

¹⁹ Эгамиз менга шундай деди:

“Агар тавба қилсанг, сени яна хизматимга оламан.
Бўлмағур гаплар ўрнига тўғри сўзлар гапирсанг,
Сени Ўзимнинг сўзловчим қиласман.
Шунда сен халқнинг олдига бормайсан,
Улар сенинг олдингга келишади.
²⁰⁻²¹ Мен сени бу халқ қаршисида
Мустаҳкам бронза девордай қиласман.
Улар сенга ҳужум қилишади,
Лекин сени енга олишмайди.
Ўзим сен билан бирга бўламан,
Сени халос қилиб, қутқараман,
Ҳа, фосиқлар қўлидан халос қиласман,
Золимлар чангалидан озод этаман.”
Эгамизнинг каломи шудир.

16-БОБ

Еремиёнинг ҳаёти учун Эгамизнинг режаси

¹ Эгамизнинг қуидаги сўзи менга аён бўлди: ² “Оила қурма, бу юртда ўғил-қизларинг бўлмасин. ³ Бу юртда туғилган ўғил-қизлар ҳақида ва уларни дунёга келтирган ота-оналар ҳақида Мен, Эганг, айтаманки, ⁴ улар оғир хасталиклардан ҳалок бўлишади. Улар учун ҳеч ким аза тутмайди, жасадларини кўмадиган бирон кимса бўлмайди, жасадлари гўнг каби, ер устида ётаверади. Улар қиличдан ва қаҳатчилиқдан ҳалок бўлишади, жасадлари қушлар ва ёввойи ҳайвонларга ем бўлади.

⁵ Мен сенга айтаман: азадор уйга кирма, мотам тутма, таъзия билдирма. Мен бу халқни тинчлик-хотиржамлигимдан маҳрум қилдим. Мен бу халқни севмайман, уларга меҳр-шафқат кўрсатмайман, — деб айтмоқда Эгамиз. — ⁶ Бу юртнинг каттаю кичиги ўлиб кетади, уларни ҳеч ким кўммайди. Ҳеч ким улар учун аза тутмайди, қайғудан баданини тилмайди, сочини олдирмайди*.

⁷ Азадорларга тасалли бериш учун ҳеч ким овқат олиб чиқмайди. Ота ёки онасидан жудо бўлганларга тасалли бериш учун ҳеч ким бир коса шароб узатмайди.

⁸ Зиёфат бўлаётган уйга кирма, улар билан ўтириб, еб-ичма. ⁹ Чунки сенинг замонингда шоду хуррамлик садоларига, келин-куёвнинг хурсандчилик

овозларига чек қўяман, — деб айтмоқда Истроил халқининг Худоси — Сарвари Олам. — Буни ўз кўзинг билан кўрасан.

¹⁰ Айтганларимнинг ҳаммасини одамларга гапириб берганингда, улар сендан шундай деб сўрайдилар: «Нега Эгамиз бизга бундай кулфатларни раво кўряпти? Айбимиз нима? Эгамиз Худога қарши нима гуноҳ қилдик?» ¹¹ Сен уларга шундай жавоб бер: «Эгамиз айтмоқда: ота-боболарингиз Мени тарк этдилар.

Қонунларимга риоя қилмасдан, Мендан юз ўғирдилар. Бошқа худоларга эргашдилар, уларга хизмат қилиб, сажда этдилар. ¹² Сизларнинг гуноҳларингиз эса ота-боболарингизнидан ҳам ошиб тушди. Мана, ҳар бирингиз ёвуз юрагингизнинг ўжарликлариға итоат қиляпсиз, Менга қулоқ солмаяпсиз.

¹³ Шунинг учун Мен сизларни бу ердан бошқа бир юртга улоқтириб юбораман. У юртни ўзингиз ҳам, ота-боболарингиз ҳам билмайдилар. У ерда сизлар кечаю қундуз бошқа худоларга хизмат қиласизлар. Энди Мен сизларга раҳм қилмайман.”

Халқ сургундан қайтади

¹⁴ Эгамиз демоқда: “Шундай кунлар келадики, одамлар онт ичганда: «Истроил халқини Мисрдан олиб чиққан Эгамиз шоҳид», деб айтмайдиган бўлади. ¹⁵ Бунинг ўрнига улар: «Истроил халқини шимолдаги юртдан* ва Ўзи сургун қилган барча бошқа юртлардан олиб чиққан Эгамиз шоҳид», деб онт ичадиган бўлишади. Мен халқимни Ўзим ота-боболарига берган юртга қайтариб олиб келаман.”

Яқинлашиб келаётган жазо

¹⁶ Эгамиз шундай демоқда: “Мана, Мен талай душманни юборяпман. Улар халқимни балиқчилар каби, тутиб оладилар. Ўша душманлар кетидан бошқаларини жўнатаман, улар овчилар каби, халқимни ҳар бир тоғда, ҳар бир тепалиқда, қояларнинг жарликларида овлайдилар. ¹⁷ Мен халқимнинг тутган ҳамма йўлларини кўриб турибман. Уларнинг ёвуз йўллари Мендан яширин эмас. Ҳамма гуноҳлари кўз ўнгимда. ¹⁸ Қилган гуноҳлари ва қилмишлари учун халқимга икки баробар қилиб қайтараман. Зотан, улар жонсиз, жирканч худолари билан юртимни ҳаром қилдилар, Менинг мулкимни макруҳ бутларга тўлдирдилар.”

Еремиёнинг ибодати

¹⁹ Эй Эгам, менинг қудратим, қўрғонимсан,
Кулфат кунида паноҳимсан.
Дунёнинг тўрт бурчагидан халқлар
Сенинг олдингга келиб, айтади:
“Аждодларимизнинг сохта бутларидан бўлак ҳеч нарсаси йўқ эди,
Бу бетайин бутларидан фойда бўлмаган эди.
²⁰ Инсон ўзи учун худоларни ясай оладими?!
Бундай худолар ҳақиқий Худо эмас-ку!”

²¹ Эгамиз шундай дейди:
“Шундай экан, уларга сабоқ берай,
Куч-қудратимни уларга кўрсатиб қўяй.
Шунда Эгангиз Мен эканлигимни билиб олишади.”

17-БОБ

Яхудо халқининг гуноҳи ва жазоси

¹ Эгамиз шундай дейди: “Эй Яхудо халқи, сизларнинг гуноҳингиз темир қалам

билин ўйиб ёзилган. Сизларнинг гуноҳингиз тош юракларингиз устига ва қурбонгоҳларингиз шохларига олмос учи билан ўйиб битилган*. ² Ҳатто фарзандларингиз ҳам баланд қирлардаги ва серсоя дараҳтлар остидаги қурбонгоҳларга бориб, Ашеранинг^{*} устунларига сажда қилишади. ³ Бутун юртда қилган гуноҳларингиз эвазига Мен Ўз тогимни*, сизнинг ҳамма бойликларингизни, хазиналарингизни ва барча саждагоҳларингизни* душманга ўлжа қилиб бераман. ⁴ Сизларга Мен мулк қилиб берган юртдан ўз айбингиз туфайли айриласизлар. Мен сизларни ўзингиз билмаган бир юртга жўнатаман, душманларингизга ҳаммангизни қул қилиб бераман. Сизлар Мени ғазаблантирдингиз, ғазабим сўнмас олов каби ёнмоқда.”

Ҳикматли сўзлар

⁵ Эгамиз шундай демоқда:

“Умидини инсонга боғлаган,
Фоний банданинг кучига ишонган,
Юраги Мендан узоқлашган одам лаънатидир.

⁶ Бундай одам саҳродаги бутадай бўлади,
Фаровон ҳаёт кўрмайди.

Чўлнинг қақроқ жойларида,
Шўр босган бўм-бўш ерларда яшайди.

⁷ Эгасидан умид қилган киши баҳтлидир,
Ёлғиз Худога инонган зот саодатлидир!

⁸ Бундай киши сув бўйига ўтқазилган дараҳтга ўхшайди,
Оқар сувлар томон илдиз отади.

Куннинг жазирамасидан кўрқмайди,
Барглари доим ям-яшил бўлади.
Курғоқчилик келганда ҳам безовта бўлмайди,
Мева беришдан тўхтамайди.

⁹ Одамнинг юраги шунчалик айёрки,
Унинг давоси йўқ!
Унинг ичидагини ким билади?!

¹⁰ Аммо Мен, Эгангиз, одамнинг юрагини биламан,
Унинг ўй-фиксарларини текшираман.
Қилмишига яраша жазолайман,
Қилган ишига яраша тақдирлайман.”

¹¹ Ноҳақлик билан бойлик орттирган киши,
Ўзи қўймаган тухумларни босиб ётган какликка ўхшайди.
Бундай киши умрининг ярмида
Бойликларидан маҳрум бўлади,
Ҳаёти охирлаб қолганда аҳмоқ эканини билади.

¹² Муқаддас маконимиз
Азалдан юксалтирилган улуғвор тахтдир!

¹³ Эй Эгамиз, Сен Исройлнинг ёлғиз умидисан!
Сени тарқ этганларнинг ҳаммаси шарманда бўлар,
Сендан юз ўғирганларнинг исмлари тупроққа ёзилар.
Эй Эгамиз, улар Сени тарқ этдилар.
Ҳа, ҳаётбахш сув булоғидан воз кечдилар.

Еремиё Эгамиздан мадад сўрайди

¹⁴ Эй Эгам, менга шифо бер, соғайиб кетай.
 Мени қутқаргин, нажот топай.
 Ахир, ёлғиз Сени олқишлийман.

¹⁵ Қара, бу одамлар устимдан кулишяпти,
 “Эгамизнинг таҳдидли сўзлари қани?!
 Айтганлари бажо бўлсин-чи энди!” деб айтишяпти.

¹⁶ Мен эса халқингга чўпон бўлдим,
 Хизмат қилишдан бош тортмадим.
 Офат куни келишини хоҳламаганимни биласан.
 Оғзимдан чиққан ҳар бир сўз Сенга аёндир.

¹⁷ Мени ваҳимага солмагин,
 Кулфат кунида паноҳим Сенсан.

¹⁸ Мени қувғин қилганлар шарманда бўлсин,
 Мени эса шарманда қилма.
 Душманларим саросимага тушсин,
 Мени эса довдиратиб қўйма.
 Уларнинг бошларига кулфат келтир,
 Жазосини икки баробар оғирроқ қилгин.

Шаббат кунига риоя қилиш ҳақида

¹⁹ Эгамиз менга шундай деди: “Яҳудо шоҳлари кириб чиқадиган Халқ дарвозаси олдига бориб тур, сўнг Қуддуснинг бошқа дарвозалари олдига ҳам бор.
²⁰ Борганингда халққа шундай деб айт: «Эй Яҳудо шоҳлари, эй Яҳудо халқи, бу дарвозадан ўтиб юрган бутун Қуддус аҳолиси, Эгамизнинг сўзини эшитинглар!
²¹ Эгамиз шундай деб айтмоқда: Шаббат куни юк ташиманглар, Қуддус дарвозаларидан юкни кўтариб кирманглар. Ҳушёр бўлинглар, тағин ҳаётингизга ўзингиз зомин бўлиб қолманглар. ²² Шаббат куни уйингиздан бирон юкни кўтариб чиқманглар, ҳеч қандай иш қилманглар. Мен ота-боболарингизга амр қилганимдек, Шаббат кунини муқаддас деб билинглар. ²³ Ота-боболарингиз гапларимга эътибор бермаган, Менга қулоқ солмаган эдилар. Улар қайсарлик қилиб, сўзларимни тингламагандилар, гапимга кирмагандилар. ²⁴ Борди-ю, сизлар гапларимга қулоқ солсангизлар, Шаббат куни шаҳар дарвозаларидан юк ташимасангизлар, ўша муборак кунни муқаддас деб билиб, ҳеч қандай иш қилмасангизлар, ²⁵ Қуддус тахтида доим Довуд наслидан бўлган шоҳ ўтиради. Жанг араваларию отларни миниб олган шоҳлар ва аъёнлар шаҳар дарвозаларидан киришади. Яҳудо халқи ва Қуддус аҳолиси улар билан бирга кирадилар. Қуддусдан то абад одам аримайди. ²⁶ Шунда Яҳудо шаҳарларидан, Қуддус атрофидаги қишлоқлардан, Бенямин худудидан, қирлардан, ғарбдаги қир этакларидан, Нагав чўлидан одамлар келади. Улар Эгасининг уйига куйдирладиган ва бошқа қурбонликларни, шукронава дон назрларини, хушбўй тутатқиларни олиб келадилар. ²⁷ Борди-ю, сизлар гапимга қулоқ солмасангизлар, Шаббат кунини муқаддас деб билмай, юк ташиб, дарвозалардан кириб чиқсангизлар, Мен шаҳар дарвозаларини ёндириб юбораман. Олов Қуддус саройларини йўқ қилади, бу оловни ҳеч ким ўчира олмайди.””

18-БОБ

Еремиё кулолнинг уйида

¹ Эгамиз Еремиёга шу сўзини аён қилди: ² “Қани бўл, кулолнинг уйига бор. Ўша

ерда сенга бир гап айтаман.”³ Мен кулолнинг уйига бордим. Кулол чарх уриб, ишлаётган эди. ⁴ У лойдан ясаётган идиш бузилди, шундан кейин у ўзи хоҳлаган шаклдаги бошқа бир идишни ясади.

⁵ Эгамиз Ўз сўзини менга аён қилиб деди: ⁶ “Эй Истроил халқи, наҳотки бу қулол қилган ишни Мен сизларга қила олмасам?! Сизлар Менинг қўлимда қулол қўлидаги лойга ўхшайсизлар. ⁷ Мен бирон халқни ёки шоҳликни қўпориб ташлашимни, йўқ қилиб вайрон қилишимни эълон этишим мумкин. ⁸ Аммо ўша халқ ёвуз қилмишларидан қайтса, Мен ҳам уларнинг бошларига фалокат келтириш ниятимдан қайтаман. ⁹ Шундай пайтлар ҳам бўладики, Мен бирон халқ ёки шоҳликка: «Сизларни қайта бунёд этиб, мустаҳкам қиласман», деб айтаман. ¹⁰ Аммо ўша халқ Менинг олдимда қабиҳлик қилса ёки айтганларимга қулоқ солмаса, Мен ниятимдан қайтаман, уларга қилмоқчи бўлган яхшилигимни қилмайман.

¹¹ Шундай экан, Яхудо халқи билан Қуддус аҳолисига айт: «Эгамиз шундай демоқда: мана, Мен бошингизга соладиган қулфатни тайёрлайпман, сизларга қарши режалар тузяпман. Бўлди энди, ҳар бирингиз ёмон йўлингиздан қайтинглар. Турмуш тарзингизни ўзгартиринглар. Эски қилмишларингиздан воз кечинглар.»

¹² Аммо улар: «Галирганинг бефойда!» дейишади. «Биз барибир хоҳлаганимиздай яшаймиз, ёвуз юракларимизнинг ўжарликларига итоат қилаверамиз», деб айтишади.”

Халқ Эгамизни рад этади

¹³ Шунинг учун Эгамиз демоқда:
“Халқлардан сўраб-суриштиринг-чи,
Бунақасини ҳеч эшитганмикан?!
Бокира қиз Истроил жирканч бир иш қилди.
¹⁴ Лубондаги қорлар ҳеч эриганми?!
Азим чўққиларни ҳеч тарқ этганми?!
Унинг муздек сувлари ҳеч адо бўлганми?!
¹⁵ Менинг халқим эса Мени тарқ этди,
Улар бехуда бутларга тутатқи тутатдилар.
Бутлари туфайли халқим қоқилди,
Азалий йўлидан адашди.
Тўғри йўлни тарқ этиб, сўқмоқлардан юриб кетди.
¹⁶ Шу сабабдан юрти хувиллаб қолади,
Юртнинг аҳволидан одамлар қотиб қолади,
Ўтган-кетганлар даҳшатга тушади,
«Ё тавба» деб, ёқасини ушлашади.
¹⁷ Шарқдан эсган шамол каби,
Мен уларни душманлари олдида сочиб ташлайман.
Бошларига кулфат тушган куни
Уларга орқа ўгираман,
Уларга назар солмайман.”

Еремиёга қарши фитна

¹⁸ Сўнг одамлар шундай дедилар: “Қани, Еремиёга қарши фитна уюштирайлик. Ахир, қонунни ўргатадиган руҳонийлар, маслаҳат берадиган донишмандлар ва Худонинг сўзини айтадиган пайғамбарлар ҳар доим бор. Еремиёга тухмат қилайлик, унинг гапларига умуман эътибор бермайдиган бўлайлик.”

¹⁹ Эй Эгам, мени тингла,
Рақибларим гапларини эшит!
²⁰ Наҳотки яхшиликка ёмонлик қайтаришса?!

Эсингдами, хузурингда туриб,
Улар учун Сенга ёлворгандим,
Улардан Сенинг қаҳрингни қайтаргандим.
Улар эса менга чуқур қазидилар.

²¹ Шундай экан, болаларини очлиқдан ўлдир,
Ҳаммасини қилич измига топшир.
Хотинлари болаларидан жудо бўлсин,
Ҳаммаси бева бўлиб қолсин.

Эркаклари ўлатдан қирилиб кетсин,
Йигитлари жангда ҳалок бўлсин.

²² Тўсатдан устига босқинчи юборганингда,
Уйларидан дод-фарёдлар кўтарилсин!
Ахир, улар мени тутиб олмоқчи бўлиб, чуқур қазидилар,
Оёғимни сиртмоққа илинтиromoқчи бўлдилар.

²³ Мени ўлдириш учун фитна қилдилар,
Буни Сен биласан, эй Эгам.
Уларнинг гуноҳларини кечирма,
Жиноятларидан ўтма.
Фазабланиб, жазоларини бергин,
Улар Сенинг олдингда йиқилиб қолсинлар.

19-БОБ

Синган кўза

¹ Эгамиз менга шундай деди: “Бориб қулолдан бир сопол кўза сотиб ол. Сўнг ёнингга халқ оқсоқолларидан ва бош руҳонийлардан олиб, ² Синган кўзалар дарвозаси яқинидаги Хиннум сойлигига* туш. Мен сенга айтадиган сўзларни оқсоқолларга сен ўша ерда айтасан. ³ Сен уларга шундай деб айт: «Эй Яхудо шоҳлари, Куддус аҳолиси, Эгамизнинг сўзларини эшитинглар. Истроил халқининг Худоси — Сарвари Олам шундай демоқда: Мен бу жойга шундай фалокат ёғдирманки, бу фалокатни эшитганларнинг бошидан ҳуши учади. ⁴ Зотан, халқим Мени тарк этди, бу ерни ҳаром қилди. Улар ўзлари билмаган, ота-боболари ҳам, Яхудо шоҳлари ҳам билмаган бегона худоларга қурбонликлар кийдирдилар. Бу ерни бегуноҳ одамларнинг қонига тўлдирдилар. ⁵ Баалга атаб саждагоҳлар* қурдилар. У ерда ўз ўғил-қизларини Баалга қурбонлик қилиб кийдирдилар. Мен уларга буни амр қилмаганман, бунақасини хаёлимга ҳам келтирмаганман. ⁶ Қараб туринглар! — деб айтмоқда Эгамиз. — Шундай кунлар келадики, одамлар бу жойни Тофат ёки Хиннум сойлиги деб атамайди, балки бу жой ‘Қирғин водийси’ деб аталадиган бўлади. ⁷ Мана шу жойда Мен Яхудо ва Куддуснинг режаларини барбод қиласман*. Халқимни душманларга мағлуб қилиб бераман, уларда қасди борларнинг қўлига топшираман. Жасадларини қушларга, ёввойи ҳайвонларга ем қиласман. ⁸ Мен бу шаҳарни шундай вайрон қиласманки, унинг олдидан ўтган-кетган ҳар бир киши шаҳарнинг аянчли аҳволидан даҳшатга тушиб, қотиб қолади. ⁹ Душманлар шаҳарни қамал қилиб, одамларни қириб ташламоқчи бўладилар. Қамал пайтида азобда қолган халқ ўғил-қизларининг ва бир-бирининг этини ейдиган бўлади.»

¹⁰ Эй Еремиё, ўзинг билан келганларнинг олдида кўзани синдир. ¹¹ Уларга шундай деб айт: «Сарвари Олам шундай демоқда: мана бу кўза чилпарчин бўлиб, тузатиб бўлмайдиган аҳволга тушгани каби, Мен бу халқни ва бу шаҳарни чилпарчин қиласман. Ўликлар Тофатда дафн қилинади, ўликлар кўплигидан қабрларга жой етмай қолади. ¹² Мен бу шаҳарни ва унинг аҳолисини шундай аҳволга соламанки, бу шаҳар Тофатга ўхшаган бўлиб қолади, — деб айтмоқда Эгамиз. — ¹³ Куддусдаги хонадонлар ва Яхудо шоҳларининг саройлари, Тофат каби, ҳаром бўлади. Чунки у ерлардаги ҳамма уйларнинг томларида самовий жисмларга атаб қурбонликлар куйдирилган, бегона худоларга шароб назрлари келтирилган.»

¹⁴ Еремиё Эгамизнинг амри билан Тофатда башорат қилди, сўнг у ердан қайтиб келгач, Эгамизнинг уйи ҳовлисида туриб халққа деди: ¹⁵ “Исройл халқининг Худоси — Сарвари Олам шундай демоқда: энди Мен айтган сўзимга биноан бу шаҳар ва унинг атрофидаги қишлоқларга фалокат келтираман, чунки сизлар ўжарлик қилиб, сўзларимни эшитишни хоҳламадингизлар.”

20-БОБ

Еремиё руҳоний Пашхур билан баҳслашади

¹ Иммар ўғли Пашхур руҳоний бўлиб, Эгамиз уйининг бош назоратчиси эди. У Еремиёнинг башорат қилиб айтган бу сўзларини эшитди. ² Шу сабабдан Еремиёни калтаклатиб, Эгамиз уйининг ҳовлисидағи Юқори Бенямин дарвозаси* томонда кишанлаб қўйишни буюрди. ³ Эртаси куни эрталаб Пашхур Еремиёнинг кишанларини ечганда, Еремиё унга шундай деди: “Эгамиз сенга «Пашхур» эмас, «Даҳшат қамраган»* деб исм қўйган. ⁴ Зеро, Эгамиз шундай деб айтмоқда: Мен сени ва ҳамма дўстларингни ваҳимага соламан. Дўстларинг душманлари қўлида ҳалок бўлаётганини ўз кўзинг билан кўрасан. Мен бутун Яхудо халқини Бобил шоҳининг қўлига топшираман. Бобил шоҳи халқимни асир қилиб, ўзининг юритига олиб кетади. Уларни қиличдан ўтказади. ⁵ Мен бу шаҳарнинг бойликларини, бор нарсасини, қимматбаҳо буюмларини, Яхудо шоҳларининг хазиналарини душманнинг қўлига бераман. Улар шаҳарни талон-тарож қилишади. Барча бойликларини Бобилга олиб кетишади. ⁶ Сен ҳам, эй Пашхур, ўз хонадонинг билан Бобилга сургун бўласан. Сен у ерда жон бериб, дафн қилинасан. Ёлғон башоратларингга қулоқ солган дўстларинг ҳам ўша қўйга тушади.”

Еремиё Эгамизга шикоят қиласади

⁷ Эй Эгам, Сен мени кўндиридинг,
Мен ҳам кўнди.

Мендан устун келдинг, мени енгдинг.
Мен ҳаммага мазах бўлдим,
Ҳамма устимдан кулмоқда.

⁸ Гапирганимда жар солишим керак,
“Зўравонлик! Ҳалокат!” дея бақиришим керак.
Сенинг сўзинг туфайли ҳаммага кулги бўлдим,
Кун бўйи мени масхара қилишяпти.

⁹ Борди-ю, мен: “Бўлди, Эгам ҳақида сўзламайман,
Унинг номидан гапирмайман” десам,
Сенинг сўзинг, олов каби, ичимни ёндиради,
Ўт қўйгандай суякларимни зирқиратади.
Сўзингни ичимда сақлаб туришдан чарчадим,

Ха, уни бошқа ушлаб тура олмайман.
¹⁰ Эшитяпман, кўпчилик ғийбат қиляпти.
 Атрофимни даҳшат қамраган!
 “Фош бўлсин! Уни фош қилайлик!” деб айтяптилар.
 Ҳатто менинг яқин дўстларим ҳам
 Қоқинишимни пойлаб турибдилар,
 “Еремиё тузоққа тушади,
 Шунда уни енгамиз,
 Ундан қасдимизни оламиз”, деяптилар.
¹¹ Аммо Сен, эй Эгам, мен билан биргасан,
 Сен баҳодир жангчига ўхшайсан.
 Мени қувгин қилганлар қоқилиб тушади,
 Улар мендан устун келолмайди.
 Исподга қолади, муваффақиятга эришолмайди.
 Улар то абад доғда қолади,
 Шармандагарчилиги ҳеч қачон унугтилмайди.
¹² Эй Сарвари Олам, Сен солиҳ кишини синайсан,
 Одамнинг дилини, ўй-хаёлини биласан.
 Душманларимдан ўч олганингни қўрайин,
 Ахир, даъвоимни Сенга топширдим!

¹³ Эгамизга қўшиқ қуйланглар!
 Эгамизга ҳамду санолар айтинглар!
 Зеро, У бечора банданинг жонини
 Бадкирдорлар қўлидан қутқарди.

¹⁴ Эвоҳ, мен туғилган кун қуриб кетсин!
 Онам мени туққан кун хосиятсиз бўлсин!
¹⁵ Отамга хабар олиб келган одам лаънати бўлсин,
 “Ўғил қўрдинг!” дея уни хурсанд қилган киши қуриб кетсин.
¹⁶ Эгамиз шафқатсизларча вайрон қилган
 Шаҳарлардай* бўлсин ўша одам.
 У эрталабданоқ доду фарёдлар эшитсин,
 Кундуз куни уруш наъраларини эшитсин.
¹⁷ Ахир, у мени онамнинг қорнидаёқ ўлдирмади.
 Шунда онамнинг қорни қабрим бўлган бўларди,
 Онам то абад ҳомиладор бўлиб қолган бўларди.
¹⁸ Нимага ҳам туғилдим экан-а?!

Машаққату қийинчилик қўриш учунми?
 Умримни шармандалиқда хазон қилиш учунми?

21-БОБ

Қуддуснинг мағлубияти ҳақида башорат

¹ Шоҳ Зидқиё* Еремиё пайғамбарнинг олдига Малкиё ўғли Пешхур ва Масиё ўғли руҳоний Зафаниёни юборди. Шунда Эгамиз Ўз сўзини Еремиёга аён қилди. Пешхур билан Зафаниё Еремиёга шундай дедилар: ² “Ўтинализ, биз учун Эгамизга ёлвор, чунки Бобил шоҳи Навуҳадназар* бизга хужум қиляпти. Балки Эгамиз аввалгидек мўъжизалар кўрсатиб, Навуҳадназарни орқага чекинтирад.”

³ Еремиё уларга шундай жавоб берди: ⁴ “Бориб, Зидқиёга Истроил халқининг

Худоси — Эгамизнинг шу сўзларини айтинглар: «Сизлар қўлингизга қурол олиб, сизларни қамал қилган Бобил шоҳига ва Бобилликларга* қарши жанг қиляпсизлар. Аммо қўлингиздаги қуролларингизни Мен Бобилликларга эмас, балки ўзларингизга қарши ишлатаман. Мана шу шаҳар — Қуддус марказида қуролларингизни уйиб ташлайман.⁵ Мен Ўзим сизларга қарши чиқаман. Ўз қудрату ажойиботларим билан, қаҳру ғазабим билан сизларга қарши жанг қиламан.⁶ Бу шаҳар ахолисини йўқ қиламан. Одамлару ҳайвонлар ўлатдан нобуд бўладилар.⁷ Шундан кейин Мен Яхудо шоҳи Зидқиёни, унинг аъёнларини, шаҳарда урушдан, қаҳатчиликдан ва ўлатдан омон қолган ҳамма одамларни Бобил шоҳи Навуҳадназарнинг қўлига бераман, — деб айтмоқда Эгамиз. — Уларда қасди борларга топшираман, душман қўлига бераман. Душманлар шаҳар ахолисини шафқатсизларча қириб ташлайдилар. Биронта одамни ҳам аямайдилар, уларга ачинмайдилар, раҳм қилмайдилар.»

⁸ Сизлар бу халқقا бориб айтинглар: «Эгамиз демоқда: Мен сизларга икки йўлни — ҳаёт ва ўлим йўлини бердим.⁹ Шаҳарда қолганлар қилич, қаҳатчилик ва ўлатдан нобуд бўладилар. Шаҳардан чиқиб, Бобилликларга таслим бўлганлар эса тирик қоладилар. Бу одамлар ҳеч бўлмаса ўз жонларини сақлаб қоладилар.¹⁰ Мен бу шаҳарга яхшилик эмас, кулфат келтиришга қарор қилдим, — деб айтмоқда Эгамиз. — Бу шаҳарни Бобил шоҳига таслим қилиб бераман. Навуҳадназар шаҳарга ўт қўяди.»

Яхудо шоҳининг хонадони жазоланади

¹¹ Яхудо шоҳининг хонадонига ҳам бориб шундай айтинглар: «Эгамизнинг сўзини эшит,¹² эй Довуд сулоласи! Эгамиз шундай демоқда:

Ҳар куни эрталабдан адолат қилинглар,
Жабрдийдаларни зўравонлар қўлидан қутқаринглар.
Акс ҳолда, қилган ёвузликларингиз туфайли
Менинг ғазабим алганга олади,
Бу ғазабимни сўндиришга ҳеч кимнинг қурби етмайди.

¹³ Эй водийдаги қоя устида қурилган Қуддус,
Мен сенга қаршиман!
— деб айтмоқда Эгамиз. —

Сизлар айтасиз: ‘Ким ҳам бизга қарши чиқа оларди?!
Ким ҳам қўрғонларимизга кира оларди?!’

¹⁴ Мен қилмишингизга яраша жазоингизни бераман,
— деб айтмоқда Эгамиз. —
Шоҳнинг саройига* ўт қўяман,
Олов атрофдаги ҳамма нарсани ёндиради.”

22-БОБ

Яхудо шоҳининг хонадони ҳақида башорат

¹ Эгамиз менга шундай деди: “Яхудо шоҳи саройига бориб, у ерда ушбу сўзларни жар солиб айт:² «Эй Довуд тахтида ўтирган Яхудо шоҳи, эшит. Аъёнларинг ва мана бу саройга кирган одамларинг ҳам сен билан бирга Эгамизнинг сўзини эшитсан.»³ Кейин уларга айт, Эгамиз шундай демоқда: «Адолат ва тўғрилик билан иш тутинг. Жабрдийдаларни зўравонларнинг қўлидан қутқаринг. Мусоғирларга, етим ва беваларга ноҳақлик қилманг, уларни

эзманг. Бу ерда бегуноҳ одамнинг қонини тўқманг.⁴ Борди-ю, сизлар ҳақиқатан ҳам буларга риоя қилсангизлар, Қуддус тахтида доим Довуд наслидан бўлган шоҳ ўтиради. Жанг араваларию отлар минган шоҳлар сарой дарвозаларидан киришади. Аъёнлар ва халқ ҳам улар билан бирга киради.⁵ Борди-ю, бу амрларимга риоя қилмасангизлар, Мен Ўз номим ҳақи онт ичиб* айтаманки, бу сарой вайрон бўлади.» Эгамизнинг каломи шудир.⁶ Ахир, Эгамиз Яхудо шоҳининг саройи ҳақида шундай демоқда:

«Сен Мен учун гўзал Гилад ўлкасига* ўхшайсан,
Бамисоли Лубоннинг юксак чўққиларисан.
Лекин қасам ичиб айтаманки, сен саҳрого ўхшаб қоласан,
Хувиллаган бир шаҳарга айланиб қоласан.
⁷ Сенга қарши босқинчиларни жўнатаман,
Қуролланган одамларни юбораман.
Улар сара садрларингни кесадилар,
Ёғочларингни оловга ташлайдилар.»

⁸ Кўплаб халқлар бу шаҳар олдидан ўтаётиб, бир-бирларидан: «Нега Эгамиз бундай буюк шаҳарни шу кўйга солган экан-а?» деб сўрайдилар.⁹ Уларга шундай жавоб беришади: «Шаҳар аҳолиси ўзларининг Эгаси Худо билан тузган аҳдини бузди. Бошқа худоларга сажда қилиб, хизмат қиласиган бўлди.»

Еремиё шоҳ Ёхуҳоз ҳақида башорат қиласи

¹⁰ Ўлган шоҳингиз* учун йиғламанг,
У учун аза тутманг.
Ундан кўра, сургун бўлган шаҳзодангиз* учун қайғуринг,
У учун аччиқ-аччиқ кўз ёш тўкинг.
Ахир, у энди қайтиб келмайди,
Она юртини бошқа кўрмайди.

¹¹ Шоҳ Йўшиёдан кейин Яхудо тахтига Йўшиёнинг ўғли Ёхуҳоз* ўтирган эди. Шоҳ Ёхуҳоз сургун қилингандан кейин, Эгамиз у ҳақда шундай деди: “У бу ерга ҳеч қачон қайтиб келмайди.¹² Сургун қилинган ерда оламдан ўтади, бу юртни бошқа кўрмайди.”

Еремиё Ёҳайиким ҳақида башорат қиласи

¹³ Эгамиз шундай дейди:
“Уйини ноҳақлик билан қурганнинг* ҳолига вой!
Юқори хоналарини адолатсизлик билан бино қилганинг ҳолига вой!
Бундай одам биродарини текинга ишлатади,
Унинг меҳнат ҳақини бермайди.

¹⁴ У шундай дейди:
«Мана, ўзим учун катта сарой қурдим,
Юқори қаватдаги хоналарни кенг қилдирдим.»
У уйига катта ойналар қўйдирмоқда,
Деворларини садр ёғочи билан қопламоқда,
Уларни қирмизи рангга бўямоқда.

¹⁵ Сен ўзинг учун кўп садр ёғочини йиғдинг,
Бу билан сен яхши шоҳ бўлиб қолмадинг!
Сенинг отанг ҳам хоҳлаганича еб-ичган,

Аммо доим ҳақиқату адолатни ўрнатган.

Шу сабабдан унинг иши юришган.

¹⁶ У фақиру бечорани ҳимоя қилган,

Шунинг учун фаровон ҳаёт кечирган.

Худони билиш дегани шу эмасми?!

— деб айтмоқда Эгамиз. —

¹⁷ Сен эса фақат ноҳақ фойдани кўзлайсан.

Бегуноҳ одамнинг қонини тўкасан,

Зўравонлик ва зулм ўтказасан.”

¹⁸ Шу сабабдан Яхудо шоҳи Йўшиё ўғли Ёҳайиқим ҳақида Эгамиз шундай демоқда:

“Унга ҳеч ким аза тутмайди,

«Вой, жигарим! Вой, жигарим!» деб йифламайди.

«Хўжайним! Олампаноҳим!» деб ҳеч ким қайғурмайди.

¹⁹ Уни ўлган эшакнинг аҳволига соладилар,

Қуддус дарвозаларидан судраб чиқиб, отиб юборадилар.”

Қуддуснинг қисмати

²⁰ Эгамиз шундай дейди:

“Эй Қуддус, Лубонга чиқиб фарёд қилгин,

Башан ўлкасига бориб, хитоб этгин.

Аборим тоғларида* туриб, овозинг борича бақиргин,

Чунки ҳамма ўйнашларинг* йўқ бўлди.

²¹ Фароғатда яшаганингда, сенга гапирдим,

Сен эса «Гапингга қулоқ солмайман!» деб айтдинг.

Ҳа, ёшлигингдан шу йўлни тутгансан,

Гапимга сен кирмагансан.

²² Шамол ҳамма чўпонларингни супуриб кетади,

Ўйнашларинг сургун бўлади.

Сен эса қабиҳ ишларинг туфайли уятда қоласан,

Шармандаи шармисор бўласан.

²³ Сен «Лубон» саройида* яшаб юрибсан,

Садр дараҳтлари орасида ин қургансан,

Аммо туғаётган аёл каби дард чекасан,

Азобдан инграйсан.”

Шоҳ Ёҳайихинни Худо ҳукм қиласи

²⁴ Ёҳайиқим ўғли Ёҳайихин* ҳақида Эгамиз шундай демоқда: “Эй Яхудо шоҳи Ёҳайихин! Борди-ю, сен Менинг ўнг қўлимдаги муҳр узугим бўлганингда эди, Мен барҳаёт Худо бўлганим ҳақи онт ичидай айтаманки, сени улоқтириб ташлаган бўлар эдим. ²⁵ Сен кимдан қўрқсанг, сени ўшанинг қўлига бераман, сенда қасди борларнинг қўлига топшираман. Сени шоҳ Навуҳадназарнинг* ва Бобилликларнинг* қўлига бераман. ²⁶ Сени ва сени туққан онангни* бегона бир юртга, киндик қонинг тўкилмаган бир ерга улоқтириб юбораман. Сизлар ўша ерда ўласизлар. ²⁷ Сизлар бу юртга қайтиб келишни орзу қиласизлар, аммо қайтиб келмайсизлар.”

²⁸ Ёҳайихин ташлаб юбориладиган синиқ хумдай бўлиб қолади,

Ҳеч кимга керак бўлмайдиган сопол идишга ўхшаб қолади.

У болалари билан сургун бўлади!
 Ўзи билмаган юртга улоқтириб ташланади!
²⁹ Эй юрт, юрт, юрт!
 Эгамизнинг сўзини эшит!
³⁰ Эгамиз шундай демоқда:
 “Бу одамнинг фарзандларини насабномага киритманг,
 Уни ҳаётда омади йўқ, деб қайд қилиб қўйинг.
 Унинг зурриётидан бирортаси муваффақият қозонмас,
 Бирортаси Довуд тахтига чиқа олмас.
 Яхудода улар ҳеч қачон ҳукмронлик қилмайдилар.”

23-БОБ

Келажакка умид

¹ Эгамиз шундай демоқда: “Чўпонлар яйловимдаги қўйларни тарқатиб юборяптилар, уларни йўқ қиляптилар. Бундай чўпонларнинг ҳолига вой! ² Эй халқимни боққан чўпонлар, сизлар қўйларимни ўз ҳолига ташлаб қўйдингизлар. Уларни тарқатиб, узоқларга қочириб юбордингизлар. Бу ёвуз қилмишларингиз учун Мен сизларни ўз ҳолингизга қўймай жазолайман, — деб айтмоқда Исройл халқининг Худоси — Эгамиз. — ³ Мен қўйларимни ҳар хил юртларга ҳайдаб юборган эдим. Энди Ўзим уларни йиғиб оламан, ўзларининг яйловига олиб келаман. Улар баракали бўлиб, қўпаядилар. ⁴ Мен улар устидан бошқа чўпонларни тайинлайман. Чўпонлар қўйларимни боқадилар. Шунда қўйларим ҳеч нарсадан қўрқмайди, саросимага тушмайди. Уларнинг биронтаси ҳам йўқолмайди.” Эгамизнинг каломи шудир.

⁵ Эгамиз демоқда: “Шундай кунлар келадики, Мен Довуд наслидан солиҳ бир новдани етиштираман. Бу Шоҳ донолик билан ҳукмронлик қиласди. Адолат ва тўғрилик билан иш тутади. ⁶ Унинг ҳукмронлиги даврида Яхудо халқи бехатар яшайди, Исройл халқи осойишта ҳаёт кечиради. Ўша Шоҳни «Эгамиз — нажоткоримиз» деб аташади.”

⁷ Эгамиз демоқда: “Шундай кунлар келадики, одамлар онт ичганда: «Исройл халқини Мисрдан олиб чиққан Эгамиз шоҳид», деб айтмайдиган бўлади. ⁸ Бунинг ўрнига улар: «Исройл наслини шимолдаги юртдан* ва сургун қилинган бошқа барча юртлардан олиб чиққан Эгамиз шоҳид», деб онт ичадиган бўлади. Улар ўз юртларида яшашади.”

Еремиё соҳта пайғамбарлар ҳақида башорат қиласди

⁹ Пайғамбарлар ҳақида ўйлаб,
 Юрак-бағрим эзилиб кетди,
 Вужудим титраб кетмоқда.
 Эгамиз туфайли,
 Унинг айтган муқаддас сўзи туфайли
 Мен маст одамга ўхшаб қолдим,
 Шаробга бўккан кишидай бўлиб қолдим.
¹⁰ Эвоҳ, юрт зинокорларга тўлиб кетди,
 Лаънат* туфайли ер қақраб қолди,
 Даشتдаги яйловлар қуриб ётибди.
 Пайғамбарлар қабиҳлик қилишга шошилади,
 Кучини ҳақсизлик йўлида ишлатишади.

¹¹ Эгамиз шундай демоқда:

“Пайғамбару руҳонийлар бетавфиқдирлар,
Хатто Менинг уйимда ҳам қабиҳлик қилғанларини күрдим.

¹² Шу сабабдан юрган йўллари сирпанчиқ бўлади,
Улар зулматга ғарқ бўлишади.

Ҳаммаси йиқилиб қолади.

Жазо оладиган йили

Бошларига кулфат келтираман,
— деб айтмоқда Эгамиз. —

¹³ Самария пайғамбарлари орасида

Жирканч бир ишни күрдим:
Улар Баал номидан башорат қилишди,

Халқимни йўлдан оздиришди.

¹⁴ Аммо Қуддус пайғамбарлари орасида
Бундан ҳам баттарроғини күрдим:

Улар зино қилиб, ёлғон ичида яшашади,
Ёвузларнинг ишини қўллаб туришади,
Шунинг учун ҳеч ким ёмон йўлидан қайтмаяпти.

Назаримда уларнинг ҳаммаси Садўм одамларидай бўлиб қолган,
Қуддус аҳолиси Фамўра* аҳолисига ўхшаб қолган.”

¹⁵ Сарвари Олам пайғамбарлар ҳақида шундай демоқда:

“Мен уларга аччиқ ўтдан едираман,
Захарли сувдан* ичираман,
Зеро, Қуддус пайғамбарлари дастидан
Юртимда бетавфиқлар кўпайиб кетди.”

¹⁶ Сарвари Олам шундай демоқда: “Сизларга башорат қилаётган
пайғамбарларнинг гапларига қулоқ солманглар. Улар қўйнингизни пуч ёнғоқча
тўлдиряпти. Улар Менинг оғзимдан чиққан сўзларни эмас, ўз дил орзуларини
айтишяпти. ¹⁷ Менинг сўзимдан нафратланган одамларга улар ҳадеб: «Ҳаммаси
яхши бўлади», дейишади. Юрагидаги ўжарликларга итоат қилғанларга:
«Бошингизга бало–қазо келмайди», дейишади.”

¹⁸ Хўш, Эгамизнинг кенгашида* улардан қайси бири қатнашибди?!

Худонинг сўзини қайси бири эшишибди?!

Қайси бири эътибор билан Уни тинглабди?!

¹⁹ Ана, бўрон кўтарилид!

Бу Эгамизнинг ғазабидир.

Унинг ғазаби қуюн гирдоби бўлиб,

Фосиқларнинг бошига тушди.

²⁰ Эгамиз кўнглидаги ниятини бажармагунча,

Уни охирига етказмагунча,

Ғазабидан тушмайди.

Кейинчалик буни англаб оласизлар.

²¹ Эгамиз шундай деди:

“Бу пайғамбарларни Мен юбормадим,

Улар ўзлари югуриб бордилар.

Уларга Мен гапирмадим,

Улар эса башорат қилдилар.

²² Агар ўша пайғамбарлар кенгашимда бўлганларида эди,

Сўзларимни халқимга етказган бўлардилар.

Халқимни ёмон йўлдан,

Ёвуз қилмишлардан қайтарган бўлардилар.”

²³ Эгамиз шундай демоқда: “Мен ҳамма ёқдаман — яқинда ҳам, узоқда ҳам ўша Худоман. ²⁴ Ким Мендан яширина олади?! Еру кўкни тўлдириб турган Мен

эмасми?! — деб айтмоқда Эгамиз. — ²⁵ Менинг номимдан ёлғон башорат қилган пайғамбарларнинг: «Мен бир туш кўрдим! Худо менга бир туш берди!»

деганларини эшитдим. ²⁶ Қачонгача бу давом этади?! Улар юракларидағи ҳийлаю найрангларини, ёлғон башоратларини бас қилишадими, йўқми?! ²⁷ Уларнинг ота-боболари Мени унутиб, Баалга сажда қилган эдилар. Шу сингари, бу сохта пайғамбарлар «Халқ Эгамизни унутсин», дея бир-бирларига тушларини айтишади. ²⁸ Майли, туш кўрган пайғамбар тушини айтсин, сўзимни эшитган эса уни садоқат билан эълон қилсин. Ахир, сомон билан буғдойнинг фарқи бор-ку! — деб айтмоқда Эгамиз. — ²⁹ Менинг сўзим оловдай куйдиради. Қояни ёрадиган болғадай зарба беради.” Эгамизнинг каломи шудир.

³⁰ Эгамиз шундай демоқда: “Бу пайғамбарлар «Эгамизнинг сўзи» деб бир-биридан гап ўғирлайди. Мен уларга қаршиман. ³¹ Ҳа, Мен ўша пайғамбарларга қаршиман, — деб айтмоқда Эгамиз. — Улар ўзларича валдираб юрадилар, яна «бу Эгамизнинг сўзлари», деб айтадилар. ³² Уйдирма тушларини айтган пайғамбарларга қаршиман! Улар ёлғонларию телбалиги билан халқимни йўлдан оздиришмоқда. Уларни Мен тайинламаганман, халқимнинг олдига Мен юбормаганман. Халқимга уларнинг заррача ҳам фойдаси йўқ.” Эгамизнинг каломи шудир.

Юк ҳақида

³³ Эгамиз менга деди: “Эй Еремиё, агар халқимдан бўлган бирорта одам, пайғамбар ёки руҳоний сендан: «Бу сафар Эгамиз бизга нима юкламоқчи?*» деб сўраса, сен шундай деб жавоб бер: «Сизлар ўзларингиз Эгамизга юк бўлдингизлар*. Энди У сизларни улоқтириб ташлайди.» ³⁴ Борди-ю, бирон одам, пайғамбар ёки руҳоний: «Эгамизнинг сўзи бизга юк бўлди», деб айтадиган бўлса, Мен ундай одамни бутун хонадони билан жазолайман. ³⁵ Сизлар бир-бирингиздан: «Эгамиз нима деб жавоб берди?» ёки «Эгамиз нима деб айтди?» деб сўранглар. ³⁶ Аммо: «Эгамиз бизга нима юкламоқчи?» деб бошқа сўраманглар. Зеро, одамлар бу иборани ишлатиб, ўз сўзларини ишонарли қилмоқчи бўладилар, барҳаёт Худо, Сарвари Олам — Худойингизнинг сўзларини бузиб айтадилар. ³⁷ Сизлар эса пайғамбарнинг олдига борганингизда, ундан: «Эгамиз сизга нима деб жавоб берди?» ёки «Эгамиз сизга нима деди?» деб сўранглар. ³⁸ Борди-ю, сизлар гапимга кирмай: «Эгамиз бизга нима юкламоқчи?» деб яна сўрасангизлар, ³⁹ Мен сизларни юк кўтаргандай кўтариб*, Ўз ҳузуримдан улоқтириб ташлайман. Ота-боболарингизга Ўзим берган шаҳарни ҳам шу кўйга соламан. ⁴⁰ Абадий иснод ва шармандаликка дучор қиласман. Бундай шармандаликни унутиб бўлмайди.”

24-БОБ

Икки сават анжир

¹ Эгамиз менга Маъбад олдида турган икки сават анжирни кўрсатди. Бу воқеа

Бобил шоҳи Навуҳадназар* Куддусдаги Яхудо шоҳи Ёҳайихинни*, Яхудо аъёнларини, хунармандлару темирчиларни Бобилга асир қилиб олиб кетгандан сўнг содир бўлди. Шоҳ Ёҳайихин Ёҳайиқимнинг ўғли эди.² Мен кўрган саватларнинг бирида яхши чиллаки анжирлар, бошқасида эса ёмон, еб бўлмайдиган анжирлар бор эди.

³ Эгамиз мендан:

— Еремиё, нимани қўряпсан? — деб сўради.

— Анжирларни, — деб жавоб бердим мен. — Яхши анжирлар ниҳоятда яхши экан, ёмонлари эса еб бўлмайдиган даражада ириб кетган экан.

⁴ Шунда Эгамиз менга Ўз сўзини аён қилди:⁵ Исройл ҳалқининг Худоси — Эгамиз шундай демоқда: “Бобилликларнинг* юртига сургун бўлган Яхудо асирлари ўша яхши анжирларга ўхшайди. Мен уларга илтифот қўрсатаман.

⁶ Назаримни солиб, яхшилик қиламан, уларни бу юртга қайтариб олиб келаман. Уларни ўйқ қилмайман, балки қайта бунёд этаман. Қўпориб ташламайман, балки барқарор қиламан.⁷ Қалбларига Мени билиш истагини соламан, улар Мени Эгамиз деб тан оладилар. Бутун қалблари билан Менга қайтадилар. Улар Менинг ҳалқим бўлади, Мен эса уларнинг Худоси бўламан.”

⁸ Аммо Яхудо шоҳи Зидқиё* тўғрисида, унинг аъёнлари, Куддуснинг омон қолган аҳолиси ва Мисрга қочиб борганлари тўғрисида Эгамиз шундай демоқда: “Улар еб бўлмайдиган анжирларга ўхшайди. Ириган анжирларни нима қилишса, Мен ҳам уларни шундай қиламан.⁹ Уларнинг бошига шундай кулфат соламанки, буни қўрган ер юзидағи барча ҳалқлар даҳшатга тушади. Мен уларни тарқатиб юборган ҳамма жойда одамлар уларнинг устидан куллади, уларни мазах қилади, хор қилади, номини қарғишларда ишлатади.¹⁰ Мен уларга ва ота-боболарига берган юртдан уларни қириб ташламагунимча бошларига уруш, очарчилик ва ўлат юбораман.”

25-БОБ

Шимолдан келган душман

¹ Яхудо шоҳи Йўшиё ўғли Ёҳайиқим хукмронлигининг тўртинчи йилида* Еремиёга Яхудо ҳалқи тўғрисида Эгамизнинг сўзи аён бўлди. Бобил тахтига худди ўша йили Навуҳадназар ўтирган эди. ² Еремиё пайғамбар Яхудо ҳалқи ва Қуддус аҳолисига шундай деди: ³ “Омон ўғли Йўшиё Яхудода хукмронлик қилган даврнинг ўн учинчи йилидан* тортиб, то бугунга қадар Эгамиз менга Ўз сўзини аён қилиб келмоқда. Мана, йигирма уч йилдирки, мен сизларга тўхтовсиз гапирияпман, аммо сизлар гапларимга қулоқ солмаяпсизлар.⁴ Эгамиз олдингизга пайғамбар қулларини бирин-кетин юборган бўлса ҳам, сизлар уларнинг гапларини эшитмадингиз, уларга қулоқ солмадингиз.⁵ Улар сизларга айтишган эди: «Қабиҳ ишларингизни бас қилинглар. Ёмон йўлдан қайтинглар. Шунда Эгамиз сизларга ва ота-боболарингизга абадий мулк қилиб берган юртда қоласизлар.⁶ Бошқа худоларга эргашманглар. Уларга хизмат қилманглар, сажда этманглар. Ясаган бутларингиз билан Эгамизни ғазаблантирунглар. Шунда Эгамиз бошингизга фалокат келтирмайди.»

⁷ «Аммо сизлар гапимга қулоқ солмадингизлар, — деб айтмоқда Эгамиз. — Бутларингиз билан Мени ғазаблантириб, ўз бошингизга фалокат келтирдингизлар.»⁸ Шу сабабдан Сарвари Олам демоқда: «Сизлар гапимга кирмаганингиз учун,⁹ Мен шимолдаги барча қабилаларни йифаман. Бобил шоҳи қулим Навуҳадназарни ҳам чақираман, — деб айтмоқда Эгамиз. — Уларни

сизларга қарши, бу юрт аҳолиси ва ён-атрофингиздаги халқларга қарши тортиб келаман. Мен сизларни тамомила қириб битираман. Сизларни кўрганлар даҳшатга тушади, аҳволингизни кўрган одамлар қотиб қолади. Мен юртингизни абадий харобазорга айлантираман.¹⁰ Шундай қиламанки, орангизда шоду хуррамлик садолари бўлмайди, келин-куёвнинг овози эшитилмайди, тегирмоннинг товуши чиқмайди. Чироғингиз ёнмайди.¹¹ Бутун юрт вайрон бўлиб, харобазорга айланади. Бу халқлар етмиш йил мобайнода Бобил шоҳига хизмат қилишади.»

¹² Эгамиз шундай демоқда: «Етмиш йилдан кейин эса Мен Бобил шоҳини, унинг халқини ва Бобилликларнинг^{*} бутун юртини қилган гуноҳлари учун жазолайман. Уларнинг юрти то абад ҳувиллаб қолади.¹³ Ўзим айтган ҳамма кулфатларни ўша юртга ёғдираман. Бу китобда ёзилган ҳамма фалокатларни келтираман. Еремиёнинг ҳамма халқларга қарши айтган башоратларини амалга ошираман.¹⁴ Бобилликлар кўплаб халқлару буюк шоҳларга қул бўладилар. Қилган қилмишларига яраша жазоларини оладилар.»

Худо халқларни ҳукм қиласди

¹⁵ Исройл халқининг Худоси — Эгамиз менга шундай деди: “Қўлимдаги косани ол. Бу коса ғазабим шаробига тўла. Мен сени қайси халқлар олдига юборсан, бу косадаги шаробдан уларга ичир.¹⁶ Улар шаробдан ичадилар, гандираклаб қолиб, ақлдан озадилар. Ахир, Мен уларга қарши қилич юбораман.”

¹⁷ Мен Эгамизнинг қўлидаги косани олдим. Эгамиз мени қайси халқлар олдига юборган бўлса, ўша халқларга шаробдан^{*} ичирдим:¹⁸ Қуддус, Яхудо юртининг шаҳарлари ва у ердаги шоҳу аъёнлар хонавайрон бўлсин деб, мен уларга шаробдан ичирдим. Бугунгача уларнинг аҳволини кўриб одамлар ёқасини ушлайди, халқимнинг номини қарғишларга қўшиб ишлатишади.

¹⁹ Сўнг мен Мисрга йўл олдим. Фиръевн, унинг хизматкорлари, аъёнлари, бутун халқи²⁰ ва у ерда яшаётган мусофиirlарга шаробдан ичирдим. Сўнг Узномли юртнинг шоҳларига, шунингдек, Ашқалон, Ғазо, Эхрон ва талафот кўрган Ашдодда^{*} ҳукмронлик қилган ҳамма Филист шоҳларига шаробдан ичирдим.

²¹ Сўнг мен Эдом, Мўаб, Оммонга,²² Тир, Сидон ва денгиз ортидаги юртларнинг шоҳларига шаробдан ичирдим.²³ Дедон, Темо, Буз^{*} ва сочини олдириб юрадиган^{*} бошқа ҳамма халқларга шаробдан ичирдим.²⁴ Ҳамма Арабистон шоҳларига, саҳрода яшайдиган ҳар хил кўчманчи қабилаларнинг ҳамма шоҳларига шаробдан ичирдим.²⁵ Зимри, Элам ва Мидия юртларининг ҳамма шоҳларига шаробдан ичирдим.²⁶ Шимолдаги узоқ-яқинда бўлган ҳамма шоҳларга шаробдан ичирдим. Ер юзидағи барча салтанатларга бирин-кетин бориб келдим. Охири косадаги шаробдан Бобил^{*} тахтида ўтирган шоҳ ичадиган бўлди.

²⁷ Эгамиз менга деди: “Уларга шундай деб айт: «Исройл халқининг Худоси — Сарвари Олам демоқда: ғазаб косамдан ичинглар! Маст бўлиб қусинглар! Турмайдиган бўлиб йиқилинглар, чунки Мен сизларнинг устингизга қилич юборяпман.»²⁸ Борди-ю, улар қўлингдаги косани олишдан ва шароб ичишдан воз кечсалар, сен уларга шундай деб айт: «Сарвари Олам сизларга демоқда: ичишингиз шарт!²⁹ Мана, Ўзимга тегишли Қуддус шаҳрига кулфат ёғдира бошладим. Сизлар жазодан қочиб қутулармидингиз?! Йўқ, жазодан қутула олмайсизлар! Мен ер юзидағи барча одамларни уруш балосига гирифтор этаман, — деб айтмоқда Сарвари Олам.»

³⁰ Шунинг учун, эй Еремиё, сен бу сўзларнинг ҳаммасини уларга айт:

«Эгамиз юксакдан шердай ўкиради,

Муқаддас маконидан садо беради.
 Юртига шиддат билан ўкиради.
 Узум эзувчилар каби* бақиради,
 Ер юзидағи ҳамма инсонларга ҳайқиради.
³¹ Гумбурлаши дунёning четигача әшитилади.
 Зоро, Эгамиз халқларга даъво қилмоқда,
 Дунёдаги одамзодни У ҳукм этмоқда,
 Фосиқларни қиличдан ўтказмоқда.
 Эгамизнинг каломи шудир.

³² Сарвари Олам шундай демоқда:
 Қаранглар, фалокат келмоқда,
 Халқдан халққа юқмоқда!
 Дунёning тўрт бурчагидан
 Кучли бўрон кўтарилимоқда!

³³ Ўша қуни бутун ер юзи, бу бошидан нариги четигача Эгамизнинг қудратидан нобуд бўлган одамларнинг жасадларига тўлади. Марҳумлар учун ҳеч ким марсия айтмайди, ҳеч ким уларни йиғиб кўммайди. Улар ер устида гўнгдай ётаверади.

³⁴ Эй чўпонлар, уввос солиб йиғланглар!
 Эй йўлбошчилар, кулга беланинглар!*
 Бўғизланадиган қунингиз етиб келди,
 Жасадларингиз ерда сочилиб ётади,
 Чилпарчин бўлган қимматбаҳо кўзадай бўлади.
³⁵ Чўпонлар ҳеч қаерга қоча олмайди,
 Йўлбошчилар қутуололмайди.
³⁶ Эшитинг! Йўлбошчилар фарёд қилмоқда,
 Чўпонлар ҳўнграмоқда!
 Эгамиз уларнинг яйловларини нобуд қиляпти.
³⁷ Сўлим майсазорларини пайҳон этяпти.
 Ахир, Эгамизнинг ғазаби аланга олди.
³⁸ Ўлжа қидириб уясидан чиққан шердай,
 Эгамиз Ўз маконидан чиқди.
 Эгамизнинг алангали ғазаби туфайли,
 Уруш балоси туфайли
 Бутун юрт харобазорга айланади.”

26-БОБ

Еремиёни ўлимга ҳукм қилмоқчи бўлишади

¹ Йўшиё ўғли Ёҳайиқимнинг Яхудодаги илк ҳукмронлиги даврида* Еремиёга Эгамиз Ўз сўзини аён қилди. ² Эгамиз шундай деди: “Эй Еремиё, уйимнинг ҳовлисига бориб тур. Яхудо шаҳарларидан уйимга сажда қилмоқчи бўлиб келган ҳамма одамларга гапир. Мен сенга амр қилган барча сўзларни, биронтасини ҳам қолдирмай уларга айт. ³ Балки, улар Мен айтган гапларга қулоқ солиб, ёвуз йўлларидан қайтишар. Шунда Мен ҳам шахтимдан қайтаман. Қилган қабиҳликлари туфайли бошлирига келтирмоқчи бўлаётган фалокатни келтирмайман. ⁴ Сен уларга шундай деб айт: «Эгамиз демоқда: сизлар Менга

қулоқ солмадингизлар, берган қонунларимни бажармадингизлар.

⁵ Олдиларингизга қайта–қайта пайғамбар қулларимни жўнатдим, аммо сизлар уларнинг гапига кирмадингизлар. Агар энди айтгандаримни бажармасангизлар,

⁶ Мен бу уйни Шилўнинг* қўйига соламан. Бу шаҳарни эса ер юзидағи халқлар орасида лаънати қиласман.»”

⁷ Руҳонийлар, пайғамбарлар ва бутун халқ Еремиёнинг Эгамиз уйида айтаётган бу гапларини эшишишди. ⁸ Еремиё Эгамизнинг амр қилган ҳамма сўзларини бутун халқقا айтиб бўлгач, руҳонийлар, пайғамбарлар ва бутун халқ унга ташланиб:

— Ўлдиринглар уни! — дея бақира бошлишди. — ⁹ Сен ҳали Эгамиз номидан башорат қиласиган бўлиб қолдингми?! “Бу уй Шилўнинг қўйига тушади, бу шаҳар эса вайрон бўлиб ҳувиллаб қолади”, деб айтишга қандай журъат этдинг?!

Эгамиз уйидаги бутун оломон Еремиёни ўраб олди.

¹⁰ Бундан хабар топган саройдаги Яхудо аъёнлари Эгамизнинг уйига келдилар. Қозилик қилиш учун Янги дарвозанинг кираверишидаги курсиларга ўтиридилар*.

¹¹ Шунда руҳонийлар билан пайғамбарлар етиб келган аъёнларга ва халойиққа мурожаат қилиб дедилар:

— Бу одам ўлимга лойиқ! У шахримизга қарши башорат қилди, буни ўз қулоғингиз билан эшиитдингиз.

¹² Еремиё ўз навбатида шундай деди:

— Сизлар эшиитган барча сўзларни гапиришим учун мени Эгам юборди. “Бу уйга ва шаҳарга қарши башорат қил”, деди. ¹³ Агар сизлар ёмон йўлингиздан қайтсангиз, турмуш тарзингизни ўзгартирсангиз, Эгангиз Худога итоат этсангиз, Эгамиз ҳам шахтидан қайтади, сизларга эълон қилган фалокатни бошингизга келтирмайди. ¹⁴ Мана, мен сизнинг ихтиёргиздаман. Нимани тўғри деб билсангиз, менга шуни қилинг. ¹⁵ Фақат билиб қўйинглар: агар мени ўлдирсангизлар, сизлар ҳам, шаҳар аҳолиси ҳам айбсиз одамнинг қонини тўккан бўласизлар. Зотан, бу сўзларнинг ҳаммасини сизларга айтишим учун Эгамизнинг Ўзи мени юборган.

¹⁶ Сўнг аъёнлар билан бутун халойиқ руҳонийларга ва пайғамбарларга шундай дедилар:

— Йўқ, бу одам ўлимга лойиқ эмас. У бизга Эгамиз Худо номидан гапиряпти–ку!

¹⁷ Юртнинг бир нечта оқсоқоли ҳам чиқиб, тўпланган бутун оломонга шундай дедилар:

¹⁸ — Яхудо шоҳи Ҳизқиё даврида* башорат қилиб юрган Мўрашатлик Михо ҳам Яхудо халқига шундай деб айтган эди*:

“Сарвари Олам демоқда:
«Куддус даладай шудгор қилинади,
Сион харобазор бўлади,
Эгамизнинг уйи турган тоғни*
Қалин ўрмонзор қоплайди.»”

¹⁹ Ўшанда Яхудо шоҳи билан бутун халқ пайғамбарни ўлдирганми?! Аксинча, шоҳ Эгамидан қўрқиб, Ундан марҳамат сўраган эди. Эгамиз эса шахтидан қайтиб, уларга эълон қилган фалокатни бошларига келтирмади. Биз–чи? Биз ўзимизнинг бошимизга ўзимиз фалокат келтиряпмиз–ку!

²⁰ Эгамизнинг номидан башорат қилган яна бир одам бор эди. У Хират–Йўримлик Шамаё ўғли Uriё эди. У ҳам худди Еремиёга ўхшаб бу юрт ва

шаҳарга қарши башорат қилган эди.²¹ Шоҳ Ёҳайиқим, унинг ҳамма соқчилари ва аъёнлари Уриёning сўзларини эшитдилар. Шунда шоҳ Уриёни ўлдиришга қасд қилди. Бундан хабардор бўлган Уриё қўрққанидан Мисрга қочиб кетди.²² Шоҳ Ёҳайиқим унинг орқасидан Ахбор ўғли Элнатанни одамлари билан жўнатди.

²³ Улар Уриёни Мисрда тутиб олиб, шоҳнинг олдига олиб келган эдилар. Шоҳ уни ўлдириб, жасадини авом халқнинг қабристонига ташлаган эди.

²⁴ Шунга қарамай, Шофон ўғли Охихам Еремиёning тарафини олди. Еремиёни ўлдирмоқчи бўлган оломоннинг қўлига топширишга йўл қўймади.

27-БОБ

Еремиё ва ҳўқиз бўйинтуруғи

¹ Йўшиё ўғли Зидқиё* Яҳудода ҳукмронлигининг илк даврида*, Эгамиз Ўз сўзини Еремиёга аён қилди. ² Эгамиз менга шундай деди: “Ёғочдан бир бўйинтуруқ яса, қайишлар ёрдамида уни гарданингга осиб ол. ³ Сўнг эса Қуддусга — шоҳ Зидқиё ҳузурига келган элчилар орқали Эдом, Мўаб, Оммон, Тир ва Сидон шоҳларига хабар жўнат. ⁴ Элчиларга буюр, улар ўз шоҳларига қуидаги хабарни етказсинлар:

«Исройл халқининг Худоси — Сарвари Олам шундай демоқда:
шоҳларингизга айтинглар,⁵ бу дунёни, ер юзидағи одамзоду ҳайвонларни
Мен Ўз қудратим ва ажойиботларим билан яратганман. Шундай экан,
уларни хоҳлаган одамга бераман.⁶ Ана шу юртларнинг барчасини Мен
Бобил шоҳи қулим Навуҳадназарга* бердим. Ҳаттоқи ёввойи ҳайвонларни
ҳам унинг измига топширдим, улар ҳам Навуҳадназарга хизмат қилишади.
⁷ Навуҳадназарнинг шоҳлиги қулагунча* ҳамма халқлар унга, унинг ўғлию
неварасига хизмат қиласи. Кейин эса Навуҳадназарнинг ўзи ҳам кўплаб
халқларга ва буюк шоҳларга хизмат қилишга мажбур бўлади.

⁸ Бобил шоҳи Навуҳадназарга хизмат қилмаган, унга бўйин бермаган
ҳар бир халқ ва шоҳликни Мен урушга, қаҳатчилигу ўлатга гирифтор этиб,
қириб ташлайман, — деб айтмоқда Эгамиз. — Ўша халқни Навуҳадназар
орқали бутунлай йўқ қилмагунимча қўймайман.⁹ Сизлар Бобил шоҳига
хизмат қилмайсизлар, дея каромат қилаётган пайғамбарларингизга,
фолбинларингизга, туш таъбирчиларига, башоратгўй одамларингизга,
сехргарларингизга ишонманглар.¹⁰ Улар сизларга ёлғон башорат
қиляптилар. Агар уларга қулоқ солсангизлар, Мен сизларни бу ердан
чиқариб юбораман. Узоқ юртларга сургун қиласман, оқибатда сизлар ҳалок
бўласизлар.¹¹ Бобил шоҳининг бўйинтуруғи остида бўйин эгган, унга
хизмат қилган ҳар бир халқни эса Мен ўз юртида қолдирман. Улар ўз
юртларида яшаб, ўз ерига ишлов берадилар. Эгамизнинг каломи шудир.”

¹² Мен Яҳудо шоҳи Зидқиёни ҳам худди шундай деб огоҳлантиридим: “Бобил шоҳига бош эгинг, унинг ўзига ҳам, халқига ҳам хизмат қилинг, шунда жонингизни сақлаб қолган бўласиз.¹³ Эгамиз: «Бобил шоҳига хизмат қилмаган ҳар бир халқ уруш, қаҳатчилик ва ўлатдан нобуд бўлади» деган эди. Наҳотки ўзингизнинг ва ўз халқингизнинг жонига зомин бўлсангиз?!¹⁴ «Бобил шоҳига хизмат қилманг», деб айтаётган пайғамбарларнинг гапларига қулоқ солманг,
улар сизларга ёлғон башорат қиляпти.¹⁵ Ўша пайғамбарлар ҳақида Эгамиз шундай деб айтди: «Уларни Мен юбормаганман. Улар Менинг номимдан ёлғон башорат қилишяпти. Шундай экан, Мен сизларни ва сизларга башорат қилаётган

пайғамбарни бу юртдан улоқтириб ташлайман. Ҳаммангиз ҳалок бўласизлар.”

¹⁶ Сўнг мен руҳонийларга ва бутун ҳалқа гапирдим: “Эгамиз шундай демоқда: «Маъбаднинг ашёлари Бобилдан яқинда олиб келинади, деб айтаётган пайғамбарларга қулоқ солманглар. Улар сизларга ёлғон башорат қилишяпти.

¹⁷ Уларга қулоқ солманглар! Жонингизни сақлаб қолмоқчи бўлсангизлар, Бобил шоҳига хизмат қилинглар. Акс ҳолда, шаҳар вайрон қилинади! ¹⁸ Агар улар, ҳақиқатан ҳам, пайғамбарлар бўлишса, агар чиндан ҳам Менинг каломим уларга аён бўлган бўлса, унда улар Мен, Сарвари Оламга ёлворишин. ‘Сенинг уйингдаги, шоҳ саройидаги ва Куддусдаги қолган ашёлар Бобилга олиб кетилмасин’, деб Менга илтижо қилишсин.» ¹⁹⁻²¹ Ахир, Сарвари Олам демоқда: «Бобил шоҳи Навуҳадназар* Яхудога бостириб келиб, таҳтда ўтирган Ёҳайиқим ўғли Ёҳайихинни* Яхудо амалдорлари билан бирга асир қилиб олиб кетганда, Маъбаддаги иккита бронза устунни, ҳовузни, тагкурсиларни ва Куддусдаги айрим идишларни қолдириб кетган эди.» Аммо ўша қолган-қутган ашёлар ҳақида Истроил ҳалқининг Худоси — Сарвари Олам шундай демоқда: «Ўз уйимда, шоҳ саройида ва Куддусда қолган ашёлар ҳақида айтадиган гапларимни эшигинглар: ²² ашёларнинг ҳаммаси Бобилга олиб кетилади*. Мен уларни олиб келгани бормагунимча, ўша ерда қолади. Сўнг эса Мен уларни қайтариб олиб келаман, шу ерга жойлаштираман.» Эгамизнинг каломи шудир.”

28-БОБ

Соҳта пайғамбар Ханониё

¹ Айни ўша йили, яъни Яхудо шоҳи Зидқиё ҳукмронлигининг илк даврида, тўртинчи йили бешинчи ойида* Ханониё пайғамбар Эгамиз уйидаги руҳонийлар ва ҳалқ олдида менга гапирди. Ханониё Гивонлик Аззурнинг ўғли эди. У менга шундай деди:

² — Истроил ҳалқининг Худоси — Сарвари Олам демоқда: “Бобил шоҳи солган бўйинтуруқни Мен синдириб ташладим. ³ Шоҳ Навуҳадназар* уйимдан Бобилга олиб кетган ҳамма ашёларни Мен икки йил ичиди бу ерга қайтариб олиб келаман. ⁴ Бундан ташқари, Бобилга сургун бўлган Яхудо шоҳи Ёҳайиқим ўғли Ёҳайихинни* ва у билан бирга ҳамма асирларни* қайтариб олиб келаман. Мен Бобил бўйинтуруғини синдириб ташлайман.” Эгамизнинг каломи шудир.

⁵ Шунда мен Эгамиз уйида ҳозир бўлган руҳонийлар ва ҳалқ олдида Ханониёга ⁶ шундай дедим:

— Омин! Илойим, айтганингиздай бўлсин. Башорат қилган сўзларингизни Эгамизнинг Ўзи бажо айласин. Ўз уйининг ашёларию асирларни Бобилдан қайтариб, бу ерга олиб келсин. ⁷ Энди эса мен сизга ва ҳалқа айтмоқчи бўлган мана бу гапларимни эшигинг. ⁸ Сиздан ва мендан олдин ўтган пайғамбарлар кўп юртлару буюк шоҳликларга қарши уруш, очарчилик ва ўлатни башорат қилган эдилар. ⁹ Тинчликни башорат қилган пайғамбарнинг башорати бажо бўлганидан кейингина*, ҳалқ уни “ҳақиқатан ҳам Эгамизнинг элчиси” деб тан олар эди.

¹⁰ Сўнг Ханониё пайғамбар Еремиёнинг гарданидаги бўйинтуруқни олиб синдириди-да, ¹¹ тўпланиб турган ҳалойиққа мурожаат қилиб деди:

— Эгамиз айтмоқда: “Худди шундай қилиб, Мен икки йил ичиди Бобил шоҳи Навуҳадназарнинг ҳалқларга солган бўйинтуруғини олиб, синдириб ташлайман.”

Бу гаплардан кейин Еремиё ўз йўлига кетди.

¹² Ханониё пайғамбар Еремиё пайғамбарнинг гарданидаги бўйинтуруқни синдиргандан кейин, кўп ўтмай Эгамиз Еремиёга Ўз сўзини аён қилиб деди:

¹³ “Ханониёning олдига бориб, шундай деб айт: «Эгамиз айтмоқда: сен ёғоч бўйинтуруқни синдиридинг, аммо ўшанинг ўрнига Мен темир бўйинтуруқ ясайман. ¹⁴ Зеро, Исройл халқининг Худоси — Сарвари Олам шундай демоқда: Мен бу халқларнинг гарданига темир бўйинтуруқ соламан. Уларнинг ҳаммаси Бобил шоҳи Навуҳадназарга хизмат қилишади. Ҳа, уларнинг ҳаммаси Навуҳадназарга бош эгади. Мен ҳатто ёввойи ҳайвонларни ҳам Навуҳадназарнинг ихтиёрига топшираман.»”

¹⁵ Еремиё пайғамбар Ханониё пайғамбарга деди:

— Менга қара, Ханониё, Эгамиз сени юбормаган. Сен эса бу халқни ёлғон гапларингга ишонтириб қўйдинг. ¹⁶ Шу қилганинг учун Эгамиз шундай демоқда: “Мен сени ер юзидан даф қиласман. Сен ўз башоратларинг билан халқни Эгангга қарши қўзғатганинг учун шу йили ёқ ўласан.”

¹⁷ Ўша йилнинг еттинчи ойида* Ханониё оламдан ўтди.

29-БОБ

Еремиёнинг Бобилдаги яхудийларга ёзган мактуби

¹ Еремиё пайғамбар Бобилда асиirlарнинг орасида омон қолган оқсоқолларга, руҳонийларга, пайғамбарларга ва асиirlикда юрган бутун халққа Қуддусдан бир мактуб йўллади. Бу асиirlарни шоҳ Навуҳадназар* Қуддусдан Бобилга сургун қилган эди. ² Шоҳ Ёҳайихин*, она малика, аъёнлар, Яхудо ва Қуддус йўлбошчилари, хунармандлару темирчилар Қуддусдан сургун қилингандан кейин бу мактуб ёзилди. ³ Еремиё мактубини Шофон ўғли Эласах ва Хилқиё ўғли Гамариё орқали жўнатди. Яхудо шоҳи Зидқиё* бу одамларни Бобил шоҳи Навуҳадназар ҳузурига юборганди. Мактуб қуйидаги мазмунда эди:

⁴ Исройл халқининг Худоси — Сарвари Олам Қуддусдан Бобилга сургун қилган барча одамларга шундай демоқда: ⁵ “Ўзларингизга яшаш учун уйлар қуринглар, боғ-роғлар яратинглар, меваларидан тановул қилинглар.

⁶ Уйланинглар, ўғил-қизлар қўринглар, ўғилларингизга келинлар олиб беринглар. Қизларингизни узатинглар, улар ҳам ували-жували бўлишсин. Ўша ерда кўпайинглар, сонингиз камаймасин. ⁷ Мен сизларни сургун қилган ўша шаҳарнинг тинч ва фаровон ҳаёти учун меҳнат қилинглар. Ўша шаҳарнинг осойишталиги учун Менга ибодат қилинглар. Шаҳар тинч бўлса, сизлар ҳам тинч бўласизлар.” ⁸ Исройл халқининг Худоси — Сарвари Олам шундай демоқда: “Орангиздаги пайғамбарлар билан фолбинлар сизларни лақиллатишмасин. Улар кўрган тушларини айтганларида қулоқ солманг, ⁹ улар Менинг номим билан башорат қилиб айтиётган ҳамма гаплари ёлғондир. Уларни Мен олдингизга юбормаганман.” Эгамизнинг каломи шудир.

¹⁰ Эгамиз шундай демоқда: “Бобил ҳукмронлигига етмиш йил бўлгандан кейин, Мен олдингизга бораман. Берган эзгу ваъдамга биноан сизларни шу ерга қайтариб, олиб келаман. ¹¹ Ахир, Мен сизлар тўғрингизда тузган режаларимни биламан, — деб айтмоқда Эгамиз. — Бу режаларим сизларга кулфат эмас, фаровонлик олиб келади, ёруғ келажагу умид беради. ¹² Ўша дамларда Менга қилган илтижою ибодатларингиз ижобат бўлади. ¹³ Мени бутун қалбингиз билан изласангизлар, топасизлар. ¹⁴ Ҳа, Мени топасизлар, — деб айтмоқда Эгамиз. — Мен сизларни яна фаровонликка эриштираман*. Сизларни сургун бўлган барча халқлар орасидан, ҳамма

юртлардан йиғиб оламан. Сизларни Ўзим чиқариб юборган она юртингизга қайтариб олиб келаман.” Эгамизнинг каломи шудир.

¹⁵ Сизлар: “Эгамиз Бобилда бизга пайғамбарлар берди”, деб айтишингиз мумкин. ¹⁶ Энди Довуд тахтида ўтирган шоҳ ҳақида, ҳануз Қуддусда яшаб келаётган бутун халқ ҳақида, сизлар билан сургунга кетмаган қариндош-уруғингиз ҳақида Эгамизнинг айтган сўзларини эшитинг.

¹⁷ Сарвари Олам шундай демоқда: “Мен уларнинг бошига уруш, очарчилик ва ўлат балосини келтираман. Уларни еб бўлмайдиган чирик анжирга ўхшатиб қўяман. ¹⁸ Қилич, очарчилик ва ўлат билан уларнинг кетидан қуваман. Буларни кўрган ер юзидаги ҳамма шоҳликлар даҳшатга тушади. Мен уларни тарқатиб юборган жойда уларнинг аҳволини кўрган ҳамма одамлар даҳшатга тушиб, ёқасини ушлайди. Уларни масхара қилиб, номини қарғишларда ишлатишида. ¹⁹ Ахир, улар гапимга қулоқ солмадилар, — деб айтмоқда Эгамиз. — Мен уларнинг олдиларига пайғамбар қулларимни узлуксиз юбориб турдим. Бироқ улар пайғамбарларимга қулоқ солмадилар.” Эгамизнинг каломи шудир.

²⁰ Шундай экан, эй Эгамиз Бобилга сургун қилган асиirlар, Эгамизнинг гапларига қулоқ солинглар! ²¹ Истроил халқининг Худоси — Сарвари Олам Хулаё ўғли Ахаб ва Масиё ўғли Зидқиё ҳақида шундай демоқда: “Улар Менинг номим билан ёлғон башоратлар айтиб юришибди. Мен уларни Бобил шоҳи Навуҳадназар қўлига топшираман. Сизларнинг кўзингиз олдида ўлдиртириб юбораман. ²² Шундан кейин Бобилдаги Яхудолик асиirlар бирорни қарғаганда шундай деб айтадиган бўлади: «Илойим, бошингга Бобил шоҳи тириклайн ёқиб юборган Зидқиё ва Ахабнинг куни тушсин.» ²³ Ахаб билан Зидқиёнинг қисмати шудир, чунки улар Истроилда разилликлар қилдилар. Қўшниларининг хотинлари билан зино қилдилар. Мен уларга амр қилмаган бўлсан ҳам, Менинг номимдан ёлғон гапирдилар. Қилган қилмишларини биламан, Ўзим шуларга гувоҳман.” Эгамизнинг каломи шудир.

Шамаёга қарши башорат

²⁴⁻²⁵ Истроил халқининг Худоси — Сарвари Олам менга Нахаламлик Шамаё тўғрисида бир хабар берди. Шамаё ўзбошимчалик қилиб, Қуддусдаги ҳамма одамга, Масиё ўғли руҳоний Зафаниёга ва бошқа ҳамма руҳонийларга бир мактуб жўнатган экан. У мактубида руҳоний Зафаниёга шундай деб ёзган экан:

²⁶ Эгамизнинг Ўзи сизни Ёҳайидо ўрнига руҳоний қилиб тайинлади. Сиз, Эгамиз уйининг назоратчиси сифатида, ўзини пайғамбар қилиб кўрсатган ҳар бир телбани кишанлаб, занжирбанд қилишингиз лозим. ²⁷ Нега энди Онотўтлик Еремиёга индамай юрибсиз? У сизларнинг орангизда ўзини пайғамбар қилиб кўрсатиб юрибди-ку! ²⁸ У Бобилга, бизга мактуб жўнатиб, мактубида: “Сизлар узоқ йиллар давомида сургунда яшайсизлар. Ўзларингизга яшаш учун уйлар қуринглар, боғ-роғлар яратинглар, мевасидан тановул қилинглар”, деб ёзибди.

²⁹ Бу мактубни Еремиёга руҳоний Зафаниё ўқиб берди. ³⁰ Шунда Еремиёга Эгамиз Ўз сўзини аён қилди: ³¹ “Сургундаги барча одамларга шундай деб ёз:

Нахаламлик Шамаё ҳақида Эгамиз демоқда: «Шамаёни Мен юбормаганман. У эса башорат қилиб, сизларни ёлғон гапларига ишонтириб

қўйди.³² Шунинг учун Мен уни бутун хонадони билан бирга жазолайман. Бу халқ орасида унинг авлодидан бўлган биронта одам ҳам тирик қолмайди. Уларнинг биронтаси ҳам халқимга Мен қиладиган яхшилигимни кўрмайди, чунки Шамаё ўз гаплари билан халқимни Менга қарши қўзғатмоқчи бўлди.» Эгамизнинг каломи шудир.”

30-БОБ

Эгамиз Ўз халқига ваъда беради

¹ Эгамизнинг сўзи Еремиёга аён бўлди. ² Истроил халқининг Худоси — Эгамиз шундай деди: “Мен сенга айтган барча сўзларимни ўрама қоғозга* ёзиб қўй.

³ Шундай кунлар келадики, Мен халқим Истроилни ва Яхудони яна фаровонликка эришираман*. Ота-боболарига берган юрга уларни олиб келаман. Улар ўша юрга эгалик қиладилар.” Эгамизнинг каломи шудир.

⁴ Эгамиз менга Истроил ва Яхудо ҳақида шундай сўзларни айтди:

⁵ Эгамиз демоқда:

“Саросима овозларини эшитдик.

Ана, ваҳима садолари эшитилмоқда! Тинчлик йўқ!

⁶ Қани, сўраб кўринг:

Эркак киши туғадими?

Нега унда мен кўрган ҳар бир кучли эркак

Дард тутган аёлдай белини ушлаб олган?

Нега ҳар бир эркакнинг юзи бўздай оқарган?

⁷ Эвоҳ, нақадар даҳшатли бу кун!

Бундай кун ҳеч қачон бўлмаган.

Ёқуб насли учун бу жабр куни бўлади,

Аммо бу кундан халқим қутқарилади.”

⁸ Сарвари Олам шундай демоқда: “Ўша куни Мен халқимнинг бўйнидаги бўйинтуруқни синдираман, киshanларини узиб ташлайман. Менинг халқим энди ҳеч қачон ажнабийларга қул бўлмайди. ⁹ Улар Мен, Ўз Эгаси Худога ва Мен тахтга ўтқизадиган Довуд авлодидан бўлган шоҳга хизмат қилишади.”

¹⁰ Эгамиз шундай демоқда:

“Эй қулим Ёқуб, қўрқма!

Эй Истроил* халқи, саросимага тушма!

Мен сени олис юртдан озод қилиб олиб келаман,

Наслингни сургун бўлган мамлакатдан қутқараман.

Эй Ёқуб насли, сен юртингга қайтасан,

Осойишта ва бехатар яшайсан.

Энди ҳеч ким сени қўрқитмайди.”

¹¹ Эгамиз шундай демоқда:

“Мен сен билан бирга бўламан,

Ўзим сени қутқараман.

Сени халқлар орасига тарқатган эдим,

Энди ўша халқларнинг ҳаммасини қириб ташлайман.

Сени эса қириб юбормайман,

Аммо жазосиз ҳам қолдирмайман,

Адолат ила жазоингни бераман.”

¹² Мана, Эгамиз Ўз халқига шундай демоқда:
“Ярангни даволаб бўлмайди,
Сенинг дардинг бедаводир.

¹³ Арзингни эшитадиган одам йўқ,
Яранг учун дори-дармон йўқ,
Сени даволаб бўлмайди.

¹⁴ Ҳамма ўйнашларинг* сени унутди,
Уларнинг сен билан иши йўқ.
Мен душман каби, сенга ҳамла қилдим,
Шафқатсиз жазоингни бердим.
Оғир жинояting, кўп гуноҳларинг учун
Сени шу кўйга солдим.

¹⁵ Нечун жон аччиғида бақиряпсан?!

Ярангни даволаб бўлмайди, ахир!
Оғир жинояting, кўп гуноҳларинг учун
Сени шу кўйга солдим.

¹⁶ Аммо сени ҳалок қилганлар ҳалок бўлади,
Душманларингнинг ҳаммаси сургун қилинади.
Сени талон-тарож қилганлар таланади.
Сенга хужум қилганлар босиб олинади.

¹⁷ Душманлар сени «Ташлаб кетилган» деб аташса ҳам,
«Ҳеч кимнинг Қуддус* билан иши йўқ», деб айтишса ҳам,
Мен сени соғайтираман,
Ярангга шифо бераман.”
Эгамизнинг каломи шудир.

¹⁸ Эгамиз шундай демоқда:
“Мен Ёқуб наслининг чодирларини қайта тиклайман.
Халқим хонадонларига раҳм-шафқат қиласман.
Шаҳар ўз вайроналари устида қайта бунёд бўлади,
Сарой ўз жойида тикланади.

¹⁹ У ердан шукrona қўшиқлари эшитилади,
Шодлик ҳайқириқлари янграб туради.
Мен халқимни кўпайтираман,
Уларнинг сони камаймайди.
Уларни обрў-эътиборли қиласман,
Ҳеч ким уларни оёқ ости қиласман.

²⁰ Фарзандлари олдингидай фаровон ҳаёт кечиради,
Жамоаси олдимда мустаҳкам туради.
Уларга жабр қилганларни Мен жазолайман.

²¹ Шаҳзодаси ўзларидан чиқади,
Ҳукмдори Менинг халқимдан бўлади.
Мен уни Ўзимга яқинлашираман,
Шунда у Менга яқинлаша олади.
Зотан, ҳеч ким ўзидан-ӯзи
Менга яқинлашишга журъат этмайди!

— деб айтмоқда Эгамиз. —

²² Шунда, эй Ёқуб насли, сизлар Менинг халқим бўласизлар,
Мен эса сизларнинг Худойингиз бўламан.”

²³ Қаранглар, Эгамиз ғазабга минди,
Унинг қаҳри бўронга ўхшайди,
Авж олган тўфондай,
Фосиқларнинг бошига тушади.
²⁴ Эгамиз ниятини тўлиқ бажармагунча,
Ўз ғазабидан тушмайди.
Кейинчалик буни англаб оласиз.

31-БОБ

Исроил халқи она юртига қайтиб келади

¹ Эгамиз шундай демоқда: “Ўша вақтда Мен ҳамма Исроил қабилаларининг Худоси бўламан, улар эса Менинг халқим бўлади.”

² Эгамиз шундай демоқда:
“Қирғиндан омон қолган Исроил халқи
Тинчлик излаб сафарга чиққанда,
Саҳрода иноят топди.”
³ Эгамиз қадимда Исроилга зоҳир бўлиб,
Шундай деган эди:
“Сени мангу севги билан севдим,
Сенга содик бўлиб келдим.

⁴ Эй бокира қиз Исроил,
Мен сени қайтадан бунёд этаман.
Сен қайта бино бўласан.
Сен яна чилдирмангни чаласан,
Қувонч ила рақсга тушасан.

⁵ Самария қирларида яна узумзорлар барпо қиласан.
Ток эккан деҳқонлар ўзлари етиштирган ҳосилдан ейдилар.
⁶ Шундай кунлар келадики,
Соқчилар Эфрайим* қирларида шундай деб жар соладилар:
«Келинглар, Эгамиз Худонинг олдига борайлик!
Келинглар, Куддусга* чиқайлик!»

⁷ Эгамиз шундай демоқда:
“Ёқуб насли учун севинч ила қўшиқ айтинг,
Ха, халқлар сардори учун Худони мадҳ қилинг.
Худога ҳамду санолар ўқинг, Унга ёлвориб айтинг:
«Эй Эгамиз, Ўз халқингни халос қилгин!
Исроилнинг омон қолганларини қутқаргин!»

⁸ Мен уларни шимолдан олиб келаман,
Дунёнинг тўрт бурчагидан йиғиб оламан.
Ораларида кўру чўлоқлар бўлади,
Ҳомиладор аёллару тўлғоқ тутаётганлар бўлади.

Катта бир жамоа бўлиб, бу ерга қайтиб келишади.

⁹ Улар кўз ёш тўкиб, йўл юришади,
Уларни бошлаб келаётганимда илтижо қилишади.
Мен уларни сув булоқлари бўйлаб етаклайман,
Қоқилмасин деб, текис йўлдан олиб юраман.

Зотан, Мен Исройлнинг отасидирман,
Эфрайим Менинг тўнғич ўғлимдир.”

¹⁰ Эй халқлар, Эгамизнинг сўзини эшитинглар,
Денгиз ортидаги юртларда шундай эълон қилинглар:
“Эгамиз Исройл халқини тарқатиб юборди,
Аммо энди уни қайта йиғиб олади,
Чўпон сурувини қўриқлагандай,
Эгамиз Исройлни қўриқлайди.”

¹¹ Зоро, Ёқуб наслини Эгамиз озод қилди,
Улардан кучлироқ бўлган бир халқдан бу наслни қутқарди.

¹² Ёқуб насли Қуддус қирларида қувонч ила ашула айтади,
Эгамиз берган баракадан қувонади.
Буғдой, шароб ва зайдун мойи туфайли,
Сурувдаги қўзилару подалардаги бузоқлар туфайли
Уларнинг юзидан нур сочилади.

Улар суғорилган боққа ўхшайдиган бўлади,
Бутунлай қайғуни унутиб юборишади.

¹³⁻¹⁴ Эгамиз шундай демоқда:
“Қизлар хурсанд бўлиб, рақсга тушадилар,
Эркакларнинг ёшу қариси шод бўлади.
Мен уларнинг қайғусини қувончга айлантираман,
Ҳасрат ўрнига таскин ва шодлик бераман.
Рухонийларни аъло сифатли овқатлар билан тўйғизаман,
Халқимни баракалардан баҳраманд қиласман.”

Эгамизнинг Исройлга бўлган меҳр-шафқати

¹⁵ Эгамиз шундай демоқда:

“Рама шаҳридан* бир нидо эшитилар,
Аччиқ бир нолаю оху фифон бу.
Болалари учун йиғлар Роҳила*,
Овунишни хоҳламас,
Ахир, улар энди йўқ.”

¹⁶ Эгамиз шундай демоқда:

“Бўлди бас, йиғлама,
Кўз ёшларингни тўкма.
Зоро, меҳнатинг тақдирланади,
Фарзандларинг душман юртидан қайтиб келади.

¹⁷ Келажагингга умид бор,
Болаларинг ўз юргига қайтиб келади,
— деб айтмоқда Эгамиз. —

¹⁸ Эфрайимнинг ҳасратини эшитдим:
«Мени жазоладинг, ўзимга сабоқ олдим.
Мен ўжар бир бузоққа ўхшаган эдим.
Мени қайтар, олдингга қайтиб борай,
Ахир, Эгам Худо Сенсан.

¹⁹ Сендан юз ўғирганимдан пушаймон бўлдим,
Эс-ҳушимни йиғиб олгач, қўксимга урдим.
Ёшлиқда иснодга қолганим туфайли

Шармандаю шармисор бўлдим.»

²⁰ Эфрайим — Менинг азиз ўғлоним,
Суюкли фарзандимdir у!
Унга қарши кўп гапирганим билан,
Хаёлимдан уни кеткизмайман.
Унга ич-ичимдан ачиниб кетдим,
Албатта унга раҳм қиласман.”
Эгамизнинг каломи шудир.

²¹ Эй бокира қиз* Истроил,
Ўзинг учун йўл белгиларини қўй,
Йўналиш устунларини ўрнат.
Келган йўлингни аниқлаб ол.
Қайт, ўз шаҳарларингга қайт.

²² Эй вафосиз қиз,
Қачонгача иккиланасан?!
Эгамиз дунёда янги бир нарса яратади:
Истроил Ўз Худосига чирмасиб олади*.

Худо халқининг ёрқин келажаги

²³ Истроил халқининг Худоси — Сарвари Олам шундай демоқда: “Мен халқимни яна фаровонликка эриштираман*. Шунда Яхудо юртидаги ва барча шаҳарларидағи одамлар Куддусни шундай дуо қиласидиган бўлишади:

«Эй муқаддас тоғ*,
Солиҳлик макони,
Эгамиз сенга барака берсин!»

²⁴ Одамлар Яхудо юртида ва унинг ҳамма шаҳарларида яшайдилар. У ерда дехқонлар ва қўйларни боқадиган чорвадорлар бўлади. ²⁵ Мен чанқаганларнинг чанқоғини қондираман, толиққан жонга ором бераман. ²⁶ Шунда одамлар мириқиб ухлаб, кучга тўлиб уйғонадилар*.”

²⁷ Эгамиз демоқда: “Шундай кунлар келадики, Мен Истроил ва Яхудо юртларини одамларга ва ҳайвонларга тўлдираман. ²⁸ Илгарилари Мен бу халқни қўпориб, ҳалок қиласан бўлсан, уларни ағдариб ташлаб, яксон этган бўлсан, бошларига фалокат келтирган бўлсан, энди уларни қайта бунёд этиб, мустаҳкам қиласман, — деб айтмоқда Эгамиз. — ²⁹ Ўшанда одамлар шундай деб айтмайдиган бўлади:

«Оталари нордон узум ейишган эди,
Болаларининг тиши қамашди.»

³⁰ Аксинча, ҳар бир одам қиласан гуноҳи учун ўзи ўлим жазосини олади. Ким нордон узум еган бўлса, ўшанинг тиши қамашади.”

³¹ Эгамиз демоқда: “Шундай кунлар келадики, Мен Истроил ва Яхудо халқлари билан янги аҳд тузаман. ³² Бу янги аҳд Мен уларнинг ота-боболари билан тузган аҳдга ўҳшамайдиган бўлади. Мен ота-боболарини қўлидан етаклаб, Мисрдан олиб чиққанимда, улар билан аҳд тузган эдим. Мен уларга содик хўжайин* эдим, аммо улар ўша аҳдимни бузишидди.” Эгамизнинг каломи шудир.

³³ Эгамиз шундай демоқда: “Мен келажақда Истроил халқи билан тузадиган аҳд

шундай бўлади: Мен қонунимни одамларнинг онгига солиб қўяман, қонунимни уларнинг юракларига ёзаман. Мен уларнинг Худоси, улар эса Менинг халқим бўладилар.³⁴ Шундан кейин одамлар бир-бирига: «Эгамизни таниб-билинг», демайдиган бўлишади. Чунки уларнинг ҳаммаси — каттасидан тортиб, кичигигача Мени биладиган бўлади. Мен уларнинг айбларини кечираман, гуноҳларини ҳеч қачон эсга олмайман.” Эгамизнинг каломи шудир.

³⁵ Кунни ёритсин дея, Эгамиз қуёш ато қилди.

Кечаси нур сочсин дея, ой ва юлдузларни яратди.

У денгизни кўпиртирас,

Тўлқинларини ўқиртирас,

Унинг номи Сарвари Оламдир.

У шундай демоқда:

³⁶ “Агар табиатдаги бу тартиб бузилса,

Исройл насли ҳам халқ сифатида йўқ бўлади.”

³⁷ Эгамиз шундай демоқда:

“Осмону фалакни ўлчаб бўлмагандай,

Замин пойдеворини* текшириб бўлмагандай,

Мен ҳам Исройл наслини тарқ этолмайман,

Қилган қилмишлари учун уларни ташлаб кетолмайман.”

Эгамизнинг каломи шудир.

³⁸ Эгамиз демоқда: “Шундай кунлар келяптики, Куддус Менинг шарафим учун қайта тикланади. Бутун шаҳар Ханонил минорасидан^{*} тортиб, то Бурчак дарвозасигача қайта қурилади.³⁹ Шаҳар кенгаяди, чегараси ғарбдаги Горив тепалигигача бориб, Гўах томон бурилади.⁴⁰ Ўликлар кўмилган, ахлат ташланган бутун Хиннум сойлиги^{*} ва Қидрон сойлигининг шарқидаги От дарвозасигача чўзилган ҳамма далалар Меники бўлади, улар муқаддас бўлади. Куддус шахри энди ҳеч қачон вайрон қилинмайди, харобага айланмайди.”

32-БОБ

Еремиё дала сотиб олади

¹ Яҳудо шоҳи Зидқиё хукмронлигининг ўнинчи йилида^{*} Еремиёга Эгамизнинг сўзи аён бўлди. Ўша йили Бобил шоҳи Навуходназар^{*} хукмронлигининг ўн саккизинчи йили бўлиб,² айни вақтда у лашкарлари билан Куддусни қамал қилиб турган эди. Еремиё эса Яҳудо шоҳи саройидаги соқчилар ҳовлисига қамаб қўйилган эди. ³ Шоҳ Зидқиёning ўзи Еремиёни ўша ерга қаматиб, шундай деган эди: “Нега сен ўзингча башорат қилиб юрибсан?! Ахир, сен шундай деб айтяспан: «Эгамиз айтмоқда: Мен бу шаҳарни Бобил шоҳининг қўлига топшираман, шаҳар таслим бўлади. ⁴ Яҳудо шоҳи Зидқиё ҳам Бобилликларнинг^{*} қўлидан қочиб қутулолмайди. У Бобил шоҳининг қўлига топширилади. У шоҳ Навуходназарни ўз кўзи билан кўради, Навуходназар у билан юзма-юз гаплашади. ⁵ Навуходназар Зидқиёни Бобилга олиб кетади. Мен Зидқиёни жазоламагунимча Зидқиё ўша ерда қолади, — деб айтмоқда Эгамиз. — Агар Бобилликларга қарши жанг қилсангизлар, мағлуб бўласизлар.”

⁶ Еремиё шундай деб айтди: “Эгамиз менга Ўз сўзини аён қилиб деди:⁷ «Эй Еремиё, сенинг олдингга Шаллум амакингнинг ўғли Ханомил келади. У сенга:

‘Онотўтдаги даламни сотиб ол. Сен энг яқин қариндошим бўлганинг учун даламни сотиб олиш ҳуқуқига эгасан*’, деб айтади.»

⁸ Кейин, худди Эгамиз айтганидек, соқчилар ҳовлисига амакиваччам Ханомил кириб келди. У менга шундай деди: «Бенямин худудида жойлашган Онотўтдаги даламни сотиб олсанг, деган эдим. Сен яқин қариндошим бўлганинг учун даламни ўзингга мулк қилиб олиш ҳуқуқига эгасан. Даламни сотиб ола қол.» Шунда менга ҳақиқатан ҳам Эгамиз гапирганини билдим.

⁹ Мен амакиваччам Ханомилдан Онотўтдаги далани сотиб олиб, унга 43 мисқол* кумушни ўлчаб бердим. ¹⁰ Кейин васиқага қўл қўйиб, уни муҳрладим*, ҳаммасини гувоҳлар олдида қилдим, кумушни тарозида ўлчаб бердим. ¹¹ Сўнг муддат ва шартлари баён қилинган васиқанинг муҳрланган нусхасини, шунингдек, муҳрланмаган очиқ нусхани ¹² Борухга бердим. Борух Нериёнинг ўғли, Махсиёнинг невараси эди. Соқчилар ҳовлисида ўтирган ҳамма яҳудийлар, васиқага қўл қўйган гувоҳлар ва амакиваччам Ханомил бунинг шоҳиди бўлдилар. ¹³ Мен уларнинг олдида Борухга шундай дедим: ¹⁴ «Исройл халқининг Худоси — Сарвари Олам демоқда: бу васиқанинг иккала нусхасини, муҳрланган ва очиқ нусхаларини олиб, хумчага солиб қўй, токи улар узоқ йиллар давомида сақланиб қолсин. ¹⁵ Зоро, Исройл халқининг Худоси — Сарвари Олам демоқда: бу юртда одамлар яна уйлар, далалар ва узумзорлар сотиб оладиган бўлишади.»

Еремиёнинг ибодати

¹⁶ Мен васиқани Нериё ўғли Борухга берганимдан сўнг, Эгамизга ибодат қилдим:

¹⁷ Ё Эгам Раббий! Сен Ўз қудратинг ва ажойиботларинг билан еру осмонни яратдинг. Сенинг қўлингдан келмайдиган нарса йўқ. ¹⁸ Сен минглаб авлодларга* Ўзингнинг содиқ севингнги қўрсатасан, аммо оталарнинг гуноҳлари учун болаларни жазолайсан. Эй буюк ва қудратли Худо! Сарвари Оламдир Сенинг номинг. ¹⁹ Сен доно режалар тузиб, буюк ишлар қиласан. Фоний бандалар қилаётган барча ишларни кузатиб турасан. Уларни қилмишига яраша жазолайсан, қилган ишига яраша тақдирлайсан. ²⁰ Сен Мисрда ёдда қоладиган аломату мўъжизалар кўрсатдинг. Ҳозирги кунда ҳам Исройл ва бутун одамзод орасида Сенинг номинг ниҳоятда машҳур.

²¹ Аломату мўъжизаларинг, Ўз қудратингу ажойиботларинг, буюк бир даҳшатинг билан Сен Ўз халқингни Мисрдан олиб чиққан эдинг.

²² Ота-боболарига ваъда қилган, сут ва асал оқиб ётган юртни* уларга берган эдинг. ²³ Улар бу юртга келиб, уни мулк қилиб олдилар. Аммо Сенга бўйсунмадилар, қонунларингга риоя қилмадилар. Буюрган амрларингни бажармадилар. Шу сабабдан Сен бу фалокатларнинг ҳаммасини уларнинг бошига солдинг.

²⁴ Ана энди Бобилликлар Қуддусга ҳужум қиляптилар. Қуддусни қўлга киритиш учун шаҳар деворига қиялатиб тупроқ уйяптилар*. Қирғин, очарчилик ва ўлат дастидан шаҳар таслим бўлади. Ўзинг кўриб турганингдек, айтганларингнинг бари бажо бўляпти. ²⁵ Эй Эгам Раббий, шаҳар Бобилликларга таслим бўлаётган шундай бир пайтда Сен менга: «Гувоҳлар олдида кумушга дала сотиб ол», дединг-а!”

²⁶ Эгамиз Еремиёга Ўз сўзини аён қилди: ²⁷ “Мен Эгангизман. Мен барча тирик жоннинг Худосиман. Қўлимдан келмайдиган иш йўқ! ²⁸ Шундай экан, Мен бу

шаҳарни Бобилликларга, Бобил шоҳи Навуҳадназарга таслим қилиб бераман, — деб айтмоқда Эгамиз. — Улар шаҳарни қўлга киритадилар.²⁹ Сизларга хужум қилиб келаётган ўша Бобилликлар шаҳарга ўт қўядилар. Куддусдаги уйларни ёндириб ташлайдилар! Ахир, Куддус аҳолиси уйларининг томлари устида Баалга қурбонликлар куйдириб, бошқа худоларга шароб назрларини келтириб, Мени ғазаблантириди.”

³⁰ Эгамиз шундай демоқда: “Исройл ва Яхудо халқлари ёшлигидан бери олдимда фақат қабиҳлик қилишади. Қачон қараса, Исройл халқи ўз ишлари билан Мени ғазаблантириб юради.³¹ Бу шаҳар бино бўлгандан буён, то бугунга қадар, шаҳар аҳолиси Мени қаттиқ ғазаблантириб келмоқда. Мен уларни хузуримдан даф қиласман,³² чунки Исройл ва Яхудо халқлари — шоҳларию аъёнлари, руҳонийларию пайғамбарлари, Яхудо ва Қуддусда яшаган ҳамма одамлар қилган ёвузликлари билан жаҳлимни чиқардилар.³³ Улар Менга юз бурмай, орқа ўғирдилар. Мен уларни тўғри йўлга солмоқчи бўлиб астойдил ҳаракат қилгандим, аммо улар Менга қулоқ солмадилар, ўзларига сабоқ олмадилар.³⁴ Менинг номим билан аталган уйга жирканч бутларини ўрнатиб, уйимни ҳаром қилдилар.³⁵ Хиннум сойлигига* Баалга саждагоҳлар* қурдилар. У ерда ўғил-қизларини Мўлаҳга қурбонлик қилиб, оловда қўйдирдилар*. Мен уларга бундай жирканч ишни амр қилмаганман, бу ҳатто хаёлимга ҳам келмаган. Натижада бу қилмишлари туфайли Яхудо халқи жазога лойиқ бўлди.

Эгамизнинг умидбахш ваъдаси

³⁶ Эй Еремиё, сен бу шаҳар ҳақида: «Қуддус шаҳри қирғин, очарчилик ва ўлат дастидан Бобил шоҳининг қўлига топширилади», деб айтаяпсан. Бу гапинг тўғри. Аммо Мен, Исройл халқининг Худоси — Эгангиз, айтаманки,³⁷ халқимни қаҳр-ғазаб ва қаттиқ жаҳл устида турли юртларга тарқатиб юборганимдан кейин, уларни йиғиб оламан. Уларни яна мана шу ерга олиб келаман. Улар бу ерда осойишта умр кечирадилар.³⁸ Улар Менинг халқим бўлади, Мен эса уларнинг Худоси бўламан.³⁹ Улар Мендан ҳар доим қўрқсин деб, уларни яқдил қиласман, ҳаммасини ҳаётнинг бир мақсади томон йўналтираман. Шунда ўзларига ҳам, болаларига ҳам яхши бўлади.⁴⁰ Мен улар билан абадий аҳд тузаман. Уларга доим яхшилик қилишдан қочмайман. Мендан юз ўғириб кетмасликлари учун уларнинг юракларига Мендан қўрқиши ҳиссини солиб қўяман.⁴¹ Мен уларга яхшилик қилганимдан хурсанд бўламан, уларни жону дилим билан бу юртда албатта мустаҳкам ўrnashiраман.”

⁴² Эгамиз шундай демоқда: “Мен бу халқнинг бошига катта фалокатни қандай ёғдирган бўлсам, ваъда қилган барча эзгуликларимни ҳам устиларига худди шундай ёғдирааман.⁴³ Одамлар бу юрт ҳақида: «Ҳа, юртимиз Бобилликларга таслим бўлди, одамлар ва ҳайвонларсиз хувиллаб қолди», деб айтишяпти. Аммо шундай кун келадики, бу юртдаги далалар яна сотиладиган бўлади.⁴⁴ Одамлар бу далаларни кумушга сотиб оладилар, гувоҳлар олдида васиқаларга қўл қўйиб, муҳр босадилар. Бундай ҳодиса Бенямин худудида, Куддус атрофида, Яхудо шаҳарларида, қирларда, ғарбдаги қир этакларида ва Нагав чўлида содир бўлади. Ахир, Мен халқимни яна фаровонликка эриштираман*.” Эгамизнинг каломи шудир.

33-БОБ

Эгамизнинг иккинчи умидбахш ваъдаси

¹ Еремиё соқчилар ҳовлисида қамоқда ўтирганда, Эгамиз унга иккинчи марта

Ўз сўзини аён қилди: ² “Эй Еремиё, Мен Эгангман, оламни яратган, ерга шакл бериб, уни ўрнатган Худойингман. ³ Менга илтижо қил, сенга жавоб бераман. Сен ҳали билмайдиган буюк сирларни сенга айтаман. ⁴ Шундай экан, Қуддус аҳлига айт: «Исройл халқининг Худоси — Эгамиз шундай демоқда: сизлар душманнинг қамал инишоотларидан* ва унинг қиличиidan сақланмоқчи бўлиб, шахрингиз деворларини мустаҳкам қилдингиз. Бунинг учун уйларингизни, ҳатто Яхудо шоҳларининг саройларини буздингизлар. ⁵ Сизлар Бобилликлар* билан жанг қиласизлар. Улар эса вайронга уйларингизни жасадларга тўлдирадилар. Мен қаҳр-ғазабга тўлиб, халқимни қираман! Халқимнинг қабиҳликлари туфайли бу шаҳардан юз ўғирдим. ⁶ Шунга қарамай, бу шаҳарга яна шифо бераман, уни соғайтираман. Аҳолисини соғ-саломат қилиб, чексиз тинчлик ва осойишталиқдан баҳраманд этаман. ⁷ Мен Яхудо ва Исройл халқларини яна фаровонликка эриштираман*, аввалгида қайта бунёд этаман. ⁸ Менга қарши қилган барча гуноҳларидан уларни поклайман, бош кўтариб қилган гуноҳларини кечираман. ⁹ Ер юзидағи ҳамма халқлар олдида Қуддус Менга шуҳрат, қувонч ва шон-шараф келтиради. Қуддусга қилган яхшилигимни, унинг равнақини қўрган барча элларни қўрқув ва титроқ босади.”

¹⁰ Эгамиз шундай демоқда: “Сизлар, бу ҳувиллаган шаҳарда на одам, на ҳайвон бор, деб айтасизлар. Айтганингиз бежиз эмас. Яхудо шаҳарлари билан Қуддус кўчалари ҳувиллаб қолган, у ерда на одам, на ҳайвон бор. Бироқ у ерда сиз яна бир бор ¹¹ қувончу шодлик садоларини, келин-куёв овозларини эшитасиз. Одамлар Эгасининг уйига яна шукrona назрларини келтирадилар, шундай деб яна куйладилар:

«Шукrona айтинг Сарвари Оламга, У яхшидир!
Унинг содиқ севгиси абадийдир!»

Мен бу юртни илгариги фаровонлигига эриштираман.” Эгамизнинг каломи шудир.

¹² Сарвари Олам шундай демоқда: “Одам ва ҳайвонсиз ҳувиллаб қолган бу жойда, юртнинг ҳамма шаҳарларида яна яйловлар бўлади, чўпонлар у ерда қўйларини ўтлатишиади. ¹³ Қирлардаги шаҳарларда, ғарбий қир этакларидағи, Нагав чўлидаги ва Бенямин ҳудудидаги шаҳарларда, Қуддус атрофида, Яхудо шаҳарларида чўпонлар яна қўйларини санайдиган бўлади.” Эгамизнинг каломи шудир.

¹⁴ Эгамиз шундай демоқда: “Мен Исройл* ва Яхудо халқларига берган эзгу ваъдамни бажараман. Ваъдамни бажарадиган кунлар яқинлашиб келяпти. ¹⁵ Ўша кунларда Мен Довуд наслидан солиҳ бир новдани* етиштираман. Юртда у адолату тўғрилик ила иш тутади. ¹⁶ Ўша кунларда Яхудо халқи бехатар яшайди, Қуддус аҳолиси осойишта ҳаёт кечиради. Қуддус шахри «Эгамиз нажоткоримиздир» деб ном олади.”

¹⁷ Эгамиз шундай демоқда: “Довуднинг насли Исройл тахтида абадий ўтиради. ¹⁸ Леви авлодидан бўлган руҳонийлар эса ҳузуримда қурбонликлар куйдириб, дон назрларини келтирадилар, улар абадулабад Менга қурбонликлар қиласидилар.”

¹⁹ Эгамизнинг сўзи Еремиёга аён бўлди. ²⁰ Эгамиз шундай деди: “Борди-ю, биронтангиз тун ва кун билан тузган амримни бузишга қодир бўлсангиз, уларнинг тартибини ўзгартира олсангиз, ²¹ шундагина Мен ҳам Довуд ва Менга хизмат қилаётган Леви авлоди билан тузган аҳдимни бузаман, Довуд сулоласини тахтдан тушираман. ²² Мен қулим Довуд наслини ва Менга хизмат қилаётган Леви авлодини осмондаги юлдузлардай, денгиздаги қумдай сон-саноқсиз қиласман.”

²³ Еремиёга Эгамизнинг ушбу сўзи аён бўлди: ²⁴ “Бу одамларнинг гапини эшилдингми? Улар, Эгамиз Ўзи танлаган иккита халқни — Истроил ва Яхудони рад этди, деб айтиб юришибди. Бу одамлар халқимдан шунчалик ҳазар қилишадики, уни энди халқ деб тан олишдан ор қилишяпти.” ²⁵ Эгамиз шундай демоқда: “Мен кун ва тунга берган амримни, осмону фалак учун ўрнатган қонун-қоидаларимни ҳеч қачон ўзгартирмайман. ²⁶ Шу сингари, Ёқуб авлодини ва қулим Довуд суоласини рад этмайман. Мен доимо Довуд наслидан шоҳ танлайман. Уни Иброҳим, Исҳоқ ва Ёқуб авлодининг устидан ҳукмрон қилиб қўяман. Мен халқимни яна фаровонликка эриштираман, уларга раҳм-шафқат кўрсатаман.”

34-БОБ

Зидқиё учун хабар

¹ Бобил шоҳи Навуходназар* ўз лашкари, қўли остидаги барча шоҳликлару халқлар билан бирга Қуддусга ва унинг ён-атрофидаги шаҳарларга қарши жанг қилаётган эди. Шунда Эгамиз Ўз сўзини Еремиёга аён қилди: ² “Қани бўл, Еремиё, Яхудо шоҳи Зидқиё* ҳузурига бор. Унга айт: «Истроил халқининг Худоси — Эгамиз шундай демоқда: Мен бу шаҳарни Бобил шоҳига таслим қиласман, у шаҳарга ўт қўяди. ³ Сен ҳам Бобил шоҳининг қўлидан қочиб қутула олмайсан. Одамлар сени тутиб оладилар. Бобил шоҳининг қўлига топширадилар. Сен ўз қўзинг билан Бобил шоҳини кўрасан, у сен билан юзма-юз гаплашади. Кейин сени Бобилга жўнатиб юборади.

⁴ Бироқ, эй Яхудо шоҳи Зидқиё, Эгамизнинг сўзини эшиш! Эгамиз сен ҳақингда шундай демоқда: сен қиличдан ҳалок бўлмайсан. ⁵ Тинчгина оламдан кўз юмасан. Одамлар ота-боболарингни, сендан олдин ўтган шоҳларни қандай дафн қилишган бўлса, уларнинг шарафига қандай гулхан ёқишган бўлса*, сенинг шарафингга ҳам шундай гулхан ёқишади. Йиғи-сиғи қилиб: ‘Вой, хожам!’ дея марсия айтишади. Эгамизнинг каломи шудир.»⁶

⁶ Еремиё пайғамбар буларнинг ҳаммасини Қуддусда Яхудо шоҳи Зидқиёга айтди. ⁷ Шу орада Бобил шоҳининг лашкари Қуддус, Лахиш ва Озикаҳ шаҳарларига ҳужум қилаётган эди. Яхудонинг мустаҳкам шаҳарларидан ўшаларгина ёвга ҳанузгача таслим бўлмаган эди.

Халқ иброний қулларни озод қилиш аҳдига риоя қилмайди

⁸ Шоҳ Зидқиё Қуддусдаги бутун аҳоли билан аҳд қилиб, иброний қулларни озодликка чиқаришни эълон қилгандан кейин, Еремиёга Эгамизнинг сўзи аён бўлди.

⁹ Зидқиё қилган аҳдга кўра, ҳамма иброний қулларга ва чўриларга озодлик берилиши лозим эди. Яхудий биродарларни қулликда тутиш ман этилган эди.

¹⁰ Аъёнлар билан бутун халқ аҳд шартларига кўнди. Улар ўз қуллари билан чўриларини озод қилишга, уларни бундан кейин қул қилиб олмасликка рози бўлган эдилар. Барча қулдорлар аҳдга риоя қилган ҳолда, қулларига озодлик беришди. ¹¹ Кейинчалик* эса ўз фикрларидан қайтиб, озод қилган қул ва чўриларни мажбурлаб, ўзларига яна қул қилиб олишди.

¹² Шунда Эгамизнинг сўзи Еремиёга аён бўлди. ¹³ Истроил халқининг Худоси — Эгамиз шундай демоқда: “Мен ота-боболарингизни Мисрдаги қулликдан олиб чиққанимда, улар билан аҳд қилиб, шундай деган эдим*: ¹⁴ «Ўзини сизга сотиб, олти йил хизмат қилган ҳар бир иброний қулни озод қилинглар.» Аммо ота-боболарингиз айтганларимга эътибор бермадилар, Менга қулоқ солмадилар. ¹⁵ Яқинда эса сизлар тавба қилган эдингизлар. Менинг ҳузуримда — Ўзимнинг

номим билан аталган уйимда туриб, биродарларингизни озод қилишга ахд қилган эдингиз. Менинг назаримда бу ишингиз түғри эди.¹⁶ Кейин эса сизлар фикрингиздан қайтдингизлар. Мени бадном қилдингизлар. Ўз хоҳишларига кўра, озод қилинган қулу чўриларингизни қайтариб олдингизлар, уларни қул бўлишга мажбур қилдингизлар.”

¹⁷ Эгамиз шундай демоқда: “Сизлар Менга итоатсизлик қилиб, ёру дўстларингизни, қўни-қўшниларингизни қўйиб юбормадингиз, шунинг учун Мен сизларни қўйиб юбораман. Мана, уруш, қаҳатчилигу ўлатга йўлингиз очик! Аҳволингизни дунёдаги барча шоҳликлар кўриб, даҳшатга тушади.¹⁸ Аҳдимни бузган бу одамларни Мен жазолайман. Улар хузуримда ахд тузган эдилар, бузоқни икки қисмга бўлиб, икки бўлаги орасидан ўтган эдилар*. Аммо ахд шартларига риоя қилмадилар. Шунинг учун Мен уларни бўғизланган бузоқнинг ҳолига тушираман.¹⁹ Бузоқнинг икки бўлаги орасидан ўтган Яҳудо аъёнларини, Қуддус маъмурларини, сарой амалдорларини, руҳонийларини ва халқ оммасини жазолайман.²⁰ Уларда қасди борларга ўзларини топшираман, душман қўлига бераман. Жасадлари қушларга ва ёввойи ҳайвонларга ем бўлади.²¹ Яҳудо шохи Зидқиёни ҳам аъёнлари билан бирга душман қўлига бераман, уларда қасди борларга топшираман. Вақтинчалик чекинган Бобил шоҳининг лашкарига* уларни таслим қиласман.²² Мен буйруқ бериб, Бобилликларни бу шаҳарга қайтариб олиб келаман. Улар сизларга ҳужум қиласилар. Шаҳарни қўлга олиб, ўт қўядилар. Яҳудо шаҳарлари вайрон бўлади, у ерда ҳеч ким яшамайди.” Эгамизнинг каломи шудир.

35-БОБ

Еремиё ва Рахав насли

¹ Йўшиё ўғли шоҳ Ёҳайиқим* ҳукмронлик қилган даврда Эгамиз Ўз сўзини Еремиёга аён қилди: ² “Қани бўла қол, Еремиё, Рахав хонадони ҳузурига бориб, у ердаги одамлар билан гаплаш. Сўнг уйимдаги ён хоналарнинг бирига уларни таклиф қилгин-да, шаробдан қўйиб бер.” ³ Мен бориб, Хавазинёнинг невараси — Еремиё ўғли Язаниёни ака-укалари билан бирга, ҳамма ўғилларини ва бутун Рахав хонадонини чақириб,⁴ Эгамизнинг уйига бошлаб келдим. Уларни Йихдалиё ўғли Ханон пайғамбарнинг ўғилларига қарашли хонага олиб кирдим. Бу хонанинг ёнида Маъбад аъёнларининг хонаси, тагида эса Шаллум ўғли Масиёнинг хонаси жойлашган эди. Масиё Маъбад дарвозабони бўлиб хизмат қиласар эди.⁵ Мен дастурхонга идишларни тўлдириб шароб тортдим, пиёлалар қўйдим. Сўнг Рахав наслига:

— Марҳамат қилиб, шаробдан ичинглар, — деб таклиф қилдим.

⁶ Улар шундай дедилар:

— Биз шароб ичмаймиз. Бобокалонимиз Рахав ўғли Ёхунадав* бизга шундай амр қилган: “Зинҳор шароб ичманглар, болаларингиз ҳам ичмасин.⁷ Уйлар қурманглар, экин экманглар, узумзорлар барпо қилманглар, уларни ўзингизга мулк қилиб олманглар. Кўчиб борган жойингизда узоқ вақт яшай олишингиз учун чодирларда кун кечиринглар.”⁸ Шунинг учун биз бобокалонимизнинг амрига бўйсуниб, ҳеч қачон шароб ичмаймиз, хотинларимиз ҳам, ўғил-қизларимиз ҳам шароб ичмайдилар.⁹ Ўзимиз учун уйлар қурмаймиз, экин экмаймиз, бизда на узумзор бор, на дала бор.¹⁰ Биз бобокалонимиз Ёхунадавнинг амрига итоат қилиб, бир умр чодирларда яшаб келдик.¹¹ Аммо Бобил шоҳи Навуҳадназар* бу юрга бостириб келгандан сўнг, Бобил* ва Орам

лашкарларидан қўрқиб, Қуддусга келишга қарор қилган эдик. Шу сабабдан ҳозир биз Қуддусда яшаб юрибмиз.

¹² Шундан сўнг Еремиёга Эгамизнинг қуйидаги сўзи аён бўлди. ¹³ Истроил халқининг Худоси — Сарвари Олам унга шундай деди: “Қани бўл, Еремиё, Яхудо халқи ва Қуддус аҳолисининг ҳузурига бориб, шундай деб таъна қил: сизлар ўзи сабоқ оласизларми?! Менга итоат қилишни ўргана сизларми ўзи?! ¹⁴ Ана, кўриб қўйинг, Рахав насли ўз бобокалонининг амрига итоат қилгани учун бугунга қадар шаробни оғзига ҳам олмай юрибди. Мен эса сизларга қайта-қайта гапирган бўлсам ҳам, сизлар Менга итоат қилмадингизлар. ¹⁵ Мен пайғамбар қулларимни олдингизга қайта-қайта жўнатдим. Улар орқали сизларни шундай деб огоҳлантирган эдим: «Сизларга ва ота-боболарингизга Мен берган бу юртда яшай олишингиз учун ёмон йўлингиздан қайтинглар. Турмуш тарзингизни ўзгартиргилар. Бошқа худоларга эргашманглар. Уларга хизмат қилманглар.» Аммо сизлар қулоқ солмадингизлар, гапимга кирмадингизлар. ¹⁶ Ёхунадавнинг авлоди ўз бобокалони буюриб кетган амри ижро этди, бу халқ эса Менга итоат қилмади.”

¹⁷ Шунинг учун Истроил халқининг Худоси, Парвардигори Олам — Эгамиз шундай демоқда: “Мен Яхудо ва Қуддус аҳолисига гапирган эдим, аммо улар гапларимга қулоқ солмадилар, уларни чақирган эдим, аммо Менга жавоб бермадилар. Шунинг учун Ўзим айтган барча бало-қазоларни уларнинг бошларига ёғдираман.”

¹⁸ Рахав хонадонига эса Еремиё шундай деди: “Истроил халқининг Худоси — Сарвари Олам демоқда: «Сизлар бобокалонингиз Ёхунадавнинг амрига итоат этдингиз, унинг насиҳатларини рад этмай, айтганларининг ҳаммасини бажардингиз, шунинг учун ¹⁹ Рахав ўғли Ёхунадав авлодидан бўлган киши ҳузуримда абадулабад хизмат қиладиган бўлади.» Истроил халқининг Худоси — Сарвари Оламнинг каломи шудир.”

36-БОБ

Борух ўрама қоғозга ёзилган сўзларни Маъбадда ўқийди

¹ Яхудо шоҳи Йўшиё ўғли Ёҳайиқим ҳукмронлигининг тўртинчи йилида* Еремиёга Эгамизнинг шу сўзи аён бўлди: ² “Ўрама қоғоз* ол. Истроил, Яхудо ва барча шоҳликларга қарши Мен айтган сўзларни ёзиб қўй. Сенга илк бор Йўшиё даврида* аён қилган сўзимдан тортиб, то бугунга қадар айтган барча гапларимни ёз. ³ Балки Яхудо халқи Мен бошларига келтирмоқчи бўлган фалокатлар ҳақида эшитиб, ёвуз йўлларидан қайтар. Шунда Мен уларнинг айбу гуноҳларини кечираман.”

⁴ Еремиё Нериё ўғли Борухни чақириб, Эгамизнинг айтган ҳамма сўзларини ёздирди. ⁵ Сўнг Еремиё Борухга тайинлаб деди: “Эгамизнинг уйига кириш менга ман этилган. ⁶ Шунинг учун рўза куни сен ўзинг у ерга борасан. У ердаги одамларга мен сенга ёздирган Эгамизнинг сўзларини ўрама қоғоздан ўқиб берасан. Ўша куни Яхудонинг турли шаҳарларидан келган халойиқ Эгамизнинг уйида бўлади, улар ҳам ўқиганингни эшитиб олсин. ⁷ Балки улар Эгамизга ёлвориб, ёвуз йўлларидан қайтишар. Ахир, Эгамиз қаҳру ғазабини уларга сочишини эълон қилди!” ⁸ Нериё ўғли Борух Еремиёнинг айтганларини тўла-тўқис бажарди. У Эгамизнинг уйига борди, ўрама қоғозга битилган Эгамизнинг сўзларини ўқиди.

⁹ Бу воқеа Яхудо шоҳи Йўшиё ўғли Ёҳайиқим ҳукмронлигининг бешинчи йили

тўққизинчи ойида* содир бўлди. Қуддус аҳолиси билан Яхудо шаҳарларидан келган бутун халқ Эгамизга бағишлаб рўза тутган эди. ¹⁰ Шунда Борух Эгамиз уйининг Янги дарвозаси ёнидаги юқори ҳовлида жойлашган Шофон ўғли котиб Гамариёнинг хонасига кирди. У ердан туриб, ўрама қоғозга битилган Еремиёнинг сўзларини бутун халқقا овоз чиқариб ўқиб берди.

Борух ўрама қоғозни аъёнларга ўқиб беради

¹¹ Гамариё ўғли Михиё ўрама қоғозга битилган Эгамизнинг сўзларини эшишгач, ¹² дарҳол шоҳ саройидаги котибнинг хонасига жўнади. Барча аъёнлар ўша ерда жамулжам бўлиб ўтирган экан: улар — котиб Элишама, Шамаё ўғли Далоё, Ахбор ўғли Элнатан, Шофон ўғли Гамариё, Ханониё ўғли Зидқиё ва бошқа аъёнлар эдилар. ¹³ Борух ўрама қоғоздан халқقا ўқиб берган барча сўзларни Михиё уларга айтиб берди. ¹⁴ Аъёнлар Куши ўғли Шаламиё авлодидан бўлган Натаниё ўғли Ёхудини Борухнинг олдига жўнатиб, шундай гапни айтиб юбордилар: “Халқقا ўқиб берган ўрама қоғозни олиб, хузуримизга келгин.” Нериё ўғли Борух ўрама қоғозни олиб аъёнларнинг олдига борди. ¹⁵ Аъёнлар Борухга:

— Қани, ўтири, бизга ҳам ўрама қоғоздаги сўзларни ўқиб бер, — дедилар. Борух ўқиди. ¹⁶ Аъёнлар эшишган сўзларидан ваҳимага тушиб, бир-бирларига қараб қолдилар. Сўнг Борухга:

— Бу ҳақда шоҳни хабардор қилишимиз зарур, — дедилар. ¹⁷ Улар Борухдан сўрадилар:

— Буларни қаердан олиб ёздинг? Бу сўзларни сенга айтган, мабодо, Еремиё эмасми?

¹⁸ — Ҳа, Еремиёнинг ўзи айтиб турди, мен эса унинг айтганларини сиёҳ билан ўрама қоғозга ёздим, — деб жавоб берди Борух.

¹⁹ — Еремиё билан бориб, бирон жойга яшириниб олинглар, ҳеч ким бу ҳақда билмасин, — деб тайинлашди аъёнлар.

Шоҳ ўрама қоғозни ёқиб юборади

²⁰ Аъёнлар ўрама қоғозни котиб Элишаманинг хонасида қолдирдилар, ўзлари эса шоҳ хузурига бориб, ҳамма гапни етказдилар. ²¹ Шоҳ ўрама қоғозни олиб келиш учун Ёхудини жўнатди. Ёхуди котиб Элишама хонасидан ўрама қоғозни олиб келиб, уни шоҳга ва шоҳ хузуридаги аъёнларга ўқиб берди.

²² Кеч куз*. Шоҳ қишки саройида ўтирап, ёнидаги манқалда ўт ёниб турар эди. ²³ Ёхуди ўрама қоғоздан уч-тўрт устунни ўқиб бўлиши биланоқ, шоҳ Ёҳайиқим котибнинг пичоқчаси билан ўрамнинг ўша қисмини қирқиб, манқалдаги оловга ташлайверди. У ўрама қоғознинг ҳаммасини оловда ёндириб бўлгунча шундай қиласверди. ²⁴ Ўрама қоғоздаги сўзларни эшишган шоҳ билан хизматкорлар қўрқувга тушмадилар, қайғудан кийимларини йиртмадилар*. ²⁵ Элнатан, Далоё ва Гамариё шоҳга ёлвориб, ўрама қоғозни ёндириманг, деб илтимос қилган бўлсалар ҳам, шоҳ уларга қулоқ солмади. ²⁶ У шаҳзода Ярахмалга, Озриёл ўғли Сараёга ва Абдал ўғли Шаламиёга, Еремиё пайғамбарни ва котиб Борухни тутиб келинглар, деб буюрди. Эгамиз эса Еремиё билан Борухни яширган эди.

Еремиё Худонинг сўзларини бошқатдан ёздиради

²⁷ Еремиё Борухга ёздирган ўрама қоғозни шоҳ ёқиб юборгандан кейин, Еремиёга Эгамизнинг қуйидаги сўзи аён бўлди: ²⁸ “Еремиё, бошқа бир ўрама қоғоз ол. Унга Яхудо шоҳи Ёҳайиқим ёндириб юборган аввалги ўрама қоғоздаги ҳамма сўзларни ёз. ²⁹ Яхудо шоҳи Ёҳайиқимга эса шундай деб айт: «Эгамиз демоқда: ўрама қоғозда: ‘Бобил шоҳи албатта келади, юртни вайрон қиласади, одамлару ҳайвонларни қириб ташлайди’, деб ёзилгани учун сен Еремиёга дўқ қилибсан,

ўрама қофозни ёқиб юборишга журъат этибсан.³⁰ Шунинг учун, эй Яхудо шоҳи Ёҳайиқим, Эгамиз сен ҳақингда шундай демоқда: сенинг авлодингдан биронтаси ҳам Довуд тахтида ўтирмайди*. Сенинг жасадингни одамлар улоқтириб юборишади, ўлигинг куннинг жазирамасида, туннинг совуғида қолади.³¹ Мен сени, сенинг авлодингу аъёнларингни қилган гуноҳларингиз учун жазолайман. Ўзим айтган барча фалокатларни сизларнинг бошингизга, Қуддус аҳолиси ва Яхудо халқининг бошига ёғдираман, чунки сизлар Менга қулоқ солмадингизлар.»”

³² Еремиё бошқа бир ўрама қофоз олиб, Нериё ўғли котиб Борухга берди. Сўнг Яхудо шоҳи Ёҳайиқим ёндириб юборган аввалги ўрама қофоздаги барча сўзларни унга ёздирди. Аммо бу сафар ўрамга шу мазмундаги кўп хабарлар қўшилган эди.

37-БОБ

Шоҳ Зидқиё Еремиёдан маслаҳат сўрайди

¹ Бобил шоҳи Навуходназар* Йўшиё ўғли Зидқиёни* Ёҳайиқим ўғли Ёҳайихиннинг* ўрнига Яхудо шоҳи қилиб тайинлади.² Аммо на шоҳ, на аъёнлари, на юртдаги халқ Эгамизнинг Еремиё орқали айтган сўзларига қулоқ солар эдилар.

³ Шоҳ Зидқиё Шаламиё ўғли Ёхухал билан Масиё ўғли руҳоний Зафаниёни Еремиё пайғамбарнинг олдига юборар экан, шу гапларни айттириб юборди: “Илтимос, биз учун Эгамиз Худога илтижо қил.”⁴ Еремиё шу вақтгача қамоқقا олинмаганлиги учун халқ орасида bemalol юрар эди.⁵ Шу орада фиръавн лашкари Мисрдан чиқди*. Қуддусни қамал қилиб турган Бобилликлар* бу хабарни эшишишгач, Қуддусдан чекиндилар.

⁶ Шунда Эгамиз сўзини Еремиёга аён қилди.⁷ Истроил халқининг Худоси — Эгамиз шундай демоқда: “Худонинг сўзини билмоқчи бўлиб, икковингизни олдимга юборган Яхудо шоҳига шундай деб айтинг: сизларга ёрдам бермоқчи бўлиб келаётган фиръавн лашкари ўз юрти — Мисрга қайтиб кетади.

⁸ Бобилликлар эса Қуддусга қайтиб келиб, шаҳарга қарши жанг қиладилар. Улар шаҳарни қўлга олиб, ёндириб юборадилар.”

⁹ Эгамиз яна шундай демоқда: “Бобилликлар энди қайтиб келишмайди, деб ўзларингизни алдаманглар, чунки улар албатта қайтиб келишади.¹⁰ Борди-ю, сизлар Бобилликларнинг бутун лашкарини мағлуб қилганингизда ҳам, уларнинг чодирларида қолган ярадорлар келиб, шаҳрингизга ўт қўйган бўларди.”

Еремиё зиндонга ташланади

¹¹ Фиръавн лашкари яқинлашиб келаётгани учун Бобилликлар Қуддусдан чекиндилар.¹² Шунда Еремиё Бенямин худудидаги* халқ орасида ўзига тегишли ер улушкини кўриш учун Қуддус шаҳридан кетмоқчи бўлди.¹³ У Қуддуснинг Бенямин дарвозасига етиб келгач, соқчилар бошлиғи Йириё:

— Сен Бобилликларнинг олдига қочиб кетмоқчисан, — деб уни қамоқقا олди. Йириё Шаламиёнинг ўғли, Ханониёнинг невараси эди.

¹⁴ — Ёлғон! — деди Еремиё, — мен Бобилликларнинг олдига қочмоқчи эмасман.

Аммо Йириё Еремиёнинг гапига қулоқ солишини истамади, уни ҳибсга олиб, аъёнларнинг олдига олиб борди.¹⁵ Аъёнлар Еремиёдан ғазабланиб, уни калтаклашди. Сўнг котиб Йўннатаннинг зиндонга айлантирилган уйига қамаб қўйишиди.¹⁶ Шундай қилиб, Еремиё узоқ вақт зиндон хужраларидан бирида ётди.

¹⁷ Орадан вақт ўтди. Шоҳ Зидқиё Еремиёни саройига чақиртириб:

— Эгамиздан бирон хабар борми? — деб яширинча сўради.

— Ҳа, бор, — деди Еремиё. — Сиз Бобил шоҳининг қўлига тушасиз.¹⁸ Нега улар мени зиндонга ташлашди? Мен аъёнларингизга ва бу халқа қарши нима гуноҳ қилибман?! — деди яна у.¹⁹ — “Бобил шоҳи сизга ҳужум қилмайди, юртимизга у тажовуз қилмайди”, деб башорат қилган пайғамбарларингиз қани?²⁰ Ёлвораман, олампаноҳим, илтижоимни рад этманг, мени котиб Йўнатаннинг уйига қайтариб юборманг. У ерда адойи тамом бўламан.

²¹ Шоҳ Зидқиё, Еремиёни соқчилар ҳовлисига қамаб қўйинглар, шаҳарда нон қолмагунча, ҳар куни унга новвой растасидан биттадан нон олиб беринглар, деб буюрди. Шундай қилиб, Еремиё соқчилар ҳовлисида қолди.

38-БОБ

Еремиёни сардобага ташлашади

¹ Маттон ўғли Шафатиё, Пашхур ўғли Гадалиё, Шаламиё ўғли Ёхухал* ва Малкиё ўғли Пешхур Еремиёнинг халқа айтган шу сўзларини эшитган эдилар:
² “Эгамиз демоқда: «Шаҳарда қолганлар қиличдан, қаҳатчилик ва ўлатдан нобуд бўладилар. Бобилликларнинг* олдига чиққанлар эса тирик қоладилар. Бу одамлар ҳеч бўлмагандა ўз жонларини сақлаб қоладилар.³ Бобил шоҳининг лашкари албатта бу шаҳарни таслим қилиб, қўлга киритади.» Эгамизнинг каломи шудир.”

⁴ Аъёнлар шоҳга арз қилиб:

— Бу одамни йўқ қилиш керак! — дедилар, — чунки у ўзининг бемаъни гаплари билан шаҳарда қолган жангчилару одамларнинг руҳини туширмоқда. У халқимизнинг фойдасини эмас, заарини кўзламоқда.

⁵ — Жуда соз, — деди шоҳ, — у билан хоҳлаганингизни қилинг. Мен сизларга монелик қила олмайман.

⁶ Аъёнлар Еремиёни ушлаб, арқонларга боғлаб сардобага туширдилар. Соқчилар ҳовлисидағи бу сувсиз сардoba шаҳзода Малкиёга тегишли бўлиб, сардобада балчиқдан бошқа ҳеч нарса йўқ эди. Еремиё балчиққа ботиб қолди.

⁷ Еремиё сардобага ташлангани ҳақида шоҳ саройининг амалдори Ҳабашистонлик* Обидмалек хабардор бўлди. Шоҳ ўша пайтда Бенямин дарвозасидаги маҳкамада* эди.⁸ Обидмалек саройдан чиқди-да, шоҳнинг олдига бориб деди:

⁹ — Шоҳ ҳазратлари, Еремиё пайғамбарни сардобага ташлаган одамлар қабиҳлик қилишибди. Шаҳарда нон қолмаган бўлса, Еремиё у ерда очликдан ўлади-ку.

¹⁰ Шоҳ Ҳабашистонлик Обидмалекка шундай амр қилди:

— Бу ердан ўттизта одамни олгин-да, бориб Еремиёни сардобадан чиқариб ол. Тағин у ерда ўлиб қолмасин.

¹¹ Обидмалек ёнига одамларни олиб, сарой хазинасининг остки қисмида жойлашган хонага кирди. У ердан эски-туски кийимлар ва латта-путта топиб, уларни арқонларга боғлаб, Еремиёга туширди.¹² Сўнг Еремиёга деди: “Арқон танангизни қийиб юбормаслиги учун латталарни арқон билан қўлтиғингиз орасига қўйинг.” Еремиё айтилгандай қилди.¹³ Одамлар Еремиёни арқонлар ёрдамида сардобадан чиқариб олдилар. Еремиё соқчилар ҳовлисида қолди.

Зидқиё Еремиёга маслаҳат солади

¹⁴ Шоҳ Зидқиё* Еремиё пайғамбарни чақиртирди, уни Эгамиз Маъбадининг учинчи киришида* кутиб олди.

— Сендан бир нарсани сўрамоқчиман, — деди шоҳ. — Мендан ҳеч нарсани яшира қўрма.

¹⁵ — Сизга ҳақиқатни айтсам, мени ўлдиришингиз аниқ, — деди Еремиё. — Сизга маслаҳат берганим билан, барибир қулоқ солмайсиз.

¹⁶ Шоҳ Зидқиё Еремиёга махфий равишда онт ичиб деди:

— Бизга ҳаёт бахшида этган Эгамиз шоҳид, мен сени ўлдирмайман. Жонингга қасд қиласётган одамларнинг қўлига ҳам сени топширмайман.

¹⁷ Шундан кейин Зидқиёга деди:

— Исройл халқининг Худоси, Парвардигори Олам — Эгамиз демоқда: “Агар сиз Бобил шоҳининг аъёнларига таслим бўлсангиз, ўз жонингизни сақлаб қоласиз, бу шаҳар ҳам оловга ем бўлмайди. Сиз ва бутун хонадонингиз тирик қоласизлар.

¹⁸ Борди-ю, Бобил шоҳининг аъёнларига таслим бўлмасангиз, Бобилликлар бу шаҳарни енгиб, унга ўт қўядилар, ўзингиз ҳам уларнинг қўлидан қочиб қутуломайсиз.”

¹⁹ — Мен Бобилликлар томонга қочиб ўтган яхудийлардан қўрқаман, — деди шоҳ. — Бобилликлар мени уларнинг қўлига топширишса, улар мени хўрлашади.

²⁰ — Топширишмайди, — деди Еремиё. — Айтганларимни қилиб, Эгамизнинг сўзига итоат қилсангиз, ҳаммаси яхши бўлади, жонингизни сақлаб қоласиз.

²¹ Борди-ю, таслим бўлишдан бош тортсангиз, Эгамиз менга ваҳий орқали аён қилганлари бажо бўлади: ²² саройингизда қолган ҳамма аёллар Бобил шоҳининг аъёнлари олдига чиқарилади. Ўша аёллар сизга шундай дейишади:

“Ишонган дўстларингиз
Сизни алдаб, енгиб кетиши.
Оёғингиз лойга ботгандা,
Ишонган дўстларингиз сизни ташлаб кетиши.”

²³ Сизнинг хотину бола-чақаларингиз Бобилликларнинг олдига чиқарилади. Сиз ўзингиз ҳам Бобилликларнинг қўлидан қочиб қутула олмайсиз. Бобил шоҳи сизни қўлга тушириб, шаҳарни ёндириб юборади.

²⁴ — Суҳбатимиз ҳақида ҳеч кимга оғиз очма, акс ҳолда, ўласан, — деди Зидқиё Еремиёга. ²⁵ — Борди-ю, аъёнлар сен билан гаплашганимни билиб қолиб, сенга: “Шоҳ билан нималар ҳақида гаплашдинг? Биздан бирон нарсани яширмай айт, бўлмаса ўласан”, деб айтишса, ²⁶ сен уларга: “Мени Йўннатаннинг уйига қайтариб юборманг, шоҳим, акс ҳолда, у ерда адойи тамом бўламан, деб илтижо қилдим”, дея жавоб бер.

²⁷ Аъёнлар Еремиёнинг олдига келиб, уни сўроққа тутишди. Еремиё шоҳ буюрган гапларни айтиб, жавоб берди. Шундан кейин аъёнлар унга бошқа савол бермадилар, чунки шоҳ билан Еремиё орасида бўлган суҳбатни ҳеч ким эшиитмаган эди. ²⁸ Еремиё Куддус қулаган кунга қадар соқчилар ҳовлисида қолди*.

39-БОБ

Қуддус қулайди

¹ Яхудо шоҳи Зидқиё ҳукмронлигининг тўққизинчи йили ўнинчи ойида* Бобил шоҳи Навухадназар* ўзининг жамики лашкари билан Қуддусга келиб, шаҳарни қамал қилди. ² Зидқиё ҳукмронлигининг ўн биринчи йили тўртинчи ойининг* тўққизинчи кунида Бобилликлар Қуддус деворини ёриб, шаҳарга кирдилар. ³ Шаҳар қўлга олингач, Бобил шоҳининг ҳамма аъёнлари шаҳарнинг Ўрта дарвозасидаги маҳкамаларда қўмондонлик қароргоҳини жойлаштирилар*.

Аъёнларнинг орасида Наргал-Шаразар, Самгарнаву, бош маслаҳатчи Сарсаҳим* ва амалдор Наргал-Шаразар бор эдилар.⁴ Яхудо шоҳи Зидқиё ва унинг жамики лашкари уларни кўрдилар-у, қочдилар. Улар ярим кечаси шоҳнинг боғи орқали ўтиб, икки девор орасидаги дарвозадан чиқдилар-да, Иордан водийсига* қараб кетдилар.⁵ Аммо Бобил* сипоҳлари уларнинг орқасидан қувиб, Ериҳо текислигига Зидқиёга етиб олдилар. Улар Зидқиёни қўлга олиб, Хомат юртидаги Ривло шахрига* — Бобил шоҳи Навуҳадназарнинг ҳузурига олиб боришиди. Шоҳ Навуҳадназар Зидқиёни ҳукм қилди,⁶ Ривлода Зидқиёнинг ўғилларини кўзи олдида ўлдирди, сўнг ҳамма Яхудо аъёнларини қатл қилди.⁷ Зидқиёнинг эса кўзларини ўйиб, Бобилга олиб кетиш учун кишанлади.

⁸ Бобилликлар* шоҳ саройига ва одамларнинг уйларига ўт қўйиб, Қуддус деворларини ийқитдилар.⁹ Кўриқчилар сардори Набизарадон шаҳарда қолган бутун халқни, Бобил шоҳи томонга ўтган қочоқларни Бобилга асир қилиб олиб кетди.¹⁰ У Яхудо юртида ҳеч вақоси бўлмаган қашшоқ одамларнигина қолдирди. Ўша одамларга дала ва узумзорларни берди.

Еремиё озод бўлади

¹¹ Шоҳ Навуҳадназар кўриқчилар сардори Набизарадон орқали Еремиёга оид қўйидаги амрни берди:¹² “Еремиёни қарамоғингизга олиб, унга яхши қаранглар. Асло зарап етказманглар, сизлардан нима сўраса бажаринглар.”¹³ Кўриқчилар сардори Набизарадон, бош назоратчи Навушазбон, шоҳ маслаҳатчиси Наргал-Шаразар ва Бобил шоҳининг ҳамма бош амалдорлари одам юбориб, унга:¹⁴ “Еремиёни қўриқчилар ҳовлисидан олиб кел”, деб буюрдилар. Уни эсон-омон уйига элтиб қўйиш учун Гадалиёга топширдилар. Гадалиё Охихамнинг ўғли, Шофонинг невараси эди. Шундай қилиб, Еремиё ўз халқининг орасида қолди.

Обидмалек

¹⁵ Еремиё соқчилар ҳовлисида қамоқда ўтирганда, унга Эгамизнинг сўзи аён бўлган эди:¹⁶ “Ҳабашистонлик* Обидмалекнинг* олдига бориб, шундай деб айт: «Исройл халқининг Худоси — Сарвари Олам айтмоқда: Мен айтган сўзларимни бажо қиламан. Бу шаҳарга яхшилик эмас, ёмонлик келтираман. Сен ўзинг бунинг гувоҳи бўласан.”¹⁷ Лекин ўша куни Мен сени қутқариб қоламан, — деб айтмоқда Эгамиз. — Ўзинг кўрқадиган одамларнинг қўлига сени бермайман.¹⁸ Сени, албатта, қутқараман, жангда ҳалок бўлмайсан. Менга умид боғлаганинг учун жонинг омон бўлади, — деб айтмоқда Эгамиз.”

40-БОБ

Еремиё Гадалиё билан қолади

¹ Кўриқчилар сардори Набизарадон Еремиёни Бобилга олиб кетилаётган Қуддус ва Яхудо асирлари орасидан занжирбанд ҳолда топиб олиб, уни Рама шахрида* озод қилди. Шундан сўнг Еремиёга Эгамизнинг сўзи аён бўлди.

² Кўриқчилар сардори Набизарадон Еремиёни ёнига чақириб шундай деди: “Эгангиз Худо, бу юртга фалокат келтираман, деб айтган эди.³ Мана, ҳозирги кунда Эгангиз айтганини қилиб, юртингизга фалокат келтирди, чунки сизлар Эгангизга қарши гуноҳ қилдингизлар, Унинг айтганини қилмадингизлар. Шу сабабдан бундай кулфат бошингизга тушди.⁴ Ҳозир мен қўлингдаги кишанларни ечаман, сени озод қиламан. Агар мен билан Бобилга бормоқчи бўлсанг, марҳамат, сенга яхши қарайман. Борди-ю, Бобилга боришини истамасанг, ихтиёринг ўзингда. Мана, бутун юрт сенинг рўпарангда турибди, хоҳлаган ерингга боравер.⁵ Бу

юртда қоладиган бўлсанг*, Охихам ўғли Гадалиёнинг олдига бор. Бобил шоҳи Гадалиёни Яҳудо шаҳарларига ҳоким қилиб тайинлади. Гадалиё Шофон деган одамнинг неварасидир. Сен унинг ёнида қолиб, халқинг орасида яшашинг мумкин ёки хоҳлаган жойингга боришинг мумкин.” Қўриқчилар сардори Еремиёга егулик билан совға бериб, уни озод қилди.⁶ Еремиё Миспах шаҳрига* — Охихам ўғли Гадалиёнинг олдига бориб, юртда қолган одамлар орасида ўрнашди.

Яҳудо ҳокими Гадалиё

⁷ Баъзи яхудий лашкарбошилари ва жангчилар таслим бўлмаган эдилар. Охихам ўғли Гадалиёни Бобил шоҳи юртга ҳоким қилиб тайинлаганини, юртда қолган энг қашшоқ эркак, аёллар ва болаларни Гадалиёнинг ихтиёрига топширганини улар эшитдилар.⁸ Сўнг Миспахга келиб, Гадалиёга учрашдилар. Келганлар — Натаниё ўғли Исмоил, Кариёҳ ўғли Йўханон, Танхумат ўғли Сараё, Натуфолик Эфайнинг ўғиллари, Махолик Язаниё* ва уларнинг одамлари эди.⁹ Гадалиё келганларга шундай деб онт ичди: “Бобилликларга* тобе бўлишдан қўрқманглар. Юртда ўрнашиб, Бобил шоҳига хизмат қиласеринглар, шунда ҳаммаси яхши бўлади.¹⁰ Мен эса Миспахда қоламан. Келадиган Бобилликларнинг олдида вакилингиз бўламан. Сизлар ўрнашиб олган шаҳарларингизда яшайверасизлар. Меваларни йиғишириб олинглар, шароб ва зайдун мойини тайёрлаб, ғамлаб қўйинглар.”

¹¹ Бобил шоҳи баъзи одамларга Яҳудо юртида қолишга ижозат берганини ва Гадалиёни ҳоким қилиб тайинлаганини Мўаб, Оммон, Эдом ва бошқа юртларда яшаётган яхудийлар ҳам эшитишли.¹² Шунда улар сургун қилинган ҳамма жойлардан Яҳудо юртига — Миспахдаги Гадалиёнинг олдига қайтиб келишиди. У ердан бир талай мева йиғишириб, кўп шароб тайёрлашди.

Гадалиёни ўлдириб кетишади

¹³ Бир куни Кариёҳ ўғли Йўханон ва қирлардаги лашкарбошилар Миспахга Гадалиёнинг олдига келиб сўрадилар:

¹⁴ — Оммон шоҳи Баалис сизни ўлдиритириш учун Натаниё ўғли Исмоилни юборганидан хабарингиз борми?

Аммо Гадалиё уларга ишонмади.¹⁵ Шунда Йўханон ҳеч кимга билдирмай Гадалиёга деди:

— Ижозат беринг, бориб Исмоилни ўлдирай. Бу ҳақда ҳеч ким билмайди. Нима учун у сизни ўлдиришига йўл қўйишимиз керак? Борди-ю, Исмоил ниятига етса, атрофингизга йиғилган барча яхудийлар тарқалиб кетадилар, Яҳудода қолган одамларнинг боши эса балога қолади.

¹⁶ Аммо Гадалиё:

— Ундей қилма! Исмоил ҳақида айтган гапларинг ёлғон, — деди.

41-БОБ

¹ Ўша йилнинг еттинчи ойида* шоҳ Зидқиёнинг* бош лашкарбошиларидан бири бўлган Натаниё ўғли Исмоил ўнта одами билан бирга Миспахга* — Охихам ўғли Гадалиёнинг ҳузурига борди. Исмоил шоҳ уруғидан бўлган Элишаманинг набираси эди. Гадалиё келганлар билан бирга дастурхон атрофида ўтириб овқатланаётганда,² Исмоил ва у билан келган ўнта одам қиличларини яланғочлаб, Бобил шоҳи ҳоким қилиб тайинлаб кетган Гадалиёни ўлдиришиди.³ Гадалиё билан бирга Миспахда бўлган ҳамма яхудийларни Исмоил қиличдан ўтказди. У ердаги Бобиллик* сипоҳларни ҳам ўлдириди.

⁴ Эртаси куни Гадалиё ўлдирилганлиги ҳақидаги хабар тарқалмай туриб,

⁵ Шакам, Шилў ва Самариядан* саксонта одам келди. Улар қайғудан соқолини қирган, кийимларини йиртган, таналарини тилган эдилар*. Улар дон ва тутатқиларни назр қилиш учун Эгамизнинг уйига кетаётган эдилар. ⁶ Натаниё ўғли Исмоил уларни кутиб олиш учун Миспаҳдан йиғлаб чиқди. Уларга яқинлашгач: “Қани, ичкарига, Гадалиёнинг олдига киринглар”, деди. ⁷⁻⁹ Улар шаҳарга киришлари биланоқ, Исмоил билан унинг одамлари уларни ҳам қириб ташладилар. Аммо келганлардан ўнтаси Исмоилга ёлвориб деди: “Илтимос, бизни ўлдирма! Далаларда яшириб қўйган буғдой, арпа, зайдун мойи ва асалимиз бор.” Исмоил уларни ўлдирмай, ҳаётларини сақлаб қолди. Ўлдирган одамларнинг жасадларини эса катта сардобага ташлади*. Жасадларга тўлган бу сардобани Яхудо шоҳи Осо Истроил шоҳи Башо хужум қилган пайтда қурдирган эди*.

¹⁰ Исмоил Миспаҳда омон қолган ҳамма одамларни асир қилиб олди. Бобиллик қўриқчилар сардори Набизарадон Миспаҳдаги ҳамма одамларни уларнинг орасидаги маликаларга қўшиб, Гадалиёнинг ихтиёрига топширган эди. Исмоил уларнинг ҳаммасини асир қилиб, Оммон юртига* жўнади.

¹¹ Натаниё ўғли Исмоилнинг қилган жиноятлари ҳақида Кариёх ўғли Йўханон ва лашкарбошилар хабар топдилар. ¹² Улар бор одамларини тўплаб, Исмоил билан жанг қилиш учун йўлга тушдилар. Улар Исмоилга Гивондаги* катта ҳовуз бўйида етиб олдилар. ¹³ Исмоилнинг асиrlари Йўханонни ва унинг ёнидаги ҳамма лашкарбошиларни кўриб, хурсанд бўлиб кетишли. ¹⁴ Исмоил Миспаҳдан асир қилиб олган ўша одамларнинг ҳаммаси орқага — Йўханоннинг олдига югуриб келиши. ¹⁵ Исмоил эса саккизта одами билан Йўханондан қочиб, Оммон юртига кетди. ¹⁶ Шундай қилиб, Йўханон ва унинг лашкарбошилари Миспаҳдаги фожиада омон қолган аёлу бола-чақаларни, сарой амалдорилари жангчиларни Гадалиёнинг қотили Исмоилнинг қўлидан озод қилдилар. Уларни ўзлари билан Гивондан олиб кетдилар. ¹⁷⁻¹⁸ Йўханон одамлари билан Бобилликлардан қўрқанлари учун Мисрга йўл олдилар. Чунки Бобил шоҳи юртга ҳоким қилиб тайинлаган Гадалиёни Исмоил ўлдирган эди. Сўнг ҳаммаси йўлда Байтлаҳм ёнидаги Химам қўнолғасида тўхтадилар.

42-БОБ

Халқ Еремиёдан ибодат қилишини сўрайди

¹ Ҳамма лашкарбошилар, Кариёх ўғли Йўханон, Хўшайё ўғли Озариё* ва каттаю кичик одам ² Еремиёнинг олдига бориб, шундай дедилар:

— Илтимос, бир оғиз гапимизга қулоқ солинг. Эгангиз Худога биз учун ибодат қилинг, тирик қолганлар учун сўранг. Ўзингиз кўриб турибсиз, илгарилари биз ниҳоятда кўпчилик эдик, энди эса саноқли одам қолдик. ³ Биз қаерга боришимизни, нима қилишимизни Эгангиз Худо бизга кўрсатсин.

⁴ Еремиё пайғамбар уларга шундай жавоб берди:

— Яхши, илтимосингизга биноан Эгамиз Худога ибодат қиласман. Эгамиз нимаики деса ҳаммасини сизларга айтаман, ҳеч нарсани сизлардан яширмайман.

⁵ Улар эса Еремиёга шундай дедилар:

— Агар биз Эгангиз Худонинг сиз орқали айтган биронта сўзига риоя қилмасак, Унинг Ўзи орамиздаadolатли ва садоқатли шоҳид бўлсин. ⁶ Биз Эгамиз Худонинг ҳамма амрларига, яхши ёки ёмон бўлишидан қатъий назар, итоат қиласиз. Эгамиз Худога итоат қилсак, ҳаммаси яхши бўлади.

Еремиёнинг ибодатига Эгамиз жавоб беради

⁷ Орадан ўн кун ўтди. Еремиёга Эгамизнинг сўзи аён бўлди. ⁸ Еремиё Кариёх

ўғли Йўханонни, лашкарбошиларни ва одамларнинг каттаю кичигини тўплаб,⁹ уларга шундай деди: «Мен илтимосингизга биноан Истроил халқининг Худоси — Эгамизга илтижо қилдим. У менга шундай деди: ¹⁰ «Энди шу юртда қолсангизларгина Мен сизларни барбод қилмайман, балки қайта бунёд этаман, қўпориб ташламайман, балки мустаҳкам ўрнаштираман. Сизларнинг бошингизга фалокат келтирганимдан пушаймонман. ¹¹ Бундан буён Бобил шоҳидан қўрқманглар, — деб айтмоқда Эгамиз. — Мен сизлар билан биргаман. Шундай экан, ундан қўрқманглар. Ўзим сизларни қутқараман, унинг қўлидан озод қиласман. ¹² Мен сизларга раҳм-шафқат қиласман. Бобил шоҳи сизларга ачиниб, она юрtingизга ўрнаштиради.»

¹³ Аммо Эгангиз Худога бўйсунмай: «Бу ерда қолмаймиз. ¹⁴ Мисрга кетамиз, у ерда уруш қўрмаймиз, бурғу садоларини эшитмаймиз, нонга зор бўлмаймиз, у ерда яшаймиз», деб айтадиган бўлсангизлар, ¹⁵ эй Яҳудо халқининг омон қолганлари, Эгамизнинг сўзини эшитиб қўйинглар! Истроил халқининг Худоси — Сарвари Олам шундай демоқда: «Агар сизлар Мисрга бориб, у ерда ўрнашиб олишга қарор қилган бўлсангизлар, ¹⁶ ўша ерга борганингизда ўзларингиз қўрқаётган урушга дуч келасизлар. Сизлар очарчиликдан қўрқяпсизлар, аммо очарчилик кетингиздан Мисрга эргашиб боради, у ерда нобуд бўласизлар. ¹⁷ Мисрга бориб, у ерда ўрнашиб олишга жазм қилган ҳар бир киши қиличдан, очарчилик ва ўлатдан нобуд бўлади. Ундай одамлардан биронтаси ҳам тирик қолмайди, Мен уларнинг бошларига келтирадиган кулфатдан ҳеч ким қочиб кутулмайди.» ¹⁸ Истроил халқининг Худоси — Сарвари Олам шундай демоқда: «Агар сизлар Мисрга боргудек бўлсангизлар, Мен Қуддус аҳолисига ёғдирган қаҳримни Мисрда сизларнинг устингизга ёғдираман. Аҳволингизни одамлар кўрганда даҳшатга тушади. Сизларни мазах қилиб, номингизни қарғишларда ишлатишади. Сизлар бу юртни бошқа ҳеч қачон кўрмайсизлар.»

¹⁹ Эй Яҳудо халқининг омон қолганлари, Эгамиз сизларга, Мисрга борманглар, деб айтди. Билиб қўйинглар, бугун мен сизларни огоҳлантириб қўйяпман, ²⁰ сизлар катта хато қиляпсизлар. Ўзларингиз мени Эгангиз Худонинг олдига жўнатиб: «Илтимос, Эгамиз Худога илтижо қил, Эгамиз Худо нима деса, ҳаммасини қиласми», деган эдингизлар. ²¹ Эгангиз Худонинг менга айтган ҳамма сўзларини бугун сизларга айтдим, аммо сизлар Унинг айтган биронта сўзига итоат қилишни хоҳламаяпсизлар. ²² Сизларга айтиб қўйя: бормоқчи бўлаётган жойингизда сизлар қиличдан, очарчилик ва ўлатдан нобуд бўласизлар.”

43-БОБ

Еремиёни Мисрга олиб кетишади

¹ Еремиё Эгаси Худо ўзига аён қилган бу сўзларнинг ҳаммасини бутун халқа айтиб бўлгач, ² Ҳўшайё ўғли Озариё, Кариёх ўғли Йўханон ва бошқа сурбетлар Еремиёга шундай дедилар:

— Ёлгон гапиряпсан! Эгамиз Худо сенга, Мисрга бориб яшаманглар, деб айтмаган. ³ Нериё ўғли Борух сени бизга қарши гижгижлаб юрибди. У бизни Бобилликларнинг* қўлига тушириб, ҳалок қилмоқчи ёки сургун қилиб юбормоқчи.

⁴ Шундай қилиб, Кариёх ўғли Йўханон, лашкарбошилар ва бутун халқ Эгамизнинг амрига итоат қилмадилар, улар Яҳудо юртида қолишдан бош тортдилар. ⁵ Яҳудога турли юртлардан қайтиб келган ҳамма одамларни Йўханон ва лашкарбошилар ўзлари билан олиб кетдилар. ⁶ Булардан ташқари, қўриқчилар

сардори Набизарадон Охихам ўғли Гадалиё ёнида қолдириб кетган ҳамма эркагу аёлларни, бола-чақа, маликалар, Еремиё пайғамбар ва Нериё ўғли Борухни ҳам улар ўзлари билан олиб кетдилар.⁷ Улар Эгамизнинг амрига итоат қилмай, Мисрга жўнаб, Тахпанхас шаҳрига етиб бордилар.

⁸ Тахпанхасда Еремиёга Эгамизнинг қуидаги сўзи аён бўлди:

⁹ “Яхудийларнинг кўзи олдида катта тошларни ол. Бу тошларни Тахпанхас шаҳридаги фиръавн саройининг кираверишига, ҳовлидаги ғишт йўлаги остига кўмиб қўй.¹⁰ Сўнг яхудийларга шундай деб айт: «Исройл халқининг Худоси — Сарвари Олам демоқда: Мен Бобил шоҳи қулим Навуҳадназарни^{*} бу ерга олиб келаман. У мана шу кўмилган тошларнинг устига тахтини ўрнатиб, шоҳона чодирини тикади.¹¹ У келганда Мисрни вайрон қиласди, ҳар бир одам пешанасидагини кўради:

Баъзилар ўлатга йўлиқиб, нобуд бўлади,
Баъзилар асирикка тушиб, сургун қилинади,
Баъзилар қиличдан ўтказилади.

¹² Менинг амрим билан Навуҳадназар Миср худоларининг саждагоҳларига ўт қўяди. Баъзи бутларини ёндиради, баъзиларини ўзи билан олиб кетади. Кўйчивон тўнини бит-бургадан астойдил тозалагандай, Навуҳадназар ҳам Миср юртини қиртишлаб тозалайди. Сўнг соғ-саломат ўз юртига қайтиб кетади.¹³ У Мисрдаги Қуёш саждагоҳига^{*} ўрнатилган бутсимон тошларни бузиб ташлайди. Миср худоларининг саждагоҳларини ёқиб юборади.”

44-БОБ

Эгамиз Мисрдаги яхудийларга танбех беради

¹ Мисрнинг шимолидаги Мигдол, Тахпанхас ва Нуф шаҳарларида*, шунингдек, Мисрнинг жанубида^{*} истиқомат қилаётган яхудийлар тўғрисида Еремиёга Эгамиз шу сўзини аён қилди. ² Исройл халқининг Худоси — Сарвари Олам шундай демоқда: “Мен Қуддус ва Яхудонинг ҳамма шаҳарларига келтирган барча фалокатларни сизлар ўз кўзингиз билан кўрдингизлар. Ўша шаҳарлар ҳозир хароб бўлиб, ҳувиллаб ётибди.³ Яхудо одамлари қабиҳ ишлари билан Мени ғазаблантирилар. Улар бегона худоларга сифиниб, қурбонликлар куйдирдилар. Бу бегона худоларни на уларнинг ўзлари, на сизлар, на ота-боболарингиз биладилар.⁴ Мен Яхудо халқи олдига пайғамбар қулларимни қайта-қайта жўнатдим. «Мен нафратланадиган жирканч ишларингизни қилманглар», деб халқимдан ўтинган эдим.⁵ Аммо Яхудо халқи қулоқ солмади, гапларимга эътибор ҳам бермади. Қабиҳликларидан қайтмади, бегона худоларга қурбонликлар қилишда давом этди.⁶ Шунда аччиқ ғазабим Яхудо шаҳарлари билан Қуддус кўчаларига ловуллаган олов бўлиб тушди. Ҳозир ўша жойлар ҳувиллаб, ташландиқ бўлиб ётибди.”

⁷ Энди Исройл халқининг Худоси, Парвардигори Олам — Эгамиз шундай демоқда: “Нега ўз бошингизга бундай фалокат келтироқчисизлар?! Яхудо ютидан келган эркагу аёл, бола-чақанинг бошига етиб, ҳаммангиз битта қолмай қирилиб кетмоқчимисизлар?!⁸ Сизлар Мисрда ўрнашиб олиб, бегона худоларга қурбонликлар қилипсизлар. Қилмишларингиз билан жаҳлимни чиқаряпсизлар. Эҳтиёт бўлинглар, яна бошингизга балою оғат орттириб олманглар. Дунё халқларининг қарфишига қолиб, ҳаммага кулги бўлиб қолманглар.⁹ Яхудо шаҳарларида ва Қуддус кўчаларида қилган қабиҳликларингизни унутдингизми?!

Буларни ота-боболарингиз, Яхудо шоҳларию маликалари, ўзларингиз ва хотинларингиз қилгансизлар-ку! ¹⁰ Мана бугунгача сизлар Мендан заррача ҳам қўрқмадингизлар, афсус-надомат қилмадингизлар. Сизлар ота-боболарингизга берган қонун-қоидаларим бўйича яшамаяпсизлар.”

¹¹ Шунинг учун Исройл халқининг Худоси — Сарвари Олам демоқда: “Мен бошингизга оғату фалокат келтираман. Яхудо халқини йўқ қилишга қатъий қарор қилдим. ¹² Мисрда яшашга қарор қилган яхудийларнинг омон қолганларини ҳалок этаман. Ҳаммаси Мисрда ўлиб кетади. Каттаю кичиги қилич ва қаҳатчиликдан нобуд бўлади. Уларнинг аҳволини кўрганлар ваҳимага тушади. Уларни мазах қилиб, номини қарғишларда ишлатишади. ¹³ Мисрда яшаган ўшаларни, Мен Қуддусни жазолагандай, уруш, қаҳатчилик ва ўлат или жазолайман. ¹⁴ Мисрда яшайман, деб келган яхудийларнинг омон қолганларидан биронтаси қочиб кутула олмайди. Улардан ҳеч ким тирик қолмайди, Яхудо юртига қайтиб боролмайди. Ўз юртига қайтиб боришни орзу қилган одамлардан фақатгина бир-икки қочоқ она юртига қайтиб боришга муваффақ бўлади, холос.”

¹⁵ Хотинлари бошқа худоларга қурбонлик келтирганини билган эркаклар, ўша ерда турган аёллар — Мисрнинг шимолий ва жанубий худудида* яшаётган яхудийларнинг кўпчилиги бир овоздан Еремиёга шундай дедилар: ¹⁶ “Сен Эгамизнинг номидан бизга башорат қилиб айтган сўзларингга қулоқ солмаймиз. ¹⁷ Биз само қироличасига* қурбонликлар қиласиз, шароб назрини келтирамиз, деб онт ичганмиз, бу онтимиздан қайтмаймиз. Биз ўзларимиз, ота-боболаримиз, шоҳларимиз, аъёнларимиз Яхудо шаҳарларида, Қуддус кўчаларида нима қилган бўлсак, шуни қилаверамиз. Нега десангиз, ўша замонларда биз истаганимизча нон ердик, турмушимиз фаровон эди, ғам чекмас эдик. ¹⁸ Аммо само қироличасига қурбонликлар қилишни ва шароб назрини келтиришни тўхтатганимиздан бери етишмовчиликдан бошимиз чиқмайди. Қанча одамларимиз очарчиликдан ўлиб, урушда қирилиб кетди.” ¹⁹ Хотинлар ҳам шундай деб айтдилар: “Биз само қироличасига қурбонликлар қилаверамиз, шароб назрларини келтираверамиз! Само қироличасига шароб назр қилишимизни, унинг шаклида нонлар ёпишимизни эрларимиз билади-ку!”

²⁰ Сўнг Еремиё бундай жавоб берган эркагу аёлларга ва бутун халойиққа деди: ²¹ “Сизлар, ота-боболарингиз, шоҳларингиз, аъёнларингиз, бутун юрт халқи Яхудода ва Қуддус кўчаларида бошқа худоларга назрлар келтирган эдингизлар. Бу назрларингизни Эгамиз унутган, дейсизми?! Ёки Унинг бундан хабари йўқ, деб ўйлайсизми?! ²² Эгамиз ёвуз қилмишларингизга, жирканч ишларингизга ортиқ тоқат қила олмагани учун ҳозир юрtingиз ҳувиллаб, ташландиқ бўлиб ётиби. Одамлар юрtingизнинг номини қарғишларда ишлатишмоқда. ²³ Ахир, сизлар бегона худоларга қурбонликлар келтириб, Эгамизга қарши гуноҳ қилдингизлар. Эгамизга итоат этмадингизлар, Унинг қонун-қоидаларини ва шартларини бажармадингизлар. Шунинг учун бу кўргилик бошингизга келди. Шуларнинг оқибатида ҳозир бу аҳволга тушиб ўтирибсизлар.”

²⁴ Еремиё уларнинг ҳаммасига, айниқса, хотинларга қаратада шундай деди: “Эй Миср ютидаги яхудийлар, Эгамизнинг сўзини эшитинглар. ²⁵ Исройл халқининг Худоси — Сарвари Олам демоқда: «Сизлар хотинларингиз билан бирга: ‘Само қироличасига албатта қурбонликлар қиласиз, шароб назрларини келтирамиз’, деб онт ичибсизлар. Онtingизни ҳам бажарибсизлар. Жуда соз, айтганингизни қилаверинглар! Ичган онtingиздан асло қайтманглар! ²⁶ Лекин, эй Миср ютида яшаб юрган яхудийлар, Эгангизнинг шу сўзини эшитиб қўйинглар: Мен Ўзимнинг буюк номим билан онт ичиб айтаманки, бундан буён Миср ютидаги биронта

яхудий Менинг номимни тилга олмайди, 'Эгам Раббий шоҳид', дея онт ичмайди.

²⁷ Мен уларнинг бошига яхшилик эмас, ёмонлик келтираман. Мисрдаги яхудийларнинг ҳаммаси, битта ҳам қолмай қиличдан ва очарчиликдан нобуд бўлишади. ²⁸ Бир-иккитагина одам қирғиндан қочиб, Мисрдан Яхудога қайтиб боради. Ўшандা Мисрга яшагани борган яхудийларнинг ҳаммаси кимнинг сўзи ҳақ бўлиб чиққанини билишади. Менинг сўзим ҳақмикан ёки уларники?»

²⁹ Эгамиз шундай демоқда: «Мен сизларни мана шу ерда жазолайман. Айтганларимнинг ҳаммаси бажо бўлишига ишонч ҳосил қилишингиз учун сизларга шундай бир аломат бераман: ³⁰ Мен Яхудо шоҳи Зидқиёни* унинг ашаддий душмани бўлган Бобил шоҳи Навуходназарга* таслим қилганимдай, Миср фирмъавни Хофратни* ҳам унинг жонига қасд қилаётган душманига таслим қилиб бераман.» Эгамизнинг каломи шудир.”

45-БОБ

Худо Борухга ваъда беради

¹ Яхудо шоҳи Йўшиё ўғли Ёҳайиқим хукмронлигининг тўртинчи йили* эди. Еремиё юқоридаги сўзларни Нериё ўғли Борухга айтиб, ўрама қофозга* ёздиргандан сўнг*, унга шундай деди:

²⁻⁴ — Эй Борух, Истроил халқининг Худоси — Эгамиз сенга шундай гапларни айтиб қўйишимни буюрди: сен: “Шўрим қурсин! Эгам қайғу устига қайғу орттириди, юрак-бағрим эзилиб кетди, жонимни қўярга жой тополмаяпман”, деб айтган экансан. Шунинг учун Эгамиз сенга айтмоқда: “Мен бутун юрт бўйлаб бунёд қилган ҳамма нарсамни бузиб ташлайман, мустаҳкам қилиб ўрнатганларимни қўпориб ташлайман. ⁵ Сен ўзинг учун катта режалар тузма! Мана, Мен барча одамзоднинг бошига кулфат ёғдирдаман. Аммо сенинг жонингни сақлаб қоламан, борган жойингда сени асрайман.” Эгамизнинг каломи шудир.

46-БОБ

Миср лашкари Кархамишда мағлуб бўлади

¹ Эгамиз халқлар ҳақида Еремиёга Ўз сўзини аён қилди.

² Бу Миср ҳақида башорат эди. Аниқроғи, Миср фирмъавни Нехонинг* лашкари тўғрисида эди. Улар Фурот дарёси бўйидаги Кархамиш шаҳрида қароргоҳ қурган эдилар. (Яхудо шоҳи Йўшиё ўғли Ёҳайиқим хукмронлигининг тўртинчи йилида* Бобил шоҳи Навуходназар* бу лашкарни мағлуб қилди.)

³ Эгамиз шундай дейди:

“Каттаю кичик қалқонларни тайёр тутинг!

Қани, энди жангга киринг!

⁴ Отларга эгар уринг,

Чопқир отларга мининг!

Дубулғаларни кийиб олинг,

Жанговар ҳолатда туринг.

Найзаларни ўткирланг,

Совутларни кийиб олинг!

⁵ Аммо нималарни кўряпман?!

Миср лашкари ваҳимага тушди,

Улар орқага чекинди,
Жангчилари тор-мор бўлди.
Улар орқага қарамай шошилиб қочдилар.
Атрофни даҳшат қамради,
— деб айтмоқда Эгамиз. —
⁶Чаққонлар қоча олмайдилар,
Сипоҳлар қочиб қутулолмайдилар.
Улар шимолда, Фурот дарёси бўйида
Қоқилиб йиқилиб тушадилар.”

⁷ Ким у Нил дарёсидай қирғоғидан чиқиб кетган?!
Ким у сувлари тошқин дарё каби бўлиб қолган?!

⁸ Миср Нилдай ҳаддидан ошган,
Сувлари тошқин дарёга ўхшаб қолган.
Миср айтади:

“Мен кўтарилиб, ер юзини қоплайман,
Шаҳарларни вайрон қиласман,
Аҳолисини қириб ташлайман.”

⁹ Эй отлиқлар, ҳужум қилинг!
Жанг араваларини учиртиринг!
Эй қалқон тутган Ҳабашибистонликлару* Ливияликлар*,
Эй камон ушлаган Лидияликлар*,
Қани, жангга киринг!

¹⁰ Ахир, бу Сарвари Олам — Раббийнинг кунидир.
Бу кун қасос куни бўлади,
Худо душманларидан ўч олади.
Унинг қиличи тўйгунча эт ейди,
Чанқоғи босилгунча қондан ичади.
Ўша куни Фурот бўйидаги шимолий юртда,
Сарвари Олам — Раббий ёвларини қурбон қиласди.

¹¹ Эй бокира қиз* Миср,
Гиладга* бор, малҳам олгин.
Аммо сен бекорга дори-дармон йиғасан,
Барибир дардингга шифо топмайсан.

¹² Халқлар шарманда бўлганингни эшитди,
Ер юзи доду фарёдларингга тўлиб кетди.
Жангчиларинг бир-бирига урилди,
Ҳаммаси мағлуб бўлиб йиқилди.

Навуҳадназар Мисрга ҳужум қиласди

¹³ Бобил шоҳи Навуҳадназар Мисрга ҳужум қилиши ҳақида Еремиёга
Эгамизнинг қуйидаги сўзи аён бўлди:

¹⁴ Мисрда шундай деб эълон қилгин,
Мигдол шахрида шундай деб хабар бергин,
Нуф ва Тахпанхас шаҳарларида* жар солиб айтгин:
“Жойларингизни эгалланг!
Жангга шай туринг!
Зоро, қилич атрофдаги ҳаммани қиради.”

¹⁵ Жангчиларингиз мағлуб бўлади!
Улар бардош бера олмайди.
Зеро, Эгамизнинг йози уларни уради*.
¹⁶ Улар қайта-қайта қоқиладилар*,
Бир-бирининг устига йиқиладилар.
Шунда ўзларига ўзлари айтадилар:
“Қани, бўлинглар,
Халқимизнинг олдига қочиб қолайлик!
Киндиқ қонимиз тўкилган юртга борайлик.
Бу қирғиндан қочиб қутулайлик.”
¹⁷ Улар шундай деб бақирадилар:
“Фиръавн катта гапирди,
Аммо фурсатни қўлдан бой берди.”

¹⁸ Худо Шоҳдир,
Сарвари Оламдир Унинг номи.
У шундай демоқда:
“Мен барҳаёт Худо бўлганим ҳақи айтаманки,
Сизларга қарши бир ғаним келаётir.
У тоғлар орасидаги Товур тоғидай забардаст,
Денгиз бўйидаги Кармил тоғидай* улкан.
¹⁹ Эй қиз Миср, тугунингни тайёрлагин,
Сургунга кетишга ҳозирлангин!
Ахир, пойтахting Нуф вайрон бўлади,
Кимсасиз, ҳувиллаб қолади.

²⁰ Миср чиройли бир ғунажинга ўхшайди,
Аммо шимол сўнаси* унга ёпирилади.
²¹ Мисрнинг ёлланма аскарлари
Боқилган бузоқларга ўхшайди.
Аммо кулфат куни келганда,
Жазо оладиган вақти етганда,
Уларнинг ҳаммаси орқага қочади,
Душман қаршисида чекинади.

²² Бостириб келаётган душман дастидан
Миср қочаётган илондай вишиллайди.
Душманлар дараҳт кесувчилар каби,
Болта кўтариб, Мисрга ҳужум қилишади.
²³ Мисрнинг ўрмони қалин бўлса-да,
Душманлар уни кесиб ташлайди,
— деб айтмоқда Эгамиз. —

Ахир, душманлар чигирткадан* ҳам кўп,
Саноғига етиб бўлмайди.

²⁴ Қиз Миср шарманда бўлади,
Шимолдаги халқнинг* қўлига тушади.”

²⁵ Исройл халқининг Худоси — Сарвари Олам шундай демоқда: “Мен Нў* шаҳрининг худоси Омонни* жазолайман. Фиръавннинг, Мисрнинг, у ердаги шоҳлар ва худоларнинг, фиръавнга умид боғлаган ҳамманинг адабини бераман.

²⁶ Уларнинг жонларига қасд қилаётган Бобил шоҳи Навуходназарнинг ва аъёнларининг қўлига бераман. Аммо вақт ўтиб, Мисрда илгаригидек одамлар яшайдиган бўлади.” Эгамизнинг каломи шудир.

Эгамиз Ўз халқини қутқаради

²⁷ “Эй қулим Ёқуб, қўрқма!
Эй Исройл* халқи, саросимага тушма!
Мен сени олис юртдан озод қиласман,
Наслингни сургун бўлган мамлакатдан қутқараман.
Эй Ёқуб насли, сен юртингга қайтасан,
Осоишта ва бехатар яшайсан.
Энди ҳеч ким сени қўрқитмайди.
²⁸ Сен, эй қулим Ёқуб, қўрқма,
Мен сен билан бирга бўламан,
— деб айтмоқда Эгамиз. —
Сени халқлар орасига тарқатиб юборган эдим,
Энди ўша халқларнинг ҳаммасини қириб ташлайман.
Сени эса қириб юбормайман,
Аммо жазосиз ҳам қолдирмайман.
Адолат ила жазоингни бераман.”

47-БОБ

Филист халқининг тақдири

¹ Фиръавн Ғазо шаҳрига* ҳужум қилишидан олдин, Филист халқи ҳақида Эгамизнинг шу сўзлари Еремиёга аён бўлди:

² Эгамиз айтмоқда:
“Қаранг, шимолда душманлар тўпланмоқда,
Улар тўлқинлар каби, пишқириб келмоқда.
Жўшқин дарё каби, тошиб ҳовлиқмоқда.
Улар тўғондай бутун юртни босиб кетади,
У ердаги ҳаммани —
Шаҳарлар ва одамларни чўктиради.
Халқ доду фарёд қиласди,
Юрт аҳолиси фифон чекади.
³ От туёқлари дупур-дупур уради,
Аравалар тарақ-туруқ қиласди,
Филдираклар гурсиллайди.
Эркаклар ичидан зил кетадилар.
Ҳатто болаларини қутқаргани ҳам
Улар орқага қайтмайдилар.”

⁴ Ҳа, ўша кун келади,
Филист халқи қириб ташланади!
Омон қолган иттифоқчилари йўқ қилинади.
Тир ва Сидон* шаҳарларига ёрдам келмайди,
Хафтўр* соҳилларидан келган Филистларни
Эгамизнинг Ўзи йўқ қиласди.
⁵ Ғазо аҳолиси қайғудан соchlарини қирдиради,

Ашқалон^{*} одамларининг дами ичига тушидай кетади.
Эй Филист забардастларининг омон қолганлари!*

Қачонгача ғам чекиб, баданингизни тиласиз?!*

⁶ Филист халқи шундай деб ёлворади:
“Шўримиз қурсин! Эй Эгамизнинг қиличи!
Қачон тиниб-тинчийсан сен?!
Бўлди етар, тинчлана қол!
Қинингга кир, дамингни ол!”

⁷ Эвоҳ, Эгамизнинг йўзи амр этган бўлса,
Қандай дам олсин у қилич?!
“Ашқалон шаҳрига ва соҳилга хужум қил” деган бўлса,
Қандай тинчлансан у қилич?!

48-БОБ

Мўабнинг тақдири

¹ Истроил халқининг Худоси — Сарвари Олам Мўаб^{*} ҳақида шундай демоқда:

“Наво аҳолисининг ҳолигавой!
Уларнинг шахри хароб бўлади.
Хиратайим^{*} шармандаларча мағлуб бўлади,
Унинг қалъаси^{*} уятга қолади,
Ер билан яксон қилинади.

² Мўабнинг довруғидан асар ҳам қолмайди.
Душман Xашбон шаҳрини қўлга киритади,
Мўаб халқини илдизидан қуритишни режа қилади.
Мадмон^{*} шаҳрида суқунат ҳукм суради,
Қилич унинг изига тушади.

³ Ана, Хўронайимдан^{*} фарёд эшитилмоқда!
«Хонавайрон бўлдик!» дея хитоб қилишмоқда.

⁴ «Мўаб вайрон бўлди-ку!» дея додлашмоқда.
Гўдаклари бифиллаб йиғламоқда.

⁵ Одамлар аччиқ-аччиқ йиғлаб,
Лухит тепалигига чиқишиади.
Ҳатто Хўронайимга тушиш йўлида
Аччиқ фифон овозлари эшитилади.

⁶ Тезроқ қочинг!
Чўлдаги юлғундай
Жонингизни сақлаб қолишга тиришинг!

⁷ Эй Мўаб, сен куч ва бойлигингга таяндинг,
Энди эса мағлуб бўласан.
Худойинг Хамўш сургун қилинади,
Руҳонийларинг аъёнларинг асир қилиб олиб кетилади.

⁸ Сенинг ҳар бир шаҳрингга вайрон этувчи келади,
Бирорта шаҳринг омон қолмайди.
Водий вайрон қилинади,

Ясси тепалик яксон этилади.”
Эгамизнинг каломи шудир.

⁹ Мўаб учун қабр тоши тайёрланг,
Кўп ўтмай Мўаб йўқ бўлади*.
Шаҳарлари вайрон қилинади,
Ҳаммаси ҳувиллаб қолади.

¹⁰ Эгамизнинг ишидан бўйин товлаган киши лаънати бўлсин! Қон тўкишдан ўзини тийган бундай киши лаънати бўлсин!

Мўаб шаҳарлари вайрон бўлади

¹¹ “Мўаб ёшлигидан бехатар ўсган,
Тиндирилган шароб каби тинч яшаган.
Гўё бир идишдан бошқасига қўйилмаган,
Ҳеч қачон ўз юртидан сургун бўлмаган.
Шу боис унинг таъми ўзгармаган,
Муаттар ҳиди сақланиб қолган.

¹² Аммо шундай кунлар келмоқдаки,
Мен Мўабга қарши одамларни жўнатаман,
— деб айтмоқда Эгамиз. —
Улар Мўабни шароб тўккандай тўкиб ташлайдилар.

Идишларини бўшатиб, чилпарчин қиласидилар.

¹³ Мўаб халқи ўз худоси Хамўш дастидан шарманда бўлади,
Исройл халқининг ҳолига тушади.
Ахир, Исройл ҳам Байтилдаги бузоққа* инониб,
Шармандаи шармисор бўлган эди-ку!”

¹⁴ “Биз қаҳрамонлармиз,
Жасур жангчилармиз”, деб
Айтишга қандай ҳаддингиз сиғди?

¹⁵ Худо Шоҳдир,
Сарвари Оламдир Унинг номи.
У шундай демоқда:

“Мўаб вайрон бўлади,
Шаҳарлари босиб олинади.
Энг сара йигитлари қириб ташланади.

¹⁶ Мўабга кулфат яқинлашмоқда,
Фалокат унга елдай учиб келмоқда.

¹⁷ Эй Мўаб қўшнилари, қайғуринглар,
Эй Мўабни таниганлар, мотам туtingлар.
Айтинглар: «Эвоҳ, салтанат ҳассаси* синди.
Кудратли ва улуғвор ҳасса парчаланди.»

¹⁸ Эй Дибонда* яшайдиганлар,
Тўрдаги ўрнингиздан туинглар,
Ердаги тупроққа ўтиинглар.
Зеро, Мўабни ҳалок этувчи сизга қарши чиқади,
У қўрғонларингизни қулатади.

¹⁹ Эй Апорда* яшайдиганлар,
Кўчага чиқиб кузатиб туинглар!

Қочиб кетаётган эркагу аёллардан
 «Нима бўлди?» деб сўранглар.
²⁰ Эвоҳ, Мўаб шарманда бўлди, вайрон қилинди.
 Уввос солиб, фарёд қилинглар!
 Мўаб хароб бўлганини
 Арнон дарёси бўйларида эълон қилинглар.

²¹ Мен ясси тепаликларда жойлашган ҳамма шаҳарларни: Хўлунни, Яхазни*,
 Миғатни, ²² Дибонни, Навони, Байт-Диблатайимни, ²³ Хиратайимни,
 Байт-Гамулни, Байт-Миённи, ²⁴ Харийўтни, Бозрахни* жазолайман. Хуллас,
 узоқ-яқинда жойлашган ҳамма Мўаб шаҳарлари вайрон бўлади. ²⁵ Мўабнинг
 қудрати синади, кучи кесилади.” Эгамизнинг каломи шудир.

Мўаб шарманда бўлади

²⁶ Ўзини Эгамиздан устун қўйган Мўабни маст* қилинглар. Ўз қусуғида ўзи
 думалаб ётсин, одамларга кулги, масхара бўлсин. ²⁷ Эй Мўаб, эсингдами, Исройл
 устидан кулган эдинг! У ўғридики, у ҳақда гапирганингда бошингни чайқаган
 эдинг!

²⁸ Эй Мўаб аҳолиси!
 Шаҳарларни тарқ этинг,
 Қоялар орасида яшаб юраверинг.
 Тоғ дарасида ин қурган кабутарлардай бўлинг.
²⁹ Эшитганмиз Мўабнинг мағрурлигини,
 Манманлиги, киборлиги, такаббурлигини!
 Нақадар такаббурдир у!
 Ниҳоятда гердайиб кетган!
³⁰ Эгамиз шундай демоқда:
 “Мен бу халқнинг сурбетлигини биламан.
 Улар беҳуда мақтанадилар.
³¹ Шундай экан, Мўаб учун Мен йиғлайман,
 Бутун Мўаб халқи учун фарёд қиласман.
 Хир-Харасот* аҳолиси учун кўз ёш тўкаман.
³² Эй Сивмо қишлоғининг узумзорлари,
 Мен ҳам, Язир шаҳри сингари, сизлар учун қайғураман*.
 Сизнинг новдаларингиз ўсиб кетди,
 Ҳатто Ўлик денгиздан ҳам ошиб ўтди,
 Шоҳларингиз Язир шаҳригача* етди.
 Аммо ёзги мевалар ва узумларингизга
 Зааркундалар тушди.
³³ Мўабнинг ҳосилдор ерларида
 Шодлигу хурсандчилик барҳам топди.
 Мен узум сиқиши чуқурларидаги*
 Шаробни тортиб оламан.
 Энди ҳеч ким шодлиқдан ҳайқириб узум эзмайди,
 Шодон қийқириқлар энди эшитилмайди.

³⁴ Хашбон, Элалей аҳли фарёд чекади,
 Уларнинг овози Яхазгача эшитилади.
 Садоси Зўвардан Хўронайимгача жаранглайди,

То Эглат-Шалишиёгача етиб боради.
 Ҳатто Нимрим сувлари нобуд бўлади.
³⁵ Мўаб саждагоҳларида* қурбонлик қилганларни ўлдираман,
 Ўз худоларига атаб тутатқи тутатгандарни йўқ қиласман,
 — деб айтмоқда Эгамиз. —
³⁶ Қалбим най каби нола қилиб,
 Мўаб учун қайғурмоқда.
 Ҳа, қалбим най каби,
 Хир-Харасот одамлари учун йиғламоқда.
 Ахир, уларнинг йиққан бойлиги йўқ бўлди.
³⁷ Қайғудан ҳамма сочини олдирган,
 Ҳамма соқолини қириб ташлаган,
 Ҳамма қўлларини тилган*,
 Белларига қанор ўраб олган*.
³⁸ Мўабдаги ҳамма томлар устида*,
 Ҳамма шаҳар майдонларида
 Фақат марсия айтилади.
 Зотан, Мен Мўабни синдириб ташлайман,
 Кераксиз идишдай чилпарчин қиласман,
 — деб айтмоқда Эгамиз. —
³⁹ Мўаб чил-чил синади!
 Одамлари аччиқ-аччиқ йиғлайди!
 Шармандалиқдан Мўаб юзини яширади!
 Мўаб ҳаммага масхара бўлади,
 Унинг аҳволидан қўшни халқлар ваҳимага тушади.”

Мўаб душманлардан қутула олмайди

⁴⁰ Эгамиз шундай демоқда:
 “Қаранглар!
 Душман бургут сингари, Мўабга ҳужум қилмоқда,
 Қанот кериб Мўаб узра парвоз этмоқда.
⁴¹ Мўаб шаҳарлари* энди олинади,
 Қалъалари қўлга киритилади.
 Ўша куни Мўаб лашкарлари ваҳимага тушади,
 Улар дард тутган аёл каби бўлиб қолади.
⁴² Ахир, Мўаб ўзини Мендан устун қўйди,
 Энди у нобуд бўлади.
⁴³ Эй Мўаб аҳли, сизни ваҳима,
 Тузоқ ва чоҳ кутмоқда!
 — деб айтмоқда Эгамиз. —
⁴⁴ Ваҳимадан қочган чуқурга тушар,
 Чуқурдан чиққан эса тузоқقا илинар.
 Мен Мўабнинг бошига
 Жазо йилини келтираман,
 — деб айтмоқда Эгамиз. —
⁴⁵ Ҳолдан тойган қочоқлар
 Хашбон шахри соясида тўхтайди.
 Аммо олов чиқади Хашбон шахридан,
 Аланга чиқади шоҳ Сихўннинг шахридан*.

Ёнғин бутун Мұаб юртини ямлаб ютади,
Исёнкор одамларнинг бошини ейди*.

⁴⁶ Эй Мұаб, ҳолингга вой!
Хамүшга сифинганлар нобуд бўлади,
Ўғил-қизларинг асирикка тушади.

⁴⁷ Аммо кейинчалик
Мен Мұаб халқини яна фаровонликка эриштираман*.”
Эгамизнинг каломи шудир.

Мұаб тўғрисидаги башоратлар ўз ниҳоясига етди.

49-БОБ

Эгамиз Оммон халқини хукм қиласади

¹ Эгамиз Оммон* халқи тўғрисида шундай дейди:

“Исройл тирноққа зормиди?!
Унинг меросхўри йўқмиди?!
Нимага унда Мўлахга* топинадиганлар
Гад ҳудудини эгаллаб олишиди?
Нимага Оммон халқи Гад шаҳарларида яшаяпти?
² Бу қилмишлари учун шундай кунлар келадики,
Мен Оммонликларнинг Рабба шаҳрига* қарши уруш эълон қиласман,
— деб айтмоқда Эгамиз. —
Рабба шаҳрини вайроналар уюмига айлантираман,
Атрофдаги қишлоқларига ўт қўяман.
Шунда Исройл халқи Оммон босқинчиларининг ерларини босиб олади,
— деб айтмоқда Эгамиз. —

³ Дод сол, эй Хашбон!*

Ай шаҳри* вайрон бўлди!
Эй Рабба аҳолиси, фарёд қилинг!
Қанорга ўраниб*, марсия айтинг,
Қайғудан баданингизни тилинг*.
Ахир, худойингиз Мўлах сургун қилинади,
Руҳонийлару аъёнларингиз асирга олиб кетилади.

⁴ Эй исёнкор қиз* Оммон,
Нечун кучинг билан мақтанасан?

Сенинг кучинг қирқилади!*

Сен бойлигингга ишонасан,
«Бизга хужум қилишга ким журъат этар?» дейсан.

⁵ Мен Ўзим сенга ҳар томондан даҳшат соламан,
— деб айтмоқда Сарвари Олам — Раббий. —
Ҳаммангиз тумтарақай бўлиб қочасизлар,
Қочоқларни ҳеч ким тўплай олмайди.

⁶ Аммо шундан сўнг
Мен Оммон халқини яна фаровонликка эриштираман*.”
Эгамизнинг каломи шудир.

Эдом халқи хукм қилинади

⁷ Сарвари Олам Эдом* ҳақида шундай демоқда:

“Темонда* фаросатли киши қолмадими?
Оқилона насиҳат берадиган топилмадими?
Ақлларини моғор босдими?
⁸ Эй Дедонликлар*, қочинглар,
Чуқур ғорларда бекиниб олинглар!
Вақт келди Эсов наслини* жазолашга,
Фалокат келтираман унинг бошига.
⁹ Бөфингизда узум терган одамлар
Бир-икки бош бўлса-да, узум қолдиради-ку!
Кечаси уйга тушган ўғри
Фақат хоҳлаган нарсасини олади-ку!
¹⁰ Мен эса Эсовнинг бор-йўғини тортиб оламан,
Унинг пана жойларини ошкор қиласман,
У ҳеч қаерга яширина олмайди.
Унинг болалари ҳалок бўлади,
Оға-ини, қўшнилари ўлади.
Ундан асар ҳам қолмайди.
¹¹ Етимларингизни қолдиринг,
Уларнинг жонини асрайман.
Беваларингиз Менга иониб яшасин.”

¹² Эгамиз шундай демоқда: “Айбсиз одамлар жабр тортса-ю, сен, эй Эдом, жазосиз қоласанми?! Йўқ, сен жазодан қочиб қутулолмайсан. Жазо косасидан* албатта ичасан. ¹³ Ўз номим билан қасам ичиб* айтаманки, Бозрах шахри* вайрон бўлади. Унинг аянчли ахволи одамларни ваҳимага солади. Ўтган-кетганлар уни мазах қилиб, номини қарғишларда ишлатади. Ён-атрофидаги ҳамма шаҳарлар ҳам то абад ташландиқ бўлиб қолади.” Эгамизнинг каломи шудир.

¹⁴ Эгамиз барча халқларга жарчи юборди,
Мен, Еремиёга шундай хабар етиб келди:
“Тўпланинг! Эдомга ҳужум қилинг,
Қани, жангга отланинг!”

¹⁵ Эгамиз дейди:
“Эй Эдом, сени халқлар орасида арзимас қилиб қўяман,
Бутун одамзод сендан ҳазар қиласиган бўлади.

¹⁶ Важоҳатинг сени алдади,
Такаббурлигинг сени аҳмоқ қилди.
Сен-ку тик қояда яшайсан,
Азим чўққиларни эгаллагансан.
Бургут каби инингни баланд қурган бўлсанг ҳам,
Сени у ердан тортиб тушираман.”
Эгамизнинг каломи шудир.

¹⁷⁻¹⁸ Эгамиз шундай демоқда: “Эдомнинг бошига тушадиган қулфатлар шу қадар даҳшатли бўладики, бу юртнинг олдидан ўтган ҳар бир киши унинг аянчли ахволидан ваҳимага тушиб, қотиб қолади. Садўм, Фамўра* ва уларнинг

атрофидаги шаҳарлар қандай вайрон бўлган бўлса, Эдом ҳам худди шундай вайрон бўлади. У ерда ҳеч ким яшамайди.

¹⁹ Мен, Иордан чакалакзоридаги арслондай, яйловдаги қўйларга ҳужум қиласман. Бир зумда Эдом ҳалқини ўз юритидан ҳайдаб чиқараман. Ўзим хоҳлаган инсонни у ерга бош қиласман. Ахир, ким Менга тенг кела олади?! Ким Мендан ҳисобот сўрай олади?! Қайси чўпон Менга қарши тура олади?! ²⁰ Шундай экан, Эдом ҳалқига қарши тузган режаларимни эшитиб қўйинг. Темон аҳолисига қилган ниятларимга қулоқ тутинг: йиртқичлар сурувдаги қўзичноқларни судраб кетади. Қилмишлари дастидан ям-яшил яйловлари пайҳон бўлади. ²¹ Эдом гурсиллаб қулаганда, ер юзи ларзага келади. Ҳалқнинг доду войлари Қизил денгизгача* эшитилади. ²² Қаранглар! Душман бургутдай Бозрахга ҳужум қилмоқда. Қанот кериб шаҳар узра парвоз этмоқда. Ўша қуни Эдом лашкари дард тутган аёл каби ваҳимага тушади.”

Дамашқ ҳукм қилинади

²³ Қуйидаги хабар Дамашқ ҳақидадир:

Эгамиз шундай дейди:

“Хомат билан Арпад аҳли* шум хабар эшитишади,
Шунинг учун улар саросимага тушади.
Юрагига тушган ғулғула босилмайди,
Жўшқин денгиз каби тинчланмайди.

²⁴ Дамашқ мадорсиз қолади,
Орқага қочмоқчи бўлади,
Бутун вужудини ваҳима қамраб олади.
Дард тутган аёлдай азобу қийноқда қолади.

²⁵ Эвоҳ, машҳур шаҳар тарк этилади!
Кувонч макони* ташлаб кетилади!

²⁶ Ўша қуни йигитлари майдонларда ўлади,
Ҳамма сипоҳлари ҳалок бўлади,
— деб айтмоқда Сарвари Олам. —

²⁷ Мен Дамашқ деворларига ўт қўяман,
Олов Банҳадад қалъаларини ёндириб ташлайди.”

Кедар ва Хазор ҳукм қилинади

²⁸ Бобил шоҳи Навуҳадназар* мағлуб қилган Кедар ва Хазор* шоҳликлари ҳақида Эгамиз шундай дейди:

“Қани бўлинг, Кедарга ҳужум қилинг!
Ўша шарқ қабилаларини ҳалок этинг!
²⁹ Қўлга киритинг чодирларию қўйларини,
Чодир пардаларию бор бисотини.
Туяларини ўзингизга олинг.
Одамлар бақиради:
«Атрофни даҳшат қамради!»

³⁰ Эй Хазор аҳолиси!
Қочинг! Узоқларга бош олиб кетинг.
Чуқур ғорларда яшириниб олинг,
— деб айтмоқда Эгамиз. —
Зоро, Бобил шоҳи Навуҳадназар

Сизларга қарши бир режа тузди,
Сизларни ҳалок этиш ниятида юрибди.

³¹ Эй Бобил лашкарлари,
Қани, хотиржам бўлган халқа хужум қилинглар!
Бехатар яшаётганларга ташланинглар!
— деб айтмоқда Эгамиз. —
Улар саҳрода ёлғиз яшайдилар,
Шаҳарларининг на дарвозалари, на тамбалари бор.

³² Уларнинг туяларини ўлжа оласиз,
Мол подаларини қўлга киритасиз.
Сочини олдириб юрган* Хазорликларни
Мен тўрт томонга тарқатиб юбораман.
Уларнинг устига ҳар ёқдан кулфат ёғдирман,
— деб айтмоқда Эгамиз. —
³³ Хазор то абад ташландиқ бўлиб қолади,
Чиябўрилар маконига айланади.
У ерда ҳеч ким яшамайди,
У жойларга ҳеч ким бориб ўрнашмайди.”

Элам ҳукм қилинади

³⁴ Яхудо шоҳи Зидқиё* ҳукмронлигининг ilk даврида Эгамиз Еремиё пайғамбарга Элам юрти* тўғрисида Ўз сўзини аён қилди.

³⁵ Сарвари Олам демоқда: “Мен Элам мерғанларини нобуд қиласман. Кудратининг манбани синдираман. ³⁶ Улар устига тўрт томондан душман соламан. Ҳаммасини ер юзининг тўрт томонига тарқатиб юбораман. Эламликлар қочиб бормаган бирон–бир юрт қолмайди.

³⁷ Мен Эламни қасди бор душманлари қаршисида саросимага соламан. Қайнаган ғазабимни устиларига кулфат қилиб ёғдирман, — деб айтмоқда Эгамиз. — Оридан қилич солиб, ҳаммасини битта қолдирмай қириб ташлайман. ³⁸ Уларнинг шоҳини аъёнлари билан бирга йўқ қиласман. Эламда Ўз тахтимни ўрнатаман.

³⁹ Аммо кейинчалик Мен Элам халқини яна фаровонликка эриштираман.” Эгамизнинг каломи шудир.

50-БОБ

Бобил мағлуб бўлади

¹ Эгамиз Бобил юрти, Бобилликларнинг* диёри хусусида Еремиё пайғамбар орқали шундай сўзларни айтди:

² “Халқларга эълон қилинг, хабар етказинг!
Байроқ кўтариб, янгиликни айтинг.
Ҳеч нарса яширмай шундай жар солинг:
«Бобил қулайди,
Уларнинг худоси Бэл шарманда бўлади,
Худоси Мардух* парча–парча қилинади.
Бобил бутлари хор бўлади,
Санамлари синдириб ташланади.»

³ Шимолдаги бир халқ Бобил устига бостириб келади. Улар бутун юртни вайрон қилишади. У ерда ҳеч ким яшамайдыган бўлади. Одамлар ва ҳайвонлар у ердан қочиб кетади.”

Исроил халқи сургундан қайтиб келади

⁴ Эгамиз шундай демоқда: “Ўша кунлар келганда, Исроил халқи Яхудо халқи билан бирга қўз ёш тўкиб, Эгаси Худога интиладиган бўлади. ⁵ Улар юзларини Куддус* томон бурадилар, у ерга олиб борадиган йўлни сўраб–суриштирадилар. Эгасига боғланиб қоладилар, У билан унугилмас, абадий бир аҳд тузадилар.

⁶ Менинг халқим адашган қўйларга ўхшайди. Чўпонлари уларни йўлдан адаштириб, тоғларга ҳайдаб юбордилар. Улар тоғлару қирларда дарбадар кезиб, оромгоҳини унугилдилар. ⁷ Қўйларимга дуч келган одам уларни еди. Душманлар шундай деди: «Бизнинг айбимиз йўқ. Уларнинг ўзлари Эгасига қарши гуноҳ қилди. Эгаси улар учун асил яйловдай эди, ота–боболари Эгасига умид боғлаган эди.»

⁸ Эй Исроил халқи, Бобилдан қочиб чиқинг! Бобилликларнинг юртини тарқ этинг! Сурувни бошқариб кетаётган серкадай биринчи бўлиб чиқинг. ⁹ Мана, Мен шимолдаги қудратли халқларни Бобилга қарши қўзғатияпман. Улар саф тортиб, Бобилга ҳужум қиласилар. Бобил жангда мағлуб бўлади. Душман ўқларининг ҳаммаси тўғри нишонга тегади, уларнинг ўқлари мерганларнинг ўқларидайдир. ¹⁰ Бобил* талон–тарож қилинади, ҳамма талончилари ўлжага тўяди.” Эгамизнинг каломи шудир.

Бобил қулайди

¹¹ Эй Худонинг халқини талаган Бобилликлар!

Сизлар севиниб, хурсанд бўляпсизлар,
Яйловдаги бузоқдай* шодон сакраяпсизлар,
Отлар каби кишиняпсизлар.

¹² Аммо билиб қўйинг, она юртингиз хор бўлади,
Сиз туғилган юрт оёқ ости қилинади.

Юртингиз халқлар орасида арзимас бўлиб қолади,
Чўл, қақроқ ер, саҳрого айланади.

¹³ Эгамиз Бобилга қаҳрини сочади,
У ерда ҳеч ким яшамайди.
Бутунлай ташландиқ бўлиб қолади.

У ердан ким ўтса ёқасини ушлайди,
Бобил харобаларини кўриб қотиб қолади.

¹⁴ Эй мерганлар!
Бобил атрофига саф тортинг!
Унга қарши ўқ узинг!
Ўқингизни сира аяманг.

Ахир, Бобил Эгамизга қарши гуноҳ қилди.

¹⁵ Ҳар ёқдан Бобилга шундай деб хитоб қилинг:

“Бобил таслим бўляпти,
Истеҳкомлари йиқиляпти,
Деворлари ўпирилиб тушяпти.”
Эгамизнинг қасосидир бу.

Сизлар ҳам Бобилдан ўч олинг,
Қилмишларини ўз бошига қайтариб солинг.

¹⁶ Бобилдаги уруғ сепувчиларни йўқ қилинг,

Ўрим мавсумида ўроқчиларни ўлдиринг.
Душман қиличидан ҳамма қочсин,
У ердаги асиirlар ўз халқи орасига қайтсин,
Она юртига қочиб борсин.

Исроил тикланади

¹⁷ Исроил халқи* шерлар ҳар ёққа тұмтарақай қочириб юборган қўйларга ўхшайды. Илк бор Исроилга Оссурия шоҳи* ташланған эди, Исроилнинг сяякларини эса Бобил шоҳи Навуходназар* ғажиган эди. ¹⁸ Шу сабабдан Исроил халқининг Худоси — Сарвари Олам шундай демоқда: “Мен Оссурия шоҳини қандай жазолаган бўлсан, Бобил шоҳини ва унинг юртини ҳам худди шундай жазолайман. ¹⁹ Исроилни ўз яйловига қайтариб олиб келаман, улар Кармил тоғининг ён бағирларида ва Башанда ўтлаб юрадилар. Эфрайим қирларида ва Гиладда* юриб, қоринларини тўйғизадилар. ²⁰ Ўша кунлар келганда Исроилдан бирон гуноҳ топилмайди, Яхудо ҳам бенуқсон бўлади, — деб айтмоқда Эгамиз. — Зоро, Мен асраган халқимнинг гуноҳларини кечираман.”

Худо Бобилни ҳукм қилади

²¹ Эгамиз шундай демоқда:
“Маротайим* юртига бостириб боринглар,
Пахўд* аҳолисига ҳужум қилинглар,
Уларни тамомила қириб битиринглар.
Сизларга Мен буюрган ҳамма ишни бажаринглар.
²² Бобилдан жанг шовқин-сурони кўтарилмоқда,
Ҳамма ёқ харобага айланмоқда.
²³ Бобил бутун дунёни болғадай парча-парча қилди,
Эҳ, энди ўзи синиб парчаланиб кетди!
Бобилнинг аҳволи халқларни ваҳимага солди.
²⁴ Эй Бобил, Мен сенга тузоқ қўйгандим,
Билмасдан тузоғимга тушиб қолдинг.
Сени фош қилдим, қўлга олдим.
Ахир, сен Менга қарши чиққан эдинг.”

²⁵ Эгамиз Ўз аслаҳаҳонасини очди,
Ғазаб қуролларини олиб чиқди.
Сарвари Олам — Раббий
Бобилликлар юртида бир иш қилишга шайланди.

²⁶ Узоқ юртлардан Бобилга ҳужум қилинг!
Омборхона эшикларини бузинг!
Бобилни дон уюмларидай йиғинг,
Ҳаммасини йўқ қилинг.
Ундан асар ҳам қолмасин!
²⁷ Ёш жангчиларини ўлдиринг,
Ҳаммасини қириб ташланг.
Бобилнинг ҳолигавой, унинг куни битди,
Жазо оладиган вақти етди.

²⁸ Бобилдан қочиб келганларнинг гапларини эшитинг. Улар Қуддусга келиб, Эгамиз Худо Ўз Маъбади учун қасос олганини эълон қилишмоқда.

²⁹⁻³⁰ Эгамиз шундай демоқда: “Бобилга ҳужум қилиш учун камонкашларни

йифинглар. Шаҳарни қуршовга олинглар, биронта одам қочиб кета олмасин. Бобилликларнинг қилган ишига яраша жазосини беринглар, қилмишларини ўз бошига қайтариб солинглар. Зеро, улар Менга, Истроил халқининг Муқаддас Худосига нисбатан такаббурлик қилдилар. Ўша куни Бобилликларнинг йигитлари майдонларда ўлиб кетади, ҳамма сипоҳлари ҳалок бўлади.”

³¹ Сарвари Олам — Раббий шундай демоқда:
“Эй такаббур Бобил, Мен сенга қарши чиқяпман!
Сенинг кунинг битди,
Сени жазолайдиган вақт етди.

³² Бу такаббур халқинг қоқилиб тушади,
Сени ҳеч ким турғизиб қўймайди.
Мен ҳамма шаҳарларингга ўт қўяман,
Олов атрофдаги ҳамма нарсани ёндириб юборади.”

³³ Сарвари Олам шундай демоқда: “Истроил ва Яхудо халқлари зулм исканжасида қолишиди. Душманларнинг ҳаммаси уларни қаттиқ тутиб турибди. Уларни қўйиб юборишдан бош тортяпти. ³⁴ Аммо Мен уларнинг қудратли Қутқарувчисиман, Менинг номим Сарвари Оламдир. Мен халқимни астойдил ҳимоя қиласман, уларнинг юртига ором бераман. Бобилликларни эса тинчлиқдан маҳрум қиласман.”

³⁵ Эгамиш шундай демоқда:
“Бобилликларга ўлим!
Бутун Бобил аҳолисига,
Аъёнларию донишмандларига ўлим!
³⁶ Фолбинларига ўлим!
Нақадар аҳмоқдир улар!
Жангчиларига ўлим!
Нақадар ваҳимага тушган улар!
³⁷ Отларию жанг араваларига ўлим!
Ёлланган жангчиларига ўлим!
Аёлларга ўхшаган заифдир улар!
Зеб-зийнату бойликларини йўқ қилинг,
Таланг, ўлжа қилиб олинг.
³⁸ Бутун юрга қурғоқчилик келсин!
Дарёлари қуриб кетсин.
Зеро, бу юрг бутлар макони бўлди,
Ваҳимага солган ўша бутлар дастидан
Одамлари ақлдан озди.

³⁹ Шунинг учун Бобилда сиртлонлару түяқушлар яшайди. У ер ёввойи дашт ҳайвонларининг маконига айланади. Инсон зоти энди у ерда ҳеч қачон яшамайди, Бобил то абад бўйм–бўйш бўлиб қолади. ⁴⁰ Садўм, Ғамўра* ва уларнинг атрофидағи шаҳарлар қандай вайрон бўлган бўлса, Бобил ҳам шундай вайрон бўлади. У ерда ҳеч ким яшамайди.” Эгамизнинг каломи шудир.

⁴¹ Ана, шимолдан оломон келмоқда.
Дунёнинг четидан
Буюк бир ҳалқу кўп шоҳлар қўзғалмоқда.

⁴² Камону найзалар билан қуролланган улар,
Шафқат қымайтын золимдир бу одамлар.
Улар отларини елдиради,
Денгиздай гувиллаб келади.
Эй қыз* Бобил, улар сенга қарши чиқади,
Жанг қылгани саф тортишади.

⁴³ Бобил шохи бу хабарни эшитди,
Күлларида мадор қолмади.
Дард тутган аёл каби
Азобу изтиробда қолди.

⁴⁴ Эгамиз шундай дейди: “Мен, Иордан чакалакзоридаги арслондай, яйловдаги қўйларга ҳужум қиласман. Бир зумда Бобил халқини ўз юритдан ҳайдаб чиқараман. Ўзим хоҳлаган инсонни у ерга бош қиласман. Ахир, ким Менга тенг кела олади?! Ким Мендан ҳисобот сўрайди?! Қандай чўпон Менга қарши тура олади?! ⁴⁵ Шундай экан, Бобил юртига қарши Мен тузган режаларни эшитинглар. Бобил халқи тўғрисида қилган ниятларимга қулоқ тутиングлар: йиртқичлар сурувдаги қўзичноқларни судраб кетади. Қилмишлари дастидан ям-яшил яйловлари пайҳон бўлади. ⁴⁶ Бобил гурсиллаб қулаганда, ер юзи ларзага келади, халқнинг доду войлари олисдаги элларга эшитилади.”

51-БОБ

Эгамиз Бобилни ҳукм қилишда давом этади

¹ Эгамиз шундай демоқда:
“Мен Бобилга ва унинг аҳолисига* қарши,
Ҳалокат келтирадиган шамол қўзғатаман.

² Бобилга ажнабийларни жўнатаман.
Улар буғдойни совургандай,
Бобилни совуриб ташлайдилар.
Унинг бор-йўғини шилиб оладилар.

Кулфат куни унга ҳар ёқдан ёпириладилар.
³ Бобил камонкашларининг совут кийишига,
Ўқ узишларига имкон берманг.
Бобил йигитларига раҳм қиласман!

Лашкарини тамомила қириб битиринг.
⁴ Улар Бобил* юртида чопиб ташланадилар,
Кўчаларида оғир яраланиб ётадилар.”

⁵ Исроил ва Яхудо халқлари
Сарвари Олам олдида гуноҳ қилган бўлсалар ҳам,
Худоси уларни тарк этмади.
Исроил халқининг Муқаддас Худоси улардан юз ўғирмади.

⁶ Бобилдан қочиб чиқинглар!
Жонингизни қутқариб қолинглар!
Бобилнинг гуноҳи туфайли қирилиб кетманглар,
Зотан, Эгамиз Бобилдан ўч олмоқда,
Қилган қилмишларига яраша жазосини бермоқда.

⁷ Бобил Эгамизнинг қўлидаги олтин косадай эди,
Бобил бутун дунёни маст* қилди.

Дунё халқлари косадаги шаробдан ичди,
Ҳаммаси ақлдан озди.

⁸ Бобил бирданига қулайди, вайрон бўлади.
У учун фарёд қилинг!
Яраларига малҳам суртинг,

Зора тузалиб қолса!

⁹ Бобилда яшаган ажнабийлар айтишади:
“Бобилни тузатмоқчи эдик, аммо у тузалмади.
Энди уни ташлаб кетайлик,
Ҳар биримиз юртимизга қайтиб кетайлик.
Ахир, Бобилнинг жазоси бошидан ошди,
Кўқдаги булатларгача етиб борди.”

¹⁰ Истроил халқи дейди:
“Эгамиз бизни оқлади.
Юринглар, Қуддусга* борайлик,
Эгамиз Худонинг буюк ишларини
У ерда эълон қилайлик.”

¹¹ Эгамиз Ўз Маъбади учун Бобилликлардан ўч олмоқчи бўлди. У бутун Бобил юртини вайрон қилишни режалаштириб қўйган эди. Режасини амалга ошириш учун Мидия шоҳларини* Бобилга қарши қўзғатиб, шундай деган эди:

“Ўткирланг ўқларни!
Тўлдиринг ўқдонларни!”

¹² Бобилга қарши байроқ кўтаринг.
Қўриқчилар сафини кучайтиринг,
Соқчилар қўйинг.
Пистирма қўйишга тайёр туриш.

Эгамиз режаларини амалга оширади,
Бобилга қарши айтганларини бажаради.

¹³ Эй сероб сувлар бўйидаги шаҳар,

Бой хазинага эга бўлган шаҳар!

Сенинг кунинг битди.

Ҳаётинг ипи узилди*.

¹⁴ Сарвари Олам Ўз номи билан қасамёд қилиб деди:

“Чигирткадай* гала-гала душманни сенга қарши юбораман.

Улар юрting узра ғолибона ҳайқиради.”

Худога ҳамду сано қўшиғи

¹⁵ Эгамиз қудрати или ерни яратди,
Донолиги или дунёни бунёд этди,
Идроки или осмон гумбазини ўрнатди.

¹⁶ Унинг овозидан осмондаги сувлар гулдурайди,
У дунёнинг тўрт бурчидан булатларни олиб келади.

Ёмғир ёғдирганда чақмоқ чақтиради,

Омборларидаги шамоллардан эстиради.

¹⁷ Унинг олдида ҳамма одамлар аҳмоқ ва нодондир.
Заргарлар ясаган бутлари туфайли шарманда бўлишади.
Ясаган санамлари соҳтадир, уларнинг жони йўқ.

¹⁸ Бу бетайин бутлар алдамчиdir.
Уларни жазолаганим заҳоти йўқ бўлишади.
¹⁹ Ёқубнинг Худоси эса ундан эмас.
Бутун борлиқни У яратган,
Исроил қабиласини Ўзига мулк қилган.
Унинг номи Сарвари Оламdir.

Эгамизнинг болғаси

²⁰ Эгамиз шундай дейди:
“Эй Бобил, сен Менинг болғам, уруш қуролимсан.
Сен билан эздим Мен халқларни,
Сен билан парчаладим шоҳликларни.
²¹ Сен билан пачақладим отлару чавандозларни,
Мажақладим жанг араваларию аравакашларни.
²² Сен билан эздим эркагу аёлларни,
Сен билан урдим ёшу қариларни,
Сен билан ўлдирдим йигиту қизларни,
²³ Сен билан эздим чўпонлару уларнинг сурувларини,
Сен билан урдим деҳқонлару уларнинг ҳўқизларини,
Сен билан ўлдирдим ҳокимлару аъёнларни.”

Бобилнинг жазоси

²⁴ Эгамиз шундай демоқда: “Куддусга қилган барча ёвузиклари учун
Бобилликларни* ва бутун Бобил юртини сизнинг кўзингиз олдида жазолайман.

²⁵ Эй Бобил, сен тоғдай бўлиб,
Бутун дунёни вайрон қилдинг.
Шу боис Мен сенга қаршиман!
— деб айтмоқда Эгамиз. —
Мен сенга қарши қўл кўтараман,
Сени қоялардан пастга думалатиб юбораман,
Куйиб хароб бўлган тоқقا айлантираман.
²⁶ Сендан на тамал тоши,
На пойдевор учун тош олинади.
Сен то абад ташландиқ бўлиб қоласан.”
Эгамизнинг каломи шудир.

²⁷ Байроқни кўтаринг!
Халқларга бурғу чалинг!
Халқларни Бобилга қарши урушга тайёрланг.
Аракат, Миннах ва Ашканоз шоҳликларини*
Унга қарши тўпланг.
Бобилга қарши жанг қиладиган лашкарбошини тайинланг,
Чигиртка галасидай кўп отлар келтиринг.
²⁸ Халқларни Бобилга қарши урушга тайёрланг.
Мидия шоҳларини, уларнинг ҳокиму аъёнларини,
Уларнинг қўли остидаги ҳамма юртларни
Бобилга қарши сафарбар қилинг.

²⁹ Бутун дунё дағ–дағ титрамоқда,
Зоро, Эгамиз Ўз режасини амалга оширмоқда.
Бобил вайрон бўлади,
Эвоҳ, кимсасиз ҳувиллаб қолади.
³⁰ Бобил сипоҳлари жангдан воз кечишади,
Қалъаларида писиб ётишади.
Уларнинг мадори қолмайди,
Аёллардай заиф бўлиб қолишади.
Бобилнинг душмани шаҳар биноларига ўт қўяди,
Шаҳар дарвозаларини бузади.
³¹ Чопар кетидан чопар югуран,
Хабарчи кетидан хабарчи келар.
Бобил шоҳига шундай хабар етказмоқчи улар:
“Шаҳрингиз қулади,
³² Дарёнинг кечув жойлари қўлга олинди,
Тўқайларга ўт қўйилди*
Сипоҳлар саросимага тушди.”

³³ Истроил халқининг Худоси — Сарвари Олам шундай демоқда:
“Қиз* Бобил хирмондаги буғдойга ўхшайди.
Тез орада ўрим вақти етиб келади,
Ҳадемай у янчилади*.”

³⁴ Куддус аҳолиси шундай деди:
“Бобил шоҳи Навуҳадназар* бизни ғажиди, эзди,
Бизни бўм–бўш идишдай қилиб қўйди.
У аждарҳодай бизни ямлади,
Лаззатли нарсаларимиз билан қорнини тўйғизди,
Кейин эса бизни тупуриб ташлади.”

³⁵ Куддус аҳолиси айтсин:
“Мажақланган танам* учун Бобилдан ўч олинсин”, дея.
Сион аҳолиси айтсин:
“Тўкилган қоним учун Бобилликлар жазолансин”, дея.

Эгамиз Истроилга ёрдам беради

³⁶ Эгамиз шундай демоқда:
“Мен даъвоингизни эшишиб,
Сизни ҳимоя қиласман.
Сизлар учун ўч оламан.
Бобилнинг булоғини қуритаман,
Дарёларини сувсиз қолдираман.
³⁷ Бобилни бир уюм тошга айлантираман,
Чиябўриларнинг макони қиласман.
Бобилнинг аҳволидан одамлар даҳшатга тушади,
Уни кўрганлар қотиб қолади.
У ерда бирон кимса яшамайди.

³⁸ Бобилликлар шер каби ўкиришади,
Шер болаларидай бўкиришади.

³⁹ Айни қизишган пайтларида

Уларга ўткир ичимлиқдан ичираман.
 Уларни маству* шодон қиласман.
 Сүнг улар абадий уйқуга кетишади,
 Ҳеч қачон уйғонишмайди,
 — деб айтмоқда Эгамиз. —
⁴⁰ Мен уларни қўзичноқ, қўчқор ва такалардай
 Қассоб олдига олиб бораман.

Бобилнинг қисмати тўғрисидаги ашула

⁴¹ Эҳа, Бобил* шаҳри қулади-я!
 Бутун дунё ғурури мағлуб бўлди-я!
 Унинг қисматидан халқлар даҳшатга тушди!
⁴² Денгиз сувлари Бобилни босди,
 Шовқин тўлқинлар уни қоплаб олди.
⁴³ Ана, шаҳарлари хароб бўлди,
 Улар чўлу саҳрога айланди.
 Энди у ерда ҳеч ким яшамайди,
 Инсон қадами у ерга етиб бормайди.
⁴⁴ Бобил худоси Бэлни* Мен жазолайман,
 Ютганларини оғзидан чиқараман.
 Энди халқлар унинг олдига оқиб бормайди,
 Бобил деворлари қулаб тушади.

Худо Бобилдаги Истроил халқига хабар беради

⁴⁵ Эй халқим, чиқиб кет у ердан!
 Қочиб қол Менинг қаҳримдан!
 Жонингни қутқаргин!
⁴⁶ Юртдаги миш-мишлар сизни қўрқитмасин,
 Юрагингизга ғулғула солмасин.
 Бир йил бир миш-миш бўлади,
 Кейинги йили бошқаси чиқади.
 Ҳа, юртдаги зўравонлик ҳақида миш-миш чиқади,
 Шоҳлар орасидаги уруш ҳақида миш-миш тарқалади.
⁴⁷ Мана, шундай кун келяптики,
 Мен Бобилнинг сохта худоларини жазолайман.
 Бутун Бобил юрти шарманда бўлади,
 Кўчаларида жасадлар ётади.
⁴⁸ Ҳа, Бобилга қарши шимолдан
 Қирғин келтирувчи келади.
 Шунда Бобилнинг ҳалокатидан
 Еру осмон шодланади,
 У ердаги барча мавжудот хурсанд бўлади,
 — деб айтмоқда Эгамиз. —
⁴⁹ Ахир, Бобил Истроил халқининг умрига зомин бўлди,
 Ер юзидағи кўп халқларнинг бошини еди,
 Ана энди унинг қилмишлари ўзининг бошига етди.”
⁵⁰ Эй қиличдан омон қолганлар!
 Ўйланмасдан қочинглар!
 Олис юртда Эгамизни эсланглар.
 Куддус ҳақида ўйланглар.

⁵¹ Сизлар айтасиз: “Шарманда бўлдик.
Ҳақоратлар эшитдик.
Юзимиз шувут.
Ахир, Эгамиз уйининг муқаддас хоналарини
Ажнабийлар оёқ ости қилди.”

⁵² Эгамиз эса шундай демоқда:
“Мана, шундай кунлар келяптики,
Мен Бобилнинг сохта худоларини жазолайман.
Бутун юрт узра
Ярадорларнинг фарёдлари эшитилади.
⁵³ Бобил осмонга чиқиб олса ҳам,
Баланд қалъасини мустаҳкам қилса ҳам,
Мен унга қарши қирғин келтирувчини юбораман.”
Эгамизниң каломи шудир.

Бобил вайрон бўлади

⁵⁴ Ана, Бобил халқидан доду фарёд кўтарилимоқда,
Бобил юртидан вайрон–талқон садолари келмоқда.

⁵⁵ Эгамиз Бобилни вайрон қилади,
Шанғиллаган товушини ўчиради.
Душманлар шиддатли тўлқинлардай ўкиради,
Қулоқни тешгудек қилиб бақиради.

⁵⁶ Қирғин келтирувчи Бобилга қарши чиқади,
Сипоҳларини асирикка олади.
Камонларини синдиради.
Ахир, Эгамиз жазолайдиган Худодир,
У роса Бобилнинг жазосини беради.

⁵⁷ Худо Шоҳdir,
Сарвари Оламдир Унинг номи.
У шундай демоқда:
“Маст қиласан Бобил амалдорларию донишмандларини,
Ҳокимларини, аъёнларию жангчиларини.
Улар абадий уйқуга кетадилар,
Ҳеч қачон уйғонмайдилар.”

⁵⁸ Сарвари Олам шундай демоқда:
“Бобилнинг қалин деворлари ер билан яксон қилинади,
Баланд дарвозалари ёндириб ташланади.
Эллар беҳуда тинкасини қуритади.
Халқларнинг тер тўкиб эришганлари оловга ем бўлади.”

Еремиёning башорати Бобилда овоза қилинади

⁵⁹ Яхудо шоҳи Зидқиё ҳукмронлигининг тўртинчи йили*. Шоҳ Зидқиё Бобилга бормоқчи бўлиб йўлга отланганда, Еремиё пайғамбар Нериёнинг ўғли,
Махсиёнинг невараси Сараёга кўрсатмалар берди. Сараё бу сафарда жавобгар бир шахс эди. ⁶⁰ Еремиё ўрама қофозга* Бобилнинг бошига тушадиган барча кулфатларни батафсил баён қилиб ёздирган эди. ⁶¹ У Сараёга шундай тайинлади:
— Бобилга борганингдан кейин, ўрама қофоздаги ҳамма сўзларни халқقا баланд овозда ўқиб бер. ⁶² Кейин эса шундай хитоб қил: “Эй Эгам, Сен Ўзинг бу жойни вайрон қиласан, дегансан. Бу ерда на одамлар, на ҳайвонлар яшайди, бу жой то абад ташландиқ бўлади, деб айтгансан.” ⁶³ Ўрама қофозни ўқиб

бўлганингдан кейин, унга бир тош боғлагин-да, Фурот дарёсининг ўртасига улоқтириб юбор. ⁶⁴ Кейин шундай деб айт: “Бобил ҳам шунга ўхшаб чўкиб кетади. Эгамиз Бобилга ёғдирадиган кулфатлар туфайли Бобил ҳеч қачон ўнгланмайди. Унинг бутун аҳолиси ўлади.”

Еремиёнинг башоратлари тугади.

52-БОБ

Куддус қулайди

¹ Зидқиё йигирма бир ёшида шоҳ бўлди* ва Куддусда ўн бир йил ҳукмронлик қилди. Онасининг исми Хамутал бўлиб, Либналик Еремиёнинг* қизи эди. ² Зидқиё ҳам, Ёҳайиқум каби, Эгамиз олдида қабиҳ ишлар қилгани учун ³ Эгамиз Куддус ва Яхудо халқидан ғоят ғазабланган, оқибатда уларни Ўз ҳузуридан қувиб юборган эди.

Зидқиё Бобил шоҳига қарши исён кўтарди. ⁴ Зидқиё ҳукмронлигининг тўққизинчи йили ўнинчи ойининг* ўнинчи кунида Бобил шоҳи Навухадназар* Куддусга қарши бор лашкарини тортиб келиб, шаҳарни қамал қилди. Шаҳар девори атрофида қамал иншоотлари* ясатди. ⁵ Шоҳ Зидқиё ҳукмронлигининг ўн биринчи йилигача* шаҳар қамалда қолди. ⁶ Тўртинчи ойининг* тўққизинчи куни шаҳарда очарчилик шу қадар кучайдики, халқ бир бурда нонга зор бўлди.

⁷ Бобилликлар* Куддус деворини ёриб кирдилар. Улар Куддусни ҳар томондан қуршаб олишган бўлсалар-да, Яхудо сипоҳлари шоҳ билан бирга қочиб кетдилар. Улар тунда саройнинг боғи яқинидаги икки девор орасидаги дарвозадан чиқиб, Иордан водийси* томонга қочган эдилар. ⁸ Аммо Бобил* сипоҳлари шоҳнинг орқасидан қувиб, Ериҳо текислигида унга етиб олдилар. Бутун лашкар эса шоҳни ташлаб қочиб кетди.

⁹ Бобил сипоҳлари шоҳ Зидқиёни ушлаб, Хомат юртидаги Ривло шаҳрига*, Бобил шоҳи ҳузурига олиб келдилар. Бобил шоҳи Зидқиёни ҳукм қилди.

¹⁰ Ривлода Зидқиёнинг кўзи олдида ҳамма ўғилларини, сўнг Яхудо аъёнларини қатл қилди. ¹¹ Зидқиёнинг эса кўзларини ўйиб, уни киshanлаб қўйди. Бобил шоҳи уни ўзи билан Бобилга олиб кетди. Зидқиё умрининг охиригача зинданда ётди.

Маъбад вайрон бўлади

¹² Бобил шоҳи Навухадназар ҳукмронлигининг ўн тўққизинчи йили бешинчи ойининг* ўнинчи кунида Бобил шоҳи хизматидаги қўриқчилар сардори Набизарадон Куддусга кирди. ¹³ У Эгамизнинг ўйига, шоҳ саройига, ҳар бир ҳашаматли иморатга, Куддусдаги ҳамма уйларга ўт қўйди. ¹⁴ Қўриқчилар сардори бошчилигига бутун Бобил лашкари Куддус деворларини йиқитди. ¹⁵ Набизарадон баъзи қашшоқларни, шаҳарда тирик қолганларни, Бобил шоҳи томонга ўтган қочоқлару қолган-қутган хунармандларни* асир қилиб олиб кетди. ¹⁶ Узумчилик ва деҳқончилик билан машғул бўлсинлар дея, ҳеч вақоси йўқ, қашшоқ одамлардан баъзиларинигина қолдирди, холос.

¹⁷ Бобилликлар Эгамизнинг ўйидаги бронза устунларни, араваларни, бронза ҳовузни* парчаладилар, бронзанинг ҳаммасини Бобилга олиб кетдилар.

¹⁸ Эгамизнинг ўйида хизмат пайтида ишлатиладиган буюмларни — қозонларни, куракларни, қайчиларни, тоғорачалар ва куракчаларни, барча бронза ашёларни ҳам олиб кетдилар. ¹⁹ Қўриқчилар сардори Набизарадон олтин ва кумушдан ясалган тоғораларни, оловкуракларни, тоғорачаларни, товоқларни, чироқпояларни, куракчаларни ва шароб назри учун ишлатиладиган идишларни ҳам олиб кетди. ²⁰ Эгамизнинг ўйи учун шоҳ Сулаймон ясаттирган иккита устунга,

ҳовузга, ҳовуз остидаги ўн иккита буқага ва араваларга* беҳисоб бронза сарф қилинган эди.²¹ Ҳар бир устуннинг баландлиги 18 тирсак, тевараги 12 тирсак* эди. Устунларнинг ичи кавак бўлиб, деворларининг қалинлиги тўрт энли эди.²² Иккала устуннинг тепасида биттадан устунқош бор эди. Устунқошларнинг баландлиги 5 тирсакдан*, атрофлари бронзадан ясалган тўрсимон безак ва анор* тасвири билан безатилган эди.²³ Устунқошнинг ҳар бир томонига тўқсон олтида анор тасвири туширилган эди. Тўрсимон безақдаги анорларнинг сони ҳаммаси бўлиб юзта эди.

Яҳудо халқи Бобилга сургун қилинади

²⁴ Кўриқчилар сардори Набизарадон олий руҳоний Сараёни, ундан кейинги руҳоний Зафаниёни ва учта дарвозабонни ҳам асирга олди.²⁵ Қуддусда қолган сипоҳларнинг лашкарбошисини, шоҳнинг еттита шахсий маслаҳатчисини, халқни лашкар сафига ёзган лашкарбошининг котибини ва халқдан шаҳарда қолган олтмиш кишини ҳам бағди қилди.²⁶ Уларнинг ҳаммасини Ривлога, Бобил шоҳи ҳузурига олиб келди.²⁷ Бобил шоҳи уларни Хомат юртида — Ривлода қатл қилди. Шундай қилиб, Яҳудо халқи ўз юртидан сургун бўлди.

²⁸ Навуҳадназар сургун қилган халқнинг сони қуйидагичадир: ҳукмронлигининг еттинчи йили* 3023 нафар яхудийни,²⁹ ўн саккизинчи йили* Қуддус аҳолисидан 832 нафар кишини,³⁰ йигирма учинчи йили* қўриқчилар сардори Набизарадон Яхудодан 745 нафар кишини сургун қилди. Ҳаммаси бўлиб сургун қилинган халқнинг сони 4600 киши эди.

³¹ Яҳудо шоҳи Ёҳайихин Бобилга сургун қилинганига ўттиз етти йил бўлганда, Бобил таҳтига Эвилмардуҳ ўтири*. Эвилмардуҳ ўша йилнинг ўн иккинчи ойи* йигирма бешинчи куни Яҳудо шоҳи Ёҳайихинга марҳамат қилиб, уни зиндандан олиб чиқди.³² Унга яхши муносабатда бўлди, Бобилга сургун қилинган бошқа шоҳлардан кўра, баландроқ мартаба берди.³³ Шундай қилиб, Ёҳайихин зиндан кийимларини ечди. Умр бўйи доимо Бобил шоҳининг дастурхонидан таом еди.³⁴ Умрининг охиригача Бобил шоҳи тарафидан кундалик эҳтиёжи ҳар доим қондирилди.

ИЗОҲЛАР

1:1 *Онотўт шаҳри* — Қуддусдан қарийб 5 километр шимоли-шарқда жойлашган эди.

1:2 *Яҳудо* — Яҳудо қабиласи Исроилнинг жанубий қисмидаги энг катта қабила эди. Шоҳ Сулаймон вафотидан кейин шимолдаги ўнта қабила жанубдаги Яҳудо ва Бенямин қабилаларидан ажралиб чиқди (3 Шоҳлар 11:26-12:24 га қаранг). Яҳудо ва Бенямин қабилалари жанубий шоҳлик деб аталадиган бўлди. Жанубий шоҳликнинг пойтахти Қуддус бўлиб қолаверди, уларнинг ўз ҳукмдорлари бор эди. Эски Аҳднинг баъзи парчаларида Яҳудо сўзи жанубдаги иккала қабилага нисбатан ишлатилган. Тўлиқроқ маълумотга эга бўлиш учун луғатдаги ЯҲУДО сўзига қаранг.

1:2 *Йўшиё Яҳудода ҳукмронлик қилган даврнинг ўн учинчи йили* — милоддан олдинги 627 йил. Йўшиё милоддан олдинги 640-609 йилларда ҳукмронлик қилган.

1:3 *Ёҳайиқум даври* — милоддан олдинги 609-598 йилларда Яҳудода ҳукмронлик қилган.

1:3 *Зидқиё ҳукмронлигининг ўн биринчи йили* — милоддан олдинги 586 йил. Зидқиё милоддан олдинги 597-586 йилларда Яҳудода ҳукмронлик қилган.

1:3 бешинчи ой — иброний календарининг Ав ойи назарда тутилган. Ҳозирги календарга кўра, бу ой тахминан июлнинг ўртасидан бошланади.

1:12 *Бодом шоҳи Менинг ҳушёр туришимни билдиради* — ибронийчада бодом ва ҳушёр сўзлари ўзаро оҳангдош. Бодом биринчи бўлиб гуллайдиган дараҳт бўлгани учун, Яҳудода баҳор рамзи ҳисобланарди. Худонинг “ҳушёр туриши” ҳам Унинг “ҳукми” рамзидир. Бундан англашиладики, Худо аҳдни бузган садоқатсиз халқини ҳукм қилишга тайёр турибди (Левилар 26:14-45, Қонунлар 28:15-68 га қаранг).

1:12 *Айтган сўзларим* — Левилар 26:14-45, Қонунлар 28:15-68 га қаранг.

1:15 *шимолдаги шоҳликларнинг барча халқлари* — Бобил ва унинг иттифоқдоши лашкарларига ишора (20:4-5, 39:1-3 га қаранг). Бобил шоҳлиги Яҳудо юртидан шарқда жойлашган эди, лекин Бобил лашкарлари Яҳудога шимол томондан ҳужум қиласди.

2:4 *Исройл* — шоҳ Сулаймоннинг вафотидан кейин Исройл халқи икки шоҳликка бўлиниб кетди (3 Шоҳлар 11:26-12:24 га қаранг). Шимолий шоҳлик “Исройл” деб, жанубий шоҳлик эса “Яҳудо” деб аталадиган бўлди. Милоддан олдинги 722 йилда Оссурияликлар шимолий шоҳликка ҳужум қилиб, уни батамом йўқ қилиб юбордилар. Еремиё даврида фақат жанубий шоҳлик, яъни Яҳудо қолган эди. Шу сабабдан мазкур оятда ва Еремиё китобининг кўп жойларида “Исройл” сўзи жанубий шоҳлик аҳолисига нисбатан қўлланилган. Бироқ айрим ҳолларда Еремиё бу сўзни собиқ шимолий шоҳликка нисбатан ёки иккала шоҳликка нисбатан ҳам ишлатган. Тўлиқроқ маълумотга эга бўлиш учун луғатдаги ИСРОИЛ ва ЯҲУДО сўзларига қаранг.

2:8 *Баал* — Канъондаги халқлар сажда қиласди ҳосилдорлик худоси бўлиб, эркак қиёфасида тасаввур қилинган. Тўлиқроқ маълумотга эга бўлиш учун луғатдаги БААЛ сўзига қаранг.

2:10 Кипр — ибронийча матнда *Киттим*, Кипрнинг қадимги номи.

2:10 Кедар — Арабистон саҳросидаги ерлар.

2:16 Нуф ва Тахпанхас — Мисрнинг икки шаҳри эди. Нуф Мемфис номи билан ҳам маълум. Мемфис шаҳри Миср шимолий ҳудудининг маркази бўлиб, Миср тарихида бирмунча вақт пойтахт ҳам бўлган эди.

2:16 ...Сочингни қириб ташладилар — улар Миср халқига қул бўлганларининг белгиси эди.

2:18 Нил — ибронийча матнда *Шихор*, Нил дарёсининг шарқий ирмоғи.

2:18 Оссурия — қадимги қудратли шоҳлик. Унинг пойтахти Найнаво шаҳри ҳозирги Ироқнинг шимолида жойлашган эди. Тўлиқроқ маълумотга эга бўлиш учун луғатдаги ОССУРИЯ сўзига қаранг.

2:18 Нил сувидан...Фурот сувидан ичиш учун — қўчма маънодаги гап бўлиб, Исроил халқи Миср ва Оссурия билан иттифоқ тузмоқчи бўлганига ишора қиласди. Улар Худога ишонмай ўша халқларнинг ёрдамига суюнган эдилар (яна шу бобнинг 13-оятига қаранг).

2:20 Ҳар бир баланд тепаликда...фоҳишадай ётдинг — Канъондаги халқларнинг удумига қўра, саждагоҳлар тепаликларда ёки серсоя дараҳтлар остида жойлашган эди. Ўша пайтларда бутпараст халқлар ўз саждагоҳларида диний вазифалардан бирини фаҳш орқали бажаардилар. Бутпараст халқларнинг удумларига қўра, одамлар фоҳишалар ва фоҳишлар билан жинсий алоқа қилиш орқали ўз худоларига топинардилар, худоларидан фаровонлик ато қилишни сўрадилар. Лекин Эгамиз Исроил халқига бу йўл билан сажда қилишни қатъиян ман этган (Қонунлар 23:17-18 га қаранг).

2:23 Водийда қилган ишларинг — Куддус шаҳридан жанубда жойлашган Хиннум сойлигига ишора. Одамлар у ерда худо Баал ва худо Мўлаҳга сифиниб, ҳатто ўз фарзандларини ҳам қурбонлик қилишарди (7:31-32, 19:1-6, 32:35 га қаранг).

2:27 ...ёғочга...Тошга... — халқ сифинган ва мадад кутган бутларга ишора.

3:1 Бундай бемаънгарчилик юртни ҳаром қилиб юбормайдими?! — Қонунлар 24:1-4 га қаранг.

3:2 Сен фоҳишалик қилмаган бирор жой қолдими?! — 2:20 га ва ўша оятнинг изоҳига қаранг.

3:6 Шоҳ Йўшиё даврида — 1:2 нинг иккинчи изоҳига қаранг.

3:6 Исроил — шимолий шоҳликнинг аҳолиси назарда тутилган (2:4 изоҳига қаранг).

3:6 ...у фоҳишалик қилди — 2:20 га ва ўша оятнинг изоҳига қаранг.

3:7-8 Мен садоқатсиз Исроилга талоқ хатини бериб, жўнатиб юбордим — Худо Исроил халқини жазолаганига ишора. Милоддан олдинги 722 йилда Оссурияликлар Исроилга, яъни шимолий шоҳликка ҳужум қилиб, пойтахти Самарияни забт этдилар. Сўнг Исроил халқининг аксарият қисмини Оссурияга сургун қилдилар (4 Шоҳлар 17:1-6 га қаранг). Шундай қилиб, шимолий шоҳлик барҳам топди.

3:14 Куддус — ибронийча матнда *Сион*. Эски Аҳддаги шеърий парчаларда ва пайғамбарлар битикларида Сион сўзи кўпинча Куддус шаҳрига ёки Худонинг халқига нисбатан ишлатилган. Тўлиқроқ маълумотга эга бўлиш учун луғатдаги СИОН сўзига қаранг.

3:16 Аҳд сандиғи — Худо йўз халқи орасида эканлигининг рамзи. Тўлиқроқ маълумотга эга бўлиш учун луғатдаги АҲД САНДИҒИ иборасига қаранг.

3:16 ...Менинг Аҳд сандиғим...янгисини ясашмайди — Бобилликлар милоддан олдинги 586 йилда Куддусни босиб олганларида Аҳд сандиғини йўқ қилиб юборган ёки ўзлари билан олиб кетган бўлишлари мумкин.

4:4 ...Юрагингизни суннат қилинг — суннат Худонинг Иброҳим ва унинг авлоди билан қилган аҳд белгиси эди (Ибтидо 17:9-14 га қаранг). Истроил халқи Худога бўлган садоқатини ва Унинг амрларига итоат қилиш истагини кўрсатиш учун суннат қилинардилар. Бу оятдаги “юрагингизни суннат қилинг” ибораси кўчма маънода ишлатилиб, тузилган аҳднинг ташқи белгиси бўлган жисмоний суннат етарли эмаслигини кўрсатади. Мазкур иборада Худога чин юракдан содик ва итоаткор бўлишга урғу берилади.

4:6 Қуддус — ибронийча матнда Сион (шу бобнинг 31-оятида ҳам бор). 3:14 изоҳига қаранг.

4:6 шимолдан — Бобил юрти назарда тутилган (1:15 га ва ўша оятнинг изоҳига қаранг).

4:8 ...Қанорга ўраниб олинглар — қанор дағал қорамтири мато бўлиб, эчки ёки тужунидан тўқилган. Қанорга ўраниб олиш умидсизликни ва қайғули ҳолатни ифодалайди. Кўпинча бу ҳаракат Худодан кечирим сўраб ибодат қилиш ва Ундан мадад тилаш билан биргаликда амалга оширилган.

4:11 гармсел — ҳосилга катта зиён келтирадиган иссиқ шамол. Бу ўринда мажозий маънода ишлатилиб, Худонинг ҳукмини билдиради.

4:15 ...Дан шаҳридан...Эфрайим қирларидан... — Дан шаҳри Эфрайим қирларидан шимолда жойлашган бўлиб, Истроил чегарасининг энг шимолий нуқтасини ташкил қиласади. Бобилликлар Куддусга ҳужум қилиш учун, даставвал Дан шаҳрини, сўнг Эфрайим қирларини босиб олишлари керак эди (шу бобнинг 6-оятига қаранг).

4:30 Ўйнашларинг — Яхудо халқининг иттифоқдошларига ишора.

4:31 Қиз — шаҳар ёки юрт аҳлига нисбатан қўлланган шеърий усул.

5:5 бойлар — ёки йўлбошлилар.

5:31 ўзларича — ёки уларга қўшилишиб.

6:1 Тахува шаҳри...Байт-Хакерем шаҳри... — Тахува шаҳри Қуддусдан қарийб 16 километр жанубда, Байт-Хакерем шаҳри З километр жанубда жойлашган эди. Шимол томондан бостириб келаётган Бобил қўшинлари аввал Куддусга, сўнг бу шаҳарларга ҳужум қилишлари керак эди. 1:15 га ва ўша оятнинг изоҳига қаранг.

6:2 Қиз — 4:31 изоҳига қаранг.

6:2 Қуддус — ибронийча матнда Сион (шу бобнинг 23-оятида ҳам бор). 3:14 изоҳига қаранг.

6:6 Дараҳтларини кесинглар... — кесилган дараҳтлардан қамал иншоотлари ва девортешар қуроллар ясалган (52:4 оятга ва 33:4 нинг изоҳига қаранг).

6:6 ...Қуддус деворига қиялатиб тупроқ уйинглар — қадимги даврларда душманлар девор билан ўралган шаҳарга ҳужум қилаётганларида, кўпинча деворга қиялатиб тупроқ уйганлар. Шу йўл билан улар шаҳарни ҳимоя қилаётган халқقا ҳужум қилиш учун деворни бузишга ёки ошиб ўтишга қулай имконият яратганлар.

6:10 қулоқлари ётиқ — ибронийча матндан сўзма-сўз таржимаси қулоқлари суннатсиз. Бу ибора “улар Худога қулоқ солишини ва итоат этишни истамайди” деган мажозий маънони ифодалайди (4:4 изоҳига қаранг).

6:17 қўриқчилар — Худо Ўз халқини огохлантириб, тавба қилишга ундаш учун юборган пайғамбарларга ишора.

6:20 Шава юрти — Арабистон ярим оролининг жануби-ғарб томонида бўлгани эҳтимолдан ҳоли эмас. Шава маликаси шоҳ Сулаймонга ҳадялар олиб келган эди (3 Шоҳлар 10:1-13 га қаранг).

6:22 шимолдаги юрт — Бобил назарда тутилган (1:15 га ва ўша оятнинг изоҳига қаранг).

6:26 Қанорга ўраниб, қулга белангин — қанор дағал қорамтири мато бўлиб, эчки ёки тuya жунидан тўқилган. Қанорга ўраниб олиш ва қулга беланиш умидсизликни ва қайғули ҳолатни ифодалайди. Кўпинча бу ҳаракат Худодан кечирим сўраб ибодат қилиш ва Ундан мадад тилаш билан биргаликда амалга оширилган.

7:10 уйим — яъни Маъбад (шу бобнинг 1-4-оятларига қаранг).

7:12 Шилў шаҳри — Қуддусдан қарийб 32 километр шимолда жойлашган. Ёшуа давридан тортиб Шомуил даврига қадар Муқаддас чодир ва Аҳд сандиғи Шилўда бўлган эди (Ёшуа 18:1, Ҳакамлар 18:31, 1 Шоҳлар 1:3, 4:3 га қаранг). Шомуил даврида Филистлар Аҳд сандиғини қўлга киритдилар (1 Шоҳлар 4:1-11 га қаранг). Археологик топилмаларнинг исботлашича, Филистлар Шилў шаҳрини вайрон қилганлар. Бу шаҳар Исроил халқининг сажда маркази бўлишига қарамай, Худо томонидан қаттиқ жазоланди, чунки Исроил халқи Худонинг амрларига риоя қилмаган эди (Забур 77:56-64 га қаранг).

7:15 Эфрайим — Эфрайим қабиласи Исроилнинг шимолий қисмидаги энг катта ва нуфузли қабила бўлгани боис, Эски Аҳднинг баъзи ўринларида Эфрайим деган ном Исроилга, яъни шимолий шоҳликка нисбатан ишлатилган. Бу шоҳликнинг пойтакти Самария эди. Тўлиқроқ маълумотга эга бўлиш учун луғатдаги ЭФРАЙИМ сўзига қаранг.

7:18 само қироличаси — Канъондаги халқлар сажда қилган ҳосилдорлик ва уруш худоси бўлган Аштарет назарда тутилган бўлиши мумкин. Аштарет аёл қиёфасида тасаввур қилинган.

7:21 ...куйдириладиган қурбонликларингизнинг гўштини ҳам ўзларингиз еяверинглар — қонунга кўра, рухонийлар ёки сажда қилувчилар деярли ҳамма қурбонликларнинг гўштини тановул қилишлари мумкин эди. Лекин куйдириладиган қурбонлик бутунлигича оловда куйдириларди. Халқ Худога итоат қилмагани учун қурбонликларнинг ҳеч қандай аҳамияти қолмаган эди. Худо қурбонликларнинг бефойда эканлигини ва уларни қабул қилмаслигини таъкидламоқчи бўлиб, киноя қилиб “куйдирилган қурбонликларингизнинг гўштини ҳам ўзларингиз еяверинглар” деб айтипти.

7:29 Сочингизни қириб ташланг — сочни олдириш умидсизликни ва қайғули ҳолатни ифодалайди.

7:31 Хинцум сойлиги — Қуддус шаҳридан жанубда жойлашган. Сойлик — икки адир оралиғидаги пастлик. Тўлиқроқ маълумотга эга бўлиш учун луғатдаги СОЙЛИК сўзига қаранг.

7:31 саждагоҳ — ибронийча матнда бамах, яъни “тепалик”. Канъон худоларига

топинадиган жойлар бамах деб аталаарди. Одатда бу саждагоҳлар тепаликларда жойлашган бўлиб, у ерда Канъон худоларининг тасвиirlари ва қурбонликлар келтириш учун қурбонгоҳ бўларди.

8:7 Каптар, қалдирғочу турналар — ибронийча матнда айтиб ўтилган бу қушлар қандай қуш эканлиги баҳсли.

8:16 ...душман Дан шаҳрига етиб келди... — 4:15 га ва ўша оятнинг изоҳига қаранг.

8:17 илонлар...заҳарли илонлар — душманлар назарда тутилган. Худо бу сўзлар орқали Исроил халқининг ота-боболарини қай тарзда жазолаганига, улар орасига заҳарли илонлар юборганига ишора қилмоқда (Саҳрода 21:4-6 га қаранг).

8:19 Куддус — ибронийча матнда *Сион*. 3:14 изоҳига қаранг.

8:22 Гилад — Иордан дарёсининг шарқ томонидаги бу ўлка доривор ўсимликлари билан машҳур эди (Ибтидо 37:25 га қаранг).

9:4 ёлғончи — ибронийча матнда бу сўз Ёқуб исмига оҳангдош. Исроил халқининг бобокалони Ёқуб ёшлигига акаси Эсовни алдаган эди (Ибтидо 27:36 га қаранг).

9:15 ...аччиқ ўт...заҳарли сув... — изтиробу аламга ишора қилаётган кўчма маънодаги ибора.

9:17 Йиғичи аёллар — қадимги Исроилда баъзан дафн маросимлари пайтида дод-фарёд қилиб, айтиб йиғлаш учун йиғичи аёллар ёлланарди.

9:19 Куддус — ибронийча матнда *Сион*. 3:14 изоҳига қаранг.

9:25 юраги суннат қилинмаган одамлар — яъни Худога чин юракдан садоқатли ва итоаткор бўлмаган одамлар (4:4 изоҳига қаранг).

9:26 ...сочини олдириб юрадиган... — бу одат бутпараст халқларга хос эди. Худо Исроил халқига сочни олдиришни қатъиян ман этганди (Левилар 19:27 га қаранг).

9:26 ...Мисрликларни...чўл қабилаларининг ҳаммасини... — оятда қайд этилган бу халқларнинг ҳаммаси Яхудо халқига қўшни бўлиб, улар сингари суннат қилинарди. Бироқ барҳаёт Худога сажда қилишмасди.

10:8 Донишманларию шоҳлари... — ёки *Халқлар....* Ибронийча матнда *Улар....*

10:11 Асл матнда бу оят иброний тилида эмас, орамий тилида ёзилган.

10:22 шимолдан — Бобил юрти назарда тутилган (1:15 га ва ўша оятнинг изоҳига қаранг).

11:5 сут ва асал оқиб ётган юрт — ниҳоятда ҳосилдор ерни билдирувчи ибора. Мўл-кўл сут — мол учун кўм-кўк яйловларнинг кўплигини билдиради. Асал — хурмодан олинадиган қуюқ, ширин мураббога ишора бўлиши мумкин. Мураббонинг мўллиги яхши ҳосил берадиган ерни билдиради.

11:10 Исроил халқи — шимолий шоҳликнинг аҳолиси назарда тутилган (2:4 изоҳига қаранг).

11:21 Ономёт — Еремиёнинг она шаҳри (1:1 га қаранг).

12:4 “Бизга нима бўлишини Еремиё қаердан ҳам биларди?!” — ибронийча матндан сўзма-сўз таржимаси “Бизга нима бўлишини у билмайди.” Қадимий юончча таржимада “Биз нима қилаётганимизни Худо қўрмаяпти.”

12:5 ...Иордан бўйидаги чакалакзорда... — қадимги пайтларда Иордан дарёси бўйидаги чакалакзорларда шерлар яшарди.

13:4 Поро анҳори — Куддусдан қарийб 10 километр ва Еремиёнинг она шаҳри Онотўтдан қарийб 5 километр шимоли-шарқда жойлашган. Ибронийча матнда бу ўриндаги ном *Перот* бўлиб, одатда Фурот дарёси маъносини ифодалайди. Бироқ Фурот дарёси Онотўт шаҳридан таҳминан 1000 километр узоқлиқда жойлашгани учун, бу оятда Фурот дарёси назарда тутилмаган бўлса керак (шу бобнинг 5-7-оятларида ҳам ишлатилган). Эҳтимол, ушбу оятда Поро анҳори — Фурот дарёсининг рамзи. Фурот дарёси Яхудо халқи келажақда сургун қилинадиган Бобил юртида эди.

13:13 маст — бу ўринда шароб Худо ғазабининг рамзи бўлиб, шаробдан маст бўлиш Худонинг ҳукмига дучор бўлишни билдиради (25:15-29 га ва Ишаё 51:17-23 га қаранг).

13:18 Шоҳга ва она маликага... — Ёҳайихин ва унинг онаси Нахушта назарда тутилган (4 Шоҳлар 24:8, 12 га қаранг). Одатда шоҳнинг онаси саройда юқори мартабага эга бўлган.

13:23 Ҳабашистонлик — ибронийча матнда *Кушлик*. Куш деган жой Мисрдан жанубда бўлиб, ҳозирги Судан ва Эфиопия мамлакатларининг бир қисмини ўз ичига олган эди.

13:24-25 Гармсел — иссиқ шамол.

13:27 ...фоҳишабозлигинизнинг гувоҳи бўлдим — 2:20, 3:2, 6 оятларга ва 2:20 изоҳига қаранг.

14:18 Пайғамбару руҳонийлар...бемаъни маслаҳатлар бериб юрибдилар — 2:8, 5:13, 6:13, 8:10 га ва шу бобнинг 13-15-оятларига қаранг.

14:19 Қуддус — ибронийча матнда *Сион*. 3:14 изоҳига қаранг.

15:4 Манаше... қўп қабиҳликлар қилган эди — 4 Шоҳлар 21:1-16 га қаранг. Манаше милоддан олдинги 687-642 йилларда ҳукмронлик қилган.

15:12 шимолдан — Бобил юрти назарда тутилган (1:15 га ва ўша оятнинг изоҳига қаранг).

16:6 ...баданини тилмайди, сочини олдирмайди... — бу одатлар Канъон юртида яшаган бутпараст халқларга хос эди (мисол учун, 3 Шоҳлар 18:28 га қаранг). Худо Исроил халқига бундай қилишни қатъиян ман этган эди (Левилар 19:27-28, Қонунлар 14:1 га қаранг). Шунга қарамай, улар баъзан бутпарастларнинг бу одатларига риоя қилишарди (41:5 га қаранг).

16:15 шимолдаги юрт — Бобил назарда тутилган (1:15 га ва ўша оятнинг изоҳига қаранг).

17:1 Сизларнинг гуноҳингиз...қурбонгоҳларингиз шоҳларига...ўйиб битилган — одамлар Канъон халқларининг худоларига топинган жойларда қурбонгоҳлар одатда тошдан ясалган. Ўша қурбонгоҳларнинг тўртала бурчагининг учи ҳайвон шохи шаклида ясалган эди ва қурбонликларнинг қони ўша шоҳларга суриларди. Одамлар Қуддусда Худога сажда қилганларида ҳам Маъбаддаги бронза қурбонгоҳ шоҳларига қурбонлик қонини суртишарди. Бу маросим халқнинг гуноҳлари ювилганини билдиради (Левилар 16:18-19 га қаранг). Бу ўринда Исроил халқи бегона худоларга сажда қилиб, ўша ердаги қурбонгоҳларига қон сургани уларнинг гуноҳи ювилганини эмас, аксинча Худонинг назарида абадий муҳр бўлиб қолгани ҳақида гап кетяпти.

17:2 Ашера — Канъондаги халқлар сажда қилган ҳосилдорлик худоси бўлиб, аёл

қиёфасида тасаввур қилинган. Унинг эркак жуфти Баал эди. Ашеранинг тасвиirlари баланд устун шаклида бўлиб, ёғочдан ясалган эди.

17:3 Ўз тоғим — Куддусдаги Сион тоғига ишора. Куддусдаги Маъбад қурилган тепалик Сион тоғи деб аталган. Эски Аҳддаги шеърий парчаларда ва пайғамбарлар битикларида Сион сўзи кўпинча Қуддус шаҳрига ёки Худонинг халқига нисбатан ишлатилган. Тўлиқроқ маълумотга эга бўлиш учун луғатдаги СИОН сўзига қаранг.

17:3 саждагоҳ — ибронийча матнда *бамах*, яъни “тепалик”. 7:31 нинг иккинчи изоҳига қаранг.

19:2 Хиннум сойлиги — 7:31 нинг биринчи изоҳига қаранг.

19:5 саждагоҳ — ибронийча матнда *бамах*, яъни “тепалик”. 7:31 нинг иккинчи изоҳига қаранг.

19:7 ...барбод қиламан — ибронийча матнда ишлатилган бу феъл “кўза” сўзи билан бир ўзакка эга (шу бобнинг 1-оятига қаранг). Бу феъл бўшатаман деган маънони ҳам билдиради. Бу вазиятда Еремиё кўзадаги сувни тўкиб, уни бўшатган бўлиши мумкин. Эҳтимол, бу ҳаракати орқали у халқнинг ўзини ҳимоя қилиш тўғрисидаги режалари пуч эканлигига, Қуддус барибир мағлубиятга учрашига рамзий маънода ишора қилган (яна шу бобнинг 10-оятига қаранг).

20:2 Эгамиз уйининг ҳовлисидаги Юқори Бенямин дарвозаси — Маъбаднинг ички ҳовлисига олиб борадиган бу дарвоза Бенямин қабиласи жойлашган томонга — шимолга қаратиб қурилган эди. Бу дарвоза тепалиқда жойлашгани учун “Юқори” деб ном олган (4 Шоҳлар 15:35, Ҳизқиёл 9:2 га қаранг). Шаҳар деворининг шимол томонидаги яна бир дарвоза “Бенямин дарвозаси” деб аталарди (37:11-13 га қаранг).

20:3 «Даҳшат қамраган» — ибронийча матнда «*Магўрмисабиб*», маъноси *даҳшат қамраган*.

20:16 Эгамиз шафқатсизларча вайрон қилган Шаҳарлар — Садўм ва Ғамўрага ишора (Ибитдо 18:16-19:28 га қаранг).

21:1 Зидқиё — 1:3 нинг иккинчи изоҳига қаранг.

21:2 Навухадназар — милоддан олдинги 605-562 йилларда Бобилда ҳукмронлик қилган. Милоддан олдинги 586 йилда у Қуддусни вайрон қилиб, аҳолининг асосий қисмини Бобилга сургун қилган эди (4 Шоҳлар 25:1-21 га қаранг).

21:4 Бобилликлар — ибронийча матнда *Халдейлар*, ўша вақтда Бобилликлар шу ном билан ҳам аталарди (шу бобнинг 9-оятида ҳам бор).

21:14 Шоҳнинг саройи — ибронийча матндан сўзма-сўз таржимаси *Ўрмонингиз*, шоҳ саройининг энг катта хонасига ишора. Бу хона Лубонон тоғларидан келтирилган садр дараҳтидан қурилгани учун “Лубонон ўрмони” деб ном олган эди (3 Шоҳлар 7:1-3 га қаранг).

22:5 ...Ўз номим ҳақи онт ичиб... — қадимги Яқин Шарқда одамлар айтган гапини тасдиқлаш учун, ўзларидан буюкроқ зот номини ёки нарсани ўртага қўйиб қасам ичишар эди. Худо борлиқдаги энг буюк Зот бўлгани учун, У айтган сўзининг қатъий эканлигини қўрсатиш мақсадида Ўз номини ўртага қўйиб қасам ичди.

22:6 Гилад ўлкаси — Иордан дарёсининг шарқ томонида жойлашган.

22:10 Ўлган шоҳингиз — Яхудо шоҳи Йўшиё назарда тутилган. Йўшиё милоддан олдинги 640-609 йилларда ҳукмронлик қилган.

22:10 *сургун бўлган шаҳзодангиз* — шоҳ Ёхухоз назарда тутилган. Шоҳ Ёхухоз отаси Йўшиёнинг вафотидан сўнг милоддан олдинги 609 йилда тахтга ўтириб, 3 ойгина хукмронлик қилган. Сўнг фиръавн Нехо томонидан Мисрга сургун қилинган (4 Шоҳлар 23:31-34 га қаранг).

22:11 *Ёхухоз* — ибронийча матнда *Шаллум*, Ёхухознинг яна бир исми (4 Шоҳлар 23:30 га қаранг).

22:13 *Үйини ноҳақлик билан қурган* — Яхудо шоҳи Ёҳайиқим назарда тутилган (шу бобнинг 18-оятига қаранг). Акаси Ёхухоз сургун қилингандан кейин, Ёҳайиқим тахтга ўтириб, милоддан олдинги 609-598 йилларда хукмронлик қилган.

22:20 ...*Лубнон...Башан ўлкаси...Аборим тоғлари...* — Lubnon тоғлари Қуддусдан шимолда, Башан ўлкаси шимоли-шарқда, Аборим тоғлари жанубда — Мўаб юртида жойлашган.

22:20 *ўйнашларинг* — Яхудо халқининг иттифоқдошларига ишора.

22:23 «*Лубнон» саройи* — 21:14 га ва ўша оятнинг изоҳига қаранг.

22:24 *Ёҳайихин* — ибронийча матнда *Хониё*, Ёҳайихиннинг яна бир исми (шу бобнинг 28-оятида ҳам бор). Ёҳайихин милоддан олдинги 598 йилда уч ой давомида Яхудода хукмронлик қилган.

22:25 *Навуҳадназар* — милоддан олдинги 605-562 йилларда Бобилда хукмронлик қилган. У милоддан олдинги 598 йилда у Қуддусни қамал қилиб, Ёҳайихинни Бобилга сургун қилган. Ёҳайихин Бобилда вафот этди. 4 Шоҳлар 24:10-17, 25:27-30 га қаранг.

22:25 *Бобилликлар* — ибронийча матнда *Халдейлар*, ўша вақтда Бобилликлар шу ном билан ҳам аталарди.

22:26 *онанг* — 13:18 изоҳига қаранг.

23:8 *шимолдаги юрт* — Бобил назарда тутилган (1:15 га ва ўша оятнинг изоҳига қаранг).

23:10 *Лаънат* — Худо берган жазога ишора. Одамлар Худонинг аҳдига содик қолмаганлари учун бутун халқ ва улар яшаган юрт лаънатланган эди (Қонунлар 29:18-21 га қаранг).

23:14 ...*Садўм...Ғамўра...* — аҳолисининг ўта бузуқлиги оқибатида Эгамиз вайрон қилган иккита шаҳар (Ибитдо 18:16-19:28 га қаранг).

23:15 ...*аччиқ ўт...заҳарли сув...* — изтиробу аламга ишора қилаётган кўчма маънодаги ибора.

23:18 *Эгамизнинг кенгаши* — Худонинг тахти атрофида самовий мавжудотлар ийғилгани ҳақида Эски Аҳдда бир неча марта сўз юритилган (мисол учун, Аюб 1:6-12, 2:1-6, 3 Шоҳлар 22:19-22, Забур 81:1, 88:8 ва Ишаё 6:1-8 га қаранг).

23:33 ...*Эгамиз бизга нима юкламоқчи?* — ибронийча матндан сўзма-сўз таржимаси ...*Эгамизнинг юки нима?* Бу ўриндаги ибронийча сўз “юк” ёки “Эгамизнинг сўзи” маъносини ифодалаши мумкин. Еремиё бу сўздан моҳирона фойдаланиб, Яхудо халқини койииди, улар Эгамизнинг сўзини юк деб билганлари учун уларни уришади. Яхудо халқи Худога итоат қилишни истамай, Унинг сўзларини оғриниб эшитади. Сохта пайғамбарларнинг тилёғламалик билан айтган гапларини эса жон қулоқлари билан эшитишади.

23:33 *Сизлар...юк бўлдингизлар* — қадимий юнонча ва лотинча таржималардан.

Ибронийча матнда Қандай юк?

23:39 *Мен сизларни юк құттарғандай құтариб...* — баъзи иброний қүләзмаларидан, қадимий юнонча, сурёнийча ва лотинча таржималардан. Ибронийча матнда *Мен сизларни унутыб юбораман....*

24:1 *Навуходназар* — 22:25 нинг биринчи изоҳига қаранг.

24:1 *Ёҳайихин* — ибронийча матнда *Ёхониё*, *Ёҳайихиннинг яна бир исми* (22:24 изоҳига қаранг).

24:5 *Бобилликлар* — ибронийча матнда *Халдейлар*, ўша вақтда Бобилликлар шу ном билан ҳам аталарди.

24:8 *Зидқиё* — 1:3 нинг иккинчи изоҳига қаранг.

25:1 *Ёҳайиқум ҳукмронлигининг тўртинчи йили* — милоддан олдинги 605 йил (1:3 нинг биринчи изоҳига қаранг).

25:3 *Йўшиё Яхудода ҳукмронлик қилган даврнинг ўн учинчи йили* — милоддан олдинги 627 йил (1:2 нинг иккинчи изоҳига қаранг).

25:12 *Бобилликлар* — ибронийча матнда *Халдейлар*, ўша вақтда Бобилликлар шу ном билан ҳам аталарди.

25:17 *шароб* — бу ўринда Худо ғазабининг рамзи бўлиб, шаробдан маст бўлиш Худонинг ҳукмига дучор бўлишни билдиради (шу бобнинг 27-оятига қаранг).

25:20 *талафот қўрган Ашдод* — узоқ қамалдан кейин Ашдод шахри Мисрликларга мағлуб бўлди.

25:23 *Дедон, Темо, Буз* — Арабистон ярим оролидаги шаҳарлар.

25:23 ...*сочини олдириб юрадиган...* — 9:26 нинг биринчи изоҳига қаранг.

25:26 *Бобил* — ибронийча матнда *Шашах*, Бобилга нисбатан ишлатилган яна бир ном.

25:30 *Узум эзувчилар каби...* — қадимги пайтларда одамлар узумни қоятошга ўйилган чуқурга ёки тупроқдан қазилган, тубига ва атрофига зич қилиб тош терилган чуқурга солиб, шарбатини сиқиб олиш учун оёқлари билан эзардилар. Шарбат ўша чуқурдан яна бошқа бир чуқурга оқиб тушарди. Узум эзиш Муқаддас Китобда кўпинча Худонинг одамлар устидан чиқарадиган ҳукмига нисбатан кўчма маънода ишлатилган.

25:34 ...*кулга беланинглар* — кулга беланиш умидсизликни ва қайғули ҳолатни ифодалайди. Кўпинча бу ҳаракат Худодан кечирим сўраб ибодат қилиш ва Ундан мадад тилаш билан биргаликда амалга оширилган.

26:1 *Ёҳайиқимнинг Яхудодаги илк ҳукмронлиги даври* — милоддан олдинги 609 йил (1:3 нинг биринчи изоҳига қаранг).

26:6 *Шилў* — 7:12 изоҳига қаранг.

26:10 ...*Янги дарвозанинг кираверишидаги курсиларга ўтиридилар* — қадимги пайтларда суд кенгashi кўпинча шаҳар, сарой ёки маъбад дарвозаси олдидағи очиқ майдонда ўтказиларди.

26:18 *Яхудо шоҳи Ҳизқиё даври* — милоддан олдинги 716-687 йиллар.

26:18 ...*Михо...шундай деб айтган эди...* — Михо 3:12 га қаранг.

26:18 *Эгамизнинг уйи турган төғ* — Куддусдаги Сион тоғига ишора. 17:3 нинг биринчи изоҳига қаранг.

27:1 Зидқиё — баъзи иброний қўлёзмаларидан ва қадимий сурёнийча таржимадан (яна шу бобнинг 3, 12-оятларига ва 28:1 га қаранг). Ибронийча матнда Ёҳайиқум (Зидқиёнинг акаси).

27:1 Зидқиё Яхудода ҳукмронлигининг ilk даври — милоддан олдинги 593 йил (28:1 га ва ўша оятнинг изоҳига қаранг).

27:6 Навуходназар — 21:2 изоҳига қаранг.

27:7 Навуходназарнинг шоҳлиги қулагунча... — милоддан олдинги 539 йилда Мидия ва Форс лашкарлари шоҳ Куруш бошчилигига Бобил шаҳрини босиб олишиди.

27:19-21 Навуходназар — 22:25 нинг биринчи изоҳига қаранг.

27:19-21 Ёҳайихин — ибронийча матнда Ёҳониё, Ёҳайихиннинг яна бир исми (22:24 изоҳига қаранг).

27:22 ...ашёларнинг ҳаммаси Бобилга олиб кетилади — 4 Шоҳлар 25:13-15 га қаранг.

28:1 ...Яхудо шоҳи Зидқиё ҳукмронлигининг...тўртинчи йили бешинчи ойи... — милоддан олдинги 593 йилнинг бешинчи ойи (1:3 нинг иккинчи изоҳига қаранг). Иброний календарининг Ав ойи назарда тутилган. Ҳозирги календарга кўра, бу ой тахминан июлнинг ўртасидан бошланади.

28:3 Навуходназар — 21:2 изоҳига қаранг.

28:4 Ёҳайихин — ибронийча матнда Ёҳониё, Ёҳайихиннинг яна бир исми (22:24 изоҳига қаранг).

28:4 ...Бобилга сургун бўлган...ҳамма асирлар... — 22:25 нинг биринчи изоҳига қаранг.

28:9 ...пайғамбарнинг башорати бажо бўлганидан кейингина... — Қонунлар 18:21-22 га қаранг.

28:17 Ўша йилнинг еттинчи ойи — 28:1 га ва ўша оятнинг изоҳига қаранг.

29:1 Навуходназар — 22:25 нинг биринчи изоҳига қаранг.

29:2 Ёҳайихин — ибронийча матнда Ёҳониё, Ёҳайихиннинг яна бир исми (22:24 изоҳига қаранг).

29:3 Зидқиё — 1:3 нинг иккинчи изоҳига қаранг.

29:14 Мен сизларни яна фаровонликка эришираман — ёки Мен сизларни асирликдан озод қилиб, Қуддусга қайтариб олиб келаман.

30:2 ўрама қоғоз — папирус ёки ошланган теридан қилинган узун ўралган қоғоз. Қадимги пайтларда китоблар одатда ўрама қоғоз шаклида бўлган.

30:3 ...Мен халқим Исроилни ва Яхудони яна фаровонликка эришираман — ёки ...Мен халқим Исроилни ва Яхудони асирликдан озод қилиб, Қуддусга қайтариб олиб келаман.

30:10 ...Ёқуб...Исройл... — Худонинг халқи, яъни шимолий ва жанубий шоҳликларнинг жамики аҳолиси назарда тутилган (2:4 изоҳига қаранг).

30:14 ўйнашларинг — Исройл халқининг иттифоқдошларига ишора.

30:17 Қуддус — ибронийча матнда Сион. 3:14 изоҳига қаранг.

31:6 Эфрайим — 7:15 изоҳига қаранг.

31:6 Қуддус — ибронийча матнда Сион (шу бобнинг 12-оятида ҳам бор). 3:14

изоҳига қаранг.

31:15 Рама шаҳри — Қуддусдан қарийб 8 километр шимолда жойлашган. Роҳиланинг мақбараси Рама шаҳрининг яқинида, Зилзах деган ерда жойлашган (1 Шоҳлар 10:2 га қаранг).

31:15 Болалари учун ииғлар Роҳила... — мажозий маънодаги бу ибора Истроил учун, яъни шимолий шоҳлик учун тутилган азани билдиради, чунки милоддан олдинги 722 йилда Оссурияликлар Истроилга хужум қилиб, аҳолисини сургун қилган эдилар. Шимолий шоҳликнинг иккита асосий қабиласи — Эфрайим ва Манаше қабилалари Роҳиланинг ўғли Юсуфдан келиб чиққан эди.

31:21 бокира қиз — 4:31 изоҳига қаранг.

31:22 ...Истроил Ўз Ҳудосига чирмасиб олади — ибронийча матндан сўзма-сўз таржимаси ...аёл эркакни қуршаб олади. Бу мажозий иборанинг маъноси қуидагича бўлиши мумкин: Худонинг халқи тўғри йўлга қайтиб, Худога содик бўлади.

31:23 Мен халқимни яна фаровонликка эриштираман — ёки **Мен халқимни асирийлардан озод қилиб, она юргига қайтариб олиб келаман.**

31:23 муқаддас тоғ — Қуддусдаги Сион тоғига ишора. 17:3 нинг биринчи изоҳига қаранг.

31:26 ...одамлар мириқиб ухлаб, кучга тўлиб уйғонадилар — ибронийча матндан сўзма-сўз таржимаси ...**Мен уйғониб, атрофимга разм солдим. Менинг уйқум ширин бўлган экан.** Бу гап мазкур бобнинг 23-оятида тилга олинган одамларнинг гапи бўлиши мумкин. Бу оят равон ўқилиши учун шу одамларнинг она ютидаги фаровон ҳаётини тасвирловчи гап сифатида таржима қилинган.

31:32 хўжайин — ёки эр.

31:37 Замин пойдевори — қадимда Истроил халқининг тасаввурига кўра, ер теп-текис бўлиб, ер остида буюк денгиз бор эди, денгиз тубида ўрнатилган улкан устунлар ерни ушлаб турарди. Бу устунлар денгиз тубидаги пойдеворга таянарди.

31:38 Ханонил минораси — мазкур минора ва шу бобнинг 38-40-оятларида айтиб ўтилган барча жойлар Қуддус шаҳрининг чегараси бўйлаб жойлашган эди.

31:40 Хиннум сойлиги — 7:31-34 оятларга ва 7:31 нинг биринчи изоҳига қаранг.

32:1 Зидқиё ҳукмронлигининг ўнинчи йили — милоддан олдинги 586 йил (1:3 нинг иккинчи изоҳига қаранг).

32:1 Навуҳадназар — 21:2 изоҳига қаранг.

32:4 Бобилликлар — ибронийча матнда **Халдейлар**, ўша вақтда Бобилликлар шу ном билан ҳам аталарди (шу бобнинг 5, 24, 25, 28, 29, 43-оятларида ҳам бор).

32:7 ...даламни сотиб олиш ҳуқуқига эгасан... — Левилар 25:25 га қаранг.

32:9 43 мисқол — ибронийча матнда **17 шақал**, тахминан 195 граммга тўғри келади.

32:10 ...уни муҳрладим... — васиқа ўралиб, очилмаслиги учун сурғуч билан тамға босиларди.

32:18 ...минглаб авлодларга... — ёки ...мингинчи авлодга... ёхуд ...мингларга....

32:22 сут ва асал оқиб ётган юрт — 11:5 изоҳига қаранг.

32:24 ...шаҳар деворига қиялатиб тупроқ уйяптилар — 6:6 нинг иккинчи изоҳига қаранг.

32:35 Хиннум сойлиги — 7:31 нинг биринчи изоҳига қаранг.

32:35 саждагоҳ — ибронийча матнда бамах, яъни “тепалик”. 7:31 нинг иккинчи изоҳига қаранг.

32:35 ...ўғил-қизларини Мўлахга қурбонлик қилиб, оловда қуидирдилар — ибронийча матндан сўзма-сўз таржимаси ...ўғил-қизларини Мўлахга (оловдан) ўтказдилар. Бутпараст халқларга хос бўлган бу жирканч одат Худонинг назарида ўтакетган қабиҳлик эди.

32:44 ...Мен халқимни яна фаровонликка эришираман — ёки ...Мен халқимни асирикдан озод қилиб, она юртига қайтариб олиб келаман.

33:4 қамал иншоотлари — қадимги даврларда душманлар девор билан ўралган шаҳарга хужум қилаётганларида, кўпинча девор ёнига баланд қурилмалар ясаганлар. Шу йўл билан улар шаҳарни ҳимоя қилаётган халққа хужум қилиш учун деворни бузишга ёки ошиб ўтишга қулай имконият яратганлар.

33:5 Бобилликлар — ибронийча матнда Халдейлар, ўша вақтда Бобилликлар шу ном билан ҳам аталарди.

33:7 Мен Яхудо ва Исроил халқларини яна фаровонликка эришираман... — ёки Мен Яхудо ва Исроил халқларини асирикдан озод қилиб, она юртига қайтариб олиб келаман... (шу бобнинг 26-оятида ҳам бор).

33:14 Исроил — шимолий шоҳликнинг аҳолиси назарда тутилган (2:4 изоҳига қаранг).

33:15 солиҳ бир новда — Довуд наслидан келиб чиқадиган шоҳга ишора.

34:1 Навуҳадназар — 21:2 изоҳига қаранг.

34:2 Зидқиё — 1:3 нинг иккинчи изоҳига қаранг.

34:5 ...ўтган шоҳларни қандай дағиң қилишган бўлса, уларнинг шарафига қандай гулхан ёқишган бўлса... — 2 Солномалар 16:14, 21:19 га қаранг.

34:11 Кейинчалик — Мисрликларнинг лашкари Қуддусга яқинлашгани сабабли Бобилликлар Қуддус қамалини вақтинчалик тўхтатган эдилар (шу бобнинг 21-22-оятларига ва 37:5-8 га қаранг). “Кейинчалик” сўзи ўша пайтга ишора қиласди.

34:13 ...шундай деган эдим... — Қонунлар 15:12 га қаранг.

34:18 ...бузоқни икки қисмга бўлиб, икки бўлаги орасидан ўтган эдилар — бузоқнинг бўлакланиши бирор кишининг онт ичиб, ваъда беришга алоқадор бўлган урф-одат бўлса керак. Иккига бўлинган бузоқнинг орасидан ўтадиган одам: “Агар ўз ваъдамда турмасам, мен ҳам мана шу бузоқдай бўлакланай”, деб онт ичаётгандай бўлади.

34:21 Вақтинчалик чекинган Бобил шоҳининг лашкари — 37:5-8 га қаранг.

35:1 Ёҳайиқум — 1:3 нинг биринчи изоҳига қаранг.

35:6 Ёхунадав — ибронийча матнда бу исмнинг бошқа варианти Ёнадав (шу бобнинг 10, 19-оятларида ҳам бор).

35:11 Навуҳадназар — 22:25 нинг биринчи изоҳига қаранг.

35:11 Бобил — ибронийча матнда Халдей, ўша вақтда Бобил юрти шу ном билан

ҳам аталарди.

36:1 Ёхайиқум ҳукмронлигининг тўртинчи йили — милоддан олдинги 605 йил (1:3 нинг биринчи изоҳига қаранг).

36:2 Ўрама қоғоз — 30:2 изоҳига қаранг.

36:2 Йўшиё даври — 1:2 нинг иккинчи изоҳига қаранг.

36:9 Ёхайиқум ҳукмронлигининг бешинчи йили тўққизинчи ойи — милоддан олдинги 604 йилнинг тўққизинчи ойи (шу бобнинг 1-оятига ва ўша оятнинг изоҳига қаранг). Иброний календарининг Хислав ойи назарда тутилган. Ҳозирги календарга кўра, бу ой тахминан ноябрнинг ўртасидан бошланади.

36:22 Кеч куз — ибронийча матндан сўзма-сўз таржимаси Тўққизинчи ой, яъни ноябрь ойи (шу бобнинг 9-оятига қаранг).

36:24 ...қайғудан кийимларини йиртмадилар — кийимларни йиртиш умидсизликни ва қайғули ҳолатни ифодалайди. Аммо бу вазиятда шоҳ ва унинг аъёнлари Худога итоатсизлик қилганлари учун ҳеч қандай афсус чекмаган эдилар, шунинг учун кийимларини йиртмадилар.

36:30 Сенинг авлодингдан биронтаси ҳам Довуд таҳтида ўтирмаиди — шоҳ Ёхайиқимнинг ўғли Ёхайихин уч ойгина ҳукмронлик қилди, сўнг Бобилга сургун қилинди (4 Шоҳлар 24:8-17 га қаранг).

37:1 Навухадназар — 22:25 нинг биринчи изоҳига қаранг.

37:1 Зидқиё — 1:3 нинг иккинчи изоҳига қаранг.

37:1 Ёхайихин — ибронийча матнда Хониё, Ёхайихиннинг яна бир исми. Ёхайихин милоддан олдинги 598 йилда уч ой давомида Яхудода ҳукмронлик қилган.

37:5 ...фиръавн лашкари Мисрдан чиқди — фиръавн Хофранинг лашкарига ишора. У шоҳ Зидқиёнинг иттифоқдоши бўлиб, ёрдамга келаётган эди. Хофра яна Априй исми билан танилган, у милоддан олдинги 589-570 йилларда Мисрда ҳукмронлик қилган. Кейинчалик рақиблари Мисрда унга суиқасд уюштириб, уни ўлдирдилар (44:30 га қаранг).

37:5 Бобилликлар — ибронийча матнда Халдейлар, ўша вақтда Бобилликлар шу ном билан ҳам аталарди (шу бобнинг 8, 9, 10, 11, 13, 14-оятларида ҳам бор).

37:12 Бенямин ҳудуди — Еремиё Бенямин ҳудудидаги Онотўт шаҳридан эди (1:1 га қаранг). У ўз мулки билан боғлиқ бўлган масала бўйича у ерга кетаётган эди (32:6-8 га қаранг).

38:1 Ёхухал — ибронийча матнда бу номнинг бошқа варианти Юхал. Унинг Ёхухал деган шакли 37:3 дан олинган.

38:2 Бобилликлар — ибронийча матнда Халдейлар, ўша вақтда Бобилликлар шу ном билан ҳам аталарди (шу бобнинг 18, 19, 23-оятларида ҳам бор).

38:7 Ҳабашистонлик — ибронийча матнда Кушлик (шу бобнинг 10-оятида ҳам бор). 13:23 изоҳига қаранг.

38:7 Бенямин дарвозасидаги маҳкама — 26:10 изоҳига қаранг.

38:14 Зидқиё — 1:3 нинг иккинчи изоҳига қаранг.

38:14 Эгамиз Маъбадининг учинчи кириши — 4 Шоҳлар 16:17-18 да айтиб ўтилган шоҳнинг шахсий ўйлагига ишора бўлса керак. Маъбаднинг бу кириш жойидан фақат шоҳнинг ўзи фойдаланган. Бу кириш жой ҳақида Муқаддас Китобда бошқа ҳеч нарса ёзилмаган.

38:28 Еремиё Қуддус қулаган кунга қадар соқчилар ҳовлисіда қолди — баъзи иброний қўлёзмаларидан, қадимий юонча ва сурёнийча таржималардан. Ибронийча матнда қуйидаги гап қўшилган: Қуддус қулаганда шу воқеалар юз берди.

39:1 Зидқиё ҳукмронлигининг тўққизинчи йили ўнинчи ойи — милоддан олдинги 589 йилнинг ўнинчи ойи (1:3 нинг иккинчи изоҳига қаранг). Иброний календарининг Табат ойи назарда тутилган. Ҳозирги календарга кўра, бу ой тахминан декабрнинг ўртасидан бошланади.

39:1 Навуходназар — милоддан олдинги 605-562 йилларда Бобилда ҳукмронлик қилган.

39:2 Зидқиё ҳукмронлигининг ўн биринчи йили тўртинчи ойи — милоддан олдинги 586 йилнинг тўртинчи ойи (шу бобнинг 1-оятига ва ўша оятнинг биринчи изоҳига қаранг). Иброний календарининг Таммуз ойи назарда тутилган. Ҳозирги календарга кўра, бу ой тахминан июннинг ўртасидан бошланади.

39:3 ...шаҳарнинг Ўрта дарвозасидаги маҳкамаларда қўмондонлик қароргоҳини жойлаштирилар — ибронийча матндан сўзма-сўз таржимаси ...шаҳарнинг Ўрта дарвозасида ўтиришиди. Қадимги пайтларда шаҳар дарвозаси савдо-сотик, ижтимоий ва ҳуқуқий масалаларни ҳал қилиш учун одамлар йифиладиган жой эди.

39:3 ...Наргал-Шаразар, Самгарнаву, бош маслаҳатчи Сарсаҳим... — ёки ...Самгарлик Наргал-Шаразар, бош маслаҳатчи Навусарсаҳим....

39:4 Иордан водийси — ибронийча матнда Араба. Араба умумий географик ном бўлиб, бу оятда Иордан водийсига нисбатан ишлатилган. Шоҳ ўз лашкари билан Иордан дарёсидан кечиб ўтиб, эҳтимол, Мўаб ва Оммон юргига қочмоқчи бўлган.

39:5 Бобил — ибронийча матнда Халдей, ўша вақтда Бобил юрти шу ном билан ҳам аталарди.

39:5 Ривло шаҳри — бу шаҳар Оронтес дарёси бўйида, ҳозирги Сурия худудида жойлашган эди.

39:8 Бобилликлар — ибронийча матнда Халдейлар, ўша вақтда Бобилликлар шу ном билан ҳам аталарди.

39:16 Ҳабаистонлик — ибронийча матнда Кушлик. 13:23 изоҳига қаранг.

39:16 Обидмалек — 38:7-13 га қаранг.

40:1 Рама шаҳри — 31:15 нинг биринчи изоҳига қаранг.

40:5 Бу юртда қоладиган бўлсанг... — ёки Еремиё қайрилиб кетмасидан олдин, Набизарадон шундай деди... ёхуд Еремиё жавоб бермасидан олдин, Набизарадон яна шундай деди....

40:6 Миспах шаҳри — Қуддусдан қарийб 8 километр шимолда жойлашган.

40:8 Язаниё — ибронийча матнда бу номнинг бошқа варианти Ёзаниё. Унинг Язаниё деган шакли 4 Шоҳлар 25:23 дан олинган.

40:9 Бобилликлар — ибронийча матнда Халдейлар, ўша вақтда Бобилликлар шу ном билан ҳам аталарди (шу бобнинг 10-оятида ҳам бор).

41:1 Ўша йилнинг еттинчи ойи — милоддан олдинги 586 йилнинг еттинчи ойи (39:2 га ва ўша оятнинг изоҳига қаранг). Иброний календарининг Тишири ойи назарда тутилган (Тишири ойи Итаним ойи деб ҳам аталади). Ҳозирги календарга

кўра, бу ой тахминан сентябрнинг ўртасидан бошланади.

41:1 Зидқиё — 1:3 нинг иккинчи изоҳига қаранг.

41:1 Миспах — 40:6 га ва ўша оятнинг изоҳига қаранг.

41:3 Бобиллик — ибронийча матнда *Халдей*, ўша вақтда Бобилликлар шу ном билан ҳам аталарди (шу бобнинг 17-18-оятларида ҳам бор).

41:5 Шакам, Шилў ва Самария — собиқ Исройлга, яъни шимолий шоҳликка қарашли бу шаҳарлар сажда марказлари бўлган.

41:5 ...соқолини қирган, кийимларини йиртган, таналарини тилган эдилар... — соқол қириш, кийимларни йиртиш ва танани тилиш умидсизликни ва қайғули ҳолатни ифодалайди (яна 16:6 изоҳига қаранг). Бу одамлар Қуддуснинг мағлубияти туфайли аза тутиб, Чайла байрамида Худога сажда қилиш ниятида Маъбадга кетаётган бўлишса керак.

41:7-9 Ўлдирган одамларнинг жасадларини эса катта сардобага ташлади — қадимий юонча таржимадан. Ибронийча матнда *Исмоил Гадалиё туфайли ўлдирган одамларнинг жасадларини сардобага ташлади ёки Исмоил ўлдирган одамларнинг жасадларини сардобага* — Гадалиёнинг жасади устига ташлади.

41:7-9 ...бу сардобани Яхудо шоҳи Осо...қурдирган эди — Осо милоддан олдинги 911-870 йилларда, Башо милоддан олдинги 909-886 йилларда хукмронлик қилган. Шоҳ Осо бу сардобани Миспах шаҳрини мустаҳкамлаган пайтда қурдирган бўлса керак (З Шоҳлар 15:20-22 га қаранг).

41:10 Оммон юрти — Иордан дарёсининг шарқ томонида жойлашган.

41:12 Гивон — бу шаҳар Миспахдан бир неча километр узоқлиқда жойлашган эди.

42:1 Озариё — ибронийча матнда бу номнинг бошқа варианти *Ёзаниё*. Унинг Озариё деган шакли 43:2 дан олинган.

43:3 Бобилликлар — ибронийча матнда *Халдейлар*, ўша вақтда Бобилликлар шу ном билан ҳам аталарди.

43:10 Навухадназар — милоддан олдинги 605-562 йилларда Бобилда хукмронлик қилган. У милоддан олдинги 605 йилда Кархамишдаги жангда фиръавн Нехони мағлуб қилди (46:2 га қаранг). Бу оятда эса Еремиё Навухадназарнинг анча кейин — милоддан олдинги 568-567 йилларда Миср устидан қозонган зафарига ишора қиласи.

43:13 Қуёш саждагоҳи — ибронийча матндан сўзма-сўз таржимаси *Қуёш уйи*. Мисрликларнинг қуёш худоси Ра саждагоҳига ишора қилинган бўлиши мумкин. Ёки шу саждагоҳ жойлашган Гелиополь шаҳри назарда тутилгандир. Гелиополь ҳозирги Қоҳира шаҳридан қариб 11 километр шимоли-шарқда, Нил дарёси бўйида жойлашган эди.

44:1 Тахпанхас ва Нуф шаҳарлари — 2:16 нинг биринчи изоҳига қаранг.

44:1 Мисрнинг жануби — ибронийча матнда *Патрӯс*, Миср жанубий худудининг қадимги номи.

44:15 ...Мисрнинг шимолий ва жанубий ҳудудида... — ибронийча матнда ...*Мисрда, Патрӯсда...* (шу бобнинг 1-оятига қаранг).

44:17 само қироличаси — 7:18 изоҳига қаранг.

44:30 Зидқиё — 1:3 нинг иккинчи изоҳига қаранг.

44:30 Навухадназар — 21:2 изоҳига қаранг.

44:30 *Хофра* — 37:5 нинг биринчи изоҳига қаранг.

45:1 *Ёҳайиқум ҳукмронлигининг тўртинчи иили* — милоддан олдинги 605 йил (1:3 нинг биринчи изоҳига қаранг).

45:1 *ўрама қоғоз* — 30:2 изоҳига қаранг.

45:1 *Еремиё юқоридаги сўзларни...ёздиргандан сўнг...* — 36:1-4 га қаранг.

46:2 *Нехо* — милоддан олдинги 609-594 йилларда ҳукмронлик қилган.

46:2 *Ёҳайиқум ҳукмронлигининг тўртинчи иили* — милоддан олдинги 605 йил (1:3 нинг биринчи изоҳига қаранг). Фиръавн Нехонинг Кархамишдаги мағлубиятидан сўнг Ўрта ер денгизининг шарқидаги ерлар Навуходназарга тобе бўлди.

46:2 *Навуходназар* — 39:1 нинг иккинчи изоҳига қаранг.

46:9 *Ҳабашистонлик* — ибронийча матнда *Кушлик*. 13:23 изоҳига қаранг.

46:9 *Ливия* — ибронийча матнда бу юртнинг қадимги номи *Фут*.

46:9 *Лидия* — ибронийча матнда бу юртнинг қадимги номи *Луд*. Бу юрт ҳозирги Туркияning шарқида жойлашган эди.

46:11 *бокира қиз* — 4:31 изоҳига қаранг.

46:11 *Гилад* — 8:22 изоҳига қаранг.

46:14 *Нуф ва Тахпанхас шаҳарлари* — 2:16 нинг биринчи изоҳига қаранг.

46:15 *Жангчиларингиз мағлуб бўлади...Эгамизнинг Ўзи уларни уради* — ёки *Апис қочади*. Худо Аписни ургани учун, у дош бермайди. Апис муқаддас буқанинг номидир. Мемфис аҳолиси унга топиниб, у худо Птахнинг ердаги қиёфаси деб ишонишарди.

46:16 *Улар қайта-қайта қоқиладилар...* — ёки *Худо уларнинг ҳаммасини қоқилтиради....*

46:18 *Товур тоғи...Кармил тоғи* — қадимги Исроилнинг шимолидаги икки тоғ.

46:20 *шимол сўнаси* — Бобил лашкарига ишора (1:15 га ва ўша оятнинг изоҳига қаранг).

46:23 *чигиртка* — баъзан тўда-тўда бўлиб келиб, далалардаги ҳосилга катта зарар етказадиган ҳашарот.

46:24 *Шимолдаги ҳалқ* — шу бобнинг 20-ояти изоҳига қаранг.

46:25 *Нў* — Фива номи билан ҳам маълум. Фива шаҳри Миср жанубий худудининг маркази бўлиб, Миср тарихида бирмунча вақт пойтахт ҳам бўлган эди.

46:25 *Омон* — Миср худоларининг ҳукмдори ҳисобланган. Бу худо фиръавнларнинг ҳомийси ҳисобланган.

46:27 ...*Ёқуб...Исроил...* — Худонинг ҳалқи, яъни шимолий ва жанубий шоҳликларнинг жамики аҳолиси назарда тутилган (2:4 изоҳига қаранг).

47:1 *Ғазо шаҳри* — Филистия ўлкасидаги Филист ҳалқига қарашли бу шаҳар Ўрта ер денгизи бўйида жойлашган.

47:4 *Тир ва Сидон* — Финикияда муҳим аҳамиятга эга бўлган шаҳарлар.

Филистлар бу шаҳарлар билан иттифоқ тузган эдилар. Тир ва Сидон Исроилдан шимолда, Ўрта ер денгизи бўйида жойлашган эди. Бугунги қунда бу ерлар Ливан мамлакатининг жанубий қисмини ташкил қиласди.

47:4 *Хафтўр* — Крит номи билан ҳам маълум. Филист халқининг аждодлари Крит оролидан келган эдилар.

47:5 *Ашқалон* — Филистия ўлқасидаги Филист халқига қарашли бу шаҳар Ўрта ер денгизи бўйида жойлашган.

47:5 ...*Филист забардастларининг омон қолганлари* — ёки ...*Филистлар водийсида омон қолганлар*.

47:5 ...*соchlарини қирдиради...Қачонгача ғам чекиб, баданингизни тиласиз?!* — 16:6 изоҳига қаранг.

48:1 *Мўаб* — бу юрт Ўлик денгизнинг шарқида жойлашган эди.

48:1 *Наво...Хиратайим* — Мўаб ютидаги шаҳарлар.

48:1 *Унинг қалъаси* — ибронийча матнда *Мизгаб*, Мўаб ютидаги номаълум бир шаҳарга ишора бўлиши мумкин.

48:2 ...*Хашбон...Мадмон...* — Мўаб ютидаги шаҳарлар.

48:3 *Хўронайим* — Мўаб ютидаги шаҳар.

48:9 *Мўаб учун қабр тоши тайёрланг, Кўп ўтмай Мўаб йўқ бўлади* — ёки *Мўаб устига туз сочинг, чунки Мўаб тақириб ёхуд Қанийди, Мўабнинг қанотлари бўлса, Мўаб учуб кетган бўларди*.

48:13 *Байтилдаги бузоқ* — 3 Шоҳлар 12:28-33, 4 Шоҳлар 10:29 га қаранг. Хўшёя 10:5-8 оятларга ва Хўшёя 10:5 нинг изоҳларига ҳам қаранг.

48:17 *салтанат ҳассаси* — бу маҳсус ҳасса бўлиб, шоҳ ва ҳукмдорларнинг ҳокимиятини билдирувчи рамз эди.

48:18 *Дибон* — Мўаб ютидаги мустаҳкам шаҳар.

48:19 *Апор* — Мўаб ютига қарашли бу шаҳар Дибондан қариб 10 километр жануби-шарқда, Арнон сойлиги яқинида жойлашган эди.

48:21 *Яхаз* — ибронийча матнда бу номнинг бошқа варианти *Яхзо*.

48:24 *Бозрах* — Мўаб ютидаги шаҳар. 49:13 да айтиб ўтилган Эдом ютининг пойтахти Бозрахдан бошқа шаҳар.

48:26 *маст* — бу ўринда шароб Худо ғазабининг рамзи бўлиб, шаробдан mast бўлиш Худонинг ҳукмига дучор бўлишни билдиради (25:15-29 га ва Ишаё 51:17-23 га қаранг).

48:31 *Хир-Харасот* — ибронийча матнда бу номнинг бошқа варианти *Хир-Харес* (шу бобнинг 36-оятида ҳам бор). Бу шаҳар Хир номи билан ҳам аталган бўлиб, Мўаб ютининг пойтахти эди.

48:32 *Мен ҳам, Язир шаҳри сингари, сизлар учун қайғурман* — ёки *Мен, Язир шаҳридан кўра, сизлар учун кўпроқ қайғурман*.

48:32 *Язир шаҳри* — қадимий юнонча таржимадан (яна Ишаё 16:8 га қаранг). Ибронийча матнда *Язир* *денгизи*.

48:33 *узум сиқиши чуқурлари* — қадимги пайтларда одамлар узумни қоятошга ўйилган чуқурга ёки тупроқдан қазилган, тубига ва атрофига зич қилиб тош терилган чуқурга солиб, шарбатини сиқиб олиш учун оёқлари билан эзардилар. Шарбат ўша чуқурдан яна бошқа бир чуқурга оқиб тушарди.

48:35 *саждагоҳ* — ибронийча матнда *бамах*, яъни “тепалик”. 7:31 нинг иккинчи изоҳига қаранг.

48:37 ...сочини олдирган...соқолини қириб ташлаган...кўлларини тилган... — 16:6 изоҳига қаранг.

48:37 ...қанор ўраб олган — қанор дағал қорамтири мато бўлиб, эчки ёки тую жунидан тўқилган. Қанорга ўраниб олиш умидсизликни ва қайғули ҳолатни ифодалайди. Кўпинча бу ҳаракат Худодан кечирим сўраб ибодат қилиш ва Ундан мадад тилаш билан биргаликда амалга оширилган.

48:38 ...томлар устида... — у замонларда уйларнинг томи текис бўлиб, одамлар томга чиқиб дам олишарди. Мўабда эса одамлар том устида ором олмай, қайғу ва изтироб чекардилар.

48:41 *Мўаб шаҳарлари* — ёки *Харийўт шаҳри*. Бу ўриндаги ибронийча сўз унинг шаҳарлари деган маънони англатиши ёки Харийўт шаҳрининг номини билдириши мумкин (шу бобнинг 24-оятига қаранг).

48:45 шоҳ Сихўнинг шаҳри — шоҳ Сихўн ҳукмронлик қилган даврда Хашбон шаҳри Амор юртининг пойтахти эди (Қонунлар 2:24 га қаранг). Еремиё бу башоратини айтган пайтда эса Хашбон шаҳри Мўаб шоҳлигига қарашли эди.

48:45 *Аммо олов чиқади Хашбон шаҳридан...Исёнкор одамларнинг бошини ейди* — Саҳрода 21:26-29 да ҳам Мўабнинг ҳалокати шунга ўхшаш сўзлар билан тасвирланган. Яна шу бобнинг 2-оятига ва ўша оятнинг изоҳига қаранг.

48:47 ...Мен Мўаб халқини яна фаровонликка эришираман — ёки ...Мен Мўаб халқини асирикдан озод қилиб, она юртига қайтариб олиб келаман.

49:1 *Оммон* — 41:10 изоҳига қаранг.

49:1 *Мўлаҳ* — ибронийча матнда бу исмнинг бошқа варианти *Милком* (шу бобнинг 3-оятида ҳам бор). Мўлаҳ Оммон халқининг худоси эди.

49:2 *Рабба* — Оммон юртининг пойтахти эди.

49:3 *Хашбон* — Мўаб ва Оммон юртининг чегарасидаги муҳим шаҳар. Қайси юртнинг қўли баланд келса, ўша юрт Хашбонга эгалик қиласади. Еремиёнинг бу оятдаги башоратига кўра, ўша пайтда Хашбон Оммонликларнинг қўли остида бўлган. Яна 48:2 га ва ўша оятнинг изоҳига қаранг.

49:3 *Ай шаҳри* — Ёшуа 7-8-бобларда ҳикоя қилинган Айдан бошқа шаҳар. Ёшуа китобидаги Ай шаҳри Иордан дарёсининг ғарб томонида жойлашган эди. Мазкур оятдаги Ай эса Мўаб юртига қарашли шаҳар бўлиб, унинг айнан қаерда жойлашгани маълум эмас.

49:3 *Қанорга ўраниб...* — 4:8 изоҳига қаранг.

49:3 ...*Қайғудан баданингизни тилинг* — ёки ...*Девор билан ўралган шаҳарларингизнинг ичидаги саросимага тушганингиздан у ёққа, бу ёққа югуринг.* Бадани тилиш умидсизликни ва қайғули ҳолатни ифодалайди.

49:4 *қиз* — 4:31 изоҳига қаранг.

49:4 *Нечун кучинг билан мақтанасан?* Сенинг кучинг қирқилади! — ёки *Нечун ҳосилдор водийларинг билан мақтанасан?* ёхуд *Нега водийларинг билан мақтанасан?* У ерда қон дарё бўлиб оқади!

49:6 ...Мен Оммон халқини яна фаровонликка эришираман — ёки ...Мен Оммон халқини асирикдан озод қилиб, она юртига қайтариб олиб келаман (шу бобнинг 39-оятида ҳам бор).

49:7 *Эдом* — бу юрт Ўлик денгизнинг жанубида жойлашган эди.

49:7 *Темон* — Эдом юртининг шимолида жойлашган шаҳар ва унинг атрофидаги ҳудуд. Бу ўринда Темон Эдомнинг шеърий номи сифатида ишлатилган (шу бобнинг 20-оятида ҳам бор).

49:8 *Дедон* — Арабистон ярим оролининг шимоли-ғарбида жойлашган шаҳар ва унинг атрофидаги ҳудуд. Ўша даврда Дедонликларнинг катта бир гуруҳи Эдом ютида истиқомат қилган бўлса керак.

49:8 *Эсов насли* — Исроил халқи Ёқубдан, Эдом халқи эса Ёқубнинг акаси Эсовдан келиб чиққан эди.

49:12 *Жазо косаси* — Худо ғазабининг рамзи бўлган шароб косасига ишора. Мана шу шаробдан маст бўлиш Худонинг ҳукмига дучор бўлишни билдиради (25:15-29 га ва Ишаё 51:17-23 га қаранг).

49:13 *Ўз номим билан қасам ичib...* — 22:5 изоҳига қаранг.

49:13 *Бозрах шаҳри* — Эдом юртининг пойтахти.

49:17-18 *Садўм, Гамўра...* — 23:14 изоҳига қаранг.

49:21 *Қизил денгиз* — ибронийча матнда Ём-Суб, маъноси Қамиш денгизи. Бу оятдаги мана шу ном ҳозирги Ақаба қўлтиғига (яъни Қизил денгизнинг шимоли-шарқидағи қўлтиғига) ишора қиласди.

49:23 *Хомат билан Арпад аҳли* — ҳозирги Сурияning шимолида жойлашган шаҳарлар. Шимолдан келган душман лашкарлари йўл-йўлакай бу шаҳарларга ҳам хужум қилишган.

49:25 *Кувонч макони* — қадимий юононча ва сурёнийча таржималардан. Ибронийча матнда *Кувончим макони*.

49:28 *Навуҳадназар* — 39:1 нинг иккинчи изоҳига қаранг.

49:28 *Кедар ва Хазор* — Арабистон ярим оролининг шимолида жойлашган ерлар.

49:32 *Сочини олдириб юрган...* — 9:26 нинг биринчи изоҳига қаранг.

49:34 *Зидқиё* — 1:3 нинг иккинчи изоҳига қаранг.

49:34 *Элам юрти* — бу юрт Бобил ютидан жануби-шарқда, ҳозирги Эрон ҳудудида жойлашган эди.

50:1 *Бобилликлар* — ибронийча матнда *Халдейлар*, ўша вақтда Бобилликлар шу ном билан ҳам аталарди (шу бобнинг 8, 25, 35-оятларида ҳам бор).

50:2 ...*Бэл...Мардух...* — Бэл Бобилнинг бош худоси эди. Бэл Мардух исми билан ҳам танилган.

50:5 *Қуддус* — ибронийча матнда *Сион* (шу бобнинг 28-оятида ҳам бор). 3:14 изоҳига қаранг.

50:10 *Бобил* — ибронийча матнда *Халдей*, ўша вақтда Бобил юрти шу ном билан ҳам аталарди (шу бобнинг 45-оятида ҳам бор).

50:11 ...*Яйловдаги бузоқдай...* — қадимий юононча ва лотинча таржималардан. Ибронийча матнда ...*Буғдој янчайётган ҳўқиздай....*

50:17 *Исроил халқи* — шимолий ва жанубий шоҳликларнинг халқи назарда тутилган (2:4 изоҳига қаранг). Шу бобнинг 20-оятида эса бу иккала шоҳлик “Исроил” ва “Яхудо” деб алоҳида-алоҳида айтиб ўтилган.

50:17 *Оссурия шоҳи* — Тиғлатпиласарнинг ўғли Шалманасар ёки Шалманасарнинг вориси Саргон II назарда тутилган бўлиши мумкин (4 Шоҳлар

17:3-6 га ва ўша оятларнинг изоҳларига қаранг).

50:17 Навуходназар — 21:2 изоҳига қаранг.

50:19 ...Кармил...Башан...Эфрайим...Гилад... — илгарилари бу ерлар собиқ Исройлга, яъни шимолий шоҳликка қарашли эди.

50:21 Маротайим — Бобил юртидаги ерларнинг ибронийча номи. Бу ерлар Дажла ва Фурот дарёлари кесишган жойдаги Форс қўлтифи яқинида жойлашган. Ибронийчада Маротайим номи икки баробар итоатсиз деган маънони билдиради, бу оятда Бобил шу ном билан таърифланади.

50:21 Пахўд — Бобил юртининг жануби-шарқида яшаган халқнинг номи. Ибронийчада Пахўд номининг маъноси жазо бўлиб, бу оятда Бобил халқининг қисматига ишора қиласди.

50:40 Садум, Гамура... — 23:14 изоҳига қаранг.

50:42 қиз — 4:31 изоҳига қаранг.

51:1 унинг аҳолиси — ибронийча матнда *Леб-қамай*, Бобил аҳолисига нисбатан ишлатилган яна бир ном.

51:4 Бобил — ибронийча матнда *Халдей*, ўша вақтда Бобил юрти шу ном билан ҳам аталарди (шу бобнинг 54-оятида ҳам бор).

51:7 маст — бу ўринда шароб Худо ғазабининг рамзи бўлиб, шаробдан маст бўлиш Худонинг ҳукмига дучор бўлишни билдиради (25:15-29 га ва Ишаё 51:17-23 га қаранг).

51:10 Қуддус — ибронийча матнда *Сион* (шу бобнинг 35-оятида ҳам бор). 3:14 изоҳига қаранг.

51:11 Мидия шоҳлари — Мидия шоҳлигига қарашли кичкина шоҳликлар. Бу шоҳликлар Бобил юртидан шимоли-шарқда жойлашган эди (яна шу бобнинг 27-оятига ва ўша оятнинг изоҳига қаранг). Улар Форсларга қўшилиб, Бобилга ҳужум қилган эдилар.

51:13 Ҳаётинг или узилди — ўлимни билдирувчи ибора. Ишаё 38:12 га қаранг.

51:14 Чигирткадай — 46:23 изоҳига қаранг.

51:24 Бобилликлар — ибронийча матнда *Халдейлар*, ўша вақтда Бобилликлар шу ном билан ҳам аталарди (шу бобнинг 35-оятида ҳам бор).

51:27 Аракат, Миннах ва Ашканоз шоҳликлари — Бобил юртидан шимолда жойлашган бўлиб, Мидия шоҳлигига қарам эди (шу бобнинг 28-оятига қаранг).

51:32 ...Тўқайларга ўт қўйилди... — қочган одамлар баланд қамишлар орасига яширишишарди.

51:33 Қиз — 4:31 изоҳига қаранг.

51:33 ...уянчилади — донни бошоқдан ажратиш жараёни янчиш дейилади. Қадимги Яқин Шарқда бу иш дон бошоқларини таёқ билан уриш, устидан тепкилаш ёки хўптирик юргизиш орқали бажарилган (хўптирик — остига учли тош ёки темир маҳкамланган оғир тахта). Янчиш сўзи кўпинча Эски Аҳдда ҳукмга ёки урушда ҳалокатга дучор бўлишга нисбатан кўчма маънода ишлатилган.

51:34 Навуходназар — 21:2 изоҳига қаранг.

51:35 танам — ёки мен ва қариндошларим.

51:39 маст — шу бобнинг 7-ояти изоҳига қаранг.

51:41 *Бобил* — ибронийча матнда *Шашах*, Бобилга нисбатан ишлатилган яна бир ном.

51:44 *Бэл* — Бобилнинг бош худоси эди. Мардух исми билан ҳам танилган.

51:59 *Зидқиё ҳукмронлигининг тўртинчи йили* — милоддан олдинги 593 йил (1:3 нинг иккинчи изоҳига қаранг).

51:60 *ўрама қоғоз* — 30:2 изоҳига қаранг.

52:1 *Зидқиё йигирма бир ёшида шоҳ бўлди...* — милоддан олдинги 597 йил (1:3 нинг иккинчи изоҳига қаранг). Шоҳ Навуходназар Ёҳайихинни Бобилга сургун қилгандан кейин Яхудо тахтига Зидқиёни ўтқизди (37:1 ва 4 Шоҳлар 24:8-17 га қаранг).

52:1 *Еремиё* — Еремиё пайғамбардан бошқа одам.

52:4 *Зидқиё ҳукмронлигининг тўққизинчи йили ўнинчи ойи* — милоддан олдинги 589 йилнинг ўнинчи ойи. Иброний календарининг Табат ойи назарда тутилган. Ҳозирги календарга кўра, бу ой тахминан декабрнинг ўртасидан бошланади.

52:4 *Навуходназар* — 21:2 изоҳига қаранг.

52:4 *қамал иншоотлари* — 33:4 изоҳига қаранг.

52:5 *Зидқиё ҳукмронлигининг ўн биринчи йили* — милоддан олдинги 586 йил.

52:6 *Тўртинчи ой* — иброний календарининг Таммуз ойи назарда тутилган. Ҳозирги календарга кўра, бу ой тахминан июннинг ўртасидан бошланади.

52:7 *Бобилликлар* — ибронийча матнда *Халдейлар*, ўша вақтда Бобилликлар шу ном билан ҳам аталарди (шу бобнинг 17-оятида ҳам бор).

52:7 *Иордан водийси* — ибронийча матнда *Араба*. Араба умумий географик ном бўлиб, бу оятда Иордан водийсининг бир қисмига, айнан Ўлик денгизнинг шимолидаги ерларга нисбатан ишлатилган.

52:8 *Бобил* — ибронийча матнда *Халдэй*, ўша вақтда Бобил юрти шу ном билан ҳам аталарди (шу бобнинг 14-оятида ҳам бор).

52:9 *Ривло шаҳри* — бу шаҳар Оронтес дарёси бўйида, ҳозирги Сурия худудида жойлашган эди.

52:12 *Навуходназар ҳукмронлигининг ўн тўққизинчи йили бешинчи ойи* — милоддан олдинги 586 йил. Оятдаги воқеа Қуддус қулагандан кейин бир ой ўтгач юз берган эди (шу бобнинг 6-7-оятларига ва 6-оятнинг изоҳига қаранг).

52:15 *қолган-қутган ҳунармандлар* — Навуходназар бундан ўн бир йил олдин, яъни милоддан олдинги 597 йилда, кўп ҳунармандларни ўзи билан Бобилга олиб кетган эди (4 Шоҳлар 24:12-16 га қаранг).

52:17 ...бронза устунларни, араваларни, бронза ҳовузни... — 3 Шоҳлар 7:15-39 га қаранг.

52:20 ...ҳовузга, ҳовуз остидаги ўн иккита буқага ва араваларга... — қадимий юононча таржимадан (яна 3 Шоҳлар 7:25 га қаранг). Ибронийча матнда ...ҳовузга, аравалар остидаги ўн иккита буқага....

52:21 ...баландлиги 18 тирсак, тевараги 12 тирсак... — баландлиги тахминан 8,1 метрга, тевараги тахминан 5,4 метрга тўғри келади.

52:22 5 тирсак — тахминан 2,3 метрга тўғри келади.

52:22 *анор* — қадимги пайтларда ҳаёт рамзи эди.

52:28 Ҳукмронлигининг еттинчи йили — милоддан олдинги 597 йил.

52:29 ўн саккизинчи йили — милоддан олдинги 586 йил.

52:30 йигирма учинчи йили — милоддан олдинги 581 йил.

52:31 ...Бобил тахтига Эвилмардух ўтируди — у Навуходназарнинг ўғли бўлиб, милоддан олдинги 562-560 йилларда Бобилда ҳукмронлик қилган.

52:31 ўн иккинчи ой — иброний календарининг Адар ойи назарда тутилган. Ҳозирги календарга кўра, бу ой тахминан февралнинг ўртасидан бошланади.